

**LAURENTIJ
BEYERLINCK
THEOLOGI ET
CANONICI...**

Laurens Beyerlinck, Ascanio
Rivaldi





A IV c 84 f v

Handwritten text in a cursive script, likely a signature or a short note, located in the lower right quadrant of the page.

LAVRENTII BEYERLINCK

THEOLOGÏ ET CANONICI

ANTVERPIENSIS

APOPHTHEGMATA

CHRISTIANORVM.



*Partinet ad Bibliothecam S. Franc
Cranskyberid 2037 —*
ANTVERPIÆ,

EX OFFICINA PLANTINIANA,

Apud Ioannem Moretum.

M. DC. VIII.

Alcy

Destinet ad Biblio. S. Franc. Franc. Almar
C. de Seram. li. 1. m. 1. d. Anarij. Secu. de

REV^{MO} DOMINO

D. IOANNI MIRÆO

ANTVERPIENSIVM

PRÆSVLI DIGNISS.



POPHTHEGMATA CHRIS-
TIANORVM, quæ, post
alias & meliores curas, ex
variorum Scriptorum viri-
dariis tamquam flosculos quosdam ex-
cerpsi, & in ordinem distinctamque
materiarum seriem redegi, REVEREN-
DISS. atque AMPLISS. PRÆSVL,
alterius quàm AMP. T. honori dicare
& consecrare, neque si velim, possum;
neque si possum, debeo. Facit hoc in-
gens meritorum tuorum in Patrium
hoc solum cumulus: facit insignis illa
tua in me non modò benignitas, sed &
beneficentia: faciunt ceteræ generosis-
simi tui animi virtutes, quæ hac tem-
porum nocte suos radios passim dif-
fun-

fundunt, — *velut inter ignes*
Luna minores.

Dum enim fluctuantem inter errorum
procellas ECCLESIAE tuæ nauiculam,
ab alto illo culmine, non sine doloris
sensu intueris, centum oculis vigilantis-
simæ tuæ mentis FVTVRA PROSPI-
CIENS, instar prouidi Naucleri, in id
vnum desudas, vt pacificè suo ordine in
optatum portum dirigatur, cuiusque in-
defessus cursus nulla Sectariorum tem-
pestate turbetur. Hinc (vt cetera pietatis
officia tacitus præteream) in hoc Belgi-
cæ oculo, cuius tu ipse pupilla es, noua
quadam insitione SEMINARIUM iecisti
primus, in quo alantur lectissimi iuue-
nes, certo numero, disciplinâ, lege: qui,
non vt alibi primis litterarû lineamen-
tis detinentur; sed ætate scientiaque
maturiores, in sacra rerum diuinarum
adyta, domi forisque ingrediuntur. è
quibus seges eorum, qui non inter epi-
batas solùm & nauales focios, verùm ad
ECCLESIAE gubernacula & clauum
collo-

collocandi. Testes horum & arbitri illi
ipsi, quorum nunc duo de viginti sua
retia in animarum capturam explicant;
DEO feliciter incrementum dante. ita
vt cum Poëta exclamare hîc libeat,

O quàm fœcundo semina iacta solo!

Huic ergo SEMINARIO (PLANTA-
RIVM ineliore iure dixerim) me pri-
mum (vt sic loquar) rigatorem dedisti.
Stadium sub initia arduum : quod &
dies molliit, & indefessa T. PATERN.
vigilantia ; ac scopus vtrique nostrum
præfixus, DEI CVM PROXIMI UTI-
LITATE CONIUNCTVS HONOS. Ne-
que sanè hîc limitem fixit tuus in me
amor. Quin, quod vel publico præco-
nio effabor, alia illius symbola, amplio-
res tesserae. Vtpote qui me non ita pri-
dem in Canonikorū huius vrbis or-
dinem, auxilio, præsidio, & auctoritate
tuâ, sustuleris. Quorum omnium ma-
gnitudini cū parem gratiam referre
nequeam, adfero quod olim apud Al-
cinoum Vlysses, MVNVSCVLA HAEC

GRATAE MENTIS. Quæ eò etiam magis sub amplissimi tui Nominis ægide in publicum exire volui, quò mihi certius persuasum, fore sub eâ, aduersus ipsum etiam Liuorem (omitto litteriorum vulgus) tutissima: fore etiam eidem Ampliff. T. D. gratissima; cuius vel aliquo instinctu hanc velificationem direxi. Vnum superest; aliquale hoc beneuolentiæ cultusque pignus, & eum qui illud defert, adfectu vt soles, vultu quo soles, admitte. Ita magnus DEVS te ECCLESIAE suæ Antistitem prudentissimum, PATRIAE parentem optimum, NOBIS Mæcenatem additissimum vel ultra Nestoris sæculum seruet. cuius obsequio me, quid ni & mea? æternùm voueo, deuoueoque,

*Laurentius Beyerlinck
Antuerpiensis.*

Antuerp. Kal. Iun. M. DC. IIX.

AMI-

AMICO LECTORI

S. D.



HABES hic, amice LECTOR, APOPH-
THEGMATA CHRISTIANORVM,
*mente aliquamdiu à me & stilo con-
cepta, nunc verò studio & ære orna-
tissimi viri IOAN. MORETI, de Repub. Lit-
teraria optimè meriti, typorum cùm elegantiâ
tum varietate adornata. Instituti huius ratio
fuit perpetuum meum in Litterarum cultores
studium. quibus nihil aquè gratum & utile fa-
cturum me existimaui, quàm si post alias curas,
ad honestum otium datas horas voluendis re-
uoluendisque plurium scriptorum (quorum hic
series) paginis impenderem, magis illustria ac
Cedro digna Christianorum dicta notare, &
eam Maximam falsitatis insimulare, Omnem
ab Ethnicis in dicendo venustatem petendâ.
Fateor non omnia ad amussim à me obseruata:
quis enim modus aut finis? cùm quòd pleraque
non satis honesta, quæ scombros potius vel thus
metuant, quàm probis inseri mereantur: tum
etiam quòd Scriptores ipsi vix notæ probitatis.
è quorum tamen stercore, velut olim ex Ennio
Lucius Crassus, aurum & gemmas colauit; ut
quæ ab auis atavisq; sapienter aliquando dicta,*

eadem nepotes postumi sapienter etiam dice-
rent. Et ne fortassis quibusdam vilescat quid-
quid in hoc stadio à me fuerit desudatum, erunt
enim (ut secula hac sunt) aut Marculus aliquis
aut Lacon, qui fastidiant, & nimis uncis nari-
bus indulgeant; paucis huius operis tractationem
libato. Materias singulas ad singulas etiam clas-
ses & domicilia reuocaui, ne indigesta moles
LECTOREM meum terreat spernatq; absinthium
illud doctrine. In ipsis classibus primum locum
obtinent illi quos Sacra pagina celebravit: imò
quandoque ipse eiusdem auctor, & architectus
nostræ salutis CHRISTVS; à quo huius etiam
operis etymon desumimus. Huic proximum sibi
vendicant ij, qui proximè Christum secuti, suæ
virtutis & constantiæ emulam nobis memoriam
reliquere: quorum etiam palmas inæfesso præ-
conio memor veneratur Ecclesia. Post illos viri
Principes utriusq; Ordinis sedem suam sortiti:
primam quidem Ecclesiastici, alterâ Sæculares:
& id iuxta dignitatem etiam sexus. Illis non
semper ignobile vulgus succedit. Cumq; ut sci-
tè & eleganter Horatius,

Omne ferat punctum, qui miscuit utile dulci,
Lectorem delectando, pariterq; monendo:
Patrum quandoque sententiæ, Philosophorum
placita, vel etiam Poëtarum gnoma, (præsertim
si eadē illis cum ipso Apophthegmate aut digni

tas aut venustas) velut flosculi quidam insiti,
suam venerem etiam habent. Adde totius operis
suavem nexum, tractationē facilem, stylum non
tam eruditum quàm clarum: neque enim alium
omnium manibus terenda, omnium oculis hau-
rienda, materies postulabat. Frontem honestam
propono, quæ vel primo adspectu tenebit tra-
berq; videntem. Quid enim hoc CHRISTIANO-
RVM APOPTHEGMATVM nomine inter
CHRISTIANOS augustius? Non erubuit tamen
nescio quo ausu, eius splendorē fæda calumnia-
rum & conuiciorum caligine obumbrare, insul-
sus quidam & impurus stigmati dogmatis tym-
panotriba apud Zutphanienses. qui dum fron-
tem tam pio nomine fucatam præfert, bonam
etiam mentem e mentitus, conceptum Liliati sui
patris virus euomit (ut summatim dicam) in
omnes bonos: quibus neque ille, neque omnes ex
eo cæno ——— digni præstare matellam:
eosq; deiicit, quos bonæ famæ superstes aura le-
uat. Hic ut in manus meas venit, bilem leuiter
mouit: necdum tamen aut mentem, aut manum.
quid enim hæc talium contactu maculem?

—— nam nullo thure litabis,

Hæreat in stultis brevis ut semiuncia recti.
Ad te igitur redeo Lector, nouo tuo candori no-
uam hanc prolem insinuo. cuius infantie adhuc
fragili faue. ut enim lolium in meliori fruge,

*ita hîc leues macula : quibus si non minùs tu ad
ignoscendum , quàm ego ad corrigendû pronus;
efficies profectò , ut laboris peracti nec pigeat
umquam , nec pudeat: & in paria subiecta cur-
renti calcar addes, si sensero hoc, quale quale est,
tuo candori non displicuisse. Vale, & me tui
amantem mutuo amore prosequere. Antuerp.
In Seminario Episcopali. Kal. Maij, Anno Chri-
sti M. DC. IIX.*

O D E

FRANCISCI VANDEN ZYPE

I. C. CATHED. ECCL. ANT. CANON.

Ad Collegam suum

LAVRENTIVM BEYERLINCK

S. T. L. DICTÆ ECCL. CANON.

In eiusdem APOPHTHEGM. CHRISTIANA.

FORMAM supernis vultibus æmulam
Colore Zeuxis reddere viuido
Conatus, Agrigentum auaris
Perspiciens oculis, puellas

Lustra-

Lustraui omnes; quas populo tener
Secreuit oris semideas decor,
Legit; peritâ, quâ enitebat
Quæque, manu in tabulâ notauit.
Enata porrò est ipsa Laciniæ
Figura Diuæ, supra hominum decus
Mortale, Numini ferè illi
Par, animam sonitumque præter:
BEYERLINGE id ipsum prototypon tibi
Sumpſisti: ab istâ lineâ opus tuum
Ducturus, in volumen vnum
Fasciculumque operosus vnum
Cogis, quod vsquam est nil meritum premi,
Promique dignum; quod penitissimâ,
Egessit entheata virtus
Christiadum, meliore parte:
Sententiarum commoda pondera,
Salsos lepores, & lepidos sales,
Locosque solertes, & acri
Ingenio genioque natos,
Et docta dicta, argutaque lemmata,
Responsa vaturn dulcè furentium,
Oracla prudentum. Quid ergo?
Quantum opus hoc, cui pulcriorum
Rerum medullas inseris omnium!
Magnis deorum nisibus vt queat
Certare, securumque fati,
Effugere & Libitinam & umbras.

AD APOPHTHEGMATA
CHRISTIANORVM

Doctiss. V. LAVRENTII BEYERLINCK
S. Theol. Licent. & Canon. Antv.

Prosopopeia F A M Æ.

ILLA, cui celeris quadriga linguæ,
Illa, quæ cata remigat per ora
Auratis speciosa Fama pennis,
APOPHTHEGMATA SACRA dum videret,
LAVRENTI studium tuum sagacis:
O, inquit, Pietatis hausta condo!
O bellaria mentis! ô medullam!
Abscedant analec̃ta senta mensa
Gentilis, taceant mihi Catones.
Nam quid omnia scripta sunt profana
Si Patrum sacra dicta comparentur?
(Vero credite) vappa, fumus, error.
Sit quiddam reperire face gemmas,
Ditari Phariis manubiisq̃:
Quid vis putidulos adire riuos,
Cum fontes habeas salubriores?

Pangebatur Iacobus de Buschere.

CENSURA.

OPVS hoc Apophthegmatum Christianorum,
à Laur. Beyerlinck Theologo & Canonico
Antuerpien. concinnatum, elegans est & festi-
um, lectionis & eruditionis multæ, vtilitatis magnæ, di-
gnum quod imprimatur. Actum 9. Septembris,
Anno M. DC. VII.

*Egbertus Spitholdius Canonicus &
Plebanus Antuerpien.*

SVMMA PRIVILEGII.

ALBERTI ET ISABELLÆ CLARÆ EVGENIÆ
*Infantis Hispaniarum, Archiducum Austrie,
Ducum Burgundie, Brabantie, &c. Serenissimorum
Belgij Principum, Priuilegio cautum est: ne quis
Apophthegmata Christianorum Laurentij Beyer-
linck Theologi & Canonici Antuerp. præter volun-
tatem Joannis Moreti, Typographi Antuerpiensis, in-
tra duodecim annos imprimat, aut alibi impressa in
Inferioris Germaniæ ditiones importet, venaliâve ha-
beat. Qui secùs faxit, confiscatione librorum & alia
gravi pœna mulètabitur: vti latius patet in litteris,
datis Bruxellæ 1. Octobr. M. DC. VII.*

Signat.

Buschere.

AVCTO-

AVCTORES

Quorum scriptis in hoc Opere
vsi sumus.

ABDIAS.

Abrahamus Bucholcerus

Adrianus Barlandus.

Ægidius Corozetus.

Ægidij sententia aurea.

Ælius Lampridius.

Æneas Sylvius.

Albertus Cranzius.

Aloisius Lippomannus.

Ambrosius Episcopus.

Ammianus Marcellinus.

Andreas Alciatus.

Andreas Eborensis.

Andreas Schottus.

Angelus Politianus.

Annales { *Anglia.*
Flandria.
Gallia.
Germania.
Hispania, &c.

Anselmus Abbas Gemblacensis.

Antonius Bonfinius.

Antonius Monachus.

Antonius Panormitanus.

Antoninus.

Arnobius.

Auctor Serm. memorab. Gallicè.

Auctor Florum sermon. Hispania, qui vulgò Floresta inscribitur.

Augustinus Episcopus.

Aurelius Prudentius.

Baptista Egnatius.

Baptista Fulgosus.

Baptista Platina.

Bernardus Abbas.

Bernardinus à Busto.

Bernardus Corius.

Bernardus Schardeonius.

Boethius.

Breuiarium Romanum.

Brusonius Contursinus.

Casar Baronius Card.

Casarius Heistarchbachensis.

Carolus Langius.

Carolus Sigonius.

Cedrenus.

Claudius Seissellus.

Conradus Lycosthenes.

Conradus à Lichtenau, qui vulgò Abbas Vrspergensis.

Conradus Monachus.

David Cythraus.

Desiderius Erasmus.

Dionysius Nycæus.

Dorotheus Monachus.

Edinerus.

Eginardus.

Egisippus.

Ensebius.

Eutropius.

Franciscus Hottomannus.

Franciscus Parricius.

Franciscus Robertellus.

Gasp

INDEX.

Gaspar Bruschius.
Gaspar Hedio.
Gaspar Peucerus.
Gaufredus de Bello-loco.
Georgius Richterus.
Georgius Sabinus.
Gerardus à Nazareth.
Godscalcus Hollen.
Gratianus.
Gregorius Magnus.
Gregorius Turonensis.
Guido Bituricensis.
Guilielmus Alanus.
Guilielmus Baldesanus.
Guilielmus Rastellus.
Guilielmus Tyrius.
Guilielmus Zenocarus.
Henricus Erphordiensis.
Henricus Farnesius.
Hermannus Gigas.
Hermolaus Barbarus.
Herodotus.
Hieronymus Oforius.
Hieronymus Platus.
Hieronymus Stridonensis.
Hinckmarus.
Horatius Tursellinus.
Hubertus Golzius.
Hugo Ranulphus.
Iacobus Ianuensis.
Iacobus Poggius.
Iacobus de Voragine.
Iacobus Spiegelius.
Ioannes Agricola.
Ioannes Auentinus.
Ioannes Balais.
Ioannes Bodinus.
Ioannes Bonauentura.
Ioannes Brugmannus.
Ioannes Cassianus.

Ioannes Chrysostomus.
Ioannes Climachus.
Ioannes Cuspinianus.
Ioannes Damascenus.
Ioannes David.
Ioannes Duibrandus.
Ioannes Francisci.
Ioannes Frossardus.
Ioannes Gellus.
Ioannes Gerzon.
Ioannes Maffei.
Ioannes Nobanus.
Ioannes Nauclerus.
Ioannes Peregrinus Petrose-
lanus.
Ioannes Petrosius.
Ioannes Rauisus Textor.
Ioannes Sclethus.
Ioannes Sleidanus.
Ioannes Spinaus.
Ioannes Stobaus.
Ioannes Viguerius.
Ioannes VVolsangus.
Ioannes Xiphilinus.
Ioannes Zonaras.
Ioannes Zieglerus.
Iosephus historicus.
Iosephus à Costa.
Iouianus Pontanus.
Iustinianus Imp.
Iustus Goblerus.
Iustus Lipsius.
Lambertus Schafnaburgēsis.
Laurentius Surius.
Lucas Euang.
Lucius Marinaus.
Luitprandus.
Ludouicus Aurelius.
Ludouicus Granatensis.
Ludouicus Vines.

Marcus

INDEX.

- | | |
|--------------------------------|----------------------------------|
| <i>Marcus Ant. Sabellicus.</i> | <i>Philippus Camererius.</i> |
| <i>Marcus Marulus.</i> | <i>Philippus Cominaus.</i> |
| <i>Marcus Euang.</i> | <i>Philippus Diez.</i> |
| <i>Martinus Azpilcueta.</i> | <i>Possidonius Olbiopolita.</i> |
| <i>Martyrologium Rom.</i> | <i>Possiderns.</i> |
| <i>Matthæus Euang.</i> | <i>Procopius.</i> |
| <i>Matthias Castritius.</i> | <i>Raphael Volaterranus.</i> |
| <i>Maximus Monachus.</i> | <i>Rheinhardus Hadamarius.</i> |
| <i>Melchior Soiterus.</i> | <i>Robertus Gaguinus.</i> |
| <i>Michael Sidonius.</i> | <i>Ruffinus.</i> |
| <i>Natalis Beda.</i> | <i>Saxo Grammaticus.</i> |
| <i>Nicephorus Callistus.</i> | <i>Sebastianus Munsterus.</i> |
| <i>Nicetas.</i> | <i>Segeri Chronicon.</i> |
| <i>Nicolaus Reusnerus.</i> | <i>Simeon Goulartius.</i> |
| <i>Nicolaus Sanderus.</i> | <i>Simeon Metaphrastes.</i> |
| <i>Onuphrius Panuinus.</i> | <i>Socrates.</i> |
| <i>Osbertus.</i> | <i>Sozomenus.</i> |
| <i>Palladius Elosius.</i> | <i>Sulpitius Severus.</i> |
| <i>Paulinus Pontius.</i> | <i>Suidas.</i> |
| <i>Paulus Æmilius.</i> | <i>Theodoreus.</i> |
| <i>Paulus Diaconus.</i> | <i>Theodorus Zuvingerus.</i> |
| <i>Paulus Iouius.</i> | <i>Thomas Morus.</i> |
| <i>Paulus Oforius.</i> | <i>Thomas Stapltonus.</i> |
| <i>Petrus Canisius.</i> | <i>Timotheus Berck.</i> |
| <i>Petrus Crinitus.</i> | <i>Trochonus.</i> |
| <i>Petrus Damianus.</i> | <i>Victor Viicensis.</i> |
| <i>Petrus Matthæus.</i> | <i>Victorinus Strigelius.</i> |
| <i>Petrus de Natalibus.</i> | <i>Vincentius Bellouacensis.</i> |
| <i>Petrus Opmerus.</i> | <i>Vincentius Mainordus.</i> |
| <i>Petrus Ribadeneira.</i> | <i>Zacharias Lippelloe.</i> |

LAVRENTII BEYERLINCK

Antverpiensis

APOPTHEGMATA

CHRISTIANORVM.

ABSTINENTIA.

IESVS CHRISTVS.



Ut à quo Religionis nostræ, ab eodem etiam huius operis sumatur exordiū: Dominus ac SALVATOR noster ingressus domum Marthæ in Bethaniâ, ab eâdem utpote matrefamilias benignè excipitur. quæ cum satageret circa frequens ministerium (ut loquitur Scriptura) sollicita, quænam fercula tanto digna hospite apponeret, & ob id sororis etiam ministerium sibi necessarium reputaret, ait: Domine, non est tibi curæ, quòd soror mea reliquit me solam ministrare? dic ergo illi, ut me adiuuet. Et respondens dixit illi DOMINVS: *Martha, Martha, sollicita es, & turbaris erga plurima. Porro vnum est necessariū. q. d. In vanum turbata es, ut plura fercula mihi, qui hæc despicio, apponas: cum vnum condimentum dumtaxat nostræ refectiōni sit necessarium. (ita Stella in expositione loci.)* tacitè insinuans, quod habet Ecclesiast. cap. 37. In multis
A escis

escis non deerit infirmitas; & qui abstinens est, adijci-
et vitam. Lucas cap. x.

EADMUNDVS CANTVARIEN. ARCHIEPISC.

Quàm benè Dominici præcepti consilijq. me-
mor EADMUNDVS cui, licet Archiepiscopatus ho-
nore præfulgeret, nihil prius optabiliusve, quàm si-
ne arte mensa. nullo namque ciborum delectu,
crebrius solam frigidam, & frustum panis pro de-
licijs sumpsit. rogantique cur in tantum absti-
neret; *Quia*, inquit, *non mihi cura corpus pascere,*
sed sustentare. & ideò cibavit eum Dominus pane
vitæ, & intellectus, & aqua sapientiæ salutaris po-
tauit illum. Osbertus, & alij, in vita.

S. HILARION.

Dignus, qui cum priore certet, ille. Intemperan-
tiæ namq. & lasciviæ stimulis agitatus, quandoque
hunc secum sermonem miscebat: *Ego te a selle fa-*
ciam ut non calcitres: nec te hordeo alam, sed paleis:
fame te conficiam, & siti: gravi onerabo onere, ut ci-
bum potius quàm lasciviam cogites. Sciebat enim, ut
refert in Epist. Hieronymus, à patre Libero ad in-
concessam Venerem gradum esse proximum in-
temperantiæ. Hieronymus in vita.

ISIDORVS XENODOCHVS.

Hic verò cùm sæpius mensæ accumbens in la-
chrymas resolveretur, quānam de causâ id face-
ret, rogatus: *Pudet me*, respondit, *vesci cibo à ratio-*
ne alieno, cùm sim & ratione præditus, & futurus in
Paradiso deliciarum, & ambrosiæ nutrimento satian-
dus. Et eccui non vilescant cibi terreni, si cum æter-
nis illis eos conferat? Palladius in vita.

HELLEN ABBAS.

Ardebat is aliquando summo mellis desiderio:
cumque

cumque præter opinionem fauos reperisset, appetitui frenos iniiciens, dicebat: *Recede à me intemperans cupiditas.* Non ignorabat vir sanctus, quanta virtus foret placitis abstinuisse bonis. Palladius in vitis PP. cap. 59.

FRANCISCVS BORGIA.

Vide titulum de AFFLICTIONE.

IULIANVS IMP.

At ne religiosos Deoque dicatos tantum in hoc virtutis genere excelluisse quis arbitretur; paucos etiam alterius Ordinis subijciam, ne eiusdem laudis commemorationem illis videar inuidere. 6

IULIANVS Imperator, etiam post fœdatam in se auitæ Religionis imaginem, non parvam huius virtutis scintillam produxit; cum è palatio, velut ad nihil vtilis, pelleret eunuchos, tonsores, & coquos. Roganti enim causam, respondebat: *Eunuchis mihi iam non est opus. sancta vxore. Unicus tonsor pluribus sufficiet: & cum nulla palato arrideant bellaria, coquum non requiro.* Utinam illi de assentatoribus par iudicium! Socrates Eccl. hist. lib. 3. cap. 1. & Ammianus lib. 22. °

THEODOSIVS IUNIOR.

Et hic venatum egressus, non conscijs viæ studiique socijs, ad Monachum diuertit: qui licet Imperatorem agnosceret; æstu tamen cursuque fatigato, panem aceto maceratum, & oliuæ liquorem apposuit. O virtus, quid non facis vbi nobiliora semel ingenia occupasti? comedit Imperator, bibit frigidam fonte receptam: tandemq. se Theodosium confessus, *Verè, inquit, tibi affirmo Pater, nunquam me in palatio tanta cum voluptate cibum sumpsisse.* Ita ante eum Darius ab Alexandro fugatus, cum

inediæ telo compulsus aquam turbidam & cadauerum squallore inquinatam hausisset, se vnquam iucundiùs bibisse negauit: nunquam enim sitiens biberat. Cedrenus.

RVDOLPHVS IMP. AVSTRIACVS

Eiusdem virtutis splendore, vti & natalibus, præfulgebat. Quippe dum aduersus Ottocarum Bohemiæ Regem castra mouisset, ac graui commeatus (potus præsertim) inediâ laboraret; ferunt colono, qui fortè collegis messoribus siceram hauserat, ablatam hydriam, ei fuisse oblatam. quâ visâ; *Reddi-*
te, ait, *homini vasculum: ego enim non mihi, sed exercitui sitiebam.* & ita exercitum suo exemplo ad sitim fortiter tolerandam inuitauit. *Æn. Syl. lib. 3.*
Commentar. in res gestas Alphonfi.

ALPHONSVS ARAGONVM REX.

Neque hic minori commédatione dignus. Cùm enim, fuso profligatoq. Iacobi Caudolæ exercitu, sine tentorijs ac commeatu pernoctaret, eiq. Ioannes Efernitanus raphanum vnum ac panem cum dimidiato caseo misisset; recusauit, dicens: *Non decet Imperatorem ieiuno exercitu mandere.* *Panormit. lib. 3. de gestis Alphonfi.*

PYRRHINICVLVS VASCO.

Is peregrè iter faciens, cùm ad meritoriam ~~in~~ bernâ venisset, & apposita esset cœna omni ex parte olitoria, vinumq. admodū dilutum; breui refectio-
ne præuia, medicum ad se vocari, cui mercedē persoluat, mandat. Indignatus caupo, *Ecquid malum!* ait, *in viculo tam agresti medicum requiris?* Cui ille: *Tun' ô bone teipsum ignoras? quò sit merces opera tua par, medici pretium accipe, non caupo-
nis.* Sentiebat enim frugalitatem sobrietatem-
que

que optimam hominis medicinam . Adrianus Barlandus.

CANTACVZENVS MAGNVS.

Et hic, dum ob prosperum rerum euentum Genio merum largiùs funderent procures, ne modestiæ temperantiæque limites excessisse videretur; in ore, & mente: *Nunc me sobrium oportet, cum alij non ebrij esse non possint.* Non ignorabat, prosperos rerum euentus humana ingenia explorare.

Niceph. Greg. lib. 9.

FREDERICVS IMPERATOR.

Ille etiam abstinentiæ cultor eximius: intellexerat aliquando Leonoram coniugem, ex quâ nullam prolem suscitauerat, faciliè fœcunditatem consecuturam, modò vino (à quo semper abhorruerat) præsertim in Germaniâ, frigidâ regione, vteretur: *Esto*, inquit: *malim uxorem sterilem, quàm vinosam.* Æn. Syl. lib. 2. Comment. de gestis Alphonfi.

LEONORA IMPERATRIX.

Succedat Augusto sua Augusta: quæ, tantum abest vt iniquo animo sui mariti responsum acciperet, vt etiam palàm profiteretur: *Etsi domini mei* (coniugem appellans) *iussioni tam libens parco, quàm viuo; si tamen vini vsum mandauerit, mori optarem, quàm parère.* Idem.

ABVSVS RERVVM.

PHILIPPVS GALL. REX.

Abstinentiæ se comitem præbet ABVSIO. vt ita opposita iuxta se posita magis illucescant. Quid enim temperato rerum vfu præclarius? inor-

A 3 dinato

dinato verò quid perniciosius? Intuebatur aliquando Histriones & Circulatores magnam populi frequentiam ad se allicere Christianissimus Rex PHILIPPVS : & ad proceres conuersus; *Histrionibus*, ait, *& huiusmodi farine hominibus pecunias dare, nihil aliud, quam demoni sacrificare.* Videbat Rex prudētissimus, quantus esset pecuniarum, quæ in similes homines insumuntur, abusus. Vincent. in Spec. hist. lib. 29. cap. 41.

LVDOVICVS XI. FRANC. REX.

Cùm ad eum referret quidam, hominem illiteratum, at curiosum, numerosam & insignem instaurasse sibi Bibliothecam; subridens, *Verè*, inquebat, *hic gibboſo comparandus: qui cùm gibbi onus in dorſo ſerat, nunquam illud intuetur.* ſentiens abuſum eſſe, librorum copiam comparare, quibus vti neſcias. Corozetus in Dictis memor.

DOCTOR ANONYMVS.

Redarguentibus hunc, quòd docendo non modò nihil proficerent auditores, ſed & deficerent; *Non id meo*, reſpondit, *ſed ſuo vitio imputent.* Innuebat enim tacitus, quod olim ſimili reſponſo Theodorus Athenienſis: quòd doctrinam, quam ipſe dextrâ porrigeret, ſiniſtrâ exciperent. Auct. ſerm. Conuiuial.

SIGISMVNDVS IMP.

Quid autem iſte? Magnoperè apud eum laudabat quiſpiam fœneratores, quòd etiam dormientes quæſtum facerent: *At tu*, inquit, *vigilando omnibus abuteris, & conſumis.* egregiè eiſ prædiga- litatem perſtringens. Æn. Syl. lib. 4. Comment. in geſta Alph.

ACCVSATIO SVI.

ANACHORETA ANONYMVS.

Veluti proximus ad conuersionem gradus est peccati agnitio; ita etiam sui de eodem Accusatio. Quare rogatus ANACHORETA, quam potissimum ad cælum viam inuenisset, respondit: *Si se homo semper accuset.* Dorothei. doctr. 7.

S. ANTONIVS.

Et hic eiusdem mentis: sciscitanti namque cuidam, quàmnam humani operis partem maximam existimaret; *Eam*, inquit, *qua peccatum proprium in conspectu Dei ponit.* Ibidem.

IVLIANVS IMPERATOR

Cùm pro tribunali sederet aliquando, accusatus apud eum quidam peculatus, qui argumenta omnia in se contorta alacriter refutabat: dumque causidicus argumenti ac documentorum inopia percitus, diceret: Quis vllius criminis pœnas dabit, si reo inficias ire proderit? IVLIANVS, *Ecquis,* ait, *insons erit, si accusatori crimine non probato habeatur fides?* Zonaras tom. 3. Annal.

ACVTE DICTA.

CORNELIVS PONTIFEX.

Non infrequens est, vt ex dicentis loquentisque verbis, eiusdem genium ingeniumque cognoscamus. & si viua vox omnis (vt est in proverbio) suam habeat elegãtiam & energiam: quantò magis, si ad eam acuta quẽdam venustas accesserit? Eius itaque nunc exempla aliquot ex vtroque

ordine in medium adducemus; licet quilibet huius operis titulus sua etiam habeat, quæ aliàs vix futura Apophthegmata. Acie itaque hîc ducat CORNELIVS PONTIFEX, qui Nouatianum redarguens, quòd se inuitum ad Pontificatum euectum iactaret: *Sinuitus*, inquit, *Nouatiane designatus es Pontifex; probabis, cum volens secesseris.* quo dicto, eius intemperatam oris proteruiam repressit; & quàm vanè gloriaretur, declarauit. Platina in vita.

LEONTIVS EPISCOPVS ANCYRÆ.

Ille etiam rari ingenij vir, cum in grauiissima illa Antiochena de fide dissensione sententiam suam palàm proferre non auderet, caput canis albicans iteratò demulcens, dixisse fertur: *Niuem hanc solutam multum luti subsequeturum est.* Ænigmate hoc obscuriùs indicans, dissonantiam eam se mortuo in seditionem euasuram. Histor. Eccles. Euseb.

SISINNIVS EPISC. NOVAT.

Nec minùs in respondendo acutus iste. Abstulerat Nouatianis Ecclesiam Leontius Ancyrae Episcopus: accedit SISINNIVS, eam reddat, postulans. Cui alter: *Quid?* inquit, vos Nouatiani pœnitentiam tollitis, & Dei benignitatem ab hominibus clauditis? respondit SISINNIVS: *Neminem adeò pœnitet, quàm me.* cui rursus Leontius; *Quomodo te pœnitet?* *Quòd te videam*, inquit SISINNIVS. Socrates lib. 6. Histor. Eccles. cap. 20.

IDEM.

Dicenti sibi D. Ioanni Chrysostomo, vnam ciuitatem duos Episcopos habere non posse: *Nec habet*, ait SISINNIVS. quod cum egrè ferret Ioannes, & inferret; Ergo tu solus vis esse Episcopus? respondit: *Neque hoc dico: sed quòd apud te solum,*

non

non sum Episcopus ; qui tamen alijs sum Episcopus.
Ibidem.

PAVLVS II. PONT. MAX.

Hic cū Præfecturam Rhodiensem, à Gallo exhaustam, Hispano commisisset gubernandam; plures eius mutationis causam sciscitati. quibus ille: *Gallicus morbus, Hispano medico erat curandus.* quòd nempe Galli profusiores, Hispani frugaliiores essent. Platina in vita.

LEO X. PONT. MAX.

Et in hunc præclaras ingenij dotes natura effuderat, ita vt nescias, an in sacro illo ordine reperias superiorem. Venit quandoque ad eum quispiam artis chemicæ peritus, offerens libellum, quem de auro conficiendo è quauis pænè materiâ ingeniosè, non tamen efficaciter, conscripserat. miratur ingenium hominis Pontifex, magnaq. expectantem, vacuâ crumenâ donat: & *Auro te donarem*, inquit, *verùm cū illud conficiendi certam scientiam promittas, id vnum tibi suffecerit (si eam ad effectum deducas) vt habeas in quo tuum aurum reponas.* Corozetus, & alij.

CONSTANTINVS IMPERATOR.

Neque hac dicendi vrbauitate & venere caruisse ciuilem ordinem, ex subiectis liquidò constabit. Cū Acesilauum Nouitianorū Antistitem in Concilio multa effutientem audiret CONSTANTINVS; & inter alia, spem remissionis à sacerdotibus nulloatenus expectandam, sed à Deo: *O Acesi*, exclamat, *pone scalam, & si potes, solus ascende in calum.* eiusdemque improbitatem & pertinaciam hoc dictò compescuit. Hystor. Tripart. lib. 11. cap. XIII.

LUDOVICVS XII. FRANC. REX.

Ille instanti virgentiq. coniugi, Claudiam filiam Carolo Maxemiliani Cæsaris nepoti desponderet; *Visne, ait, clitellas asini equorum ephippijs præferri? & assumpta parabola, subdidit: Principio cervas cum cervis amplioribus cornibus natura insigniuit: at cum cervæ se maribus cervis præferrent, indignatus Deus, excornes prodirent, imposternum imperavit. P. Emil. in vita.*

COMES NASSOVIÆ.

Erat & hic, ut bellicâ virtute, ita & sagaci ingenio clarus. quippe castrorum Cæsarianorum ductor, cum præter Cæsaris opinionem diutiùs in Peronæ Franciæ opidi obsidione moraretur; ab Hungariæ regina Caroli filia reprehensus, quòd in expugnatione columbarij (ita Peronam nuncupabat) tantam moram neceret; *Fateor, dicebat, Peronam columbarium: verùm alit robustas & alacres columbas, quæ se agrè capi permittunt.* Theat. vit. hum.

MENDICVS ANONYMVS.

Elisabetha Angliæ Regina, cum fortè ad templum deformatæ religionis dogmata auditura procederet: mendicum ad templi fores incubantem, stipemque exigentem conspicata, ut erat ingenio facili, *Eia, inquit, quàm verum illud adagium, Pauper ubique iacet.* quo audito ille, nihil cunctatus (erat enim ex eo genere, quos cum laboris pertædet, mendicitatis studium etiam literatos quandoque delectat) respondet,

In thalamis Regina tuis hac nocte iacerem,

Si foret hoc verum, Pauper ubique iacet.

Incerti auctoris.

BOYAR-

BAYARDVS, CAPITANEVS F. R.

Iste etiam, dissidentibus inter se Carolo V. Imperatore, & Francisco Galliarum Rege, cum ei opidi Metisci custodia obligisset, & Franciscus à Stritigen aduersæ partis ductor opidum sibi tradi per internuntios rogasset, responsum hoc referri iussit: *Equi Francici* (quos Bayard appellant) *non timent Roussinos* (equorum genus) *Alemannicos*. ita simul animi fortitudinem, promptitudinemq; expressit. Corozetus.

COSMVS MEDICES.

Nolim hîc COSMVM præterire, qui à Strossianis in exilium ad Benacum pulsus, dum ad eum venisset qui rogaret quidnam ageret, respondit: *Gallia incubanti frequens adsum, ut eius postmodum fructu potiar*. Insinuabat autem, se assidue de reditu cogitare, quem postmodum est consecutus. Egnat. lib. 7. cap. 2.

Require ARGVTE DICTA ET RESPONSA.

ACTIO, EIVSQUE NECESSITAS.

IESVS CHRISTVS.

CVM iustitiam solus ille verè dicatur nosse, qui eam facit, iuxta Augustin. super Psalm. adeoque, ut in Officijs sentit eloquentiæ parens, omnis virtus in actione consistat: quàm præclare de hoc laudis ac virtutis genere locuti sint Christianorum plerique, nunc persequi propositum est. Et ut à CHRISTO ipso exordiamur; cum ad eum, in vinculis ab Herode detentus Ioannes, duos ex discipulis ablegaret (idque ut eam doctrinam quã pridem

pridem de Christo imbibebant, altè retinerent) qui dicerent: Tu es, qui venturus es, an alium expectamus? inquirebant autem de vero Messia: ipse eorum ignorantiam prudenter dissimulans, ac Ioannem docere se fingens, *Euntes, inquit, renuntiate Ioanni, quæ audistis, & vidistis.* tunc tandem sufficiens cognitionis cuiuspiam argumentum esse insinuans, si actio doctrinæ confirmetur. Matth. cap. 9.

I D E M.

Legisperitum se tentantem, ac curiosius inquirentem, Quid faciendo vitam æternam possidebo? quid, & quomodo legeret, interrogabat. quo dilectionis mandatum recitante, subiungebat: *Rectè respondisti, hoc fac, & vines.* q. d. Non diligas verbo & lingua: sed opere & veritate. Luc. cap. 10.

I D E M.

Interrogantibus Iudæis, Si tu es Christus, dic nobis palàm; respondit: *Loquor vobis, & non creditis. Opera quæ ego facio in nomine Patris mei, hæc testimonium perhibent de me.* Verum de se, ac quovis alio, iudicium ex actionibus desumi vult, veluti de arbore iudicatur ex fructibus. Ioannes cap. 10.

PAMBO ABBAS.

Neque in hoc ab Antesignani sui vestigijs aberrarunt viri sancti; quorum nonnulla præclara dicta facta que subnectam. Prodit se inter eos primus PAMBO ABBAS: qui cùm religionis & pietatis gloria præfulgeret, literarum tamen expers, pio feruentique affectu petijt à quodam doceri Psalmos. verum doctore illo suæ doctrinæ initium sumente à Psalmo 38. eiusque primum versiculum (Dixi,

(Dixi, Custodiam vias meas, vt non delinquam in linguâ meâ) memoria ediscendum proponente; ceteros audire renuit, dicens: *Si hūc opere compleuero, reliquis vix mihi opus.* Cumque post menses aliquot rogaretur, cur à cæpto opere animum auerteret: *Quia*, ait, *priorem illum versiculum necdum opere compleni.* ac demum percontanti post multum temporis, an tandem eum didicisset; respondit: *Quadraginta & nouem anni sunt, & vix eum opere implere valui.* Socrat. Tripart. hist. lib. 8. cap. 1.

S. ÆGIDIVS.

Et hic Pambone hoc in genere non inferior. Increpabat enim iudicem, quòd cū se Deo credere assereret, bona nihilominus temporalia æternis anteponeret; eoque interrogante, An ergo tantum opere exequitur homo quantum credit? respondebat: *Sancti & iusti, bona qua studuerunt ac potuerunt facere, opere conati sunt adimplere. Si autem opere non potuerunt, pio saltem desiderio operis defectum supplenerunt.* Ex sent. aureis eiusdem.

IDEM.

Roganti se, utrū præstaret verbum Dei populo annuntiare, an opere exequi; subridens, *Dic mihi*, ait, *utrū è duobus tu plura meritum arbitraris; eum, qui ad S. Iacobum v. g. peregrinationis causa properat; an illum, qui eò perueniendi viam demonstrat?* innuens factores legis apud Deum iustificandos. Ibidem.

IOAN. ABBAS.

Venerant ad eum moribundum fratres, breue aliquod vitæ documentum petituri. quibus ille ingemiscens; *Nunquam*, ait, *propria voluntate fecius quicquam feci: nec alium docui, quod prius ipse non fecerim*

14 LAURENTII BEYERLINCK
cerim. In vitis PP. cap. de eorum profectu.

FRANCISCVS BORGIA SOC. IESV.

Neque hunc calamo prætereundum duxi, qui Eboræagens, dum sexta feria aggregatis Socijs, ut more antiquorum patrum collationibus sacris vacarent; rogaretur sententiam; hoc tantum, *Opera, inquit, verbis præstant.* In vita eiusdem lib. 4. cap. 1.

ADMONITIO.

S. IOANNES BAPTISTA.

VEniamus nunc ad salutis æternæ, magnarumque rerum non exiguum incitamentum, ADMONITIONEM seriam: cuius admirabilē virtutem, ut Saluatorem nostrum, cuius tota vita continua ad benè beateque viuendum adhortatio exstitit, omitteremus, eiusdem Præcursor suā prædicatione ostendit. Cū enim mandatorum Dei transgressores ab electorum cōsortio separandos proponeret, & circumstās turba de salutis obtinendæ medio inquireret, dicens; *Quid ergo faciemus?* respondit: *Qui habet duas tunicas, det non habenti: & qui habet escas, similiter faciat.* Venientibusque Publicanis ut baptizarentur, ac idem interrogantibus; *Nihil, ait, amplius, quàm vobis constitutum est, faciatis.* q. d. Ne amplius extorqueatis in vestrum vsum, ultra id quod præscriptum est à Principe. Et militibus idipsum percontantibus; *Neminem, inquit, concutatis: videlicet opprimendo, aut corporaliter affligendo: neque calumniam faciatis: extorquendo ab innocentibus vobis indebita. Contenti estote stipendijs vestris.* quæ nempe vobis acceptantibus

bus, sunt pro militiæ laboribus constituta. Luc. cap. 3.

S. EPHRAËM.

De hoc quoque memorię prodidit Surius: quòd, cum inuerecundè meretrix eius concubitū postularet, sollicitus qua ratione eam ad meliorem reduceret mentem, conditionem propositam ratam habuerit, dicens, Si vis nos ambos simul dormire, vbi tibi dixero; placet. arripit illa sermonem, & locum inquit. quo respondente; In medio ciuitatis: Quid, inquit illa, nōne aperto rubore suffundemur, id palàm cōmittere ante conspectum omnium? Cui vir pius, quasi conuersionis eiusdem ansam accipiens; Si ergo, ait, *hominum oculos sufficere putasti, ad pudore conficiendam animam, & à malâ actione abducendam: Dei oculos qui omnia intuentur, non multò magis reuerēbimur, & extimescimus?* Ita quæ voluit capere impatibilem & caltam animam, diuino spiritu capta est, & tam seria adhortatione ab errore conuersa. Sur. tom. 1. in vita.

ABBAS' OLYMPIVS.

Supra modum hac Exhortationum laude clauerunt plurimi Anachoretarum & Monachorum: quos Bibliothecæ SS. PP. alijsque operibus insertos reperimus: nos vno aut altero contenti erimus. OLYMPIVS ABBAS aliquod dogma à se requirenti, respondebat: *Vbicunque sederis, dic assiduè, Peregrinus sum.* Breuis sententiæ profundum mysterium. Ecquis enim se peregrinum hīc reputans, non omnia faciliè vtpote aliquando relinquenda, contempserit; & ad veram illam supernorum ciuium mansionem suspirauerit? Prat. Spirit. cap. 12.

ABBAS

ABBAS ELIAS.

Et ille, ut insignius aliquod elogium proferret, interpellatus; *Diebus*, ait, *patrum nostrorum tres istae virtutes in amore & studio apud Monachos erant: Nuditas rerum omnium, Mansuetudo, & Continentia. quorum in locum successere Avaritia, Gula, & Audacia. quod horum tibi placeat, arripe. Quàm verè omni in statu & ordine illud obtinet?*

*Aetas parentum peior avis, tulit
Nos nequiores: mox datura
Progeniem vitiosiore.*

Ibid. cap. 32.

THEOTECNVS EPISC. CAESAREAE PALÆST.

Circa tempora Galieni Imperatoris, Marinus vir genere & virtute illustris, pro tribunali vocatus quod Christianus esset, cum trium horarum spatium ad deliberandum à Iudice accepisset; egressum THEOTECNVS eius loci Antistes ad colloquium inuitat, & prehensa manu in Ecclesiam ducit: què cum interiùs ad ipsum Sanctuarium collocasset, læua paullulum in alteram partem dimota, gladium quo erat accinctus ostendit; & ex aduerso Euangeliorum codicem proponit: præcipitque, ut ex duobus, quod magis esset ex animi sententia, seligeret. ubi verò manu protensa absque cunctatione Euangelium accepit; ita eum affatus Præsul: *Tene, & adharesce Deo. Sic enim ab eo roboratus, quod inoptatis est, certò assequere. Abi in pace.* In tantum hæc verba apud eum valuerunt, ut per præconem ad tribunal reuocatus, maiorem fidei ardorem studiumq. declarans, actutum inde ut erat ad supplicij locum ductus, martyrium constanter subierit.

Euseb. histor. Ecclesiast. lib. vii. cap. xiiii.

S. LVDO-

S. LVDOVICVS EPISC. TOLOSANVS

Coniunctissimo sibi collegę iniunxerat, vt si quę præter decorũ obseruaret, sine dissimulatione corripere ac moneret: qui dũ crebriũs id faceret, & liberiũs fortassis quàm par erat, ab alijs ipse correptus & admonitus. quibus LVDOVICVS; *Amici,* inquit, *monendi sunt & obiurgandi: vera enim amicitia quod sentit, dissimulare nescit.* Ex membrana manuscripta in Biblioth. FF. Minorum Louanij.

ANTONIVS SYLVERIA LV SIT.

Dandum nunc aliquid ciuilis ordinis exemplis, vt prioribus inspersa, varietate ipsa delectet. Densis arcis Præfectus ANTONIVS SYLVERIA Lusitanus, conspiciatus Turcarum classem ad præfatam arcem expugnandam aduentare, ad commilitones conuersus, in hæc verba prorupit: *En viri, tempus nunc, acceptam à maioribus gloriam bellicam, debitamque tum Deo tum Regi fidem, nobis ob oculos ponendi.* Profuit præsens Ducis animus, & de hostibus vix speratam victoriam reportauit. I.P. Masfæus hist. Ind. lib. xi.

VXOR IVLIANI PRÆFECTI.

In hoc quoque virtutis genere muliebris sexus suâ laude non est fraudandus. Direpturus Iuliani Apostatæ imperio sacrata Deo vasa è Christianorum tēplis eiusdem Præfectus IVLIANVS, aduersus sacram aram (horret animus meminisse) in conspectu omnium, vesicam exonerat. non sustinet tantum nefas Ezoius, vir pietate & religione summus: & prohibere conantem alter in faciem cædit; dicens, Quid? non vides res Christianorum omni Dei cura & prouidentia destitui? At vltori Deo meritas pro scelere pœnas dedit. In morbum enim

B

prola-

prolapsus, visceribus putredine exesis, ipsas naturæ sordes contra naturam, etiam per sacrilegum os, blasphemix instrumentum, egressus: ad quem tunc Christianâ fide nobilis vxor; *Debes, ait, meritò mirarite Christum Saluatorē laude predicare, quòd tibi hac castigatione suam potentiā declarauit. Ne enim te lateret quem oppugnaveris, solita sua lenitate usus, has plagas tibi influxit.* Miser itaque cū coniugis oratione, tum cruciatu intolerabili, morbi causam agnoscens, frustrâ Imperatorem, ut ablata restituat, orauit: & ipse extemplò hac vitâ migravit. Theodor. hist. Eccl. lib. 3. cap. 12.

PLACILLA THEODOSII IMP. VXOR.

Hæc etiam de salute mariti sollicita, cū eum prosperis rebus elatum supra modum, ideoque ab auitæ pietatis studio alienum animaduerneret, adhortari subinde non destitit, & hoc eum sermone compellare: *Considerare te oportet coniux, quis antea fueris, & in quem locum te euexerit vniuersitatis conditor: & sic eum, qui tibi ut fideli ministro Imperium commisit, ritè decenterque coles.* Niceph. Callist. lib. 12. hist. cap. 42.

E A D E M

Coniugis sui superbiam arrogantiamque ita aliquando prudenter moderabatur: *Cogita, inquit, quiebat, priuatum te hominem fuisse; atque nunc præ cæteris ad Romana Reipub. gubernacula adscitum, non ut superbires, sed te hominem cogitares; varijs perinde ac subditi fragilitatibus obnoxium.* Lycosth.

ADVER-

ADVERSITAS . RES ADVERSÆ.

S. LUDOVICVS EPISC. TOLOS.

Quam firmā ornatamq. in arduis rebus mentē Romani illi Athletæ seruauerint ; testantur eorumdem monumenta postumę ætati relicta. Verūm ne & nos hac laude caruisse quispiam arbitretur ; paucos sub breuitate transcurramus , qui eadem claruerunt . Cogitanti autem se prodit LUDOVICVS Tolosana Ecclesiæ Antistes . Hic vix annos pubertatis egressus , Cathaloniam obses à patre mittitur : vbi septennium carceri inclusus , cūm rogaretur , quā tam æquam tot rebus aduersis mentem seruaret ; respondit : *Aduersa Dei amicis plus conducunt , quā prospera . Tunc enim Deo subditi sumus , quando aduersis urgemur .* In eandem sententiam Sil. Ital. lib. 7. bell. Pun.

Tanta, inquit, adeo, cū res trepidæ, reuerētia Diuinū nascitur.

ex membrana manuscripta in Bibl. FF. Minorum Louanij.

S. MARTINVS TVR. EPISC.

Vide DEI BENIGNITAS , CVRA , &c.

FRANCISCVS BORGIA, SOC. IESV

Temperato tranquilloq. animo vir, cūm aduersa incidissent , immotus permanebat : eiusque in ferendo constantiam admirantibus, dicebat : *Res humanas , vt que nihil ad nos attinent , in minimis pono. &, An abbreviata est manus Domini , vt saluare nequeat ? quid timeamus ? Si Deus pro nobis , quis contra nos ?* In vita eiusdem lib. 4. cap. 6.

ALPHONSVS ARAGONVM REX.

Vt & his alterius ordinis exempla subiungamus, monet genere, & virtutum omnium gloria illustris ALPHONSVS ARAGONIVS. qui cùm partes Ioannæ Neapolis reginæ, vi & auxiliaribus copijs tuendas suscepisset, dehortantibus propinquis, ne se temerè periculo exponeret: *Non abhorreo, inquit, pericula, sine quibus nemo vnquam gloriam consecutus est.* Præclara magnanimi Regis vox, quam sera posteritas haud immeritò stupeat. Panormit. lib. 1. cap. 2. de Rebus gestis eiusdem.

WENCESLAUS BOHEMIÆ REX.

Et is cum toto exercitu fusus fugatusque, dum in manus hostium incidisset, & captius detineretur; rogatus, quoniam animo esset, *Nunquam, respondit, meliori.* Dum enim omnibus humanis præsidijs vallatus essem, vix de Deo cogitandi dabatur spatium: nunc omnibus illis exutus, solum Deum cogito, qui me, sat scio, inuocantem exaudiet. Capnionis hoc dictum erat: *Quando duplicabantur lateres, tunc venit Moyses.* quo Dei auxilium præstò semper esse declararet, cùm aduersæ res potissimum ingruunt. Æn. Syl. in hist. Bohemicâ.

CATHARINA ARAGONIA.

Ecquis illam hoc loco tacitè prætereundam iudicabit, quæ virili mentis animique constantia, toties Fortune inconstantiam, humanosque casus superauit? Repudiarat eam Henricus viii. Angl. Rex, vt Bolenâ (quæ velut altera Helena, tanti excidij, quale postmodum subsequutum, fax & scintilla) potiretur. illa nihil indignata, diuinę se clientelæ submittebat: rogata verò vtrumuis rerum statum eligeret: prosperumne, an aduersum? *Hunc præ illo se malle.*

*malle, respondit. quia, inquit, infelicibus raro de-
est consolatio: fortunatis verò plerumque mens ipsa &
ratio.* N. Sanderus lib. 1. de schism. Anglic.

Vide Apophth. de AFFLICTIONE infra.

ADVLATIO. ADVLATOR.

IESVS CHRISTVS.

Magna iam cura studioq. referendum, quan-
topere ADVLATIONIS seductionisque, quæ
fallaci laude fit, stimuli, ab illustrium virorum pe-
ctoribus non sine ratione consilioq. summoti sint.
Ut autem à veritatis Magistro ordiamur: reprehensi
Pharisæi, abeuntes consilium inierunt, ut eum in
sermone (secundum Script. phrasim) caperent; mit-
tuntq. discipulos suos cum vectigalium collecto-
ribus (quos Herodianos, quasi Herodi subiectos
nominat Matthæus) qui eum hoc verborum leno-
cinio demulcerent: Magister, scimus quia verax es,
& viam Dei in veritate doces, & non est tibi cura
de aliquo: nō enim respicis personam hominū, &c.
ad quæ Dominus, cui nihil occultum, cognita eo-
rum nequitia, ait: *Quid me tentatis hypocrita?* q. d.
Cur vestra hypocrisis sollicitatis me, ut vobis placentia
loquar? vero accommodatoque nomine Adula-
tionem, hypocrisim appellat: cum per illam ea fa-
cere delectet, ut loquitur Augustin. super Psalm. 9.
in quibus non solum non metuitur reprehensor,
sed etiam laudatur operator. Matth. cap. 22.
Mar. cap. 12. Luc. cap. 20.

HERODES AGRIPPA.

Cum huius particulatim meminerint Sacre lite-
ræ, ut posteris daretur exemplum, quanta sit Adu-

lationis pernicies, cum hoc loco prætermittendum non esse, quamvis fortassis à proposito nobis ordine alienum, iudicavi. Casareæ itaque dum ludis pro Augusto celebrandis vacaret, in theatrum processit, amictus veste regia, quæ sua maiestate spectantibus horrorem venerationi mixtum incuteret. Assentatores eiusdem magno clamore Deum consalutabant; rogantes, ut faueret propitius. Quam impiam adulationem cum nec castigaret nec repelleret, diuinam ultionem ocyùs sensit. grauissimis quippe cruciatibus impetitus, oculos quasi iam in morte grauatos ad amicos conuertens; *En ego, inquit, vestra appellatione Deus, vitam relinquere inbeor; fatali necessitate vestrum arguente mendacium. Et quem immortalem salutastis, ad mortem rapior.* Act. cap. 12. & Ioseph. lib. 19. Antiq. cap. 7.

S. GREGORIUS.

In tanto apud istum pretio fuere Adulatores, ut, cum suum de illis iudicium proferret, dixerit: *Adulator scorpio est, qui palpando incedit, sed canda ferit.* Collig. ex lib. 1. in Ezech. cap. 9.

IOAN. DANTISCUS EPISC. VARMIENSIS.

Huius quoque de Parasitis & aulicis Gnatonibus iudicium libet attexere. Ille enim, Actæonis canibus eos comparare solitus, dicebat: *Idem accidit Principibus à Parasitis, quod Actæoni à canibus; ut nempe deuorentur ab iis quos alunt.* Refert Philip. Camer. in operibus successiuis. Georg. Sabinus, & alij.

SIGISMUNDVS IMPERATOR.

Ille cum se Adulatores veluti pestes odisse assereret; Brunenius Neronensis sermonem interrumpens,

pens, Tamen, dixit, nullum genus hominum isto magis amas. Cui Imp. Vincis sanè, ait. Ita enim natura comparatum; ut, cum vitandos Assentatores dicimus, tum maxime illis adhareamus: nam neque tu tanto tempore mecum fuisses, nisi meis moribus ad blandiri assueuisses. Æn. Syl. de dictis Sigismundi & Friderici Imp. pp.

• I D E M

Vni è Proceribus se supra modum laudanti, & dijs similem asserenti, alapam inflixit: hoc dicto, *Cur me mordes adulator?* Sciebat egregius Imperator, verum esse quod habet Hugo de S. Victore, Adulatorem amicum in obsequio, hostem in animo, comptum in verbo, turpem in facto, lætum ad prospera, fragilem ad aduersa, inflatum ad obsequia, anxium ad opprobria, immoderatum ad gaudia, facilem ad humana, difficilem verò esse ad honesta. Æn. Syl. lib. i. Comm. de reb. gest. Alphon.

LADISLAUS POLON. REX.

Clarum Sigismundi exemplum; nec minùstamen illustre LADISLAI, qui etiam Assentatores colaphis excipere solitus. causam verò rogatus; *Percutientes*, dicebat, *me, re percussio*. nolebat & ille cum Propheta oleo peccatoris caput suum impinguari. Oleum enim peccatoris, ut exponit Cassiodorus, est dilectio simulata verborum, quæ vocum blandimentis, nostras mentes velut olei pinguedo ingrediens, rigorem veritatis emollit. Collig. ex Prom. mor. Th. Staplut. Sermon. ii. Aduentus.

ALPHONSUS ARAGONVM REX.

Nulla virtus aut laus, in qua sibi locum nō vendicet ALPHONSUS: ita ut in eum vnum omnium virtutum laudumque congeries effusa videatur.

Adulatores etiam plus quàm hostili loco habuit; & de illis verba faciens, *Sunt, aiebat, Adulatores per-similes lupis. nec malè. nam veluti lupi titillando & scalpendo asinos vorare soliti: sic & illi ad Principum perniciem, blanditijs simul ac mendacijs in-tendunt.* Ant. Panorm. & Æn. Syl. ille lib. 3. de Gestis, hic de Dictis eiusdem.

CAROLVS V. IMP.

Nec minùs prudenter prudens ille Imperator hanc assentandi pestem fugiebat. Cùm enim Lute-tiæ Parisiorum constitutus, graui oratione eiusdem laudes in publicum adduceretur; paucis oratori re-spondit: *Grata mihi est affinis Regis erga me beneuo-lentia; sed laudes illæ mihi attributæ, commune factio-nis dumtaxat sunt, qualis esse deberem.* In vita eiusdem Cythr. & alij.

PHILIPPVS II. CAROLI FILIVS

Parentis sui vestigijs inhærens, conceptam à te-neris agendarum rerum prudentiam rariùs dicto manifestabat: neque, si id præstiterit, literis confi-gnatam, aut æmulæ posteritati transmissam existi-mauerim. Interrogatus, verò aliquando (prout nar-rantis ore excepi) quo apud eum loco essent Adu-latores; *Peiori*, inquebat, *quàm corui.* & subdens illud Aristippi, ut est apud Bruson. *Malim, aiebat, in cornos incidere, quàm in assentatores aut parasitos.* Videbat Rex sapientissimus illos corpus tantùm, at hos animos etiam mentesque corrodere: & verum esse illud Nasonis lib. 2. Trist.

Impia sub dulci melle venena latent.

MAVRICIVS SAXONIÆ DVX.

Hic verò Assentatorem conspicatus, dixisse cō-memoratur: *Stercus domini sui comedit, ut canis.* No-tabat

tabat autem, vt habet Seneca, Assentatores non tantum esse dominorum suorum arisores, sed & arro-
 fores. Phil. Camer. in locis Manl.

FREDERICVS SAXONIÆ DVX.

Ille vt regni solique, ita & animi mentisque he-
 res; ab illo hominum genere cauendum ratus, di-
 cebat: *Maximè metuedi sunt ij, qui pedibus proximi
 sunt, ne calces concutcent.* tacitè insinuans, adulanti-
 bus proprium, Regum Principumve auribus pro-
 pius assistere. Ibidem.

A D V L T E R I V M.

I E S V S C H R I S T V S.

O Ccultum olim, & abominabile apud veteres
 illos Sophos, quod hodie (proh dolor!) Ma-
 gnatum ferè ludus est, A D V L T E R I V M nunc pertra-
 ctandum. vtpote quod tantum humano generi
 pudicitiaëque incommodum adferat; quantum fa-
 lutis, coniugalis fides præstat. Habet igitur & hoc,
 qui velut præsentem perniciem animæ detesten-
 tur; habet qui amplectantur. Prioris generis ductor
 sit vera pudicæ castitatis norma ac regula Coæternus
 DEI FILIVS: qui Pharisæis eius discipulos redar-
 guentibus, quòd illotis manibus manducassent pa-
 nem, ait post multa: *Non intelligitis, quòd omne quod
 in os intrat, in ventrem vadit, & in secessum emitti-
 tur? Quæ autem procedunt de ore, de corde exeunt, &
 ea coinquinant hominem. de corde exeunt cogitationes
 male, homicidia, adulteria, &c. hæc sunt quæ coinqui-
 nant hominem.* Matth. cap. 15.

S. MARIA MATER CHRISTI.

Quis te Virgo castissima meritis laudibus dignè
B s
celebret?

celebret? quæ velut lilium inter spinas, cùm de filij conceptione Archangeli nuntium accepisses, non tam de nuntio incredula, quàm de modo sollicita; *Quomodo, inquis, fiet istud, quoniam virum non cognosco?* quasi diceret intrate: Ego meæ virginittatis iacturam facere nolim, & votum de ea in perpetuū seruandā violare. Maluisti certè etiam desponsata, cordis corporisque integritate splendere; quàm dignitatem aliquam quantumvis excellentem cum eius violatione subire. Luc. cap. 1.

BALDVINVS FLANDRIÆ COMES.

Tranſeamus nunc ad alios, qui hanc adulterij luem execrati. Inter quos facile principem obtinet locum BALDVINVS Flandriæ noſtræ Comes, qui & Imperator Byzantinus: hunc enim in tantum ab hoc crimine fuiſſe alienum conſtat; vt publicè per præconem his in hebdomada edici curauerit: *Nemo quis in palatio meo pernoctato, qui alienam coniugem contigerit.* Nicetas.

OTHOCARVS BOHEMIÆ REX.

Minori cum laude, & infra regiam dignitatem hic. de coniugis enim impudicitia monitus; *Lex, aiebat, natura eſt, Cornua qui faciunt, ne cornua ferro recuſent.* verum leuitatis incontinentiæq. indicium. inſinuat quippe cōiugi non eſſe illicitū fidem violare coniugalem, cùm & ipſe idem faciat, alijs feminis abutendo. Cornua quippe facere, communi phraſi idem eſt quod fallere. Æn. Syl. lib. 3. Comm. de geſtis Alphon.

FRANCISCVS BRIANVS EQVVS ANGLVS.

En alterum eiſdem, ſi non maioris, leuitatis impudicitiaque exemplum. Erat enim hic inter perditiffimos Henrici illius Octavi hæreſiarchæ Anglorum

glorum assentatores: à quo cùm Rex, alter sui sæculi Heliogabalus & Sardanapalus, postquam Annam Bolenam eiusq. sororem Mariam ac matrem in adulterinum thalamum traduxisset, quæreret; Quale peccatum tibi videtur, matrem primùm, deinde filiam carnaliter cognoscere? nefarium hoc responsum reddidit: *Omnino ô Rex, quale gallinam primùm, deinde pullum eius gallinaceum comedere.* quod verbum cùm Rex magno applausu accepisset, dixisse fertur: *Næ, tu meritò meus es Inferni vicarius.* iam enim egregio hoc nomine ob præclara quædam facinora apud omnes passim innotuerat. Quis non ter & ampliùs felicem tali vicario Regem dixerit? Guiliel. Rastellus in vita Thomæ Mori.

HENRICVS VIII. ANGL. REX.

Hic cùm Thomas Bolenus maritus matris illius Annæ, quæ Anglicani excidij fomes, in Gallijs legatione (quo munere cum donarat Henricus, ut tantò liberiùs eiusdem coniugem in suum thorum pelliceret) fungeretur: & intellecto, quod Rex ineditabatur, coniugis legitimæ repudio; ut præfatam Annam, quam ex Boleni coniuge absente illo genuerat, in vxorem duceret; venit quantò ocyùs, Regi ob oculos rem totam ponit, sceleris incestusque adulterini admonet. at frustra. post multa enim hanc dumtaxat improbissimæ mentis indicem vocem audiuit: *Tace ô stolide. centum ex aquo tua coniuge abusi: cuiuscunque illorum tandem filia sit, certè erit vxor mea.* Quis non hîc elata voce exclamabit, quod olim ille, O tempora, ô mores! Sleidanus lib. 9.

ADVO-

ADVOCATUS.

LUDOVICVS XII. GALL. REX.

SEquitur iusta causarum in iudicio tutela : quæ veluti benè impena , bona est & salutaris ; ita neglecta & contra regulam probitatis vsurpata , ac proprii quæstus sordibus imbuta , portentosa est , & prorsus inepta. Occurrit hoc loco LUDOVICVS XII. Gall. Rex : qui cùm Lutetiæ moraretur , quoties liatis subsellijs ius dicebatur , de more intererat ; & disertos causarum patronos suo quoque patrocinio fouebat. De illis tamen , non secùs ac de alijs , dicebat : *Tales sutoris artificium sibi vendicant : causamque subdens , Quia , aiebat , quod sutoris proprium est alutam dentibus producere ; hoc etiam illis , in dilandis Prudentium responsis , & Cesarum decretis.* P. Æmil. in Vita.

I D E M

Pragmaticos Forenses varijs cauillis impetebat. vnde quæstione aliquando cum Proceribus mota , quid oculis potissimùm prodesset ; illud Auguris illius apud veteres vsurpabat : *Si Pragmaticum , Patronumque rarissimè videris.* Ecquis , ait Augustin. Epist. 36. tandem Aduocatus reperitur , qui dicat suscepto suo : Recipe quod mihi , cū malè adessem , dedisti ; & redde aduersario , quod ei , me iniquè agente , abstulisti ? Ibidem. & Annal. Franc.

ADVOCATVS ANONYMVS.

Fuerat hic magnus , at felix causarum patronus : qui eo munere abdicato , religionē amplexus , Cœnobio ob dexteritatem in rebus agendis præficitur. verùm rebus sibi non tam dextrè vt priùs succedentibus,

dentibus, mirati fratres, causam inquirunt. ad quos ille: *Dei timor qui mihi ante oculos, facit; quòd tam liberè mentiri non audeam, veluti in sæculo solebam.* implicitè notans, quantum is qui sæcularium rerum patrocinio se dedicauit, veritatis limites transgrediatur aliquando, vt propositam susceptamque causam contra fas tueatur. Auctor Sermon. conuiuialium.

MORIO F. SFORTIÆ.

Aliud ad calcem adiungo; conditionem personæ, à qua profectum, non ineptè exprimens. Altercabantur coram Francisco Sfortia Mediolanensium Duce nonnulli: vter esset præferendus; Aduocatus Medico, an è conuerso: quolibet autem suas partes exquisitis argumentis firmare conante, cùm grandis illa difficultas indecisa remaneret; MORIO disputationem interrumpens, sententiam dixit: *Non videtis, inquit, si quando latro suspendendus, quòd pracedat ipse, subsequente tortore?* inurbanâ hac parabolâ, Aduocatum Medico præferendum insinuauit. Corozetus.

CIVIS DIESTENSIS ANONYMVS.

Properanti manus iniicit Diesthemij Brabantia opidi olim incolâ & ciuis. Ille, prout fideli relatu accepi, cùm filium haberet quem ad bonarum artium studia educauerat, anxie secum animo voluebat frequentius, cui tandem professioni eum applicaret. aliosque super hac re consulens, hoc modo procedebat: *Si Theologico studio statuique se dedat; vereor ne lubrica illa ætas, crebris animæ periculis exponatur. neque suis etiam caret Medicina incommodis; utpote cuius praxis plena labore & periculis. Ad Iurisprudentiam itaque confugiat necesse.* E tribus malis

malis eligatur quod minus est. Quippe satius, ut crumenas suis emungat nummis; quam vitâ corpus proximi: aternâ retributione propriam, & aliorum animam. Verumtamen huic iudicium suum & mens esto. longè aliter Greg. super Ezechielem: Iustus Aduocatus à nullo iniustas causas accipit; nec verba dare pro iustitia consuevit. Incerti auctoris.

ÆMVLATIO. *vide INVIDIA.*

ÆQVITAS. *vide IYSTITIA.*

ÆTERNITAS. VITA ÆTERNA.

S. EVGENIVS EPISCOP.

NON exigui ponderis eam sententiam Apostoli 1. Cor. 15. & mortalium mentibus infigendam inferendamque existimo: Magnum momentum, vnde pendet aternitas. verè magnum: quo acerbiteratem pœnarum, cum beata gloriæ æternitate, fas est mortali commutare. Meritò itaque ÆTERNITAS nobis proponatur, & quantum eiusdem desiderio exarserint Christianorum plerique: neque enim omnia in hunc locum congerenda, ne sola huius tituli tractatio in immensum opus succrescat. Vt autem ea prætereamus, quæ Æternitatis largitor diuersis in locis de ea dixit & annuntiavit: EVGENIVS ANTISTES raræ virtutis vir, cum iam in animum induxisset, potius pro Catholica fide mortem oppetere, quàm vel ad latum vnguem ab eadem secedere, ac sententiâ rogaretur, respondit: *Illud est vita aterna, mori pro Iustitia.* Quàm benè ille cum Regio Psalte annos æternos in mente habuit! quos & lucrifaceret, momentaneos hos lubens

bens amisit. Gregor. Turonens. histor. Franc. lib. 2. cap. 3.

S. FRANCISCVS.

Quanto labore hic ad Æternitatis brauium in hac vitæ palæstrâ decurrerit, superuacaneum foret in præsentî referre. illud tamen non præteribo, quòd, cùm ob assiduas & vbertim fluentes lacrymas oculorum ægritudine incurrisset, ab ijs q. sibi abstinendum, ni corporei luminis vsu priuari vellet, medici consulerent, suspirans dixerit: *Non est ob amorem luminis, quod nobis cum muscis commune est, visitatio lucis æterna vel modicū repellenda: quia non propter carnem spiritus, sed propter spiritum caro lucis beneficium accepit.* Sur. tom. 5. in vita.

IDEM

Interrogatus, quā tam tenui amictu hiemalis algoris asperitatem temperaret; respondit: *Si supernæ æternæque patria flamma per desiderium congeremur, facile nos ab hoc frigore tueremur.* Sur. tom. 5. in vita.

RECAREDVS HISPAN. REX.

Non eum sæculares curæ, non intentatæ mortis metus, ab hoc æternitatis desiderio auocarunt. Hispania quippe Ariana labe purgata, auitam complexus est fidem. ac pater ni eam abneget, necem minatur: cui is; *Benè, inquit, fortî constantique animo, mecum agis pater: siquidem ut Regnum hoc abs te iugulatus amittam, æternum cum Superis pro caduco hoc consequar.* Regia illa vox, & cedro digna. Egnat. lib. 1. cap. 1.

THOMAS MORVS ANGLVS.

Non minùs illustre est, quod sequitur. THOMAS MORO, cui parem Anglia nunquam vidit, verè tali
ciue

ciue indigna, impiissimis Henrici VIII. decretis carceri mancipato, quòd improbissimis eiusdem dogmatibus subscribere recusaret; cùm ad expugnandam eius constantiam multi Principes nequicquam venissent, vxori tandem imperatum, viro suadeat, ne se, liberos, bona omnia, & famam, vitamq. quâ frui adhuc posset, pro derelictis haberet: cui ille: Ecquamdiu, inquit, Aloysia mea, potero hac vita frui? Totis viginti, & ampliùs annis, illa respondit; si Deo ita visum. *Vin' ergo, ait MORVS, eternitatem viginti annis commutem? Na tu imperita mercatrix es mea vxor: nam si annorum viginti milia diceres, aliquid tu tamen diceres: sed quid ad eternitatem?* Sanderus de schism. Anglic. lib. 1. Tho. Staplur. in vita eiusd.

AFFABILITAS.

S. IOANNES PATR. QVI ET ELEEMOSYNARIVS.

PRæclara, & non reticenda Magnatum virtus; quibusuis ad eorum patrociniū confugientibus aures patentes præbere, ac Principis maiestatem tempore & loco seruare. Quo in genere non pauci excelluere. nos ex iis clariores in medium adducemus. Et vt mundi redemptorem CHRISTVM si leam, cuius omnis prædicatio, conuersatioque mirè affabilis; D. IOANNEM ELEEMOSYNARIVM referam, qui Patriarchatus munere insignitus, bis per hebdomadam patentibus porticibus cuius aures accommodabat: cumque, vt fit, confessores sui quosdam duriùs increpatos repellerent, eos his verbis compellabat: *Cùm nos ad Deum sine intercessore liberè accedamus, qui tamen homines sumus; quomo-*

quomodo & non conseruis nostris portas reſeramus, & benignam cuius aurem præbemus? æquè præclarè ac Vespasianus ille olim; qui neminem à Cæſaris colloquio tristem diſcedere oportere reſpondebat: vt auctor eſt Sueton. Suriuſtom. i. in vita.

IDEM

Cùm aliquando præſediſſet, omnium alloquio quereliſque excipiendis paratus, & nemo pro ſubſidio acceſſiſſet; veſperè ſubtritiſt abijt. Cauſam verò ſciſcitâti, cur triſtior appareret; *Hodie*, dicebat, *nullus à me quicquam accepit: neque minimum quidem piaculum offerre potui Chriſto pro peccatiſ meis.* an non ea laude dignus, qua iſ apud Quiriteſ? qui amicis ſe diem perdiſſe conquerabatur. Ibidem.

PIVS II. PONT. MAX.

Priori haud abſimiliſ. cùm enim ad eum ſenex verbis ſupra modum profuſus, petendi quippiam gratia acceſſiſſet, eumque quia profuſiorem quidam de adſtantibus moneret; verè pius Pontifex, omnia illum ab exordio repetere imperat: vultuque ſeucriùſ in alterum retorto, *Neſciſ*, ait, *ex quo Pontificatum iniſ, aliſ viuere me oportere; non mihi.* rarum exemplum humanitatiſ, quod meritò æmulentur poſteri. Ioan. Ant. Camp. in vita.

RVDOLPHVS IMP. AVSTRIACVS.

Ad alioſ tranſeo, quorum hîc æqua cum prioribus laus. Quis enim Auſtriacę ſtirpiſ primam quaſi radicem RVDOLPHVM ſine iniuria ſileat? Cùm enim frequentior ad eum foret populi concurſus, & per ſatellitium quorſdam tenuioriſ fortune ad ſe affectanteſ ſubmoueri aduerteret; non ſine ſtomacho edixit: *Per Deum* (ipſa eiſ verba ſunt) *ſinite homineſ ad me venire. Non enim idcò ad Imperium*

vocatus sum, et in arculam includar. Meminerat pius Imperator, Regem regum dum inter homines homo degeret, discipulos increpasse, quod paruulos, id est humiles & abiectos, à se remouerent: talibus inquebat est regnum cælorum. Refert I. Lipsius lib. 2. Mon. Polit. cap. 7.

HENRICVS IMP. FREDERICI FIL.

Et hic ita in rebus assiduus, ut vix serò cibum caperet. monentibus autem valetudinis curam haberet; *Prinato, ait, homini tempus cibi est, cum id lubet aut solet: at Regi si nomen suum non abdicat, id solum, quo vacat.* Ibidem.

ALPHONSVS ARAGONVM REX.

Illius quàm similis vox & animus? reprehensus enim quòd erga hostes & subditos se affabilem & mansuetum præberet: *Nihil, aiebat, magis aduersariorum animos flectit, quàm placabilitatis & mansuetudinis nomen.* Panorm. lib. 3. de Gestis Alph.

ANONYMVS SENATOR NORIMBERG.

Addamus inclytum hoc & rarum exemplum. Cùm Noribergæ aliquamdiu versaretur Ferdinandus Imp. (alii referunt ad Maxemil. I.) quendam è primatibus rogat, quomodo tantam multitudinem regerent; qui respondit: *Blandis verbis, & atrecibus pœnis.* sic enim debent imperia esse constituta, ut gubernatores omnibus comiter respondeant, & in pœnis adhibendis grauitatem seruent. Phil. Camer. in locis Manlij pag. 589.

AFFECTVS DOMANDI.

FRANCISCVS BORGIA S. I.

Consonum nunc de humanis affectibus, iisque si mali sunt domandis, pauca dicamus. ut enim

enim affectus, si moribus congruant, nec recte rationi aduersentur, fouendi sunt: ita si moribus & rationi diffformes, radicitus euellendi. FRANCISCVS BORGIA iteratò se offert: qui dum presente se quempiam de vitæ sanctitate innocentiaque laudari audiret, illud vnum insonabat: *Talis erit, qui se vincere norit*. fontis infontisque vitæ causam, in affectus proiciens. Lib. 4. vitæ eiusdem cap. 5.

IDEM

Cùm intellexisset Carolum V. ætate iam & labore fessum, rebus Imperij feliciter transactis, se in cœnobium recepisse: *O magnū virum*, inquit. *qui cū de hostibus toties triumpharit, tandem seipsum vicerit*. Ribad. in vita eiusd. lib. 2. cap. 14.

SENEX RELIGIOSVS ANONYMVS.

Et ille non inmerito priori coniungendus: qui hortum cupressis consitum cum discipulis suis obambulare solitus, eis vt teneriores euellerent primum, tum magis annosas, præcepit. quibus dicto obtemperantibus, ita ad eos senior: *Hoc modo affectus nostri dum tenelli, facile extirpantur: vbi verò radices egerint, difficillimè*. Dorothe. doctrin. xi.

PETRVS ALDOBRANDINVS CARD.

Venerat huc Mediolanum orator ab Apostolica sede missus: rogatusque à Margareta Austriæ Regina (ad cuius triumphalem ingressum plurima erant expressa simulacra) quisnam Regum omnium videretur sibi maximus; *Qui*, respondit, *libentius sibi, quàm alijs imperat*. hoc Imperium verè possidet, qui nunquam in alia fortuna est alius. Henric. Farnesius in Apoph. de Principe.

IDEM

Dicebat, *Felicitatis fabrica in temperandis affectibus*

etibus sita est. virtus enim & vitium, ex affectu ari-
matur. Ibid.

VENCESLAVS DVX BOHEMIÆ.

Inter Ciuiles non iniuria VENCESLAVS princi-
pium faciet. Etenim qui hac animi æquitate etiam
Philosophorum moderationem est transgressus.
Mortuo namq. patre, in Bohemiæ Ducem electus,
cùm sciret Bokslauum fratrem suæ vitæ insidias
struere, nunquam nisi verbis eum deterruit à sce-
lere. at frustra. redeuntem è templo VENCESLAVM
frater expectat, comitatus aliquot nefariis: & im-
petum in eum facit. irruit è contra VENCESLAVS,
& Boleslao ad terram prostrato, gladioque adem-
pto, perfidiam exprobrat; manumque & enseni
continet: ac in melijs irarum fluctibus, adfectu
superato, eum intactum dimittit. quam egregiam
animi moderationem admirantibus qui aderant;
Malim, dicebat, vt frater Deo sanguinis reddat ra-
tionem, quàm si ego in fratrem manus iniecero, & fra-
ternæ necis causam apud Deum dicere compellerer.
Stupenda animi tranquillitas, & affectuum domi-
nium: cui si Archyta, aut Platonis, Stasyppeve mo-
destia conferatur; iocus ludibriumque, ac veluti
pueriles ludi inter viriles actiones videbuntur.
Fulgof. lib. 4.

AFFLICTIO. VEXATIO. TRIBVLATIO.

IESVS CHRISTVS.

Afflictionum modò quis fructus quæve uti-
litas, demonstrandum. Neque enim (vt inquit
Cyprianus) nisi præcesserit pugna, potest esse vi-
ctoria. Hoc in seipso exhibuit DOMINVS, ac SAL-
VATOR

VATOR: noster qui assumpto iam immortali ac glorioso corpore, se in alia effigie (vt loquitur Marcus) discipulis in Emaus ambulantibus interposuit, eosque ex Sacris literis instruens, tandem subiunxit: *Nōne oportuit hac CHRISTVM pati, & ita intrare in gloriam suam?* Ita enim à Deo decretum, per stultitiam Crucis saluos facere credentes. Luc. cap. 23.

IDEM

Discipulos illos, qui inter alios gloriam & honorem affectabant in regno suo, rogabat; *Potestis bibere calicem, quem ego bibiturus sum?* vt intelligamus, passionis calicem, & tribulationis amaritudinem, esse viam gloriæ & superni honoris. Matth. cap. 20.

SS. PAVLVS ET BARNABAS.

Hi Christi capitis viua membra, ab eodem nunquam descuerunt. lapidibus enim à Iudæis impetiti, & extra ciuitatem eiccti, nihilominus confirmabant discipulorum animos in fide, & dicebant: *Quoniam per multas tribulationes oportet nos intrare in regnum Dei.* Act. cap. 14.

MACARIVS ALEXANDRIN.

Lasciuientis carnis stimulos per sentiens, seriò de illis refrenandis cogitabat. neque præsentius remedium corporis afflictione ratus, saccum arena ruderibusque opplerum humeris per siluas deserti cui Theosebius obtiniam factus, cum rogasset quid agis Macari? ille, *Vexatorem*, respondit, *meum vexo.* vnam in hoc incumberet lasciuia huius ætatis iuuentus, & suæ menti illud Ethnici insculperet?

Otia si tollas, pericere Cupidinis artes.

Pall. in hist. Lausian. 20.

S. BERNARDVS.

Neque ad castitatem continentiamque conseruandam solùm confert Afflictio; verùm etiam ad benè beatèque in hoc sæculo viuendum. Docet id D. BERNARDVS; qui sæculi ludibria abnuens, diuino impulsus spiritu, cùm fratres, & quoscumque poterat, ad religiosam vitam adhortaretur, vnus Gerardus eius germanus, ceteris vt apparebat prudentior, non acquiescebat. cui vir sanctus: Scio, scio, *sola vexatio intellectum dabit auditui.* quod & factum. nam non ita diu pòst grauiter ictu lanceæ sauciatus, mortem præsentem veritus, inclamat: Monachus sum Cisteriensis. Quo BERNARDVS intellecto, *Sciebam, inquietat, quòd durum ei esset contra stimulum calcitrare.* In vita eiusdem cap. 3.

S. ÆGIDIUS.

Rogatus à quodam sodalium; Quid nobis agendum, frater, si tribulationes ingruant? respondit: *Licet lapides & saxa de celo pluerit Dominus, non nocebūt nobis, si tales fuerimus, quales nos ille requirit.* insinuans quod in Odis Horatius:

*Iustum & tenacem propositi virum,
Non ciuium ardor praua iubentium,
Non vultus instantis Tyranni
Mente quatit solida. — &c.*

Ex sent. aureis eiusdem.

FRANCISCVS BORGIA S. I.

Ad alium non minùs illustrem transgredior, corpus suum variè affligentem, FRANCISCVM BORGIAM. Qui dum à sociis, cur id ageret, rogaretur: *Belluam istam, inquit (eo nomine corpus honorabat) plorare iubeo: vt quam delicijs voluptatibus cepit palatum, eandem abstinendo amittat, expietque.*

pietque. Lib. 4. vitæ eius cap. 5. Andr. Schottus.

IDEM.

Amici nomine appellare solitus ea omnia, quæ ad corporis afflictionem conducebant. hinc si per solis ardores, aut brumæ aspera frigora, itinerumq. anfractus proficiscebatur, illud identidem ingeminabat: *Quàm bellè me iuvant amici mei!* mente apprehendens æternam illam coronam, non nisi legitime decertanti conferendam. Ibidem.

ALTARE.

BRACMANNA ANONYMVS.

QVanta Deus ultione irreuerentiam suæ Aræ factam, in Iuliano Apostatæ Iuliani præfecto, expiarit, vbi de Admonitione egimus, ex Theodoro to in medium attulimus. Subit hîc mentem alia pietatis & reuerentiæ imago, quam sacratis Aris BRACMANNORVM quispiam, cuius nomen immerito apud Auctores reticetur, impendit. Nam cum in vrbe Meliaparensi sacerdos Ecclesiam ingressus, literas per antiquas saxo cum cruce insculptas intueretur, Indum interpretem accersit. qui cum vix ob altitudinem attingeret; Aram conscendere iussus, in quâ Deo ter maximo iuge sacrificium conferebatur quotidie, requit: *Nefarium facinus* dicens, *altare in quo res diuina fieret humanis pedibus cõculcari.* O si vel modica huius Pietatis scintilla in nostri æui Nouatoribus! non tot Ecclesiarum ruinas exhiberet Belgium, neque adeò sancta tua Domine conculcata essent & contaminata. Ofor. lib. 3. hist. Eman.

ALTIORA NON SCRVTANDA.

IESVS CHRISTVS.

Non esse curiosè indaganda ea quorum contactu mentis nostræ acies hebescit, documento est nostri generis Redēptor CHRISTVS IESVS: qui post resurrectionem conuescens cum Apostolis, dum rogaretur ab iisdem; Domine, si in tempore hæc restitues regnum Israel? respondit; *Non est vestrum nosse tempora vel momenta, quæ Pater posuit in sua potestate.* non enim humani iudicij acies ad sublimia illa, inconcussa attingit: verùm in ænigmate tantùm ea cōtemplatur, post facie ad faciem, pulsa terrenæ molis nube, visura. Act. cap. 1.

F. ÆGIDIUS COMES S. FRANC.

Ille cuidam de inscrutabili Prædestinationis mysterio multa inquirenti; *Sufficit*, inquiebat, *ripa maris ad lauandum pedes, manus, & totum corpus: stultus est qui altum petit. Sufficit scientia benè beatæque viuendi.* Ex sent. eiusd.

AMBITIO.

IESVS CHRISTVS.

Non minùs rescindenda est regnandi ac carnis fœda libido, quã AMBITIONEM vocamus: quæ successionis legitimæ iura per vim violat sæpè, & sceptrum ad indignos defert, homini Christiano indignum, atque radicitus exstirpandum: prout eam etiam primus discipulorū animis exstirpauit vnigenitus DEI FILIVS. Persoluto enim statère, discipulos ad se vocatos, quid in via tractassent, rogat. qui dum

dum confitentur inter se ventilatum, quísnam eorum futurus esset maior in regno calorum; aduocans paruulum, statuit eum in medio eorum, & dixit: *Amen dico vobis, nisi conuersi fueritis, videlicet ab hac stulta contentione, & efficiamini sicut paruulus iste,* (quem putant fuisse Martialem Petri discipulum & Germaniæ Apostolum) *non intrabitis in regnum calorum.* Insinuat humiliter de se sentiendum per virtutem, velut paruuli faciunt per ætatem. Matth. cap. 18. Marc. 9. Luc. 9.

I D E M

Cùm audita mortuorum resurrectione, mater filiorum Zebedæi peteret, Dic vt sedeant hi duo filij mei, vnus ad dextram tuam, & vnus ad sinistram in regno tuo, id est, vt primarias circa te dignitates obtineant; tam inordinatam & ambitiosam postulationem arguens, dixit: *Nescitis, quid petatis: & paulò post: Sedere ad dextram meam & sinistram, non est meum dare vobis: sed quibus datum est à Patre meo.* q. d. Non vt homo, veluti vos existimatis, aut ex humano adfectu, ratione cognationis hoc dare possum: sed diuino iudicio illud dabitur his, quibus ob virtutem paratum est. Matth. cap. 20. Mar. 10.

I D E M

Indignantibus decem Apostolis, quòd filij Zebedæi per matrem primarias post resurrectionem dignitates postulassent, ad se vocatis, ait: *Scitis, quia Reges gentium dominantur eorum; & qui potestatem habent super eos, benefici vocantur?* Dominari hoc loco contemptum inducit & coactionem: vnde significatũ vult DOMINVS, Prælatos ac Principes Christiani populi, non debere vt Gentiles, dominari subditos deprimendo, & ex mera regnandi libidine

præesse. vnde subdit: *Vos autem non sic. Sed qui maior est in vobis, fiat sicut minor: & qui præcessor, sicut ministrator.* quibus omnem fastum & inordinatam ambitionem vetuit. Matth. cap. 20. Luc. cap. 22.

ANONYMVS ORATOR.

At parum Domini præcepti consilijque memores illi, quos hic ordine in scenam adducam. Prologum agat Granatensis regni Orator quondam celeberrimus. Illi nihil prius, quàm, debitum (vt iactabat) suis virtutibus, honoris regni que fastigium. vnde oratione habita, dum è cathedrâ descendenti, quidam non parui nominis, auxiliarem dexteram porrigeret; suam ad se traxit, inquiens: *Nolo mihi dextram abs te porrigi ut descendam; porrige, si quicquam vales, ut ascendam.* at, vt benè Plautus in Amph.

Virtute ambire oportet, non fautoribus.

Sat habet fautorum semper, qui rectè facit.

Foresta de Dict. memorabil.

BARDAS PRÆFECTVS MILITVM.

Iungat se illi comitem BARDAS militum sub Basilio Imperat. Præfectus. Qui dum per decretum Imperatoris sibi ablatam non exiguam potestatis, quâ antè præfulgebat, portionem cerneret; euestigio imperium ipsum ambit, militem & vires colligit. Mittitur interea Stephanus Nicomediæ Antistes, suafurus bello abstineat, Imperatori suum regnum cedat, & illi pristina facultas. at is eum vix responso dignatus, dextroque pede protenso, quem coccinei coloris calceus, Imperij insigne, decorabat; *Fieri nequit, ait, ut qui hunc semel in conspectu multitudinis induit, eum temerè exuat. Quare vel me sua sponte Imperatorem agnoscant, vel inuitis ipsis*
Impe-

Imperium m. h. met vendicabo. Ita feruebat animus cupiditate domini, & implicitè dicebat, quod ille apud Persium olim:

Occupet extremum scabies, mihi terpe relinqui.
 Cedren. In Basilio.

ALPHONSUS REX ARAG.

Quere Apophth. de ADVERSITATE.

ADOLPHUS EGMONDANVS.

Veniam nunc ad aliud sæculi nostri, imò etiam soli, priore crudelius. illo enim in Principem, hoc in patrem fructum. ADOLPHUS EGMONDANVS, dum patris sui Arnoldi Geldriæ Ducis & dynastæ diuturnum imperium molestius ferret, per factiones quosdam in suas partes trahit, patrique palàm bellum facit. Cumque re sopita, per Carolum Audacem pro sententia diceretur; Arnoldus pater solum titulo Geldriæ Ducis utatur, at filio opida vrbesque ac arces cedat, Grauià dumtaxat sibi exempta: accipiat quoque in alimoniam de manu filij tria quotannis aureorum milia. arroganti ac effrenato vultu voceque ADOLPHUS: *Quid malum? Pater alibi imperet, qui totos quadraginta annos omnibus præsuit. Aequum est ad nos recurrant regnandi vices: nec aliud admisero, quàm de annuâ pensione; sic ut pater Geldria tota excedat, nunquam in campum pedem relaturus. aliàs malim precipitem dare parentem in puteum, & me superiniicere, quàm ut in has condiciones paciscar.* En responsum, non tam impium (quale & tunc omnibus visum) quàm insanum. Refert I. Lips. Monit. Pol. lib. 2. cap. 5.

CHAN TARTARORVM.

Claudam hoc virorum agmen iocoso, licet alterius ordinis exemplo: ut vel eo etiam liquidò cõstet,
 non

non solum quàm crudelis, sed & impia sit ac irreligiosa Ambitio. CHAN TARTARORVM (eorum Princeps sic dicitur) cùm Stephanus haud ita nuper optimus fortissimusque Poloniae Rex obiisset, in comitiis de rege creando, ipse quoque per legatos interuenit, dixitque: *Potentem se esse, & posse myriades equitum educere è suis terris, Polonia tuenda vel augenda. Item frugalem se esse ac continentem, & sine ullis ciborum delicijs, solâ equinâ in fame contentum.* Tertiò, quod ad religionem attinet: *Tuus, inquit, Pontifex, meus Pontifex esto: tuus Lutherus, meus Lutherus esto.* Ecce hominem paratum omnia sacra Deosque deserere regnandi causa. Ita etiam hoc æuo videas, quod olim Ennij;

Omnis cura viris uter esset Induperator.

Ibidem num. 11.

CHROTILDIS FRANCIAE REGINA.

Hæc quoque, sui sexus intemperatam libidinem dominandi, in promouendis suis nepotibus ad legitimam regni successionem, adhibuit. Cùm enim proprijs filijs reiectis, alios ex fratre nepotes adoptaret, eorumque capillitium more illius æui summa cura enutrit; fratres legationem ad eam mittunt, & cum illa nudatum enseni & forcipẽ, optionem facientes, vtrum malit nepotum capiti adhiberi. at illa plus æquo commota, & ambitionis stimulis agitata; *Satius, exclamat, mihi est, si ad regnum non eriguntur; mortuos eos videre, quàm tonsos.* Ita de Seiano memorat Iuuenalis, quòd, cùm

—— nimios optabat honores,

*Et nimias poscebat opes, numerosa parabat
Excelsæ turris tabulata, vnde altior esset*

Casas.

Casus, & impulse præceps immane ruina.
 Fanc. Hottoiman. de Franco-Gallia cap. 19.

AMICITIA, & AMICVM BONVM.

Item, AMARE, & AMOR.

CHRISTVS DOMINVS.

Contemplemur AMICITIÆ vinculum, potens
 & præualidum: cuius præsidio ni cincta sit hu-
 mana vita, deserta erit, & vix vitæ imaginem refe-
 rens. Eius autem vim & virtutem insignem suo ex-
 emplo demonstraui nostri generis REDEMPTOR.
 cui, dum nuntiatum esset, Lazarus quem amas, in-
 firmatur; post biduum ad discipulos conuersus, *Ea-*
mus, ait, in Iudæam iterum. Mirantibus verò illis ac
 dicentibus: Rabbi nunc te quærebant Iudæi lapi-
 dare, & iterum vadis illuc? respondit, paucis interie-
 ctis: *Lazarus amicus noster dormit; sed vado ut à som-*
no excitem eum. Vera quippe amicitia foras mittit
 timorem. omni enim tempore, vt dicitur Prouerb.
 17. diligit, qui amicus est: & frater in angustijs com-
 probatur. Ioan. cap. 11.

IUDÆI ANONYMI.

Egregium hi amicæ pietatis exemplar. Missi
 enim (vt refert Lucas) à Centurione quodam ad
 Christum vt eum pro seruo illius deprecaretur, so-
 licite orabant, vtq. magis beneuolū redderēt; *Quia*
dignus est, vt hoc illi præstes, inquit, diligit enim gen-
tem nostram, &c. Egregius locus, amici bonum vbi-
 que promouendum edocens. Luc. cap. 7.

Vide titulum de BENEFICENTIA,
CHARITATE ERGA HOMINES, &c.

LYDO-

Ad Ciuilis ordinis benefacta transeo, & narrare incipiam quanto apud quosdam in pretio hoc Amicitiae vinculum semper fuerit. Prodeat in medium, suoque id testimonio primus confirmet, Galliarum Rex LYDOVICVS, eius nominis duodecimus. Qui parva de hoste victoria, postquam Feuxeum inter suos cecidisse percepit, dissimulato omni plausu quem victoria exigebat, ad amicos conuersus: *Vixnam, ait, ego Italia exclusus essem, viueret verò Feuxeus, reliqui superessent procures. Hostibus tales eueniāt victoria: si sic iterum vincimus, victi sumus.* Quā appositè hoc loco vetus illud inelamari posset: *Flere victum; at victorem perdi ab ipsa victoria.* Ita pius Rex amicorum vitam proprijs commodis anteferebat. *Æmil. in vita.*

HENRICVS II. DVX BRABANTIAE.

Consimilis beneuolentiae est domesticum hoc, quod subiungo. HENRICVS II. Brabantiae nostrae Dux, cum venisset ad Villariense cœnebium, rogatus, templi limina subiret, inuisurus Sanctorum reliquias isthuc in pace sepultas, respondit: *Sufficiat mihi nunc videre ossa Fratrum demus in morte sepulcrum: ibi enim latent reliquia mihi chara.* En, quos viuos fuerat persecutus, etiam mortuos viuus complectitur. verum namque amorem mors non soluit; quod eleganti Emblemate depingens Alciatus, ita canit:

*Arentem senio, nudam quoque frondibus vltimum,
Complexa est viridi vitis opaca cœmā:
Agnoscit quæ vices natura, & grata parenti
Officij reddit mutua iura suo.*

Excm-

*Exemploque monet, tales nos querere amicos,
Quos neque disiungat fœdere summa dies.*
Ex Chron.monast.Villariens. manuscr.

TRIVMPARA REX COCINI.

Rarum amicæ fidei exemplum. Fauebat hic Lusitanis, eosque fouebat, ac graue ob id bellum ei mouit Zamerinus Calecutanus Rex. Lusitanis autem dimitti postulantibus, ne eorum causa ea belli tempestas exoriretur: *Bono animo*, inquit TRIVMPARA, *Divina providentiæ fidere; quæ bonas causas, dum in potissimum discrimen adductæ, subleuare consuevit. Neque enim permittam; ut ii quos semel in tutelam atque amicitiam recepi, me vino & consentiente, ad alienam opem supplices ac vagi confugiant.* I. P. Maff. hist. Ind. lib. 2.

ALPHONSVS ARAGONVM REX.

Æqualis benignitatis ille. Cùm enim Neapolitani ad perpetuam sui Regis memoriam arcum triumphalem communibus impensis exstruere, ac nominis eius famam posteritati consecrare in animum induxissent; quo requisitum spatium vndeque haberet, Nicolai Mariæ Buzurij equitis clarissimi domum demoliri contendunt. Res ad Regem per occasionem defertur: qui eam improbens, *Non tanti, aiebat, facio edificia ventorum & æris iniuriæ exposita, ut ob id amici mei veteris dirutam domum velim.* pluris faciens amicum, quàm sui nominis æuiternum monumentum. Panorm. lib. 1. de Gestis Alphonsi.

IDEM

Audiens illud Vespasiani dictum, Amici diem perdidi: *Gratia Deo, ait, quod eam ob rem nullum diem perdidi.* Ibidem.

EQUES

EQVES ANONYMVS GARSIAE REG. NAVARRI.

Æquè hoc in genere nobilis acclarus EQVES
GARSIAE Regis. ille enim Ferdinando & Garsia in
Hispanijs bello decertantibus, Garsiam quem pue-
rum educauerat, bello atque prælio abstinere mo-
net: sibi constare asserens, eum à suis relinquendū:
(malè enim audiebat apud suos Garsias.) contemnit
hic monita, & se prælio parat. Quid faceret amicus
EQVES: instat, vrget, perurget, at frustra. tandemque
in hoc verbum prorupit: *Eheu! statutum video ut
interficiaris: cui rei cum nihil opis adferre queam, id
enitar saltem, ne te vel mortuum vel victum videam.*
Ita galeam atque thoracem exutus, solo ense hasta-
que in hostium turmam ingruit, non reditus. ma-
luit quippe cum amico mortem oppetere, quàm su-
perstes eum mortuum videre, aut victum. Bap.
Fulgof. lib.4.

THOMAS PONTANVS.

Et hic prudentia ac rerum experientia clari Ti-
mus, dicere solebat: *Amorem nunquam fecisse stipen-
dium.* Innuebat autem, Amoris eam esse vim, ut
vbiuis terrarum facilè locum inueniat, etiam sine
pecunia. Iac. Spieg. in lib. 2. Æn. Syl. de Dictis
& Factis Alph.

THOMAS MORVS.

Magnus item iste Amicorum & Amicitie cultor,
etiã in extremis angustiis constitutus. Accepta quip-
pe mortis sententia, eaque qualis in latrones ferri
solet; cum eam clementer (ut dicebant) Rex miti-
gasset, eò quòd benigniùs cum eo agere decreuis-
set: *Hanc, aiebat, Regiam benignitatem, ab amicis
meis omnibus auertat Deus.* Thom. Staplut. in
vita cap. 18.

AMOR

AMOR DEI. *vide* DEI AMOR, & CVLTVS.

AMOR PROXIMI. *vide* CHARITAS ERGA
HOMINES.

AMARI A SVBDITIS.

SIGISMVNDVS IMPERATOR.

SVbditos habere parum admodum est, ab iisdem timeri minus, amari autem plurimum. illud enim crudelitatis, hoc candoris beneuolentiaëque symbolum. Hinc eternâ memoriâ celebrandus SIGISMVNDVS, qui dum in controuersiam adduci intellexisset, Præstarétne amari Regem Principémve à subditis, an timeri? respondit: *Superi amari volunt & timeri, ita & Reges; neque enim ames, nisi timeas.* eo videlicet timore, quem filialem siue reuerentialem vocamus. Regibus itaque competit à suis amari & timeri, si ita moderentur vitam, vt nec inferioribus terrori, nec superioribus sint despectui. Æn. Syl. lib. 4. Comm. in Res gestas Alphonsi.

FREDERICVS IMP.

Percontanti quos præ cæteris amaret ardentius, respondit: *Qui me minùs metuant, quàm Deum.* Præclara atque imperatoria vox: timeri vult; at moderatè. *Qui enim non timet, contemnit.* Æn. Syl. lib. 4. Comment. in Res gestas Alph.

ALPHONSVS ARAG. REX.

Neque fuit ab hac mente alienus ALPHONSVS: qui rogatus, quos è popularibus percaros haberet; *Illos, inquiebat, qui non magis me, quàm pro me metuant.* Sentiebat autem illos verè amicos, qui

D

Princi-

Principem magis amant, quàm metuunt. Panor.
lib. 4.

THOMAS PONTANVS.

Ille identidem Amoris penetralia ingressus, frequenter in ore habebat, & corde: *Amorem inermem incedere, dormire tamen loricatum.* Acutè notabat, amorem subditorum erga Principem tanti fieri; vt Princeps, cui suorum beneuolentia satis superque perspecta est, non sibi timeat, licet solus interdium obambulet: noctu tamen suo corpori custodes adhibet. Iac. Spieg. in lib. 2. Æn. Syl. De dictis factisque Alph.

D. LVDOVICVS GALL. R.

Claudat hoc agmen LVDOVICVS, qui letali morbo correptus, accersito Philippo filio regni herede; *Rogo te, aiebat, fili; cura vt à subditis ameris. malim enim Scotum, aut aliquem ex vltima Barbarie, ad Francos sapienter & piè regendos accersiri; quàm te cum infamia tam illustre sceptrum tenere.* Ionuil. in vita eiusd. cap. 98.

ANGELORVM CVSTODIA.

IESVS CHRISTVS.

Magna animarum, inquit Hieron. fideiũ dignitas, vt vnaquæque ab ortu suæ natiuitatis habeat in sui custodiam Angelũ deputatum. quod etiã ex SALVATORIS nostri responso non obscure elicitur. Rogantibus enim discipulis, Quis putas maior est in regno cælorum? aduocato paruulo, eum in medio illorum statuit, eiusque innocentiam illis commendans, & contemptum vetans, subdit: *Videte ne contemnatis vnum de pusillis istis: dico*

dico enim vobis, quia Angeli eorum, s. custodiæ deputati, in calis semper vident faciem Patris mei, qui in calis est. apud quem nempe vos accusabunt, si vnum ex istis contemnatis. Quàm benè exclamat hoc loco D. Bernardus! Benignus es Domine, qui non es contentus nostra fragilitate murorum; sed ipsis hominum custodibus angelicam custodiam supponis. Matth. cap. 18.

ABBAS ISODORVS.

Beatum Abbatem Moysen tam vehemēter impugnabat fornicationis spiritus, vt sui compos in cella remanere vix posset. Solatium quæritat apud ISODORVM: qui cū frustra, ad cellulam rediret, hortaretur; tandem cum ad superiora domus ducit, & ad Occidentem respiciat, mandat. paret: videtque innumerabilem dæmonum copiam inter se turmatim concertantium. Dein' iubet ad Orientem se vertat: hīc conspicatus splendentem Angelorum exercitum. Tum iteratō ad eum ISODORVS: *Quos, inquit, in Occidente vidisti, ipsi sunt qui etiam iustos impugnant: quos verò versus Orientem, hi quos in adiutorium mittit seruis suis Dominus exercituum. Cognosce igitur, quòd plures nobiscum sunt, quàm cum illis, vt dixit Eliseus Propheta. In vitis SS. PP.*

S. CÆCILIA VIRGO & MARTYR.

At iniuriam pateretur fæmineus sexus, si eum silentio præterirem. veniat ergo in medium CÆCILIA Romana, genere, patria, & virtute nobilis virgo, & suum de Seraphici ordinis spiritibus iudicium depromat. A prima ætate Christianæ fidei præceptis instituta, Deo virginitatem consecrat. Sed quid? inuitam parentes Valeriano in coniu-

gem locant : ad quem illa, primâ nuptiarum nocte, hunc sermonem habuit: *Ego Valeriane in Angeli tutela sum, qui virginitatem meam custodit: quare ne quid in me committas, quo ira Dei in te concitetur.* quo dicto commotus Valerianus, Christi sponsam contingere non est ausus: quin addidit, se etiam in Christum crediturum, si Angelum videret. Breuiar. Rom. 12. Nouemb. ex vita.

S. AGNES VIRGO & MARTYR.

Quid te dignum loquemur tenella VIRGO quæ, dum Semphronius tuæ vrbis Præfectus, concepta furoris flamma, optionem daret, vt vel Vestæ impuræ deæ sacrificium faceres, aut meretricium conubernium ingredereris inuita; hac eum voce compellas: *O os impudens! si Dei mei tibi virtus innotuisset, non in tam impias voces prorumperes. Illi ea cura est corporis mei, vt Angelum suum mihi associet, qui corpus istud ab omni iniuria vindicet.* Nos etiam qui Angelorû præsidio in his fluctibus gaudemus,

*Dicimus grates tibi summe rerum
Conditor, Verbo tua quòd ministros
Flammeos finxit manus, Angelorum
Agmina pura.*

*Quos iubes nobis comites adesse,
Et pios cœtus hominum tueri,
Atque grassantis premere incruenta
Arma leonis.*

In vita eiusd. apud Surium, ex D. Ambrosio.

ANGLI POPULI.

S. GREGORIUS.

NEcerit à proposito nostro alienum, si quid de ANGLIS præclarè dixerint viri præclari, vno aut

aut altero exemplo comprobemus. Anglo-Saxonibus regnum Angliæ occupantibus, indigenæ passim cum fide expulsi & extincti: donec Ecclesiam administrante Gregorio PP. tam hæc quàm illi rursus exsurgerent. Hic autem cum fortè Anglorum liberos Romæ venales exponi conspiceretur, alludens ad patriæ vocabulum, *Benè*, inquit, *Angeli dicuntur, quia vultu nitent angelico. oportet eis iter æternæ salutis pandere.* & affectum pio effectui comprobauit. Seb. Munsterus lib. 2. de Inst. Britan. cap. 12.

PHILIPPVS VALESIVS FRANC. REX.

Laudis illud, hoc vituperij exemplum. Pace inter Edouardum Angliæ & Philippum Franciæ Reges inita; dum, non obstantibus inducijs, Edouardus regnum Franciæ per dolum inuasisset, hos versus in eum, & vniuersam Angliæ nationem, PHILIPPVS retorfit:

*Angelus est Anglus, cui numquam fidere fas est:
 Dum tibi dicu Aue, sicut ab hoste caue.*

Corozetus.

ANIMÆ IMMORTALITAS, ET CVLTVS.

IESVS CHRISTVS.

POtissimum in hac vitæ palæstra laboris solatium est, quòd absoluta hac viuendi periodo aliam vitam expectemus, longè beatiorẽ, ac nullo fine terminandam. Hinc immortalitatis largitor CHRISTVS, muniens suorum corda ad fortiter tolerandas persecutiones; *Nolite, ait, timere eos qui corpus occidunt, animam verò non possunt occidere.*

illa utpote immortalitatis dono prædita, etiam cum corpore immortalem retributionem accipiet.

Lucæ 12. Matth. 16. Marc. 8.

IDEM

Ut animæ immortalitatem explicatiùs proponat, exemplo villici iniquitatis adducto, qui sibi compararat amicos de bonis Domini sui; tandem concludit: *Facite vobis amicos de Mammona iniquitatis* (diuitias intelligit, quæ ordinariè ab iniquitate descendunt, aut per eam acquiruntur, ut notavit Ianssonius) *ut cum defeceritis, recipiant vos in æterna tabernacula.* quod verum non ellèt, nisi anima post mortem corporis aliud haberet receptaculum, numquam cum eâ interiturum. Luc. c. 16.

S. STEPHANVS PROTOMARTYR.

Calamus manúsque scribentem deficeret, si omnes in hunc locum referre voluero, qui de hac vita exeuntes, in Domino mortui, hanc immortalitatis spem etiam in medijs angustijs præclarè protestati sunt. Sit instar omnium vnus STEPHANVS: qui à persecutoribus saxis obrutus, læto animo expectans sempiternā illam mercedem, positis genibus; *Domine Iesu, inquit, accipe spiritum meum.* Act. c. 7.

IOANN. SHERTVS ANGLVS.

At dignum etiam foret recensere, quàm multi nostro æuo huius immortalitatis desiderio apud Anglo-Caluinistas mortem oppetierint. Ex his IOANNES SHERTVS, reus crimine læsæ Maiestatis, quòd Reginam Angliæ, caput Ecclesiæ negaret; cùm moneretur veniam delicti petere, & sententiam mutare: *Quid?* inquit, *pro vili hoc cadauere conseruando, animam meam perdam? absit.* Ex marty. eiusdem.

ALPHON -

ALPHONSVS ARAGONVM REX.

Satis multa de illis: Ciuilia etiam adijciamus. Maximum sibi immortalitatis argumentum videri assererat ALPHONSVS: *Quòd corpora in hac vita decrescant, suosque terminos habeant: animi verò, quantò ampliùs ad annos accederent, tantò magis sapientia, virtute & intelligentia crescerent.* Panorm.lib.4. de Gestis eiusdem.

I D E M

Reuoluens opera Senecæ Philosophi rogabatur, cur animus hominis ita esset insatiabilis. qui ait: *Animus hominis à Deo profectus, non priùs conquiescit, quàm eò redeat, unde profectus est.* Ita olim Lucretius:

*Cedit enim retrò de terra, quod fuit antè
In terra: sed quod missum est ex aetheris oris,
Id rursum celi fulgentia templa receptat.*

Panorm.lib. 1. de Gest. eiusdem.

FREDERICVS IMP.

Æquali prudentia hic. Dum enim in Austria vita functus esset è primoribus suis vnus, annum agēs 93, cui omnia viuenti ex animi sententia euenerant: *Et hinc, ait IMPERATOR, immortales animas cēscere licet. Nam si Deus est, ut verè est, qui hunc mundum gubernat; eumq. iustum nemo nisi iniustus negat; alia profectò loca sunt, ad quæ post mortem anima commigrant, ubi pro meritis demeritisve, mercedem pœnãve consequantur: hiç enim neque bonis sua præmia, neque malis pœnas reddi videmus.* Æn. Syluius, de Dictis Alphonsi.

IOANNES DE CANIS MEDICVS.

Ad alia properantem, tenet me IOANNES DE CANIS Medicus Florentinus, multi quidem nominis,

at modicæ pietatis. Hic enim cùm ex Matæosophiæ principijs, animam mortalem esse sibi certò constare semper affirmasset; mortì proximus, dubitare cœpit: animamque agens, *Sit*, exclamat, *nec ne, mox sciam.* Ioan. Bapt. Gellus, Dialog. 2. Chimerico.

CAROLVS V. IMP.

Et hic cæteris meritò adiungendus. qui Philippo filio occupato circa corporis ac capillitij potissimum cultum, *Non corpus*, inquiebat, *sed animus excolendus, quo veros tibi concilies amicos.* Significabat prouidus IMPERATOR, mores animi esse verè amicos fideles, qui nunquam etiam in aduersis destituunt possidentem. Hinc satis appositè Iac. Bill.

Ancilla inseruit domina quicumque relicta,

Ecquis eum sani pectoris esse feret?

Non sani magis est animi, qui mollia quarens

Carni, animam lenta tabe perire sinit.

Ex vita Caroli V.

ANIMI PROMPTITVDO. vide OBEDIENTIA.

ANIMI FORTITVDO.

S. VINCENTIVS.

A Nimosum nunc & apertum niuei pectoris robur pertractandum. cuius dum exempla persequor, se primùm offert B. VINCENTIVS. qui Daciano graui tormenta minitanti, ni idolis lita-
ret; *Hæc*, ait, *sunt quæ omnibus votis mihi cupio offerri. Frustrà fatigaris Daciane; non poteris tam crudelia parare tormenta, quàm ipse paratus non sum sustinere.* August. Serm. 12. & 13. de SS. item Surius in vita.

IDEM.

IDEM.

Vide ARGVTE DICTA.

S. LAURENTIUS.

Quis te martyrum clarissime LAURENTI hoc loco prætereat? qui craticulæ superimpositus, ac penè tostus, Tyrannum illudis, & *Versa*, inquis, & *manduca*. O stupendam, & nullis sæculis auditam fortitudinem! In vita apud Sulpitium.

S. DIONYSIUS EPISC. ALEXANDR.

Hic etiam, dum impijssimorum hominum insultus fortiter pro Christo sustineret, ad tortores conuersus; *Quid, inquit, inspectando laboratis? Caput meum, pro quo tantopere fatigamini, auulsum ceruice, tyranno vestro dono mittite.* Euseb. lib. 6. Hist. Eccl. cap. 30.

MACEDONIUS, ET THEODVLVS, E TATIANIS.

Et hi eodem igne cum prioribus accensi, dum noctu in delubrum irruunt, & simulacra confringunt, iussu Amachij, Iuliani præfecti, cratibus ferreis impositi, lento igne torrentur. Tosti aliquantulum, non secùs ac B. Laurentius, tyrannum compellant: *Amachi, assum desideras? Conuertito nos in alia latera, ne semiaffati palato tuo minùs sapidi videamur.* & ita urbanè iocantes, Christi martyres efficiuntur. Suidas.

S. IGNATIVS MARTYR.

Vide ARGVTE DICTA.

IOAN. FISCHERVS EPISC. ROFF.

Illà prioris ætatis, hoc nostræ. IOAN. FISCHERVS vir eruditione & pietate vix vlli par, quòd Henrici VIII. primatum Ecclesiasticum nollet confiteri, morte mulctatus; cùm supplicij locum intueretur, abiecto cui senex innitebatur baculo, *Eia, in-*

D S

quit,

quit, *pedes officium facite, parum itineris iam restat.*
N. Sand. de Schism. Anglic. lib. 1.

S. CHRISTINA.

Prosequamur etiam infirmioris sexus fortitudinem animi & robur. CHRISTINA, pietate non minùs quàm genere nobilis, cuius tolerantiam mirabor faciliùs, quàm laudabo; patris, qui Tyri Italiae opidi Præfectus, idola confregerat. Qui eam dum blandimentis minisque à vera fide remouere conatur, & scopulo videret immobiliorem, ungulis discerpi imperat. at illa, laceri corporis partem in os patris iniiciens: *Satiare miser, aiebat, carnibus, quas genuisti: filiam comedere potes; at certè impietati tuæ consentiat, facere non potes.* Vinc. Spec. lib. 2. cap. 82. Sur. tom. 3. in vita.

S. AGATHA.

Et hæc, dum Quintiano iubente in mammilla distorqueretur, ad illū conuersa, exclamabat: *Impie, crudelis, dire Tyranne: non te pudet in me amputare, quod in matre suxisti? at nihil proficis: habeo quas auellere non potes interioris fidei speiq. mammillas: quarum alimento in me reparatur sustinendi virtus.* Sur. tom. 1.

S. AGNES VIRGO & MARTYR.

Quis hunc virginitatis & martyrij florem prodignitate explicet? fulgebat in tenellis annis cana virtutum omnium effigies; in puerili pectore plus quàm virilis animus delitescibat. Nam cùm multa in Idolorum contemptum coram Symphronio Præfide sapienter dixisset, & ille; Patior te, diceret, deos blasphemantem, quia tuos annos infra sensum adspicio: *Fides, aiebat, non in annis, sed in sensibus inuenitur:*

uitur: & Deus magis mentes comprobabat, quam etates.
 Sur. tom. 1. in vita.

E A D E M.

Non sic ad thalamum nupta properaret; vt ad supplicij locum, læta successu, gradu festina, hæc VIRGO processit. Quo non terrore egit Carnifex, vt timeretur; quibus blanditijs, vt suaderet: quantorū vota, vt sibi ad nuptias proueniret? At illa, *Et hæc sponsi iniuria est, inquit, exspectare placituram. Qui me sibi prior elegit, accipiet. quid percussor moraris? Pereat corpus quod amari potest oculis, quibus nolo.* Stetit, orauit, ceruicem inflexit. & ita vna hostia duplex martyrium subiit, pudoris & religionis. Ambros. de Virginib. lib. 1.

S. DOROTHÆA VIRGO & MARTYR.

Vide DEI DILECTIO, CVLTVS, &c.

S. THEODORA VIRGO & MARTYR.

De huius etiam fortitudine dixisse, detraxisse est. quis enim à memoria sæculorum similem huic audiuit aut legit aliquando? Trahitur ad lupanar VIRGO, à milite imminuenda, & ecce de martyrio cōtēdit vterque. Iudicatur miles vt reus pro VIRGINE at illa ad locum supplicij accurrens, inclamare cœpit: *Non ego te mortis vadem elegi, sed prædem pudoris optavi. In me lata est ista sententia, qua pro me lata est. Moriar certè innocens, ne moriar nocens. Nihil hic medium: hodie ero aut rea tui sanguinis, aut martyr mei.* S. Ambros. in vita, lib. 2. de Virgin.

LYDOVICVS XII. GALL. REX.

Admirationis etiam plena exempla habet Ciuilis ordo. In quo principatum obtinet LYDOVICVS XII. Gall. Rex. monitus quippe Mediolanensi bello tormentorum ictus vitare; *Ecquem,* ait, *Gallia-*

rum Regem, unquam pilâ necatum accepistis? Qui metuit, me clypei loco utatur. Corozer.

CAROLVS V. IMP.

Paris fortitudinis CAROLVS V. cùm enim in Germania ad Ingolstadium copias haberet, cinxissentque eum ingenti exercitu fœderati hostes, & æneorum tormentorum copiâ ferream grandinem in castra ipsa non sine graui pernicie immitterent; monentibus sibi prospiceret, immutato vultu & loco, arridens dixisse fertur: *Confidite, nullius unquam Imperator tormenti ictu interijt.* Dignum memoriâ ac laude sæculorum. I. Lips. Monit. Polit. lib. 1. cap. 7. num. 10.

IDEM

Cùm in Hispaniam profecturo, sedatis iam fluitibus, pestem in locis maritimis magis inualescere nuntiaretur; quasi nihil ducens, *Eundem*, ait, *nec pratermittenda tam bona tempestas: pestis Augustum, pestis Casarem, pestis Carolum vllum nunquam attigit.* Franc. Robertel. in Orat. sua funebri.

LVDOVICVS BAVARVS.

Detinebat hunc in vinculis Albertus Marchio Brandenburgensis, cumque multa ab eo peteret, & nihil impetraret, minas adiecit; ni pareat, tradendum in manus sui hostis. cui LVDOVICVS: *Qua poteris ex me libero impetrare, eadem modò ex capto petito. Si amplius quid voles, corpus meum in tua potestate est; animum verò mihi, non tibi obnoxium inuenies.* Æn. Syl. lib. 3. Comm. de Gestis Alph.

THOMAS MORVS.

Egregium quoque fortitudinis decus THOMAS MORVS. Ille namque ad locum supplicij, certaminis gloriosi palestram, deductus, recitato Psalmo 50.

ac

ac finita prece, dum veniam Carnifex de more peteret, ei osculum & Angelotum aureum porrexit, dicens: *Tu mihi hodie id beneficij præstiturus es, quod hætenus nemo mortalium aut præstitit, aut præstare potuit.* quidnam illud? hoc sanè, quod ad auctorem suum anhelans properaret spiritus ex hoc mundi carcere, ad lucidas illas sedes,

Ver ubi æternum, tepidas quæ præbet

Iuppiter brumas. ———

Thom. Staplur. cap. 20. in vita.

MVLIER ANONYMA.

Digna hæc, quæ cum prioribus sui sexus deceret. Otho III. Imp. equitem, qui falsò fuerat accusatus, nomine tentatæ pudicitie Imperatricis, capite plecti iussit. Vxor mariti caput gremio gestans, Imperatorem adit, & Quæ pœna iniustus Iudex mulctandus? rogat: Morte, ait Imperator. Illa subintulit: *Tu ergo Imperator morere, qui maritum meum innocentem occidisti. Innocentem fuisse, ferro ignito quod innoxie manibus meis contrecto, probabo.* animosè profectò, & supra sexum fæmineum. Bern. Corius in vita Othonis.

AQVA LVSTRALIS

MACEDONIUS MONACHVS.

NEque hîc reticendum, quàm mirabilis Deus in operibus suis, ac ijs potissimum, quæ Rom. Ecclesia S. Spiritus instinctu gubernata, mysticè ad sanctificationem nostram usurpat. Quod de AQVA LVSTRALI, cuius non infrequens & inutilis vsus, adstruit MACEDONII Monachi exemplum. Nam dum adhuc in vtero gestaretur Theodoretus, ac matri grauidæ abortus immineret, eam inuisendi gratia

gratia accersitus, aduenit MACEDONIUS (eius quippe precibus prius sterilis conceperat) & aquam per orationes Ecclesiæ expiat. tum, *Bibe, inquit, hanc aquam, & diuinum tibi præstò aderit auxilium.* paret, & abortionis periculo liberata, tã pretiosam margaritam, nempe Theodoretum, orbi dedit. Theodoret. hist. P. C. 13.

ARGVTE DICTA ET RESPONSA.

S. VINCENTIVS.

PAUCA in hanc rem alio in loco diximus, vbi de acutè Dictis particulatim egimus: quorũ pleraq; huc reuocari, & ex his nonnulla eodem reduci possunt. B. VINCENTIVS, vt ab eo sumamus initiũ; in equuleum à Daciano sublatus, ac per ludibrium roganti, Vbinam es? *In sublimi*, magno animo respondit, *vnde te terrena potestate tumentem, altior despicio.* Aug. Serm. 12. & 13. de SS. & in vita eius.

S. IGNATIVS.

Vincentio meritò adiungetur, qui eiusdem etiam certaminis victor, IGNATIVS. Romę quippe ad bestias damnatus, dum in Theatrum productus rugitum perciperet leonum; alacri vultu vocẽque; *Frumentum*, ait, *Christi sum, dentibus bestiarum molar, vt panis mundus inueniar.* Verus IGNATIVS, qui diuini amoris igne succensus, cupiebat cum Apostolo dissolui, & esse cum Christo. Euseb. lib. 3. hist. Eccles. cap. 30.

S. ANASTASIUS MARTYR

E custodia eductus, cùm Idolis immolare compelleretur, rogat tyrannum, Quibus? eoque dicente, Igri, Soli, & Lunæ; dixit subridens, *Ergo etiam montē*

montibus, collibus, & pecoribus, omniq̃ue seruituti hominum: quibus imperare iussi à conditore, non parere. Sur. tom. 1. in vita.

S. EPHRAEM.

Claudet hunc ordinem EPHRAEM. qui cūm Edeſſæ ageret, ac cibum ſibi pararet, à meretrice per fenestram patentem deſpectus eſt. quæ cūm impudentiùs inclamaret, Benedic Abba: & indecoro cū riſu interrogaret, *Quid deest cibo tuo?* argutè, at modeſtè reſpondit: *Tres lateres, & parum luti, ut hac fenestra obſtruatur.* Sur. tom. 1. in vita.

ABBAS ANONYMVS.

Sed inferit ſe etiam iſte. de quo memoriæ proditum, quòd priuſquam ad Abbatis munus euehere-
 rur, demiſſo in terram vultu, miram humilitatem & benignitatem præ ſe ferret. at in demortui Abbatis locum communi ſuffragio conſtitutus, ut dignitate, ita & animo vultuq̃ue factus elatior. miranti autem cuidam tam ſubitam morum mutationem, reſpondit: *Quòd priùs demiſſo vultu incederem, erat, quòd cœnobij clauſes quærerem: quibus nunc inuentis, quin me erigo, & cernicem attollo?* Greg. Richterſus axiom. Polit.

S. AGATHA.

Ad fæminas digrediamur: æquè illæ cum viris in hac laude illuſtres. Cūm multa de ſuperſtitioſo falſorum deorum cultu præclarè in medium adduxiſſet Chriſti Martyr AGATHA, eamq̃ue Quintianus Præfectus à ſententia reducere conaretur, dicebat: *Sit ſicut Venus dea tua, uxor tua: & tu ſicut Iupiter deus tuus.* inſinuans illud Pſal. Similes illis fiant, qui faciunt ea, &c. Sur. tom. 1. in vita.

S. MAR-

S. MARCELLA VIDVA.

Dum eam vir consularis coniugem peteret, & illa coniugium abnuens, diceret; Si vellem nubere, maritum quærerem ætate magis florentem, non verò hæreditatem, &c. & ille intulisset, posse senes diu vivere, & iuvenes citò mori; eleganter & argutè lusit: *Iuuenis quidem potest citò mori, & diu vivere: senex diu vivere non potest.* Sur. tom. 1. in vita.

ALPHONSVS ARAG. REX.

Ad alia festinat calamus. properanti autem se obicit ALPHONSVS ARAGONIVS: qui Virgiliana lectione occupatus, & quidem vbi de Didonis interitu agit, cùm terræ motus concitaretur, & rem improvísam admirarentur omnes; *An mirum, inquit, vobis videatur, si in morte tam celebris Regina, terra intremiscit?* appositè & argutè ad rei novæurbationem leniendam. Panormit. lib. de Gest. eius.

RVDOLPHVS IMP. AVST. vide CVRIOSITAS.

CARNIFEX HORNANVS.

Videbat hic ciues Hornanos (opidi nomen in Batavia) acriùs in eos sæuire, quos ob Romanæ fidei constantiam neci adiudicatos ipse ad supplicij destinatum locum deducebat; ac gentium more, illo rerum statu, varia quemlibet tormentorum genera, quibus rei afficiendi, suggerere: non sine acri sale, *Malum!* inquit, *haudquaquam deinceps mea opera indiget Senatus Hornanus, cuius ciues tam accuratè tortorum officio perfunguntur.* Ex manuscript. Martyr. Holl. P. Opineri.

Vide infra ARTIVM CONCERTATIO.

ARROGANTIA. vide SVPERBIA.

ARS

ARS EIVSQUE DIGNITAS.

PIVS II. PONT. MAX.

Quanta res sit ingenuas pectus coluisse per artes, vt canit Ouidius, clarius est, quàm vt multis confirmemus: ne tamen ab instituto nostro diuertamus, quanto in pretio apud viros magnos Artes ingenuæ habitæ, paucis comprobabimus. Pio II. Pontifici tanto in honore erant artium omnium moderatrices Bonæ literæ; vt cùm de illis mentio incidisset, crebrius in hanc vocem eruperit: *Plebeis argenti, Nobilibus auri, Principibus gemmarum loco literæ esse deberent.* Sciebat prudentissimus PONTIFEX, iis ingenium molliri, & solas eripi à nullo posse. Platin. in vita.

ALPHONSVS ARAG. REX.

Queri mecum etiam ALPHONSVS videtur, & ne prætereatur metuere. Ad summam quippe eius laudem facit, quantus bonarum artium exstiterit indagator, recensere. Interrogatus aliquando, librisne, an armis maiorem gratiam deberet; *Ex libris, ait, arma, & armorum iura didici.* insinuans se libris, & quæ in iis doctrinæ, acceptum referre, quidquid haberet industriæ: ac vero verius esse illud Nasonis:

Artibus ingenuis quæsitæ est gloria multis.

Panorm. lib. 4. de Gestis eiusd.

LADISLAVS.

Quo tempore Fredericus Imperialibus infulis à Nicolao V. Pontifice Romæ cingebatur, LADISLAVS ætate non mente puer, clamitabat sæpius: *Homines mihi non videntur, qui bonas literas ignorant.* Iudicabat, & id rectè, tum demum homines
E à bru-

à brutis animantibus differre, quando animū honestarum disciplinarum vomere excoluissent.

Æn. Syl. lib. 3. Com. de Gestis Alph.

Vide APOPH. de DOCTRINA & ANIMI CULTV.

*Item de DOCTRINA IN PRETIO HABITA
& LIBRIS.*

ARTIVM CONCERTATIO.

LEO X. PONT. MAX.

NON tantū liberalium Artium scientiam habuisse quibusdam gloriæ & laudi datur; sed & eam tempore & loco depromsisse. Exemplo sit LEO X. PONT. verus Musarum patronus, qui serijs & grauissimis suis negotiis gaudia quandoque & ludicra interponens, versibus ex tempore cum Camillo Querno, qui se Archipoëtam iactabat, certare poterat. Dum namque mensæ LEONIS de more adstanti, pensum persolvere duorum carminum, foret imperatum; ilicò in hoc erupit:

Archipoëta facit versus pro mille poëtis.

cūmq; ad secundum hæsitaret, inexpectatò LEO hoc pentametrum subiunxit:

Et pro mille alijs Archipoëta bibit.

Quernus verò dum se recolligens subijceret:

Porrige quod faciat mihi carmina docta Falernum.

LEO repentè à Virgilio mutuatus, Quernum, quòd præ nimio potu podagricus esset, illudēs, conclusit:

Hoc etiam enervat debilitatque pedes.

Iouius in Elog. & Theatrum vitæ hum.

EOBANVS HESSVS POETA.

Ille etiam cum Sinapio certamen inijt, vter distichon plurium pedum ex tempore depromeret;
Sinapio

Sinapio hexametron proferente, ΕΟΒΑΝΥΣ ita orsus:

Mille boues pascunt, vitulorum millia mille,

Musca super vitulum quemlibet una sedet.

&, En victor abeo, inquit: nihil enim refert metricine pedes essent, an verò ζωνοὶ intelligerentur. Theat. vit. hum.

GEORGIUS SABINUS & STIGELIVS POETÆ,

Ad conuiuium vocati, ab accumbentibus ut versibus concertarent impulsī. SABINUS ætate & dignitate prior, cœpit:

Carmina conscribant alij dictante Lyæo,

Multa sit in versu cura laborque meo.

quod STIGELIVS citè excipiens, ac carmen inuertens, ait:

Carmina conscribant alij dictante cerebro,

Nulla sit in versu cura laborque meo.

quis non utrumque vitulâ dignum iudicauerit?

Ibidem.

ANONYMVS GERMANVS.

Addam & aliud non minùs ingeniosum quàm facetum. Orta erat contentio inter quosdam, an equestre studium literario cederet; an verò è conuerso. Equites mira in suum fauorem adducunt: quæ resumens, qui fors aderat, homo literarum non expers; *Quid, inquit, vos ipsi agnoscitis equestre studium inferius studio literarum. idè enim abiectis candidis equinis, quas olim equites gestare soliti, pennas vobis imponitis; easque in vertice aliàs inglorio, tamquàm trophæum à literatis positum, statuitis. Pennas enim, scribendi artificium, ioco interpretabatur.*

Georg. Sab. lib. 13. Metamorph.

ASSENTATIO. *vide* ADVLATIO.

ASSIDVITAS. *vide* INDVSTRIA, & LABOR.

ASTROLOGIA.

ANONYMVS EX ALPHONSI COMITATV.

NON pauci hanc artem meritò despexerunt, cùm quòd incerta sit, & coniecturis dumtaxat habeatur eius certitudo; tum quòd inutilis & vana. Senferat hoc Alphonsus Rex, quem sæpius in testem adduximus. de eo enim cùm inter nonnullos quæsitum esset, cur præter morem (erat enim in omne hominum genus munificus & liberalis) solos Astrologos præteriret: neque enim tales vnquam in Curia eiusdem visi: quidam adstantium quo Rex familiariter utebatur; *Sidera*, aiebat, *stultos regunt, impelluntque: sapiens astris imperat.* Stultos ergo Principes, Astrologos honorare consequens est; non verò sapientes, inter quos nomen Alphonsus obtinet. *Æn. Syl. lib. 4. Com. de Gestis Alph.*

ANONYMVS, & ASTROLOGVS CANDIDVS.

CANDIDVS dum se plurima ex siderum adspectibus cognouisse iactaret, & de multis rerū euentibus admonitum diceret, quidam non illepidè; *Certè, inquit, miror, quòd astra cùm sciant & videant uxorem tuam non satis pudicam, te tamen de eo non commonefaciant.* facetè eum redarguens, quòd astrorum cursus & ordinem sectans, vitæ suæ & coniugij ordinem negligeret. quo sensu dicebat aliquando Bias, ridiculos esse Astronomos, cùm non videant pisces iuxta se in litore nantes, illos qui in cælo sunt, videre se dicant. CANDIDVM autem

tem hoc Epigrammate descripsit Thomas Morus,
quod his subnectere non erit à proposito alienum:

Sapè suam inspectis uxorem CANDIDVS astris,

Predicat en vates omnibus esse bonam.

Inspectis iterùm, postquam uxor adultera fugit,

Predicit vates omnibus esse malam.

Omnibus ergo uxor quòd se tua publicat; id te

Astra licet videant omnia, nulla monent.

ANONYMA MULIER.

Nec aliter iudicauit, exiguè aliàs iudicij mentis-
que, muliebris sexus. Nam cùm Astronomi cuius-
dam ancilla, dominum suum astris nimium curio-
sè intentum in cloacam cœno refertam incidisse
aduertisset, in cachinnum soluta, tantum abest vt
de extrahendo cogitaret, vt diceret : *Meritò ac iure*
illud tibi euénit : qui cùm iuxta pedes posita ignores,
caelestibus contemplandis animum adyccis. Hoc ipsum
Thaleti accidisse, auctor est Stobæus. Cautè ergo
Alciatus in Emblematis, adducta Icarì fabula,
monet:

Astrologus caueat quicquam predicere : præceps

Nam cadet impostor dum super astra volat.

Auct. Serm. conuiual.

ASTVTIA BONA AC MERITORIA.

EVSEBIVS VERCELLENSIS EPISC.

Quemadmodum ASTVTIA fraudis doliq̃ue cõ-
scia, improbanda est; ita ea summoperè pro-
banda, quam prudentia & pietas comitatur. Ta-
m exhibuit EVSEBIVS Vercellensium Antistes,
in Arianos à Dionysio Albanensi Episcopo sub-

scriptionem sui dogmatis per fraudem extorsisse accepisset. Ille etenim artem arte delusit, dolúmque fraudulentum prudenti astutiâ compensavit. Finxit autem se quoque eiusdem opinionis cum Dionysio. hinc ab Arrianis subscriptionum indicem accipit, ut & ipse illi sua signatura adstipuletur. verum ut vidit Dionysij nomen inter primos; quasi ad rem novam stomachatus, *Vos, ait, Patrem in divinis Filio maiorem dicitis, & cur iuuenis ille, meus quandoque discipulus, hic me precedet? non id decet, aliam itaque schedulã conficite, in qua suo ordine quivis subsignet.* Dixerat: cum Arriani hæc bona fide & ad mentem eorum ita dici aurumantes, chartam lacerant, & aliam ad EVSEBIUM deferunt à nouo signandam. Quibus ille subridens, *Nec ego, inquit, nec filius meus Dionysius, vestris impietatibus subscribemus* Ex quo facto ita concludit Ambrosius: Cùm dicat Evangelium in hac generatione prudentiores filios tenebrarum filijs lucis, ecce hic ipsis tenebris prudentior filius lucis inuentus est. Ambr. Serm. 69.

TIMOTHEVS PRESBYTER ALEX. & MERETRIX.

Accusatus Athanasius quòd mulierem constuprasset, vocatur cum illa ad concilium Episcoporum. cùmque ab Arrianis subornata impudenter Athanasio concubitus obiceret, TIMOTHEVS presbyter Alexandrinus (ita enim cum Athanasio conuenerat) mulierem affatus, *Egon' inquit, te compressi mulier?* cui illa; *Tu ipse: numquid tali loco & tempore?* ita explosa meretrice, & accusatio ridicula apparuit, & Athanasij innocentia comprobata est. Quàm scitè Comicus:

Falla-

*Fallacia alia aliam trudit,
Astutum fallere difficile est.*

Sozomen. lib. 2. cap. 24.

CONSTANTINVS IMPERATOR.

Celebre etiam illud quod sequitur. hic enim sub Imperij sui exordium, periculum facturus quoniam è domesticis orthodoxam fidem amplecterentur, qui verò ab eadem desciscerent; convocatis omnibus, *Qui, inquit, dijs sacrificare voluerint, summo apud me honore mansuri sunt: qui verò id recusauerint, ilicò aula mea abscedant.* Quibusdam itaque Catholicorum aulâ exeuntibus, alijs verò dijs thura ponentibus; hos à se reiecit, illos velut domesticos suos summo honore est prosecutus. Ecquis hîc rursus in Ambrosij sententiam, quam superiori exemplo recensuimus, non descendat? Euseb. lib. 1. cap. 11.

A V A R I T I A.

I E S V S C H R I S T V S.

IN natū humano generi A V A R I T I Æ malū, quam omnis improbitatis Metropolim dicebat Bion, feram pessimam Diogenes, nostro etiam operi inserimus, vt eiusdem perniciem euidentibus exemplis demōstrems. Magnoperè autem eam cauendā prouidè nos docuit DEI FILIVS: quem dum de rebus grauib; differentem, importunè quidam è turba compellaret, fratrem moneret vt secūm hereditatem diuideret; respondit: *Videte & caute ab omni auaritia: quia nō in abundantia cuiusquam viuit eius.* rerum quippe affluentia, non causat in homine vitam, at læpius mortem. Luc. cap. 12.

S. ÆGIDIUS.

Ille quoque insignis Avaritiæ impugnator, cū de avaris mentio incidisset, roganti, cui eos assimilari arbitraretur; *Talpa*, respondit: *hic enim nullum thesaurum credit, nisi in terra, quam excavat & inhabitat.* Ex aureis Sent. Ægidij.

PIVS II. PONT. MAX.

Nec minùs ille Avaritię vitium infectatus. cū enim adstantium quispiam auaros nemini prodesse dixisset; ille, *Verè nulli nisi post mortem profunt*, adiecit. Hinc benè à SS. Patribus per porcū hieroglyphicè Avaritia designatur; qui dum viuit, eo quòd lanam non proferat, ad nihil utilis: ita etiam auarus munificentię lanam non produciens, amicos, imò & seipsum nescit; nec illis, nisi mortuus, benefacit: vt est apud Salomonem in Prou. Ex lib. Rerum memor.

THOMAS MORVS.

Vt ad Ciuilem ordinem transeamus. primus in eo THOMAS MORVS, qui rogatus aliquando, cui similem diceret auarum; *Canis*, respondit, *in præsepi.* Ille enim nec fœno vescitur, nec vt equus eo vescatur sinit: ita etiam auarus congestas opes seruat, nec ijs vti alium patitur. Idem Apophthegma hoc Epigrammate præfatus Auctor complectitur:

In præsepe canis fœno nec vescitur ipse,

Nec sinit, vt fœnum qui cupit, edat equus.

Seruat Auarus opes, opibus non vitur ipse:

Atque alios vti qui cupiunt, prohibet.

Epigramm. Mori.

IDEM

Rogatus, cui Auaritiam aptissimè compararet; *Igni*, respondit: *qui quantò plus lignorum depascit,*
tantò

tantò feruentior fit ad plura depascenda. Auaritia namque hydropis instar, sibi indulgens crescit.

—— *multa petentibus Desunt multa.*

&: *Curta nescio quid semper abest rei.*

Thomas Staplur. in vita.

HIERON. STRIDONENSIS.

Huius etiam non minùs celebre dictum. de Auaris namque verba faciens, *Auaro*, inquebat, *equè illa quæ habet, quàm quæ non habet, desunt.* anxie enim suas opes requirit, quæ sitis verò abstinet, & vti timet. Fulgos. lib. 7.

IOAN. BVGHENHAGIVS.

Hic autem verus impostor non immeritò ad calcem adiectus. abdicata namque Religione & Fide, Apostata Lutheri veneno imbutus, colubri instar, miserorum sanguinem sitiebat. Ad Daniam ergo se conferens vt zizania in medio tritici seminaret; auri cupidus, falsitatis & impietatis suæ dogmata Sycophanta pecunijs vendidit. vnde emenso Baltici maris sinu, dum Chersonense littus attigisset, conceptam animo improbitatem peperit. dicebat enim: *Tu meum habeas Dania Euangelium, ego tuos nummos. vale.* En novos Pseudoprophetas, etiam Deum ipsum cōmutare pecunijs paratos. Inc. auct.

Vide titulum de PECVNIARVM CONTEMPTV.

AVLICA VITA. AVLICI. AVLA.

CONSTANTINVS IMPERATOR.

H Eliotropium cum sole circumagi quocumque se ille mouerit, testis est Plinius. ad eundem modum Proceres aulicos ad Regis Principisve ingenium,

ingenium, etiam contra rectam rationem propendere, quotidiana testis est experientia. Hinc illi Principum abusus, & Reipub. defectus, quòd ita quosuis in suam Curiam, imò & ad aures admit-
tant. Videbat id CONSTANTINVS I. PERATOR, qui Principum aulas improbis hominibus refertas intuitus, *Apagite*, inquebat, *tineæ & sorices Palatij* Quid prudentius à prudenti Imperatore dici potuit aut debuit? Niceph. interp. & Scholiast. lib. 8. Eccl. hist. cap. 14.

ALEXANDER SEVERVS.

Hunc, grauium scriptorum vestigijs inhærens, Catholicorum cœtui annecto; licet plures eum inter Ethnicos referant. vt vt est, plura certè Christiano homine digna, sub vitæ finem & fecit & dixit. Inter alia, urbem & domum suam hominibus non necessarijs purgabat, inter quos Aulicorum plures recensebat. dicebat autem: *Malus pupillus est Imperator, qui ex visceribus prouincialium, homines Reipub. inutiles aleret.* Aelius Lampridius in Alex. Seucro.

ANONYMVS.

Quidam Aule sectator assiduus, iniuriarum Palatinarum patientissimus, cùm rogaretur, quomodo rarissimam rem in aula consecutus esset; *Iniurias*, respondit, *accipiendo, & gratias agendo.* Dixit fortassis in hunc sensum aliquando Persius:

——— *Vide sis, ne maiorum tibi fortè*

*Limina frigescent: sonat hîc de nare canina
Littera.*

Bruson. lib. 1. cap. 5.

ALPHONSVS ARAGONIVS.

Sentiebat etiam hic, quanta esset in aulis Principum,

pum, assentatorum aulicorumque pernicies. Ex Sicilia namque nauem soluens, ubi in altum processisset, vidit garras aues circum triremem nantes, & bolos à nauigantibus proiectos accipientes, ac ilicò auolantes. has cùm amicis digito monstrasset; *Persimiles, ait, sunt garris istis aulici aliquot mei, qui simulac concertantes à me beneficium accipiunt, statim aufugiunt.* Notauit veros aulicorum mores, qui fideles se Principibus præstant, quoad dolosi spes affulserit nummi. Panorm. lib. 1. de Gestis Alph.

FREDERICVS KERN GERMANVS.

Vnicam autem gratiam in Principum aulis dormire, suo dicto confirmauit iste: videbat assiduitatem & diligentiam cuiusdam Cancellarij Imperatoris Maiestatis; & subridens, *Quid, inquit, domine Cancellarie, tam strenuus & assiduus es rebus aulicis componendis? Eadem est gratia cacanti in medium conclaue, & euerrenti.* notans lentas aularum gratias; quodque verus sit hic rithmus:

Κύεα, qui senuère, canunt, ἐλέησον, in aula.
Philip. Camer. in Postil.

THOMAS MORVS CANCEL. ANGL.

Hinc benè & doctè ille. cùm Episc. Rossensis ei statum & ordinem in aulâ gratulatus esset, *In aulam, ait, inuitus veni: & in eadem non minùs male hereo, quàm quisquam equitandi insolens haeret in cella.* Meminerat, vt erat lectionis magnæ, illius Lucani:

—— Exeat aula,

*Qui volet esse pius. Virtus & summa potestas
Non coeunt.*

Th. Staplur. in vita, cap. 7.

BAPTIS

BAPTISMVS.

IESVS CHRISTVS.

S Alutiferæ curationis auxilium, quod reuelante gratiæ tempore (vt loquitur Beda in Lucam) contra peccati vulnus BAPTISMVS præstat, hoc loco referamus , huius operis ordo postulat. Cuius quidem dignitatem ac supremam necessitatē eiusdem primus auctor & institutor CHRISTVS IESVS, paucis insinuauit: dum Nicodemo, qui ad se nocte venerat , inquisiturus, quomodo homo denudò nasci posset, eo quòd Christus necessarium docuerat ad salutem renasci ; respondet : *Nisi quis renatus fuerit ex aquâ & Spiritu sancto, non potest introire in regnum Dei.* quibus & Baptismi utilitatem, atque absolutam necessitatem , quoad omnes omnino, non eam quam præcepti vocant Theologi, sed quam mediij, explicatè insinuat. Ioan. c. 3.

I D E M.

Quia tanta futura erat ad salutem eius necessitas, hinc post resurrectionem ad Patrem transiturus, cum discipulos suos per vniuersum orbem mitteret, vnicum hoc mandatum dedit; *Euntes ergo docete omnes gentes, baptizantes eos in nomine Patris, & Filij, & Spiritus sancti.* quo dicto & Sacramenti necessitatem docuit, & formam essentialem, ac Sacramenti necessitate (vt habet phrasis Theologorum) necessariam, expressit. Matth. cap. vlt.

S. PETRVS APOST.

Ille etiam post acceptum Spiritum sanctū cum habita insigni illa oratione de Christo, eiusq; resurrectione, quidā de circumstantibus dicerent, *Quid facie-*

faciemus viri fratres? respondit: *Pœnitentiam agite, & baptizetur unusquisque vestrum in nomine Iesu Christi, in remissionem peccatorum; & accipietis donus Spiritus sancti.* en geminus Baptismi effectus: peccatorum remissio, & gratiæ infusio.

Act. cap. 11.

EVNVCHVS CANDACIS REGINÆ ÆTHIOPVM.

Quàm prudenter & prouidè iste Ierosolymis in patriam rediturus Philippum in suum currum exceperat! Et edoctus ab eo Christum, dum ad riuum quendam venissent; *Ecce aqua*, inquit Philippo, *quis prohibet me baptizari?* Cui ille: *Si credis ex toto corde, licet.* insinuans, adultis vt Baptismi effectum consequantur, opus esse vera fide. Act.c.8.

S. SYLVESTER.

Neque hunc latuit diuina illa, quam per BAPTISMVM consequimur, ritè eum suscipientes, virtus. Constantinum namque Imperatorem sacro fonte expiaturus, ipsum Lauacrum manu ostendens, & Sacramenti veram significationem exponens; *En hanc aquam*, inquit, *Imperator: hæc diuina virtutè per viuificæ Trinitatis inuocationem concepta, quemadmodum extrà, corpus hominis abluit; ita etiam animam intrà, à sordibus & inquinamentis mundanis, splendidiorè radijs solaribus efficit.* quod esse verissimum in se optimus Princeps expertus est. Niceph.lib.7.Hist.cap. 33.

VICTOR PROCONSUL CARTHAG.

Tempus viresque deficerent Diuina narrantem. Ciuilis ordinis, & quidem vtriusque sexus, exempla adducantur. Quid autem de VICTORE ciue & Proconsule Carthaginensi dicam? ille ad negandam fidem Orthodoxam à Carthaginensi Dominatore solici-

solicitatus, memor eiu quod in Baptismo seruare
 spoponderat, indignabundus. *Me, ait, omni tormen-*
torum genere Rex discrutiet: si consensio, frustra
Christi Baptismate iniunctus sum. Viet. lib. 3.
 Hist. Vandal.

CLODOVÆVS REX FRANC.

Hunc Clotildis vxor crebrius, at in vanum, de
 Baptismo suscipiendo, adhuc Gentilium erroribus
 imbutum, adhortabatur. Tandem cum Sueuis &
 Alemannis signa conferens, cum sibi toti que exer-
 citui summum discrimen imminere videret, ac
 decorum suorum numen nequicquam imploraret;
 profusis lachrymis, & oculis in cælum elatis, *Iesu*
Christe, ait, quem Clotildis vxor mea colit, ac Dei
Filium predicat, ad te confugio. Tu mihi si adfueris
propitius, & sentiam reipsa eam virtutem quam tibi
deuoti de te predicant; me totum tibi tradam, tuum-
que Baptismum suscipiam. Orationem & votum
 Deo acceptum fuisse & probatum, memoranda ac
 celebris victoria declarauit. Hincmarus in vi-
 ta S. Remigij.

S. DIONYSIA.

Agite & faminci generis prudentiam viri æmu-
 lamini. Habuit suas easq; memorabiles vetus Lex;
 sed quid illæ ad nostram DIONYSIAM? Quam nul-
 lis cruciatibus potuerunt Arriani Vandali in suum
 pertrahere errorem. at inter plagarum ictus, dum
 vnicum filium, cui Maioricus nomen, ætatis tenel-
 læ, pœnarum timore trepidantem cerneret, eum
 confortabat confirmabatque, dicens: *Ne memento*
fili, quod in nomine SS. Trinitatis, in matre Catholi-
ca baptizati sumus. Ne perdamus indumentum nostra
salutis, ne veniens inuitator vestem non inueniat nu-
ptialem.

ptialem. Quis non hanc vocem meritò exosculetur? quis non rem ipsam sedulò imitetur? Monet itaque Hymno 6. Cathemer. Prudentius:

*Cultor Dei memento,
Te fontis & lauacri
Rorem subisse sanctum,
Te Chrismate innotatum.*

Vict. Vitic. lib. 3.

B A R B A.

FRANCISCUS BORBONIVS.

O Ccurrit nunc de corporis ornatu, qui in BARBA etiam consistit, breuibus agamus. Cùm pro Rege Galliarum contra Carolum V. bello præesset FRANCISCUS BORBONIVS, iuuenis adhuc & imberbis: Marchio Guastanus ei illudens nuntiavit, quòd nimis exigua barba vestiret mentum, ut cum eo congredereetur. cui BORBONIVS: *Non barbis pugnandum, sed ensibus.* Corozetus.

ANONYMVS.

Haud secùs alius quidam hoc nostro æuo, cuius nomen de industria non addimus, vir alioquin non parvæ eruditionis: cùm in re seria suam mentem explicaret, reprehensus à cauillatore sibi assidente, ea de re iudicaret, ubi barba excreuisset promissior, respondit: *Hem homo barbate; non barba iudicium fert, sed mentis sagacitas: neque barbis causa defenditur, sed linguis & rationibus.*

LEGATI ANONYMI.

Ferunt LEGATOS quosdam à Venetorù Senatu missos olim ad Henricum Franciæ Regē: qui, quòd eos parùm adultos barbatosque conspiceretur, vix respon-

responso dignatus est: adiiciēs etiam, *Maturius hac de re iudicium feretis, ubi barba vestra maturior fuerit.* Verū alter illorum se à Rege exceptos intelligens, in hunc ferè modum, scomma in eum retorfit:

Si promissa facit sapientem barba, quid obstat

Barbatus posset quin caper esse Plato?

Ex lib. Rerum memorab.

CAROLVS V. IMP.

Quod Alexandro Macedonio attribuit Plutarchus, id ipsum nostri sæculi, imò & fortassis futuri Alexandro, CAROLO V. adscribunt, qui eiusdem Facta Dictaque memoranda posteritati consecraverunt. Hic igitur dum graue illud bellum gereret cum Francisco Rege, & iam omnibus ad prælium incundum paratis, ab Equitatus primario ductore rogaretur, an aliud fieri imperaret; *Nihil, inquit, quam ut enses aptetis radendis Gallorum barbis.* Insinuabat autem cominus, non eminus pugnandum: quo in genere pugnae barbae impedimento sunt, ne illa hostis hostem apprehendat. Ex vita eiusdem.

CIVIS BASILIENSIS ANONYMVS

Percontanti, cur tam protensam barbam enutrit, respondit: *Vt intuens hos meos pilos, me non mulierem, sed virum intelligam.* Barba quippe virum ornat, monetque non nisi virilia aggrediatur. Hinc benè in Metamorph. Ouid.

Turpis equus nisi colla inbaependentia velent,

Pluma tegit volucres, ouibus sua lana decori est,

Barba viros hirtaque decent in corpore seta.

Conr. Lycosth. in Apophth.

BARBARIES.

ALPHONSVS ARAGONVM REX.

A Tringimus BARBARIEM : sed quantum eam execrati viri sapientes ! Certè ALPHONSVS ARAGONVM REX, intuitus Syracusanum equitem agrestibus moribus, Barbarum eum nuncupabat. at is Barbari nomen ægrius tulit. cui Rex: *Ego non à genere, sed moribus Barbarum soleo definire. Nobilem existimabat illum, quem nobilitat sua virtus.* Panorm. lib. I. de Gestis eiusdem.

SIGISMVNDVS IMP.

In Constantiensi Concilio reprehensus à Cardinale Placentino, quòd contra Grammaticorum præscripta verba quædam pronuntiasset, non minus scitè quàm festiuè, *Placentine, ait, si supra leges sumus, quare supra Grammaticam esse non possumus? Placentine, Placentine, quibus places, placeas; mihi certè non places.* Auctor Serm. conuiual. & Chronica Germ.

BARTOLVS IVRISCONS.

Ille Iureconsultorum neotericorum princeps, vti cetera benè, ita hoc malè, cum summo tamè applausu, dixit: *De verbis non curat Iurisconsultus.* Lud. Viues lib. I. Corrupt. discipl.

BEATITVDO. vide GLORIA CÆLESTIS.

BELLI STVDIVM.

IESVS CHRISTVS.

BELLI commodum perniciemque aggredimur. neque enim semper suo fructu caret MILITIA, cum moderatione & legitima auctoritate suscepta,

pta, sine quibus tamen non attingenda. Quod Redemptor mundi CHRISTVS breui compendio insinuauit, quando ad montem Oliueti, à Iudæis apprehensum, Simon Petrus educto gladio vindicare de vi illata nitebatur; aiebat enim: *Conuertere gladium tuum in locum suum: omnes enim qui acceperint gladium, gladio peribunt*. Qui nimium sine legitima potestate eum acceperint, sed propria auctoritate, ac quasi à seipsis: neque ad cōseruandam iustitiam, sed in vindictam: exigit enim iustitiæ ratio, vt tales similiter gladio pereant; iuxta preceptum Dei, Genes. cap. 9. Math. c. 26.

RVDOLPHVS IMP. AVSTRIACVS.

Ciuiles attingimus, & quid illi ex Bello commo-
di retulerint. Ad gloriam quippe consequendam non parum facere Armorum decus, exemplo est RVDOLPHVS IMP. Austriacus: qui dum victum à se Bohemix Regem excepturus, fidemque ab eo accepturus esset, monitus se regio cultu trabeaque adornaret, eò quòd Bohemus se splendida veste foret exhibiturus; renidens, *Absit*, inquit, *Rex Bohemia toties meam gryseam togam explosit; nunc illa ipsummet explodet*. & ad suos conuersus; *Vos*, inquit, *arma & equos expedite, accinctique & instructi, vt ad pugnam stete. Decus Teutonicorum armorum, non vestium, aduenis istis ostendite. hoc me vobisque dignum*. Refert I. Lipsius Monit. Polit. lib. 2. cap. 17.

ANTONIUS A PRATO CANCELL.

Senserat identidem iste, belli incommodo suum etiam adesse commodum. Nam Francisco I. Gallis imperante, quidam Mediolanum funditus diruendum suadebant. ad quod Cancellarius; *Minimè*
verò

verò rectè illud, inqu it: quin potius ut vitiosi humores è corpore pharmaco pelluntur, ita bello Mediolanensi Gallia ab improborum face purgabitur.

Ægid. Corroz.

ALPHONSVS ARAGONVM REX.

Iustissimas ob causas Bellum geri posse, pietatis & iustitiæ amans REX ALPHONSVS declaravit. Piceno etenim sedi Romanæ rebellanti, pro Eugenio Pontifice bellum fecit, & ad pristinum iugum Picenum reduxit. Quid rependeret Pontifex? vrbes aliquot offert. Renuit ille: & *Non, inquit, præda aut questus, sed Ecclesiæ gratia hanc expeditionem suscepi.* Significabat autem, non nisi pro aris & focis, patriæ ac religionis defensione, bellandum.

Panormit. lib. 3. de Gestis eiusdem.

ANONYMVS.

Cùm autem pacatis tranquillisque temporibus maximè à domesticis turbetur Ecclesia, nō ita malè sensillè dicendus est is, cui frequens in ore: *Bellum Turcicum pax est Ecclesiæ.* Insinuabat plerisque Principes, præsertim Germaniæ, nisi eo occuparentur, in Ecclesiam insurrecturos. *Gregor. Richt. in Axiom. sacris.*

BELLICA FORTITVDO;
vide FORTITVDO BELLICA.

BENEFICENTIA.

ALEXANDER SEVERVS IMP.

BENEFICENTIÆ nunc commemorationi aliquantum vacemus. illius enim gratus inter homines vsus, quippe quæ eos Deo (cui proprium benefacere)

nefacere) reddit maximè similes. ALEXANDER SEVERVS, quem probabili coniectura inter Christianos annumerari posse suprà diximus, vsque adèd in omnes beneficus exstitit, vt etiam de se nihil meritos ad petendum quippiam inuitaret, diceretque: *Quid est quod nihil petis? An me tibi vis fieri debitorem? Pete, ne priuatus de me querare.* agnoscebat Principes viros maximè præ alijs decere beneficentiam. Pont.cap. 11. de Liberal. Æl. Lampr.

IDEM

Percontanti, quísnam videretur sibi Rex optimus; *Qui, ait, amicos muneribus retinet, & inimicos sibi beneficijs conciliat.* Max.Serm.9.de Magistrat.

ALPHONSVS REX.

Nec defuit huic isto in genere sua laus. Intelligebat quosdam acceptis à se beneficijs ingratos esse: & *Esto, inquit, nequaquam tamen effecturi, quo minùs ipse & humanus sim & beneficus.* Considerabat non esse prudentis, ob malorum ingratitude, bonis desinere esse beneficum. Panormit. lib.1.de Gestis eiusdem.

IDEM.

Quinimò, venientibus ad se Ioannæ Neapoleos Reginae oratoribus, vt eam contra Martinum v. Pont.Max. qui indignam quæ feudatarium Ecclesiæ regnum obtineret iudicabat, defenderet, acquieuit. dissuadentibus verò consiliarijs, vt qui durum & anceps fote bellum indicarent, respondit: *Hercules etiam non rogatus laborantibus subuenire consuevit. dignum igitur vt & ego famina assistam, & tantoperè roganti opem feram.* Ibidem.

Vide de eodem Apophth. de AMICITIA.

IDEM

IDEM

Progredi volenti cursum rursus sistit: iniquum enim futurum existimo, aliquam eius laudem silentio præterijisse. Cumque (vt constat) naturæ fuerit admodum beneficæ, quod mente retinebat, crebrius verbis exprimebat, dicens; *Oblatrantibus canibus & rebellantibus, offula obijcienda.* Intelligebat autem maleuolos homines beneficiis vincendos. Pontan. cap. 30. de Liberal.

LYDOVICVS XI. FRANC. REX.

Ille item, præsertim in eos qui vitæ aut operum sanctitate præfulgerent, admodum beneficus & liberalis. causam verò rogatus; *Quia, inquit, horum precibus, vita diuturnitatem conciliari mihi posse confido.* Claud. Seissellius.

Vide titulum de LIBERALITATE.

BENEFICIUM ECCLESIASTICVM.

CLEMENS III. PONT.

QUâ moderatione ac circumspectione in Beneficiorum Ecclesiasticorum collatione vsi sint plerique, paucis videndum: vt exemplum præbeamus iis, qui illa contra primæuam eorundem institutionem, hac ætate, non sine graui scandalo, & honorum iniuria, in quoscunque tandem conferunt; affectu humano supra rectam rationis regulam dominante. Vix dici potest, quantum in hoc genere splendoris assecutus sit CLEMENS QUARTVS. Instabant apud eum consanguinei, vt nepoti qui tria Beneficia obtinuerat etiam alterum adiceret. At ille, tantum abest vt insulsæ petitioni

acquiesceret ; quin statim bina ei eripuit , & meritis de iisdem prouidit ; clarè in hanc vocem erumpens : *Non est dignus Petri successor, qui plus cognitioni quàm pietati largitur.* Rarum , & cui neicias an par exemplum. In vita.

CALIXTVS III. PONT.

Eiusdem hic dignitatis & mentis. Pluralitatem beneficiorum aspernatus ; priusquam ad sacrum Pontificatus culmè attigisset, vnico dumtaxat contentus , benè illi & piè deseruiebat. rogatus autem, cur , cùm posset plura accipere , recusaret ; *Quia,* inquit , *unicam eamque virginem in uxorem peto.* Ex lib. Rer. memor.

ADRIANVS VI. PONT.

De prioribus Italia, de isto nostrum hoc Belgium se extollet. Ex infimo quippe gradu per solam virtutem in id euectus supra quod ascendendi nō potest, rarissimè, & non nisi difficulter cognatos propinquosque ad Beneficia promouebat. Non quidem, quòd si idonei essent, eis non faueret ; sed quia (vt dicebat) *edificare Sion ex sanguinibus volebat.* docens , sacris in rebus necessitudines sanguinis & naturæ non esse spectandas. Onuphrius Panuinus in vita eiusd.

LVDOVICVS XII. FRANC. REX.

Neque hunc latebat sui tēporis abusus ex Beneficiis indignè collatis exurgēs. vnde, vt erat ingenio saceto, cū intellexisset indoctos, & ob id inidoneos, ad Ecclesiasticas Præfecturas euectos ; ita cauillabatur : *Quàm est potior conditio asinorum, quàm equorum!* Quippe equi cursu defatigantur, vt asinis Præfecturas Ecclesiasticas & Prabendas deferant. meritò indignè ferens, vix vllò habito delectu , quādoque
tam

eam leuiter de Ecclesiasticis dignitatibus sine vlllo fructu disponi. Hinc laudanda (& vtinam vbiuis locorum in praxi obtineret!) illa TRID. SYNODI constitutio, Sess. 22. cap. 4. qua irrita decernitur omnis prouisio, facta ei, qui habilitates ad eam requisitas integrè non habuerit. P. Æmil. in vita.

BLASPHEMIA.

Et quomodo punita?

IESVS CHRISTVS.

IRreligiosa se modò offert conuictorum iacula-
LIX BLASPHEMIA: quam dijs Gentium inuisam docent historiæ: quid ni etiam vero Deo ingrata & abominabilis? Scripturarum seriem percurramus, vbi non ea repressa & punita? Quin DOMINVS IESVS sæpiùs, ac præsertim calumniantibus Pharisæis, Hic non eiicit dæmones, sed in Beelzebub principe dæmoniorû: postquam eos falsitatis cõuicisset, subiecit. *Ideò, scilicet vt intelligatis quantum peccetis, dico vobis: omne peccatû, videlicet aliud, & blasphemia remittetur hominibus, id est, facile potest remitti per pœnitentiam: Spiritus autem blasphemia non, id est, difficulter, remittetur.* Blasphemiam Spiritus vocans eam, quæ cõtra manifestam Dei operationem committitur. Hinc addit: Qui autem dixerit contra Spiritum sanctum, &c. id est, qui manifesta Spiritus sancti opera dæmoni attribuit, &c. Matth. c. 12. Marc. 3. Luc. 12.

LATRO BONVS.

Suspensio vtrinq; cum Christo LATRONE, cum populus spectans Christo illuderet; vnus de his qui pendebant latronibus, eius etiam dignitati per-

blasphemiam derogabat, dicens: *Sit tu es Christus, saluum fac teipsum, & nos.* quem alter increpans, respondit: *Neque tu times Deum, quòd in eadem damnatione es?* insinuans Blasphemiam, initio sapientiæ quod est timor Domini, aduersari.

Luc. cap. 23.

CLERICVS ANONYMVS.

Repressum per illos; at ab his impiè non impunè tamen vsurpatum Blasphemie portentum. CLERICVS quidam multa per vim prætendebat, cùmque instante prælio, Missæ sacrificio interesset, ac fortè illud Euangelium occurrisset in quo de humilitate differens Dominus concludit: *Omnis qui se exaltat humiliabitur, &c.* ad circumstantes, ut erat ambitiosus; *Falsa, ait, est hacce sententia. Nam si ego me aduersarijs meis humiliter inclinassem; non tot hodie possessionum ac clientum copias haberem.* Vah impurum tympanotribam, quem secundæ res nimium supra se extulerant. Petrus Damian. Epist. 14. ad Desid. Abbat. cap. 6.

SACERDOS ANONYMVS.

Æquè, at alio in genere impius ille. Aurelium obsidentibus Gothis, Anianus eiusdem Episcopus vnà cum clero Sanctorum Litanias per vrbis muros decantabat: vidēs id SACERDOS è captiuis vnus (quem ne captiuitatis iugum ab oris procacitate coërcebat) cùm in acie vrbi vicina versaretur, vocem intendens; *Cassa spe, clamat, duceris Aniane, si verbis abigi aduersarios posse credis: eadem preces validis urbibus nihil profuerunt.* Audiūt Sancti, & ilicò blasphemum vita spoliant. Greg. Turonens. lib. 2. hist. cap. 7. Sidonius lib. 8. Epist. penult.

IULIANVS IMP. APOSTATA.

Venio nunc ad IULIANVM APOSTATAM, cuius insignes blasphemias horret animus meminisse. Ex Christiano factus Christi persecutor, ex Rege tyrannus, cùm suscepto aduersus Persas bello, in ipso prælio diuinitus (vt putatur) lethale vulnus inter costas lanceâ acciperet, sanguine è vulnere in manum recepto, eoque in cælum eiaculato, in hæc verba impiè erupit: *Exple iram tuam Galilae* (ita enim Christum per contemptum appellabat) *fa-teor, viciisti.* & ita infelicem animam non diu post exhalauit. Sozomenus, Rufinus, Eutropius, Fulgos.

*FREDERICVS II. IMP.

Quanta & illius intemperies in vita & lingua fuerit, non inquireret curiosius, qui considerabit vulgare illud, quod frequēs ei in ore dicebat enim: *Tres fuere insignes impostores, qui humanum genus seduxerunt; Moyses, Christus, Mahumetes.* non veritus sentire, quod (vt auctor est Arnob. lib. 1. contra Gent.) olim non nemo improbus: Christum magum fuisse, & ex Ægyptiorum adytis, potentiū Angelorū nomina habuisse. Refert I. Lips. Mon. Polit. lib. 1. cap. 4.

ALPHONSVS X. HISPANIÆ REX.

Mitior quidem huius, sed parum melior vox aut sensus. Solitus Prouidentiam identidem culpare, parum sapienter ac prouidè, *Si principio mundi,* aiebat, *Deo adfuissem, multa melius ordinatiū-s-que condita fuissent.* Miselle, quò linguâ & mente abis? at notabile, & hunc regno & priorem imperio priuatos, in publico odio & infamia obijisse. Ibidem.

ANONYMI.

Relatu non indignum, quod Bononię adscribunt probati Scriptores. Cum in conuiuio gallus mira arte assatus dissecaretur, vnus conuiuiarum, *D. Petro*, inquebat, *hunc gallum redintegrare impossibile foret.* alius autem, *Quin nec ipse Christus id posset*, subiungebat. Ad has voces, res mira! gallus profilit, & collisis alis iusculum quo erat perfusus in discumbentium ora diffudit. Blasphemi verò leprâ hereditariâ puniti. Vincent. lib. 25. cap. 64. Spec. exempl. recens editum.

IOANNES ZVVICKIUS.

Ista alterius, hæc nostri xui & soli: quorum relatione hanc chartam adhuc maculo. Oliuerio Tempelio Hallensis Hannoniæ opidi expugnationem cogitante, IOANNES ZVVICKIUS homo non religionis solum & vitæ improbus, sed & linguæ, canere triumphum re infecta, & palàm inclamare cœpit: *Ego meis manibus Hallensi muliercula* (statuam B. Virginis crebris miraculis illustrem appellans) *nasum abscindam.* Audit Diua, & quasi talionis pœnam machinata, procurat mox vbi ad vrbis muros peruentum, illi ipsi scurræ plumbeâ glande nasum auferri. en vindictam: quam perperius subsequutus est sarcasmus, iocosus tamen, inter commilitones, qui hominem identidem ad nasum recipiendum Hallas mittebant.

I. Lips. de Diua virg. Hallens. cap. 7.

IOANNES RYSSELMANNVS.

Eadem expeditione iste sacrilego ore profuderat; *Statuam illam Hallensis Maria, Bruxellam faxo ut deferam* (agebat enim isthîc præsidarium) *& igne subiecto palàm concremabo.* Audiit & hunc Virgi-

Virginis filius, atque impio illi blasphemum in suam matrem os, mentumque & mentem, tormenti ictu abstulit. Ibidem.

BONA FORTVNÆ.

ALPHONSVS MAGNANIMVS ARAG. REX XVII.

FORTVNÆ BONA, exteriore specie delectabilia, in se tamen fucata & mundanam fragilitatem præ se ferentia, attingimus: & te, inclyte ALPHONSE, eadem despicientem. qui rogatus, quemnam felicem diceres; *Eum*, inquis, *qui, cum hæc bona fucata sibi maximè arriserint, eadem deserit.* Legebat quandoq; illud Senecæ in Agamemnone:

—— *Quicquid in altum*

Fortuna tulit; ruitura leuat.

Modicis rebus longius animum est.

Lucius Marinus Siculus, lib. 11. de Rebus Arrag.

CAROLVS V. IMP.

Iam ætate maturus, ac bello fractus, in Cœnobium regulariū D. Hieronymi secesserat. ad quem visendum cum venisset Franciscus Borgia, ac post triduum recessum pararet, ducentos aureos ab eo dono accepit. qui & dixit: *Exiguum id munus testor: sed iam bonis exutus, priuatam personam gero. cuius si statum consideres, numquam à me maius beneficium accepisse cognosces.* Ribadin. in vita Borgia lib. 2. cap. 12.

• Vide Apophtheg. de CONTEMPTV MVERNVM & PECVNIARVM NEGLECTV.

BONVM.

B O N V M.

LVDOVICVS BAVARVS.

DE vero **B**ONO acturis præsentem **ſc** exhibet
 LVDOVICVS BAVARVS: qui inquirenti, quæ-
 nam bonorum nomine intelligenda cenſeret, ait;
Sola bona, quæ honeſta. Ita ante eum in Paradoxis
 Cicero. Heu quàm multi ab hoc ſcopo declinant,
 quibus in ore & corde:

—— *Quærenda pecunia primum,*
Virtus poſt nummos. ——

A N O N Y M V S.

At difficilis inter homines veri **B**ONI cognitio.
 unde rogatus vir prudens & diſertus, cur homo
 faciliùs ad aliarum rerum quàm veri **B**ONI cog-
 nitionem deueniret; *Deſectũ*, inquebat, *recti iudicii.*
velut enim apud Plutarchum, Scythæ iuravit, ſe mal-
le audire hinnientem equum, quàm canentem cytha-
rædum; ita paucis ineſt veri BONI ſenſus. quod venu-
 ſtè admodum & doctè ſuo æuo etiam expreſſit Iu-
 uen. Sat. x. cùm ait:

Omniſus in terris, quæ ſunt à Gadibus uſque
Auroram & Gangem, pauci dignoſcere poſſunt
Vera Bona, atque illis multum diuerſa, remota
Erroris nebula. Quid enim ratione timemus,
Aut capimus? quid tam dextro pede concipis, ut te
Conatus non pœniteat votiſque peracti?
 Ioan. Cuſpin.

B O N V S V I R.

CLEMENS ALEXANDRINVS.

R Aram auem in terris producimur in mediũ
 VIRVM BONVM: de quo rogatus aliquando
 CLEMENS

CLEMENS ALEXANDRINVS, quid sentiret; *Eum*, inquiebat, *hoc nomine appellari posse existimo, qui paucissima desiderat.* Semper enim inops quicunque cupit. Theat. vitæ humanæ.

PETRVS ALDOBRANDINVS CAR.

Hic sciscitanti, quodnam in terris potissimum referant mortales ex virtute præmiū; *Vt viri fiant*, inquit. Præclara vox! vir enim à virtute, & est & dicitur. Henric. Farnes. in Apoph. de Principe.

IDEM

Frequentius dicebat: *Bonis viris leges scriptæ non sunt, quia ultro quod honestum est sequuntur. quia Oderunt peccare boni virtutis amore.* Ibid.

EVGENIA PHILIPPI FILIA.

Huic sola ea cura, vt viro bono desponsaretur. Cùm itaque eam pater in coniugem tradere destinasset filio Præsidis Aquileæ, iuueni moribus & forma corporis insigni, non tamen Religione orthodoxa imbuto; ita eum affatur: *Pater, maritus moribus non natalibus eligendus: illo enim, non parentibus eius utimur.* quod pulchrè expressit Poëta:

Aliena laudat, qui genus laudat suum:

At sua laudat, mores qui probat suos.

Theat. vit. hum.

Vide titulum de PRINCIPE BONO.

BREVILOQUENTIA.

PAPIAS S. IOAN. EVANG. DISCIP.

Quam verum sit illud Ausonij,
Nemo silens placuit, multi breuitate loquendi;
in præsentī dicendum. PAPIAS D. Ioannis Euangelistæ discipulus, videbat multum sermonis procacitate & copia Dei veritatem lacerari, & ad populum

Iam conuersus; *Non, inquit, multa dicentibus, sed pauca & vera tradentibus auscultandum.* Euseb. hist. Eccles. lib. 3. cap. 19.

PAMBO ABBAS

Præclarus hac in re vir. Theophilo namque Episcopo se aliquando aduenti, & spiritualem refectiorem postulanti; *Si, inquit, taciturnitate mea & verborum raritate non reficeris, neque sermonibus meis reficeris.* Hist. Tripart. lib. 8. cap. 1.

S. ANTONIVS EREMITA.

Non minor hic Eremita quàm Breuiloquij cultor exstitit. Reuersus quippe ad discipulos, cùm multa de Paulo Eremita intricatè diceret, eò quòd eidem Athanasij pallium laturus, reditum pararet; discipulis multa inquirētibus, solum hoc responsum præbuit: *Tempus loquendi, tempus tacendi.* Breuis vox, si literas & syllabas spectes; si sensum mentemque dicentis, perampla. Hieron. in vita Pauli primi Erem.

ANONYMVS.

Iurisconsulto pluribus verbis rem exiguam per ambages deducere, ait non illepidè quidā illud Pythagoræ; *Haud est artis multis pauca, sed paucis multa dicere: si enim prius ex arte reputetur, quis eo in genere superabit hirundines aut picas?* Hinc benè monet in arte Poëtica Horat.

Quicquid præcipies, esto brevis: ut citò dicta

Percipiant animi dociles, teneantque fideles.

Ex lib. Rer. memorab.

FERDINANDVS IMP. & MILES.

Fideli relatu ad me peruenit, FERDINANDO Cæsare orbis habenas moderante, quendam, quòd multis annis eius obsequio se deuouisset, ac vitam

non

non semel ancipiti periculo exposuisset, solutionem efflagitasse. Insinuatur IMPERATORI, adesse veteranum militem qui se præstoletur. at ille, In aliud, magisq; opportunū tempus redeat oportet, inquit. MILES, quid ageret? instat, vociferatur: *Ecquid,* inquit, *tantūmne itineris frustra confecero? tribus tantūm verbis omne exequemur negotium: neque res magna est, Imperatorem tribus dumtaxat verbis præbere aures.* Defertur iteratō ad FERDINANDVM: qui importunitate hominis victus, Veniat, inquit, ea lege, vt non plura quā terna verba depromat. paret alter, & ad Imperatorem ingressus, cū rogaretur, quid peteret. ita effatur: *Solutionem vel dimissionem.* cui FERDINANDVS replicādo, *Non dimissionem,* ait, *sed solutionem.* Incerti auct.

CÆCITAS.

PYGMEIVS PRESB. ROMANVS.

QUām grata nonnullis, ex se alioquin formidabilis, & perpetuæ noctis imaginem referēs CÆCITAS; monent illi ipsi, ex ordine prosequamur. Principatum inter eos obtineat PYGMENIVS: qui nihil æquius in vita tulit, quā se luminibus priuatum, ne Ecclesiæ hostes vel inuitus deberet intueri. Quare Iuliano Apostatæ factus obuius; qui ironicōs dicebat, Gratiās dijs ago PYGMENI, quōd te videam; constanter respondit: *Et ego gratiās ago Deo meo, quōd te non videam.* Tanto animo cæcitatem tulit, quanto tyrānum despexit. Beda in Martyr. Sabell. lib. 5. Euseb. & alij.

INARIVS CHALCEDONENS. EPISC.

Consimilem expertus fortunam, non dissimilem
etiam

etiam constantiam exhibuit. Nam cùm ei crebriùs insonaret præfatus Apostata, Galilæum suum (ita Christum familiari voce per contemptum vocabat) pro visu recipiendò, quem ei senium & vigiliæ ademerant, deprecaretur: animosè in eum debachatus; *Gratias, aiebat, ago Deo, qui mihi visum ademit, ne te hominem tam impium aliquando vel inuitus videre cogerer.* Fulgos. lib. 6. cap. 2. ex hist. Ecclesiast.

ANTONIUS EREMITA.

Intellexerat & hic Didymum ægriùs ferre oculorum & luminis orbitatem. Quare ad eum properans; *Nihil, inquit, ô Didyme te offendat, quòd carnalibus oculis tibi orbatus videris: desunt quidem tibi oculi animales; sed latere, quòd eos habeas, quibus Deum videas.* parum esse reputans oculis corporis priuari, modò mentis lumen in nobis retineamus. Hist. Eccles. Euseb. & Tripart.

I D E M

Iteratò Didymum affatus, rogabat, vtrùm se oculis captum doleret; eoque subticente, vrgebat responsum, ac tandem in ærorem fateretur, compellit. quo cōfite, rursus ANTONIUS: *Mirror virum prudentem eius rei dolere damno, quam formicæ & culices habent; & non latari illius possessione, quam Sancti soli & Apostoli meruerunt.* Insinuans, oculos mentis potiores corporeis luminibus. Socrat. lib. 4. Hist. c. 20.

PETRVS ABBAS CLARÆVALL.

Hic quoque oculorum lumine orbatus, dicebat: *Quàm gaudeo, me è duobus inimicis, alterius molestus liberatum.* Marull. lib. 5. cap. 4. Sabell. lib. 3. cap. 7.

THEOTIMVS ANONYMVS.

Ad alios tranſeo, qui magnum & præclarum illud oculorum donum, exiguæ voluptatis pretio, imprudenter non minùs quàm impiè commutarunt. Quis hoc loco B. Ambroſium ſileat? qui de THEOTIMO quodam refert, quòd cùm grauiter ex oculis laboraret, eiùque à medicis coëundi cum vxore interdiceretur facultas, niſi oculis omnino priuari mallet; libidinis impatiens, ac parère recuſans, cùm in ipſo æſtu ſe iam oculis orbari ſentiret, clamarit: *Vale amicum lumen.* Quàm benè ille, & meritò cum Ethnico illo Rege exclamaret, Hei quantum bonum breuis voluptatis cauſa perdidit! Amb. ſup. Luc. cap. 4.

POTOR ANONYMVS.

Eiùſdem farine iſte. oculorum lippitudine afflictuſ, medicum vitiato lumini medelam flagitat. ille, Facilis ea erit, inquit, modò fomitem & mali huius cauſam tollas, potationem. ad quod ira præ-nè ſuccenſus noſter Bacchicola, *Quid, inquit, potationem? non fecero, vt quoad vino delicias meas oculis poſtponam.* Ergo, ſubinfert medicus, omni lumine priuandus. Eſto, ait POTOR; *malim certè cum iucunditate oculos perdere, quàm cum dolore eos vermibus in eſcam conſeruare.* Auſt. Serm. conuiual.

CALLIDE DICTA.

INNOCENTIVS VII. PONT. MAX.

Non acumen ſolùm dicendi ſuam habet venerem; ſed magis ſi in eo aliquod calliditatis, non malitioſæ tamen, ſpecimen concurrerit. probat dicto factoque INNOCENTIVS VII. Huius

enim mandato, cum Andreas Mantineas pictor egregius Sacellum in Palatio Vaticano adornasset, Sacerdotium aliquod siue munus, Latino vocabulo Beneficium, filio suo per Pontificem dandum frustra sperabat. Iubente itaque eo septem vitia capitalia pingere, de industria fecit ut vacaret locus in quo ingratitudinem exprimeret. Interrogatus autem à Pontifice, cum septem tantum vitia sint, cur octauum addiderit; Tum, inquebat, quod locus vacaret, tum quod nullum vitium ingratitudine magis inuisum. At INNOCENTIVS re intellecta; *Rectè tu sanè*, ait: *at quoniam ex hoc latere octo vitia apparent, quamvis septem tantum sint; ita è regione, septem illis virtutibus, extra ordinem adijunge Patientiam.* Bern. Scardeonus, lib. 3. Hist. Pat.

EPISCOPVS ANONYMVS

Meritò priori adiiciendus. Burgundi nobiles dum opiparo instructo conuiuio loci Antistitem aduocassent, virum doctum & facetum; ut sit inter sermocinandum, quidam mirari se dixerunt, suum Episcopum parum si annos spectent maturum, tantam caluitiem gerere, pilosque ante determinatam à natura ætatem decidere. cumque eius rei diuersum motiui causamque diuersi proponerent, quin & medicinæ peritos consulendos dicerent; *Minimè*, inquit ille, *medicorum consilio mihi opus: non enim natura defectum incuso, sed vos ipsos, qui me depilatis.* Callidè insinuabat suos nobiles admodum in id intendere, ut Ecclesiasticorum Prælatorum possessiones imminuant, & quilibet pilum aliquem suo capiti ex aliena cæsarie reporter. Auct. Serm. conuiual.

SIGI-

SIGISMUNDI IMPERAT. ASSECLA.

Ciuiles nunc producimus, & inter eos primùm virum nobilem è familia Sigismundi. Ille etenim, cùm Sigismundo fluentum equo traiciente, fortè equum in medijs aquis vrinam reddere conspiceretur, faceret & callidè, *Quàm hic equus persimilis*, ait, *est domino suo?* Eius autem rei causam requirenti Cæsari, eadem qua priùs libertate, *Hic enim equus*, inquit, *huius fluminis abundantiam sua vrina augere amplius enititur: ita etiam tua Maiestas erga eos se exhibet liberalem, quibus est omnium rerum vbertas.* Callidè licet iucundè insinuabat, Imperatorem debere esse erga quosuis beneficium, qui benè de se meriti. Matth. Castrit. de Hero. virt.

FRANC. SFORTIA.

Facetè ille, hic grauitè. Cùm enim insidijs armisque Pauli Ursini exterritus profugisset vrbe Roma, & in Algido castra metatus esset, missus ad eum S. Angeli Cardinalis legatus; qui inter alia, *An*, inquit, *SFORTIA Ursum timebis, cùm sis sub columna tutissimus?* cui ille extemplò: *An non tibi Pater insanus videbor, si dum frustra à surdo marmore opem imploro, bellua ingens, dente ac unguibus ferox, & humano sapè gressu incedens, mihi minime sit formidanda?* Non illepidè remota Columniorum auxilia designans, & Pauli Ursini ingenium depingens. P. Iouius.

ANONYMVS

Interfuerat orationi admodum insulse, & nullius veneris. cùmque eum de re feliciter acta Orator exultās rogaret, Numquid benè mea oratione misericordiam moui? *Magnam, imò maximam, re-*

spondebat ; *neminem namque fuisse existimo tam durum, cui oratio tua admodum miseranda non sit visa.*
Auct. Serm. conuiual.

HYRVVS DVX MILITIÆ.

Adiungit se ceteris HYRVVS Caroli VII. Franc. Regis auspicijs aduersus Britannos Dux. Hic enim, dum Rex cunctaretur vt meliùs voluptati operam daret, vrget, exercitui de necessarijs prouideatur. cùmque eadem à Rege expectaret, voluptatum apparatus, ludos & puellas ei exhibuit, petijtque quid de illis sentiret; Cui HYRVVS: *Nunquam alium Regem, qui letiùs sua perderet, me vidisse.* Cuius dicti aculeo tactus Carolus, resipuit. Fulgos. lib. 6. cap. 2.

HISPANVS ANONYMVS.

In aliena causa iste, hic in propria. postulabat ab Alphonso Castulonensi rege Præfecturam Toletanam. Quem cùm Rex prima fronte reiiceret, quòd iunior esset: indignabundus, *Et tu, ait, Princeps, cùm adhuc lacte te infantem nutrix aleret, iam Rex eras: & quam multi magnis officijs persuncti, qui pueri tecum lufere. Me ergo, quod tecum nunquam luserim, etate ingenioque parum valere existimas?* Mouit Alphonsum ea libertas, voti que compotem eum fecit. Fulgos. lib. 6. cap. 2.

CALVMNIA.

IESVS CHRISTVS.

Ad CALVMNIAM pergimus: quæ vt cum iniuria prolata, vitiosa est; ita sæpiùs iustæ castigationi permixta, reprehensione caret. Quo modo ea non semel vsus aduersus Phariseorù improbita-

probitatem SALVATOR : & quidem venientibus ab Ierosolymis Scribis & Phariseis , & rogantibus; Quare discipuli tui transgrediuntur traditionem Seniorum ? non enim lauant manus, &c. gravissimum in eos crimen retorquet, dicens : *Quare & vos transgredimini mandatum Dei, propter traditionem vestram?* id est, melius observatis ea, quæ vos præcipitis, quàm quæ à Deo profecta. Matth. cap. 15.

IDEM

Accedentibus Sadducæis, & signum de cælo postulantes, respondit non sine indignatione; *Generatio mala & adultera signum querit : & signum non dabitur ei, nisi signum Ionæ Prophetæ.* Ibid. cap. 16. Marc. 8. Luc. 12.

AGAPETVS ROM. EPISC.

At quia longum foret persequi quoties idem DOMINVS ei acutatas in se calumnias retorserit, offert se mihi Christo in hoc genere proximus AGAPETVS. Qui à Theodato Gothorum per Italiam rege Constantinopolim Iustinianum placaturus missus, cum eum Euychianæ hæresis labe infectum deprehendisset, magno eoque libero animo dicebat : *Ad Iustinianum Christianissimum Imperatorem venisse me arbitrabar : sed, quantum intueor, ad Diocletianum veni.* Iusta, licet calumniosa reprehensio, nec minori idcirco laude digna. Hist. Eccles.

ANTIOCHENI.

Nec malè illi. contendentes frequentius cum Apostata Iuliano, multa in eum iactabant: cumque rerum omnium pretia imminuisset, ac barbam prolixiorem aleret; *Tondeatur*, clamitabant, *eius*
G 3
barba,

barba, ut ad funes consificendos profit. Et quoniam superstitionis suæ causa, taurum idolis immolare assueuerat, tauri imaginem in solido suo formari præcepit; quam videntes ANTIOCHENI, rursus eum proscindentes, iactitabant: Iste taurus evertet mundum. Hist. Tripart.

S. THEOPHILVS.

Impius iste aliquando, at postmodum iuxta sui nominis etymon, Sæctorum catalogo adscriptus; cum Dorotheam virginem iudicis Prætorium egredientem, Deo gratias agere, quòd ad Paradisum hinc euocaretur, audiuiſſet: in eam hoc modo (erat quippe Sapritij Præsidis aduersus Christianos caudicus) calumniabatur: *Eia tu, quæ dicis te sponsam Christi, mitte ad me de Paradiso sponsi tui mala & rosas.* quod eam fecisse, & suum calumniatorem in martyrij societatem traxisse, subsequutus euentus docuit. Sur. tom. I. in vita.

FREDERICVS III. IMP.

Vide CONTVMELIA.

DUX SAXONIÆ FREDERICVS.

Claudam hoc agmen inclyto FREDERICI Ducis inclyti exemplo. Ille, (quod utinam in omnibus nostri sæculi Principibus foret) aures calumniantibus obturare solitus: &, si qui fortè ex ea hominum fece molestiores essent, *Accipiam*, inquebat, *delationes vestras, si coram presentibus in faciem dicturos spondeatis, quæ de absentibus desertis.* assentiuntur namque aliquando delatoribus Principes, re non explorata, in præiudicium innocentis.

Peucerus in Lect. Chron. An. 1572.

Vide Apoph. de MALEDICENTIA, & CONVI- TIIS, item LIBERE DICTIS.

CAN-

CANTOR.

BRYSÆVS PRÆSES PARISIENS.

CAntandi peritiam & vsum, non admodum
vtilem & decentem Principibus viris, suo di-
cto explicauit BRYSÆVS Conc. Parisiens. Præses.
qui, cum à Rege Anglorum ad Ludouicum XI.
Franc. Regem Oratores mitteretur, & ille quo mu-
nere eos donaret (meditabatur enim munus ali-
quod exigui pretij) inquireret; respondit: *Turba
cantorum tibi est, quorum melodijs parum oblectaris,
eos tamen magnis impensis alis: quos, quia facile care-
bis, Oratoribus vniuersos dando censeo.* Gaguinus
in vita Ludouici.

ALPHONSVS ARAGONVM REX.

Quid verò ARAGONIVM ALPHONSVM memo-
rem? Obstrepebant (vt in Principum aulis) tibici-
nes, & varijs clangoribus eius aures obtundebant:
ille arrepto, quod fortè ad manum, Ciceronis vo-
lumine, clara voce intonare cœpit: *Apagite Musi-
ci, apagite. adest qui mecum dulciora misceat,*

Princeps Romani Tullius eloquij.

Panorm. & Æn. Syl. de Dict. & Fact. eiusd.

ANONYMVS.

Alius mentis iste. Filium quem vnicū ex coniu-
ge suscitauerat, bonarū artium disciplinis cum in-
stituisset; Musices artem & cantandi peritiā tandem
addiscere eum imperauit. dicebat enim: *Per hac
(Cantum videlicet & Musicam) ingenium molitur:
nihilque post exantlatos labores homini gratius eueni-
re potest.* Quàm scitè & benè Horat. in Arte Poët.

Dictus & Amphion Thebana conditor arcis,

*Saxa mouere sono testudinis, & prece blanda
Ducere quò veller. —*

Auct. Rer. memorab.

CASTIGATIO. CORREPTIO. REPREHENSIO.

IESVS CHRISTVS.

Q Vantum boni iusta. CASTIGATIO correptio-
que secum adferat, substitutis clarissimorum
virorum imaginibus prosequemur. Primus huius
aciei ductor ipsa Veritas CHRISTVS: qui, sa-
nata ipso Sabbato muliere, quæ duodeuiginti an-
nis infirmata fuerat, ob id reprehensus ab Archi-
synagogo & Phariseis; *Hypocrita*, aiebat, *unusquis-*
que vestrum non soluit bouem aut asinum à præsepio,
& ducit ad aquare? hanc autem filiam Abraha, quam
alligauit satanas decem & octo annis, non oportuit solui
à vinculo isto die Sabbati? additque Euangelista:
Cum hoc diceret, erubescabant omnes. Optima illa
& vera Apophthegmatis natura. Luc. cap. 13. &
simile habes Matth. cap. 12. & Marc. 3.

S. FRANCISCVS

Sui Domini ac Magistri egregius imitator. Pe-
tenti cuidam ad Ordinem à se institutum recipi,
cum dixisset pauperibus sua distribueret, si paupe-
rum consortio iungi vellet; & is parum memor mo-
nitorum, in amicos omnia sua transtulisset, redeun-
ti ad se, dixit verus pauperum Patriarcha, dura eum
feriens increpatione: *Vade viam tuam frater musca:*
nondum existi de domo & cognatione tua: à carne inepi-
sti, & rimosum spiritali fabricæ fundamentum colloca-
sti. Indignum enim pauperum locietate eum reputa-
bat,

bat, qui pauperes defraudasset. Sur. tom. 5. in vita.

PAVLVS PONTIFEX.

Hic quoque, cùm Iudæum quendam, qui quæ-
stus gratia varijs in locis Baptisimum suscep-
erat, baptizare vellet: & subito è baptisterio aqua eua-
nuisset, dixit: *O homo, aut veteratoris partes agis, aut
Baptismum ignorans suscepisti.* Socr. lib. 7. Hist.
Eccl. cap. 17.

EDOUARDVS ANGLIÆ REX,

& PHILIPPVS VALESIVS REX FRANC.

Illa exempla inter sacros. quis nunc carpet vnũ
aut alterum ex Ciuili ordine inferi? Cùm regalibus
Angliæ insignibus (videlicet Leopardis) etiam
Franciæ Lilia coaptasset EDOUARDVS, & ob id à
PHILIPPO Francorum Rege redargueretur, quat-
tuor hos versus, barbariei illius ætatis indices, ad
eum remisit:

*Rex sum regnorum bina ratione duorum:
Anglorum regno sum Rex ego iure paterno;
Matris iure quidem Francorum nunc ipor idem.
Hinc est armorum variatio facta meorum.*

quibus PHILIPPVS illicò alios hos eiusdem valo-
ris & ponderis replicauit:

*Prædo regnorum qui diceris esse duorum,
Francorum regno priuaberis atque paterno.
Matris ubique proles ius semper non habet ullũ.
Succedunt mares huic regno, non mulieres.
Hinc est armorum variatio stulta tuorum.*

Corozetus.

LVDOVICVS XI.

Subtilis hic & industrius. cùm fortè ad eum
venisset quidam ex Ducibus, lætum expeditionis
ante Cameracum factæ nuntium deferens, qui &

G s ponde-

ponderosum torquem (quem ex reliquijs spoli-
rum Ecclesiæ Cameracensis conflatum Rex suspi-
cabatur) circum collum gestabat, & alius eum ma-
nu contingere niteretur; clamabat Rex: *Cane, ne te
sacrilegio commacules; est enim res sacra.* Subtiliter
taxâs suum Ducem, quòd etiam rebus sacratis ma-
nus commaculasset. Corozetus.

SANGVINEVS LVCRETII CVIVSDAM FILIVS.

En quanti mali scintilla, neglecta castigatio. Nar-
rat Boëtius de SANGVINEO illo, quòd, cùm nimium
in castigando corripiendoque remissum se gessisset
pater, ille ob delicta laqueo adiudicatus, patri ex-
tremum vale daturus, nasum dentibus præsciderit,
dicens: *Si me à teneris corripuisses, hæc non devenis-
sem.* Verè ille & benè:

Blanda patrum segnes facit indulgentia natos.
Boët. de Disciplina Scholar.

Vide Apoph. sequentia, & de REPREHENSIONE.

CASTIGATIO MODESTA.

IESVS CHRISTVS.

Quemadmodum verbum bonum (vt est in
Prouerbio) multiplicat amicos, ita & mode-
sta castigatio. Testis erit DOMINVS noster, qui Ni-
codemo, quem secum differentem audiuerat, per-
contanti, Quomodo homo iterùm nasci posset?
nō quidem de re incredulo, sed de modo dubitanti;
modestè respondit: *Tu es magister in Israël, & hæc
ignoras?* q. d. Tu legem quam doces, ignoras? Re-
darguit ergo eum, quòd de modo huius regenera-
tionis tanquam dubius inquireret, qui tamen eum
ex le-

ex lege, ut doctor, scire deberet. Ioan. cap. 3.

I D E M

Ætate adhuc tenellus, repertus à parentibus in templo, cum Legis peritis disserens; dicentibusque illis, Fili, quid fecisti nobis sic? magna animi modestia, *Quid est, inquit, quòd me querebatis? nesciebatis, quòd in his quæ Patris mei sunt, oportet me esse?* Luc. cap. 2.

BENIAMIN DIACONVS

Cùm in carcerem missus ab Isdigerde Persarum Rege fidem negare iuberetur; eam iussionem corripuens, *Quo, inquit, ô Rex, honore dignus, qui suum relinquens regnum, inuadere nititur alienum?* dicente autem illo, *Mortis supplicio.* sapientissimus DIACONVS respondit: *Quid ergo non iustè patiatur homo, qui Mundi creatorem deserens, unum consensuum suorum deificare voluerit, & illi debitum cultum, alteri exhibuerit?* Theodor. hist. Tripart. cap. 33. lib. 10.

S. EPHRAËM.

Suprà de ADMONITIONE.

Item vide Apophth. de ÆTERNITATE.

CASTIGATIO DVRA, ET SEVERA.

S. BASILIVS.

DVrius quidem ille, non tamen extra omnes modestiæ terminos. Cùm enim cum Valentis Imperatoris coquus primarius, Demosthenes nomine, audacter reprehendisset, sermonem barbarissimo inficiens; subridens aiebat: *Hem! vidimus Demosthenem sine literis.* Illo verò stomachando progrediente, *Tuam est,* subdebat BASILIVS, *solerter inspicere,*

ſpicere, quomodo ſercula condiantur: noſtrum, quâ ratione ſacra myſteria tractentur. Theod. lib. 4. cap. 17.

PAMBO ABBAS.

Non minùs hic ſapienter ac ſeuerè illo altero. Nam cùm ad eum B. Nelania vaſa argentea trecentarum librarum detuliſſet, rogans vt rerum ſuarum eſſet particeps; dixit: Deus tibi mercedem reſpondat. cumque illa benedictionem exſpectaret, Domine, inquit, vt ſcias quantum ſit, ſunt 300. libræ argenti. cumque is ne ad hoc quidem annueret, tandem ſilentij clauſtrum abrumpens, *Ea,* inquit, *à te attuliſti filia, non eſt quòd ſciam quantitatem ponderis. Qui enim montes & ſyluas appendit ſtaterâ, multo magis nouit quantitatem tui argenti. Si autem mihi hæc dares, rectè pondus diceres: ſi Deo qui ne obolos duos deſpexit, tace.* Seuerè caſtigabat promittentes in bono illo opere inanis gloriæ ſtimulos. Pallad. in vita.

S. ANASTASIA MARTYR.

Emicuit quoque nobilis hæc Seueritas in fæmineis pectoribus. ANASTASIA namq. à Põtifce idolorum rogatâ interpretationem ſermonis cuiuſdam à ſe prolati; *Tu,* aiebat, *non es, qui hoc diſcas. Nemo enim qui ſapit, commiſcuit vnguentum vaſi patri.* Meminerat illius Sponſi ſui, non oportere margaritas effundi ante porcos. Sur. tom. 6. in vita.

CASTIGATIO LIBERA.

IESVS CHRISTVS.

FRequens liberæ caſtigationis apud eum vſus: quod vel tunc potiffimùm comprobauit, cùm
iam

iam manibus traditus nocentium, crebrius in eos insultaret, diceretque: *Tanquam ad latronem existis cum gladijs & fustibus comprehendere me? Quotidie apud vos sedebam docens in templo, & non me tenuistis.* Matth. cap. 26.

S. PAVLVS APOST.

Non minori libertate Vas electionis PAVLVS: productus enim in Concilium, cum Princeps Sacerdotum Ananias os eius percuti iussisset, insurgens, *Percutiet te Deus, Paries dealbate, inquit; & tu sedens iudicas me secundum legem, & contra legem iubes me percuti.* Verè animosa & constantiæ index reprehensio. Act. cap. 25.

S. REMIGIVS.

Dum Clodouæum cum tribus Cathecumenorū milibus ad baptisterium procedentem, & inter candidatos magnificè apparentem, altos & Christianæ humilitati dissentaneos præ se ferentem spiritus intueretur Antistes REMIGIVS; *Mitis, inquit, depone colla Sicamber: adora quod incendiisti, incende quod adorasti,* hoc est, inanibus deorum simulachris exustis, deinceps Deum verum in basilicis quas igne prius vastabas, agnosce & venerare. Granis & efficax castigatio, non sine fructu prolata. Hincmarus in vita. & Greg. Turon.

S. IOANNES CHRYSOSTOMVS.

Et hic personam cuiusvis respicere nescius, dum statuam Eudoxiæ Augustæ, quæ non procul ab Ecclesia sua erecta, loco deturbare vellet; iniquè fecit Augustæ, aduersus eum Synodum conuocare parat. quod ille suspicatus, notissimam illam in Ecclesia protulit Homiliam, cui exordium: *Karsius Herodius insanit, rursusque turbatur: denuò saltat, denuò ca-*

nuò ca-

*nudò caput Ioannis in disco concupiscit accipere. So-
crates Tripart. hist. lib. 10. c. 15.*

S. ELEVETHERIVS.

Illum etiam dum multis blanditijs aggredere-
tur tyrannus, vt à cōstantia mentem repeñeret, pro-
bra hæc ab eodem remunerationis loco accepit: *O
luxe Arabice, qui Christi ouibus insidiaris: nunquam
mihi persuadebis, vt ab hac pia constantia desistam.*
Metaphr. Lippom. tom. 2.

SERGIVS II. PONT.

Vide CHRISTIANISMVS.

CASTITAS.

IESVS CHRISTVS.

VNde te, virorum pariter ac fæminarum de-
cus, & præcipuum firmamentum, inuocem?
Tu illa es, quæ sub iugo rationis, impetum fœdæ li-
bidinis refrænas, per edomitas vitiorum furias (Au-
gustini verba refero) munda & honesta totius cor-
poris habitudo. Ades igitur & cognosce, quàm
præclarè de te sentiant omnes boni. Et quidem illi-
batæ pudicitix fons CHRISTVS IESVS, multis ad se
concurrentibus, cùm multa præclarè in parabolis
dixisset, mirum in modum hanc virtutum omnium
altricem commendauit, vbi ait: *Sint lumbi vestri
præcincti, & lucernæ ardentes in manibus vestris.* Ec-
quando enim lumbos præcingimus? nisi (vt expo-
nit Gregorius Homil. 13. in Euangel.) dum carnis
luxuriam per continentiam coarctamus. Luc.
cap. 12.

B. VIRGO MARIA.

Vide titulum de ADULTERIO.

S. PETRVS

S. PETRVS APOSTOLVS.

Quid autem de Apostolorum Principe dicemus,
 qui huius virtutis amore coniugem repudiauit?
 Hinc pro se alijsque confidenter loquitur: *Ecce nos
 reliquimus omnia, & secuti sumus te: quid ergo erit
 nobis?* quibus verbis se vxori quoque renuntiasse,
 vel ex eo constabit, quòd CHRISTVS ilicò hoc re-
 sponsum subnectat: Amen dico vobis, nemo est qui
 reliquit domum, aut parentes, aut fratres, aut vxo-
 rem, aut filios, propter regnum Dei, &c. Quin
 Ethnicus Poëta Tibullus in Epistolis inquit;

*Vos quoque abesse procul inbeo, discedat ab aris
 Cui tulit hesternâ gaudia nocte Venus.*

S. IVLIANVS ANTIOCHENVS MARTYR.

Hoc etiam in eo mirabile, quòd nuptijs cum Ba-
 silissa virgine celebratis, suscepit perpetuæ casti-
 tatis votum; quo factum, vt brumæ tempore, rosa-
 rum ac liliorum fragrantiam in cubili senserit: stu-
 pescentique puellæ ac roganti, *Quis hic odor?* ille,
Virginalis munditiæ, respondit. cuius quidem suau-
 tate capta, à virginitatis seruandæ proposito nun-
 quam recessit. Sur.tom.i. Marul. lib. 4.c.7.

S. VANDO ABBAS.

Non minor casti propositi constantia Abbatis
 VANDONIS fuit. Pipini enim nepos, à Dagoberto
 regni successore ducere vxorem compulsus: neque
 tamen vt castitatem violaret, potuit compelli. Nu-
 ptam itaque hoc modo alloquitur: *Quæso, Deo po-
 tius, quàm Mundo seruiamus.* itaque matrimonio
 nondum consummato, vterque monasticam vitam
 amplectitur; & dum in Spiritu seminant, de spiri-
 tu vitam æternam metunt. M. Marulus ibid.

THEO-

THEONAS SCHYTIOTICI MON. ABBAS.

Et ipse non sibi, sed parentibus obsecutus, conjugij iugum tulit. cæterum quinquennium conjugij emensus, de continentia seruanda deinceps cogitat. quod cum vxori frustrâ suadere etiam nititur, tandem ait: *Ego te o mulier abstrahere à morte non possum, nec tu me separabis à Christo. Melius est mihi cum homine, quam cum Deo habere dinortium.* Verè insignis animi index vox. Cassianus
Coll. 21. cap. 9.

S. ÆGIDIVS.

Deus bone! quantus castitatis sectator cultorque ÆGIDIVS? cui in ore aliquando: *Quid nos Deo magis commendat, ei que charos reddit, nisi illa mentis castitas, qua sensus omnes custodit.* cumque in laudanda castitate progredereur, quidam matrimoniali vinculo constrictus, Ego, inquit, vxore mea contentus, alijs fæminis abstineo. Cui ÆGIDIVS: *Putas non posse hominem ex proprio vino inebriari?* Sur. in vita, tom. 2.

S. BERNARDVS.

Insignis etiam Pudicitie custos hic exstitit. cum enim tertio ad eum intempesta nocte venisset forma eiusdem capta, impudica mulier, vt ad flagitium eum pelliceret, manu ac voce, Fures, inclamat, & latrones. Arguunt primo manè socij, quòd somnando immoderatiùs clamasset, Latrones. quibus, *Verè, inquit ille, & extra iocum somniumque latrones aderant: nam mulier quedam pretiosissimum pudicitie meae thesaurum ablatura, tertio venit.* Auct. vitæ ipsius lib. 1. cap. 3. Sur. tom. 1.

THOMAS II. EBORAC. EPISCOPVS.

Dignus quoque memoria sæculorum iste. Cui agrotan-

agrotanti dum medici solum fæminæ vsum morbo remedium adferre posse iudicaret, easque adhiberet vrgerent incunctanter, cùm illi, tum consanguinei; & iam fæminâ decentis formæ adduxissent, noluit eam contingere; inquiens: *Propter salutem carnis tãdem moritura, immortale Pudicitia decus nō amittam.* Præclarè de illo dici potest, quod de Michaële Verinò posteritati consecratum reperimus:

Sola Venus poterat lento succurrere morbo;

Ne se pollueret, maluit ipse mori.

Polyd. lib. 1. cap. 3.

S. IPHIGENIA VIRGO.

Sed vt fæminis quoque suas hîc partes demus, res ipsa postulat: ne, si ijs contenti tantùm erimus quæ iam diximus, ipsæ dedignentur sequi sexum alienum. Adducamus huc igitur sponas Christi, & inter eas primam statuamus post Virginem matrem, (cuius pudicitiam laudasse, detraxisse foret,) IPHIGENIAM Ægippi Æthiopum Regis filiam. Hæc Matthæi Apostoli prædicatione, vera fide illuminata, Virginitatem vouit: & alijs quæ eam vouerant, præerat sedula gubernatrix. sed quid? paterni regni successorem Hirtacum in maritum accipiat, ab eodem impellitur. quo spreto, *Æterni,* ait, *Regis sponsa sum, nec mihi eo relicto alteri nubere fas.* neque minis, neque instantibus iam flammæ periculis, à sententia amoueri potuit. Abdiæ in vita Matthæi.

S. LUCIA VIRGO.

Et hæc Pudicitiam vitâ habuit chariorem. Iuueni enim iungi noluit, vt iungeretur Christo: & ad idololatriam compulsæ, mansit immota in fide rupes. Quare minitanti Paschasio, Ego te faciam

H

ad

ad lupanar trahi, ut cum fueris scortata, fugiat à te Spiritus sanctus: *Nunquam, inquit, inquinetur corpus, nisi à consensu mentis: si namque me inuitam feceris violari, castitas mihi duplicabitur ad coronam.* Sur.tom.6.in vita.

S. AGNES VIRGO ET MARTYR.

Neque tu, fidissima Pudicitiae tutela AGNES, silere. quæ, dum te deperiret Præfecti tuæ urbis filius, nondum pubertatis annos egressa, cum animosè despexisti; dicens: *Recede à me fomes peccati, nutrimentum facinoris, pabulum mortis: iam ab alio amatore prauenta sum, qui annulo fidei suæ subarraxit me.* O senectutem infantilis mentis! ô iuuenilis animi capitiem! Sur.tom.6.in vita.

S. EUPHRAXIA VIRGO.

Et hanc etiam Antigoni filiam, quia Romano patricij generis iuueni à parentibus antè pacta, quam Religioni se daret, fuerat, cum eidem nubere per Theodosij Imp. literas cogeretur, respondisse tradunt: *Sponsum habeo in calis, non in terra: & certum mihi extrema omnia perpeti, quàm fallere fidem illi datam.* Quid priùs miremur, nescio: an senilem teneræ ætatis in respondendo sapientiam, an verò puellaris animi in proposito constantiam? In vitis PP. Sur.tom.2.

GVNZONIS DVCIS FILIA.

Neque hanc pudere debeat, si primis illis iungatur: cuius virginitatis flos etiam suum odorem per vniuersam Galliam diffudit. Ut enim erat Arbonæ Ducis filia, à Segeberto Galliarum Rege in coniugem petita. at quid sponsa Christi? *Æterno Regi desponsata sum*, ait. Cui & nunc meritò in cælesti illo solio iuncta, quæ dum hîc viueret, plaris fecit Castitatis

stitatis quàm Franciæ regnum. In vita S. Galli
lib. 1. cap. 21. Sur. tom 5.

VIRGO ANONYMA.

Sentiebat item illa, vbi diuersus sexus est, diuer-
sarum cogitationum pugnas incidere necessarium:
cùm namque B. Martinus eam inuifere cogitaret,
aditu negato, dixit: *Pater sancte ora pro me, quia à*
viro nunquam sum visitata. Rarum etiam Pudicitiae
exemplum. Hieron. Epist. ad Oceanum.

ELIZABETH VIDUA.

Est etiam viduis sua castitas. vnde & eas hono-
rare præcepit Apostolus, quæ verè viduæ sunt. Ta-
lis indubiè erat ELIZABETHA Lantgrauio tradita:
quæ, mortuo coniuge, dum ab Episcopo Bamber-
genfi ad nuptias incitaretur, respondit: *Si id coneris,*
fixum mihi truncatis naribus, vel lacerata facie me ita
deformare, ut qui me ducere velit, futurus sit nemo.
Itaque oblitam fortunæ felicitatem respuit, sola
castitate gaudens. Conrad. Concion.

MVLIER AQVILEENSIS.

Satis de illis, quæ Deo suam castitatem voto ob-
strinxêre, hoc loco dictum: neque enim is animus
omnia persequi. ad alias transeo: quæ licet alterius
ordinis, eiusdem tamen propositi & mentis. Iactet
suam Lucretiam Roma, habet etiam suam Aquil-
lea quam proferat. cuius virilis animus maligno
errore fortunæ muliebri corpus sortitus est. Hæc
enim vt erat ingenua, à Barbaro hoste capta, ad stu-
prium rapiebatur. Quid ageret? ad preces conuer-
titur, & vix tandem impetrat, vt in superiorem
domus partem sibi liber aditus fiat. quo facto, ea
parte occupata quæ flumini imminebat, ad Hun-
num conuersa, *Vis me, ait, potiri? me sequere.* & ex

alto præcipitem se in flumen dedit : magis de corporis, quàm salute animæ prouida. Sabell. lib. 5.

GVALDRATA PVELLA.

Hanc ad calcem adiicimus. quæ cùm esset formâ & corporis habitu admodum decoro, ab Othone III. qui tum Florentiæ, vt se deosculandi copiam faceret, expetita. at illa : *Nullius meherculè, quàm eius quem maritum habitura sum, suauium accipiam.* Placuit, & meritò, ea vox Principi, ac quæ illam protulerat, Guidoni Germano, viro armis inclito, in matrimonium data est. vsque adeò Deo & hominibus grata castitas. Bapt. Fulgos. lib. 6. cap. 1.

CENSVS. TRIBVTVM.

IESVS CHRISTVS.

NON minore apud Deum loco existimandum. Nest esse eum, qui debito tributo, quod in potestatis recognitionem subditus pendit, quàm qui requisito obsequio, superiorem suum defraudat. Hinc Phariseis cum Herodianis ad CHRISTVM tentandum accedentibus, dum quærunt, Licétne censum dare Cæsari, an non? CHRISTVS non quod liceat tantùm, sed quid fieri debeat, imperans; visa numismatis quod exhibebant inscriptione & imagine, *Reddite, inquit, quæ sunt Cæsaris, Cæsari : & quæ Dei, Deo.* quod alio in loco, his verbis Apostolus : Cui honorem, honorem: cui tributum, tributum. Matth. cap. 22.

IDEM

Dum venientem Capharnaum pro didragmate
(erat

(erat is nummus fortassis valoris trium solidorum) interpellant, Petrum in domo præuertens, *Quid tibi videtur, inquit, Simon? Reges terra à quibus accipiunt tributum vel censum? à filiis, an ab alienis?* & illo dicente, *Ab alienis;* subinfert CHRISTVS: *Ergo filij sunt liberi.* declarans naturales filios non solere parentibus pendere tributum aut censum. Ibid. cap. 17.

CONSTANTINVS IMP.

Mitis admodum & temperatus, vt in alijs omnibus, circa hanc Censuum exactionem fuit CONSTANTINVS: ab cuius ore sæpè sæpiùs audita est memoranda illa vox: *Communes regni opes securius à communitate asseruantur, quam si eas nos ipsi recondamus.* Verè prudens Imperator, qui suam potentiam in ciuium potentia collocabat. Euseb. hist. Eccles. lib. 1. cap. 10.

PETRVS SABAVDIÆ COMES.

Forti animo, licet parum æquo hic. Monitus namque apud Othonem 1111. per Cancellarium eiusdem, feudales literas nonnullarum urbium quas pridem acquisiuerat, exhiberet; euaginatam ensilem protendit, & *Hæ,* inquit, *litera, quibus eas acquisiui.* Camerar. Meditat. hist. cap. vi.

CHARITAS ERGA DEVM.

Vide DEI AMOR & HONOR.

CHARITAS ERGA PROXIMVM,

IESVS CHRISTVS.

Sanctorum exemplis dictisque nunc inuestigandum, quo animi adfectu proximus (sub quo
H 3 omnem

omnem hominem comprehendimus; omniū enim vnus est pater Deus) prosequendus à nobis sit. Et quidem roganti se DOMINVS, Magister quod est mandatum magnum in lege? respondit: *Diliges Dominum Deum tuum, &c. & proximum sicut teipsum.* Tunc utiq. proximum sicut teipsum diligis, si quod tibi non vis fieri (vt explicat Scriptura) nec illi feceris. Matth. cap. 22. Marc 12.

S. PAVLVS APOST.

At subit aliud non minùs illustre charitatis exemplar, Gentium doctor: qui anathema voluit esse pro fratribus. cū autem multa coram Agrippa Rege de sua conuersione ac mortuorum resurrectione in medium adduxisset, & is diceret, In modico suades me Christianum fieri; subiicit: *Opto apud Deum & in modico & in magno, non tantum te, sed & omnes qui audiunt, hodie fieri tales, qualis & ego, exceptis his vinculis.* Act. cap. 26.

S. IOANN. EVANGELISTA.

Amicum quoq; erga omnes se ostendit IOANNES EVANGELISTA, qui cū Ephesi moraretur plenu dierū, ita vt vix inter manus discipulorū ad Ecclesiam deferretur, nec posset in plura verba vocē contexere, nihil aliud proferbat, quàm, *Filioli, diligite alterutrum.* at cū discipuli tædio affecti, quòd eadē semper audirent, rogaret, Magister, quare hoc semper loqueris? dignam IOANNE sententiā respondit: *Quia preceptū Domini est, & si solum fiat, sufficit.* Hieron. in Cōm. Epist. ad Galatas; & Breuiar. Rom.

S. IOANNES CHRYSOST.

Ille amicum suum Basilium per industriam ad Episcopatum induxerat, eo quòd se in iudicio periclitantem magnis periculis liberasset. alijs autem

hbc

hoc factum improbantibus; *Ego*, inquit, *aliter amare non didici*. Coniecturam enim sumebat CHRYSOSTOMVS, cum non secus Christi oues amaturum, quàm amicum dilexerat. Chrysoft. lib.2.de Sacerd

S. GREGOR. NAZIANSENVS.

Cùm omnia ei ex animi voto succederent, & ob id plurimum in se inuidiam concitaret, iamque in eius locum alius substitueretur Episcopus: ipse, quid fieret sentiens, *Absit*, inquebat, *ut mei causa simultas aliqua in Dei sacerdotibus oriatur. si propter me est ista tempestas; tollite, & mittite in mare, & desinet à vobis quassatio*. En virum sanctissimum, etià paratum quæuis perpeti, ut cum proximo pacem concordiamque conseruet. In vita eiusd.

S. DOMINICVS.

Hic quoque mirus charitatis cultor, hanc frequenter vsurpabat vocem: *Plus in charitatis codice didici, quàm in vniuersa Scriptura*. Nec malè; quia plenitudo legis, est dilectio. In vita eiusd.

S. MARTINVS.

Egregium item charitatis fraternæ exemplar is fuit. Moriturus enim, dum quererentur discipuli, quòd se sine solatio relinqueret, ad preces cōuersus; *Domine*, inquit, *si adhuc populo tuo sum necessarius, non recuso laborem: fiat voluntas tua*. O virum ineffabilem! nec labore victum, nec morte vincendum, qui nec mori timuit, nec viuere recusauit! Sulpit. in vita.

B. IGNATIVS LOIOLA.

Nec minùs ille hoc in genere illustris. Cùm enim Lutetiæ quidam Gefario pellicis amore teneretur, cumque omni via & modo ab eadem auellere ne-

quicquam tentaret; tandem opido egressus, in lacum, itineri, per quod alter ad turpes suas delicias iturus erat, conterminum, se ceruice tenus immergit, venientem exspectat, præsentemque è longinquo ita compellat: *Perge miser ad fœdissimas tuas voluptates: impendentem tuo capiti ruinam non vides? hîc ego me tui causa tamdiu macerabo, donec iustissimum Dei furorem in te paratum auertam.* Percussus homo tam insigni charitatis exemplo, stat, pedem refert, & mentem. Ribad. in vita.

B. FRANCISCUS XAVERIUS.

Vt vitæ genere cum priori, ita & in charitatis huius vinculo par. Amicis namq; ne in Chinam pergeret ob præsens periculum dissuadentibus; *Non aliud, respondit, mihi in votis, quàm vel morte mea Chinarum salutem repræsentare.* Sciebat certè spei metum cedere, vbi maiora periculis proposita sunt præmia. Hor. Tursell. lib. 3, cap. 15. in vitâ eiusdem.

CIVILIA,

Require in Apophthegm. de AFFECTU,
& AMICITIA.

CHRISTI HONOR, AMOR, ET LAVS.

IESVS CHRISTVS.

NVnc ad salutis nostræ Auctorem confugimus: qui si huic etiam operi, ad cuius honorem id aggressi sumus, benignus adspiret; illæsa (vt aiunt) rate in portum incolumes deueniemus. Et quis non merito honore eum prosequatur, cuius opera omnia ineffabilia, humani ingenij captum longè

gè excedunt? Immeritò ergo Principes Sacerdotum & Scribæ, audientes pueros in templo clamâtes Hosanna filio David, indignati; & iure per CHRISTVM repressi, qui rogantibus, Audis quid isti dicunt? *Utique, inquit, numquam legistis, quia ex ore infantium & lactentium perfecisti laudem?* Matth. cap, 21.

IDEM.

Dum in ingressu Ierusalem acclamaret populus, Benedictus qui venit Rex in nomine Domini; ac quidam Phariseorum dicerent, Magister, increpa Discipulos tuos; ait: *Dico vobis, quia si hi tacerint, lapides clamabunt.* insinuans gloriam & potentiam suam prædicandam ab irrationalibus creaturis, si rationales conticuerint. Luc.c. 19.

S. PETRVS APOST.

Mirum, quantum hic sui magistri desiderio flagrarit. post cuius in cælum ascensum, vbertim lachrymas effudisse memoriæ proditum. rogatus autem, cur tantùm lachrymaretur; respondit: *Desiderio Domini.* qua etiam de causa Gentium Doctor Paulus, cupiebat dissolui & esse cum Christo. Ex vita eiusdem.

S. THEODORVS MARTYR.

Et vt alios tacitus præteream, quid de THEODORO Martyre dicam? cui dum tormenta ob oculos poneret Publius, rogaretque, Mauisne esse cum tuo Christo, an verò nobiscum? inquit: *Cum Christo meo, & sum, & fui, & ero: ideoque non timeo tormentatua.* Considerabat certè cum Apostolo, non esse condignas passiones huius temporis, ad futuram gloriam in nobis reuelandâ. Sur. tom.6.in vita.

P. BORGIA SOC. IESV

Meritò prioribus annumerandus: vt qui oblitus (vt habet Psalmista) populi sui, & domus paternæ, insonaret hanc vocem crebrius; *Pereat ille amor, vt vivat in me, quem quero, Christi.* Nōne & illi vivere Christus dicendus est fuisse, & mori lucrum? In vita lib. 4. cap. 6.

CAROLVS V.

Erat hic animi magnitudine par, at pietate superior, & melior magno illo Iulio. Cū enim Saxonum & aliorum ingentes ac numerosas copias exigua manu fudisset, ad summum Pontificem de rei euentu scribens, *Veni, inquebat, & vidi, sed Christus vicit.* non sibi, vt Cæsar ille olim; at victoriæ largitori, eius quoque laudem adscribens. Sur. in Hist.

I D E M.

Neque hīc prætereundū quod sequitur. vt enim erat vitæ sanctimonia in nobili illo genere clarissimus, in eodem prælio quod cum Saxonibus commisit, observauit imaginem Christi in cruce affixi, plumbea glande ab impio milite recenter traiectā. Stetit, & ingemuit; atque elata voce ad Deum clamauit: *Domine si vis iniuriam hanc vlcisci, potes: ecce autem me vindicem tuum paratum inua.* Certè audiuit, & iuuit: prout subsequētā mox hostium dissipatio declarauit. Iust. Lips. Mon. Polit. lib. 1. cap. 2.

CHRISTIANISMVS ET CHRISTIANVS.

S. DIACONVS.

TE te, mundi vinculum & firmamentum,
CHRISTIANA RELIGIO, pennato vomere ingredi-

gredimur: & quantum tui studium cùm obseruan-
dæ, tum amplificandæ fuerit, paucis dicendum sus-
cipimus. si enim omnia quæ in Sanctorum glorio-
sa morte de te dicta sunt recensere voluero; nullum
scribendi finem inueniam. Ex multis igitur S. DIA-
CONVM adducimus, qui de genere, domo, patria,
fide percontanti tyranno, in medijs tormentis ni-
hil aliud respondit, quàm, *Christianus sum. hoc mi-
hi nomen, genus, patria, doctrina. aliud nihil sum.* quo-
modo etiam hic omnia reputauit vt stercora, solùm
vt Christum lucrifaceret. Euseb. Hist. Eccles.
lib. 5. cap. 1.

S. NICEPHORVS MARTYR.

Consimilis fortitudinis hic. cùm Sapritiũ presby-
terum, ob supplicij quod iam iam imminabat hor-
rorem, à fidei constantia deficientem videret; in la-
chrymas solutus, vt persisteret rogauit. quo renuen-
te; *Ego igitur, ait, pro ipso feriar: Christianus sum.*
& lubens ceruicem tyranni gladio submisit. Sur-
tom. 1. in vita.

PACIANVS EPISCOPVS.

Præclarum etiam iste suæ fidei testimonium red-
didit, dum ad Sempronianum scribens ita loqui-
tur: *Catholicum istud nomen, nec Marcionem, nec
Apellem, nec Montanum sonat: nec hereticos sumit
auctores. Christianus mihi nomen est, Catholicus cog-
nomen. Illud me nuncupat, hoc ostendit: hoc probor,
inde significor.* Collig. ex Epist. prima.

S. CHRISTOPHORVS MARTYR.

Cursum sistere volenti, non minori virtutis
quàm corporis sui mole obsistit CHRISTOPHO-
RVS. Ille namque accepto à Sami Præfecto cola-
pho, *Repercussissem, inquit, nisi Christianus fuisset.*

Re

Re & nomine se Christianum testatus; utpote cui proprium, pati. Sur. tom. 4.

SERGIVS II. PONT. MAX.

Illius se lateri comitem adiungit SERGIVS, qui Lotharij Imperatoris filio de patris mandato Italianam populanti ac Romanam cogitanti, ad Portas argentinas obviam procedens, cum his verbis aggreditur: *Si pacato magis, quàm hostili animo ad nos venisti; sique ad Christiani nominis utilitatem magis respicis, quàm ad sapiendi voluptatem; meo iussu ingredi: sin aliter armatus es, fores ne tetigeris: nam super caput enses habes scelerum omnium ultorem.* Vide quàm perfecta Christianæ religionis charitas omnem expellat timorem. Platina in vita.

PIVS II. PONTIFEX.

Hunc Sergio velut in officio, ita & in hac laude successorem annectimus. qui *omnem sectam humana auctoritate firmatam ratione carere* assererat. dicebat autem; *Christiana religio, etiamsi miraculis non esset confirmata, honestate sua recipi debuisset.* Plat.

IOVINIANVS IMPER.

Ad alios festino, qui in Ciuili ordine sua laude & gloria hinc carere non debent, aut possunt: cum, si nos subticuerimus, ipsamet per se facta dictaque loquantur. Quis enim non meritò IOVINIANVM celebret? qui dum Imperij habenas suscipere inuitus cogeretur, eam conditionem electoribus proposuit: *Nolim Imperij administrationem accipere, nisi omnes quibus impero, Christiani esse velint.* O memorandam boni Principis vocem! Theod. lib. 4. cap. 7.

TERENTIUS DVX.

Vide ZELVS ERGA DEVM.

LADIS-

LADISLAUS HUNGARIÆ REX.

Vultis & aliud non minùs illustre? LADISLAUS Rex, vbi Hungaros, qui ex deuastata Transilvania magnam prædam auexerant, prælio fusos conspiciaretur, suumque militem acriter in eos sæuire; *Parcite, clamabat, milites, parcite humano sanguini, sat cruoris hostilis effusum: fugientem capite multitudinem, ut si fors an Orthodoxam fidem amplectantur, Dei populũ multiplicemus.* Digna Christiano Principe oratio. Bonfinius lib. 4. Dec. 2.

● IVGO DVX CARINTHIÆ.

Magnum item illius desiderium Christianam fidem propagandi: vnde cùm aliquando magnifico apparatu plebeios & agricolas in conuiuium excepisset, aulicos suos admodum tenui in mensa ab eis amouit. Mirantibus, cur (videbatur enim præter decorum) hos tam tenui, illos verò utpote agrestes, tam nobili conuiuium exciperet; respondit: *Pro animarum qualitate conuiuiũ instruxi. Non enim tam puri sunt illi, qui alta palatia incolentes, sædo simulachrorum cultui se dedunt; quàm hi, qui humiles casas habitantes, ac Christi Euangelio credentes, vnda Baptismatis expiati sunt.* Re verbisque castigati nobiles, paulò post se Vergilio & Anno-ni Episcopo, vt Christi sacris initiarẽtur, instituentos præbuerunt. Sabell. lib. 3. Æn. 10. ex Æn. Syl. lib. 20. Europæ.

NORVEGIÆ INCOLÆ.

Hac gente nulla ante Christum agnitũ in tuenda superstitione pertinacior: post susceptum verò, nulla constantior. ferunt enim olim quauis ex causa eos peregrinatos; cùm autem primũ reduces terram suam attigissent, pronos cadere in terram, & fa-

& facto Crucis signo, eam exosculari solitos, & exclamare: *O terra Christiana ante omnes. usque aded sui generis cultum præ ceteris extollebant.*

Cranz. lib. Noruegiæ cap. 11.

JAPONII INCOLÆ ANONYMI.

Hos etiam longè à nobis remotos terrarum spatio, nunc verò Christo propinquos, annumerare præsentibus visum: qui interrogati, quid de Christiana fide sentirent; hoc respondebant: *Nemo, nostra quidem sententia, rationis particeps, qui non auditis Christianæ disciplinæ decretis pronus assensatur, ac pareat.*

Ita de illis Maffei lib. 1.

Epist. ex Epist. Xaverij.

CHRISTIANORVM AMOR, ET ODIVM.

S. LUDOVICVS PIVS FRANC. REX.

NEque id satis visum quibusdam, ut Christiani dicerentur: quin & summo apud eosdem in pretio Christianorum nomen erat, & salus. quorum utrumque alij minùs piè aspernati. Priorem aciem ducat LUDOVICVS, qui ob insignia & præclara gesta PIVS dictus. ille enim dum in Syria cum exercitu ageret, rogabatur, nobilem quemdam Saracenum, qui Sultanum interfecerat, militari balteo donaret. at ille: *Absit à me, ut vel pro servanda vita, vel morte declinanda, à Christiana religione alienum balteo donem.* Sentiebat solis Christianis illud honoris competere. Gaufred. de Bello-loco, in vita eiusdem.

CAROLVS V. IMP.

Ætate, at non facti gloria posterior, nostri sæculi Cæsar CAROLVS. qui cùm in Africa constitutus, aduer-

aduerteret prælum, quod ocys committendum,
 non ex animi voto luccellurum; receptui canerent,
 imperavit: adiiciens nobilem illam vocem; *Malim*
unum Christianum servare, quam mille Mauros,
Turcas, Pænosve interimere. O clementiam! ô mā-
 factudinē! ô religionem! Zenocarus in
 vita, lib. 3.

IULIANVS APOSTATA.

Ille iam dictis ut ætate, ita & impietate prior; nō
 in Christum modò, sed & membra ipsius ita ut ne-
 que Christianos ad se venire permetteret, neque
 eorum legationem nisi inuitus susciperet. Mo-
 ventibus bellum Persis legationem mittebant Ni-
 sibini, auxiliares copias postulantes: quos omnium
 Christianorum nomine impio hoc responso com-
 pellans; *Nec me ullum, inquit, subsidium laturum,*
nec polluta civitatis legationem suscepturum scitote:
nisi prius vos mecum in Paganismum descendisse in-
tellexero Impiorum animus tum tranquillus, cum
 plures in sui sceleris consortium trahit.
 Sozom. lib. 6. Hist. Eccles. cap. 4.

I D E M

Ad quævis scelera pronus, ipsos Paganos in
 Christicolas armabat, animabatque. qui oppressio-
 nem illam aliquamdiu sustinentes, cum ingraue-
 sceret indies, ad eum recurrunt: at is, ut erat, alter
 sui sæculi Nero, *Quid expectatis? solatiū aliquod,*
aut lenimen? Vestrum, aiebat, est, ut patientes ma-
la sustineatis, hoc etenim præceptum est vestri Christi.
 Ita impius IMPERATOR, impiè in Christi doctri-
 nam blasphemus, eius quoque cultores illudebat,
 ipso Herode deterior. Ibid. cap. 39.

I D E M

IDEM

Ecclesiasticorum bona diripi & in fiscum inferri præcipiebat, Religionem prætexens. dicebat autem: *Hac ratione eos magis expeditos reddo ad regnum calorum. Beati namque inter eos sunt pauperes, quoniam ipsorum est regnum calorum.* Pompon. Lætus in vita eius, G. Richt. in axiomat. Eccles. cap. 80.

CHRISTI PŌTENTIA ET NOMEN.

IESVS CHRISTVS.

Q Vis dabit mihi nunc pennas sicut columbæ, ut ad augustum hoc CHRISTI nomen euolē, & non cum learo per nimium eius splendorem in præceptis agar? Quid enim Gentium simulachra (etiam Deo ita permittente) operata, si cum iis conferas, quæ huius nominis potentia freti viri sancti admiranda præstitere? cum ipsa Veritas dicat dilectis suis: *Usquequo non petistis quicquam in nomine meo? petite, & accipietis.* neque id dilectis solum; sed & improbis concessum, in nomine suo eiicere dæmones, & alia supra hominem efficere. Vnde super his miratus Ioannes, Magister, inquit, vidimus quemdam in nomine tuo eiicere dæmonia, qui non sequitur nos: & prohibuimus eum. IESVS autem ait: *Nolite prohibere eum. Nemo enim est qui faciet virtutem, id est miraculum, in nomine meo, & possit citò malè loqui de me.* (qua fronte enim malediceret illi nomini, quod in se experitur esse tam efficax?) *Qui enim non est aduersum nos, pro nobis est.* Admiranda nominis CHRISTI virtus: quæ etiam in alienis, & à se auersis pectoribus, suæ claritatis radios diffudit. Marc. cap. 9.

S. PETRVS

S S. PETRVS & IOANNES.

Hoc ipsum contestati huius nominis amantissimi, PETRVS & IOANNES. introcuntibus namque in templum, dum Cæcus quidam ad portam quæ Speciosa dicebatur, de more eleemosynam à trans-euntibus petens procumberet, & ab his etiam stipem flagitaret, eamque, respicere iussus in eos, iam certò exspectaret; PETRVS de meliori eleemosyna cogitans, *Argentum*, inquit, & *aurum non est mihi: quod autem habeo, hoc tibi do. In nomine Jesu Christi Nazareni surge, & ambula.* Act. cap. 3.

ALEXANDER EPISCOPVS.

Insignis quoque huius nominis cultor exstitit iste. qui videns nouas indies sectas pullulare, cùm auctoritate Constantini coactum esset Philosophorum concilium, qui cum Christianis de fidei veritate conferrent: ille paranti dicere Philosopho, *Tibi*, inquit, *in nomine Christi silentium impero.* manet ille ad hanc vocẽ elinguis: & quod ore non poterat, victus manum dat ALEXANDRO. reliqui viso miraculo conuersi, ac si Dominum audiuisent dicentem; *Si mihi non creditis, operibus ipsis credite.* Euseb. in vita Constant.

S. MARTINVS TYRON. EPISC.

Iuliano Cæsare donatiua parante, quæ in milites, quò in prælium iam imminens alacriores descenderent, erogaret; missionem MARTINVS postulat, dicens: *Christi nunc miles sum, pugnare mihi nefas.* motus ad iram Tyrannus, cum pugne instantis metu militiam iam detrectare obiecit. at MARTINVS, quasi illato sibi terrore constantior; *Si hoc*, ait, *ignaviae adscribitur, non fidei; ego die crastino solo signi*
I *Crucis*

CHRISTVM SEQVI.

S. IGNATIVS.

Quanta res sit Christum habere vitæ suæ exemplar, & ad illud suos mores efformare, vel ex illo eiusdem testimonio euidens sit, vbi ait: *Qui sequitur me, non ambulat in tenebris, sed habebit lumen vitæ.* cuius rei fiducia incensus IGNATIVS, vix cōceptum intra pectoris medullas ignem continere valens, ad bestias Romæ damnatus, *Nunc* inquebat, *incipio discipulus esse Christi: nihil de iis quæ videntur desiderās, vt Iesum Christum inueniam.* Verè & piè Bernardus; Nil canitur suauius, auditur nil iucundius, nil cogitatur dulcius, quàm Iesus Dei filius. Euseb. lib. 3. hist. Eccl. cap. 30.

• S. MALACHIAS EPISC. HIBERNIÆ.

Hic à nefario quodam Principe per dolum è templo vocabatur, firmandæ (vt prætexebat) pacis causa. cumque ne ad eum descenderet totus clerus suaderet, ille pacis cupidus, *Sinite, ait, me imitari magistrum meum. sine causa sum Christianus, si Christum non sequor.* Verè pectoribus nostris inferenda vox. quibus nomen dumtaxat Christianum in pretio, non vita. Sur. tom. 6. in vita.

NIVARDVS FRATER D. BERNARDI

Summa laude & admiratione dignus. cui puero adhuc, cum fratres, inter quos magnus ille Bernardus, ad Religionem pergentes in foro cum æqualibus ludenti dicerent; Niuarde frater, nunc te solum manet totius summa patrimonij: nos omnibus cedentes, Christum sequimur; ille, *Celum vos ergo possidebitis, ego terram?* absit. nihilque moratus,

puerilem animum in virilem commutans, fratres sequitur, & cum illis Christum. In vita Bern. lib. 1. cap. 3.

THOMAS MORVS.

An non dignus ille, qui prioribus iungatur? Cùm, vt erat summa pietate & religione, supplicationes diebus rogationum fieri consuetas pedes comitaretur; monitus à suis, equum conscenderet, dixit: *Nolo Dominum meum peditem equès subsequi.* Dicebat autē id propter crucifixi imaginem, in qua Christum venerabatur. Tho. Staplut. in vita.

CHRISTVM CONFITERI.

S. ROMANVS MILES.

Magna eos præmia manent, qui Christum hæc coram hominibus confitentur, nec eum annuntiare tam re quàm verbo erubescunt. tales enim ipsemet coram Patre suo confessurum se explicatis verbis promisit. quod intelligens (vt sexcētos alios omittam) ROMANVS MILES, qui postquam plum-batis flagrisque diu tortus, etiam ipsa latera mucronibus rescinderentur; dixisse fertur ad impiissimum Tyrannum: *Gratias ago, quòd ampliores mihi oris patefacias meatus, quibus Christum predicem: tot ecce laudant ora, quot sunt vulnera.* Dictum merè & verè Romanum. Sur. in vita.

S. DIONYSIVS: M.

Ille etiam meritò Romano adiungendus, qui Romæ à Diocletiano comprehēsus, dum latus ad supplicij locum duceretur, solùm hoc toto itinere ingeminabat: *Etsi milies occidi possem, tamen Domi-*

nium.

num meum Iesum palam confiteri non cessarem.

Pet. de Natalibus.

S. EVELPISTVS.

Et hic cum Sodalibus prætorio Rustici Præfecti sistitur. quo rogante, Tu quisnam es, cuiusve religionis? nil cunctatus, *Servus quidem Caesaris*, inquit, *sed à Christo libertate donatus; eiusque beneficio, illius spei, cuius & isti quos hic vides, particeps factus.* Sur. tom. 2. Lippelloo ibid. Metaphrast.

CIBVS.

IESVS CHRISTVS.

SCribis & Pharisæis ex eo quærentibus, quare tui discipuli transgrediuntur traditiones seniorum? non enim lauant manus cum panem manducant. Ille, conuocatis ad se turbis, *Audite*, dixit, *& intelligite. Non quod in os intrat coinquinat hominem.* & paulo post: *Non intelligitis quia omne quod in os intrat in ventrem vadit, & in secessum emittitur?* significans, nullum cibum esse ex se immundum, aut coinquinare eum comedentem, cum nihil cibi cor hominis (à cuius pollutione homo coram Deo pollutus reputatur) ingrediatur, & quidquid in eo immundi per secessum eiiciatur. Matth. cap. 15.

PIOR MONACHVS.

Hic ambulando, vel aliud semper agendo, cibum sumere solitus. rogatus autem cur eo modo comederet? *Nolo*, inquit, *velut necessitate uti cibo; sed tamquam extraneum aliquid agere.* Cur ita? percontanti, *Ne*, respondit, *dum comedo, anima voluptatem sentiat corporalem.* Socr. lib. 8. Trip. hist. c. 1.

F. BERNARDINVS PALOMVS.

Narrandum etiam quod huic subiicitur. Adscribunt BERNARDINO PALOMO, homini supra modum faceto, inter cetera illud : *Cibi sumptio, ad loquendum & bibendum commodius, instituta est : at, si apud magnates id fiat, prius dedecus, posterius infame aestimatur.* Floresta.

ISODORVS XENODOCHVS.

Vide tit. DE ABSTINENTIA.

LAVRENTIUS MEDICES.

Cum fatali lecto decumbenti cibi adferrentur, & eos porrigens rogaret, Quam sapiunt cibi illi? respondit, *Vt solent morienti.* quasi dicat, nihil in humanis relinqui solatij, aut dulcedinis illi, qui se videt moriturum. Ang. Politianus in Epist.

CLEMENTIA, MANSVETVDO, &c.

IESVS CHRISTVS.

INGredimur CLEMENTIÆ MANSVETVDINIS-
QUE fines : cuius nomen cum ex ipso Numine
petitum sit, obuiam quoque & paratam habet com-
mendationē. Ante omnia autem ipsum totius man-
suetudinis fontē referam CHRISTVM DOMINVM:
cuius humanissima facta ut sileam, vnicum tamen
sermonem eius rei indicem recensebo. Mansuetissi-
mus agnus ad victimam currit, maledicatur & irri-
detur: seque in exemplum nobis præbens ; *Discite,*
inquit, à me, quia mitis sum, & humilis corde; & inne-
nietis requiem animabus vestris. Veram nempe re-
quiem, in cælo, & in terra: dicente Propheta, Man-
sueti

fueti hereditabunt terram , & delectabuntur in
multitudine pacis. Matth. cap. 11.

S. ANSELMVS.

Vide EDVCATIO LIBERORVM.

ALEXANDER SEVERVS IMP.

Ad Ciuiles cursum flecto , quòd Sacrorum tan-
tus sit æstus, vt verear, ne si illos attigero, diu nimis
immorandum foret. Ducatum hìc præbet SEVE-
RVS IMPERATOR : cuius clementiam cùm impro-
barent mater & coniux, ac , Molliorem tibi magis-
que contemptibilem Imperij dignitatē fecisti, ob-
iicerent; ille , *Sed securiorem*, respondit , & *diutur-*
norem. Quàm dispar à nomine vita , & mores ! ac
rariùs verum illud,

Conueniunt rebus nomina quæque suis.

Bruf. lib. 3. cap. 13.

CONSTANTIUS IMP.

Adiungit se illi CONSTANTIUS. qui cùm rapto-
rem cuiusdam virginis in exilium relegasset , & in-
dignarentur parentes non esse morte multatum;
Haftenus, respondit, *incusent iura clementiæ: sed Im-*
peratorem, mitissimi animi legibus, præstare ceteris de-
cet. Auct. Serm. conuiuii. Item in vita eiusd.

CAROLVS MAGNVS.

Admirandam hic inter nostros gloriã & gratiam
hac quoq; virtute collegit. vt enim Pipinum filium
transcã, cui tertio, quòd in se coniurauerat, clemen-
ter ignouit; ad filiam veniam. Erat Eginhartus in
aula CAROLO ab epistolis; vir, vt illo æuo, doctus &
prudens. At quid nō facit cæcus amor? in filiam do-
mini sui exarsit , & ipsa in eum vicissim. quid face-
rent? restinguūt (vt solent amātes) furtiua sui copia,
& congressu: qui aliquamdiu latuit, donec hiemāte

quadam nocte, cum in secretiore cubiculo Eginhartus fuisset, & sub ipsam lucem exire vellet, videt multam niuem cecidisse. hæret, & timet ne à vestigiis deprehendatur vir in gynæceo fuisse. Consilio & astu subuenit amica, & illum in humeros sublatum & pendentem, dulce onus tulit. Ecce ô sortem miseram; æquam tamen. Videt id fortè ex superiore domus parte aurâ captans CAROLVS. dissimulat, donec pleno die Principû conuentus. Hic rem narrat, rogatque (at nomina suppressit) qua pœna famulus qui sic in dominum, & filia quæ in patrem peccasset, digni? cui illi, Mortis. Tum vtrumque vocat, & coram se sistit. En, inquit, hi sunt qui peccauerunt. Tu Eginharte, tu filia, qui hoc ausi estis. (nec negandi erat locus; patrem, ac dominum, inspectorem, accusatorem, iudicem, & vindicem habebant.) Quid meruistis? Mortē, inquiunt illi. at CAROLVS: *Tamen mitem tu Patrem, tu Dominum videte. Ignoscimus lege hac quam dicam. Eginharte, hanc tuam latricem uxorem duces: concordēs estote, & mutuum deinceps inter vos ferte.* Dixerat. illi à summo metu in gaudium inexpectatum translati, grates agunt, & gratulationes futuri connubij accipiunt.

I. Lips. Monit. polit. lib. 2. cap. 12. num. 12.

CAZIMIRVS DVX SENDOMIRIENSIVM.

Nec nimis seuerum est quod addam. CAZIMIRVS, qui postea Polonorum rex, dum tempus aliquando falleret per lusum alex cum domestico suo Ioan. Conario equite, & alternaret (vti in illis fit) Fortuna: cum multa nox esset, placuit vno iactu de tota summa decidere. Is felix CAZIMIRO fuit: qui pecuniam ad se attraxit. Indignatus eques, & sorti
suæ

suæ iratus, per calorem Principem inuadit, (capitale erat) & beneficio noctis euadit. primo mane CAZIMIRO sistitur puniendus. Expectatis hîc vindictam, aut ultionem, licet æquam? Nequaquam. at re bene considerata, Princeps, *Amici*, inquit, *iste minus quam ego peccauit: imò quidquid peccatum est, meum est. Calor mentem & manum ei mouit. at ego cur causam præbui? & oblitus conditionis meæ, quasi cum pari lusi? Imò tu Joannes, non veniam à me solum, sed & gratiam accipe. utili me castigatione docuisti, ne quid imposterum Principe indignum committam.* Ita dixit, fecitque. En clementiam, patientiam, prudentiam. Ibidem.

RVDOLPHVS IMP. AVSTRIACVS.

Hic etiam cum post morum mutationem clementior factus esset, quam in ipso Imperij exordio; reprehensus, in prudentem hunc sermonem erupit; *Seuerum & immitem fuisse me aliquando pœnituit: lenem & placabilem, numquam.* Memoranda, & verè Imperatore digna vox. *Æn. Syl. lib. 2. Com. de reb. gestis Alphonsi.*

LVDOVICVS XII. GALLIÆ REX.

At in isto etiam spectabilis hæc virtus fuit. cum enim in Regem esset euectus, accessit magna cum fiducia è domesticis vnus, postulans bona ciuis cuiusdam Aurelianensis, qui (tristi illo tempore, quo inter Ludouicum & Carolum octauum grauis illa simultas, & dissidium) ex acerrimis Ludouici hostibus fuerat. Rex animo planè regio, *Tu verò aliud à me pete*, inquit, *& meritis tuis gratia erit. De isto, omitte: nam Rex Gallia (verba eius sunt) non ulciscitur iniurias ducis Aurelianensis.* Dux enim antea cum hoc titulo fuerat: significabat ergo, dignita-

tem se, atque cum eâ etiam affectus mutasse. Refert Iust. Lips. suprâ.

REX MYMONIÆ IN HIBERNIA.

Tempora confundimus, at in re eâdem. Orta aliquâdo graui inter MYMONIÆ REGEM, & fratrem simultate, factum, vt à fratre REX regno pelleretur. Pulsus ad Malachiam Episcopum fugit, à quo regio honore excipitur, ac simul ab eo instigatur, regnum quo per iniuriam pulsus erat, per vim reciperet. cui ille, *Nequaquam id fecero, ait: nolo enim pro terreno meo honore humanum sanguinẽ effundere, qui contra me de terrâ clamet ad Dominum.* Docuit ex necessitate parandam virtutem. Coll. ex Surio tom. 6. in vita S. Malachiaë.

ALPHONSVS ARAG. REX.

Te autem ALPHONSE silerem? qui hîc parem vix ullum, at superiorem certè neminem habuisti. Obsidebat Caietam pertinaciter rebellem, constabat obsessos inopiâ comineatum premi: quod ipsi mer passi, inutilem turbam emittebât. Agitatum in consilio eam repellere in urbem, dedendam enim mox hac ratione. at noluit REX eorum misertus. quare cùm ea potitus non esset, quidam obicere ausi, Nisi illos emisisses, iam vrbe potitus esses. Ille fortiter & constanter, *At mihi, aiebat, pluris tot hominum incolumitas est, quàm centum Caietæ.* Tamen nec ea defuit. nam ciues tam insigni virtute moniti, vltro se ei tradunt. Meminerat clementissimus Princeps illius Senecæ, quod

—— quisquis est placidè potens
Dominusque vitæ seruat innocuas manus,
Et incruentum mitis imperium regit,

Ani-

*Animoque parcat : longa permensus diu
Felicis cui spatia, vel calum petit,
Vel lata felix nemoris Elisij loca.*

I. Lips. loco cit. Panorm. lib. 1. de Gestis eiusd.

IDEM

Percontanti, cur erga omnes, etiam malos, ita lenis esset; vocem factis consonam respondit: *Quia bonos iustitia conciliat, malos clementia.* Panorm. lib. 2. de Gest. Alphon.

IDEM.

Iterum cum de nimia eius lenitate quererentur ministri, eamque vix Principem decere dicerent: *Quid ergo, inquit, vultis vrsos & leones regnare? Hominum clementia, belluarum feritas propria est.* Vera dixit. Quo quis maior, & magis (ut sic dicam) homo est, hoc virtuti huic pronior, quæ ob id humanitas appellatur. Quare sapienter admodum Iuvenal. de hac virtute verba faciens Sat. 1. ait:

———— Separat hæc nos

*A grege brutorum: atq; ideò venerabile soli
Sortiti ingenium, diuinorumque capaces.*

& paulò post:

*Principio indulsit communis conditor illis
Tantum animas, nobis animæ quoq; , mutuus ut nos
Affectus petere auxilium, & præstare iuberet.*

Panormit. ibid.

IDEM.

Eiusdem etiam illa vox; *Malo multos mea clementia servare, quàm paucos severitate perdere.* Vnde etiam dicenti sibi cuidam: *Caue, ne tua hæc clementia in perniciem cedat: Imò verò,* respondit, *multa mihi perferenda sunt, ne in invidiam cadam.* Ibidem.

IDEM

I D E M

Quid maximè aduersarios flecteret , rogatus; *Placabilitatis ait, & mansuetudinis nomen.* Vnde dum contra Venetos & Florentinos haud equidem iniuria bellum suscepisset , ac magno animo & viribus aduersus eos contendisset , Veneri oratores armato obuiam procedunt, pacem humiliter postulant. cuius conditiones , cùm eiusdem procures intelligere desiderarent , ac se faciliè quiduis à victo hoste impetraturos dicerent , ALPHONSVS respondisse fertur: *Nullum aliud data pacis pretium existimo, quàm hostibus genibus ad me aduolutis pacem dare.* O Clementiam ! pænè è Potentùm pectoribus proscrip-
tam. Panorm. lib. 1. de Gestis eiusd.

CAROLVS V. IMP.

Et te vnicum Mansuetudinis præsidium CAROLÆ Cæsar in extremo hoc agmine colloco. Illi enim nihil grauius ingratiùsque , quàm aliquem capitis damnatum intelligere. Quare cùm in Anglia nobilissimum quemdam iuuenem sententia Volsæi , qui iudiciis præerat, damnatum audiuiſſet, pulchrè ludens , *Indignum*, aiebat , *à cane lanij tam pulchram damam deuorari.* nam ille qui tot annis lanienam in Anglia exercuerat, lanij filius erat. Præclarè Ouidius ad Cotim :

Conueniens hominum est hominem seruare voluptas:

Et melior nulla quæritur arte fauor.

Chyt, in Orat. de Carolo v. Imp.

COEMITERIUM.

ELIAS ABBAS.

COEMITERIA, quæ mortuorum domicilia, suntq; quasi publica quædã gymnasia, in quibus vera Philosophia, Mundi videlicet cōtemptus, docetur, alacri animo accedamus cum ELIA AB-
BATE. Ille enim cū sæpius ad ferales has scholas suos remitteret, & illi quidnam emolumentum ex eo accessu consequerentur, inquirerent; dicebat: *Quale in domo figuli retulit Ieremias propheta.* Iste namque eò à Domino missus, cū vidisset vas super rotam, ejusque confractionem & novam restorationem, didicit dependentiam necessariam populi à diuina bonitate. Ita & nos, intuentes Sepulchreta, vitæ nostræ & mortis memoriã recolimus, quodq; gloria hominis stercus & vermis est: hodie extollitur, & cras non inuenitur. ac vt benè cecinit Poëta,
*Omnia sunt hominum tenui pendencia filo,
Et subito casu quæ valuere ruunt.*

EREMITA ANONYMVS.

Rogatus, quomodo ad hanc publicam scholam accedendum esset, respondit; *Quo olim ad ludum Pythagora.* Ad eum enim primum accedentibus quinquennale imperabatur silentium, vt silendo meliùs tandem loqui discerent. Ita in hac mortaliū palestra, silentio & tacita inspectione opus; cū ad prudentiùs loquendum, tum ad rectiùs iudicandū, & meliùs viuendū. Ex Stimulis virtut.

PVER ANONYMVS.

*Complorata iacent mæstis ubi corpora bustis,
Garrula soluebant vocibus ora senes.*

Certa-

*Certabantque iocis : ad quos puer ore protervus,
Sunt, ait, ad vestras gaudia quanta domos.
Confectos atate senes , leihoque propinquos,
Ipsumque notans, esse sepulchra, domos.*
Ex Epigramm. Sabini.

COGITATIO, CONTEMPLATIO, MEDITATIO.

S. THOMAS AQUINAS.

QUAM verum Heracliti dictum, Plutarcho teste, vigilantibus vnum communem esse mundum, sopitos in suum quemque discedere, per cogitationem scilicet & contemplationem ; reipsâ inuestigandum. Atque vt Hieronymos, Augustinos, & alios insignes viros, apud quos magno in pretio contemplationis & sanctæ cogitationis studium, omittam ; THOMAS AQUINAS, qui ob doctrinæ præstantiam Angelici Doctoris nomen obtinuit, Parisiis cum Philippo, vel (si Campano fides) Ludouico rege in cœna accumbens, animo alienatus, cum ne oculis quidem conuiueret, manu tandem percutiens mensam, exclamauit ; *Aduersus Manicheos conclusum est.* quod factum dum Rex admiraretur, THOMAS cum rubore respondit : *Argumentum mihi in mentem venerat, quo Manichæorum dogma penitus euertendum.* Ita viri sancti etiam aliud exterius agentes, interiùs ad Dei gloriam promouendam semper intendunt. Fulg. lib.8. cap.7.

S. BASILIUS.

Aquinati sc BASILIUS associet. qui non ignorans, quantû pia consideratio ab impietatis studio mentem

tem auocaret, cū rogaretur, Quis frequenter irascitur? quis ad opera spiritualia piger est? quis actiones suas ad Dei gloriam non refert? hoc vnum ad singula respōdebat; *Qui non semper cogitat Deum suarum actionum inspectorem esse. Hæc enim una recordatio si esset assidua, contra omnia vitia medelam præbet.* Refert Th. Stapl. in Promp. æstiu. pa. 404.

FR. ÆGIDIUS COMES S. FRANC.

At quoniam facilem in homine aditum parat fœda cogitatio, dicebat aliquando FR. ÆGIDIUS, *Cum eiusmodi cogitatio accedit, eam abige: dicesque, Jam alius hospes meum domicilium occupauit.* Benè Ambros. Si non penitus libidinem nostro excutimus animo, tollimus eam magis nobiscum, quàm post nos relinquimus. Ibidem Dom. 2. post Pentec.

FRANCISCUS BORGIA SOC. IESV.

Vide infra, SVI COGNITIO.

S. ELIZABETHA.

Quæ etiam fæminis in hac contemplandi laude acciderunt, referam. Pannonum regis filiam ferunt ita supra se sublatā, cælestibus rebus animum intendisse, vt Iesum se in nubibus videre palàm testaretur, sibi que dicere, Ego tecum sum. vnde & illa cunctis audientibus respondebat: *Ita Domine, tu mecum, atque ego tecum.* Magnum diuinæ liberalitatis beneficium, vt homo Deum alloquatur: maius, vt alloquentem audiat: maximum, vt vnà cum illo sit. Conrad. Concion. de S. Elizabeth.

•CAROLVS MAGNVS.

Ille ad cervicale pennam & encaustum cum membrana noctu reponebat, vicinumque lecto parietem cera illini curabat. percontanti eius rei causam;

144 LAURENTII BEYERLINCK
fam; *Vt, inquit, si quid cogitanti mihi in lecto utile
occurrerit. signem, & memoria signatum postero die re-
uocem.* Conuenienter Aufonius,

Μελέτη τὸ πᾶν qui dixi, & dictum probo,
Meditationem id esse totum quod geras.
Eginard. in vita Caroli, & Henr. Erphord.

CAROLVS V. IMP.

Eiusdem mentis, sed paulò aliter CAROLVS V. qui
rem quampiam aggressurus, diu multumque eam
animo voluebat: in publicum non prodibat, imò
morbum quandoq; simulabat. dicebat enim; *Prin-
cipum consilia deprehendi non debere, priusquam in
opus deducta essent.* Theat. Zuing.

COGNITIO SVI.

ARSENIVS ABBAS.

SVI COGNITIONEM, quam veram Philosophiam
dicebat Demonax, rem difficillimam Thales,
tractandam per exempla suscipimus. Primum sit
ARSENII, magni illius Abbatis, quem dum videret
quispiam cum Ægyptio viro agresti multa disse-
rentem de cogitationibus, & non sine admiratione
multa inquirentem; indignabatur, virum tantum,
& tam celebrem, hominem idiotam de grauissimis
rebus consulere: sed ARSENIVS, *Non quidē negaue-
rim mediocriter me eruditum: huius tamen rustici illi-
teratam inscitiam me nondum fateor didicisse.* Sur.
tom. 4. ex Palladio & Metaphr.

IDEM.

Eiusdem etiam percelebre illud, quod comme-
morat Dorotheus. solitum enim eum frequenter
dicere asserit, *Arseni, ad quid venisti?* nihil magis
repu-

reputans ad sui cognitionem assequendam facere,
quàm sapiùs meditari, ad quid huc venerimus.
Dorothe. doct. 10.

CONSTANTIUS MONACHVS.

Hunc Arsenio socium damus. nam cùm ad viden-
dum eum quidam è longinquâ regione Anconam
venisset, eumque quòd statura pusillus esset despe-
xisset, irrisorem suum oculo excepit. & , *Quantum*
gaudeo, inquit, *quòd tandem nactus sum hominem, à*
quo iure parui pendendus existimor. Seruum enim me
scio, & ut habitu, ita ad quoduis bonum opus pusillum,
ac prorsus inutilem. Longè aliter hic sentiebat, quàm
publica hominum lex :

Quâ nemo in sese tentat descendere, nemo.

Sed precedenti spectatur mantica tergo.

Greg. lib. 1. Dial. cap. 5.

FRANCISCVS BORGIA SOC. IESV.

Ille item dignus qui inter priores locum habeat.
Occurrenti namque Dynastæ Hispaniæ, eiusque
vicem querenti, quòd inops veste attrita ambularet,
seque & valetudinem negligeret, respondit: *In me*
fore recipio, ut mihi caueam. Iter enim facturus, pro-
dromos binos præmitto tamquam exploratores, qui ho-
spitium mensamque adornent. Interrogantiq̃ue Dy-
nastæ, Ecquòsnam illos? *Mei*, replicabat, *cognitio-*
nem, & pœnarum apud Inferos quas merui, contem-
plationem. Lib. 4. vit. eiusd. cap. 1.

RELIGIOSVS ANONYMVS.

Iste quoque interrogatus à confratre, Cur ego as-
siduè iudico fratres, eosque carpo? respondit; *Quia*
necdum te ipsum cognouisti. Nam seipsum qui nouit,
fratrum vitia non aspicit. sed potiùs considerat,

--- num sibi quid vitiorum insenerit olim

*Natura, aut etiam consuetudo mala: namque
Neglectis vrenda filix innascitur agris.*

ANONYMVS FRANCISCANVS.

Cum esset hic Ecclesiastes summus, rogabatur, cur non eam energiam haberent sermones eius, quam Bernardini religiosi viri, quem ipse tamen eloquio superabat; Ego, inquit, comparari possum carboni calido, sed non ignito: cui si alij carbones apponantur, ignem non concipiunt. At Bernardinus similis carboni ardenti, inflammatus diuino spiritu: cui si applicentur alij, ignem concipient. In vita S. Bern. apud Sur. tom. 7. pag. 432.

COLLOQVIA.

S. PERMENAS PRESBYTER.

CORrumpunt bonos mores COLLOQVIA praua, habet vulgatum illud. & verè ita esse, suo dicto confirmauit PERMENAS vir sanctissimus, qui cum Polycronio Episcopo Babylone martyrium subiit. Comprehensus namque à Decio, cum is multa Polycronium rogaret, & ille nihil responsi redderet, quæsiuit Imperator, num mutus effectus esset. quod PERMENAS excipiens; *Non est, ait, mutus Episcopus, sed tacet, ne impiorum colloquiis inquinetur.* Marul. lib. 5.

S. LVDOVICVS EPISC. TOLOS.

Paris virtutis & animi hic: qui vana hominum colloquia velut cane & angue pciora fugiebat. Dicebat autem, quod & verè sentiebat: *Grata mihi piorum & bonorum familiaritas: quia ab his eruditio & pietas, non secus ac ab aromatibus odor.* In vita eiusd. manuscr. Louan. in Biblioth. FF. Minorum.

S. Go-

S. GODOFREDVS EPISC. AMBIAN.

Nec minùs illustris iste, apud quem ea inualuerat consuetudo, comites itineris vel antecedere, vel remotiùs eos subsequi; accedere autem neminem. Rogatus autem cur id ageret; *Ne, inquit, otiosis sermonibus detur occasio.* suo exemplo contestatus, Deo dicatum, sacris contemplationibus, non inani- bus sermonibus intentum semper animum habere oportere. Sur. tom. 6. in vita.

COMPASSIO.

IESVS CHRISTVS.

Multa alio in loco à nobis dicta, quæ ad hunc aptè deduci possent. pauca tamen in præsentì addemus, ne COMPASSIONIS limites neglexisse videamur. Huius autem illustre exemplum est D O M I N V S I E S V S, cuius tota vita quid aliud quàm continuata quædam compassio, & humanæ infirmitatis condolentia? videbat (vt grauiora seponam) turbam copiosam se sequentem triduùm, sine cibo: & conuocatis discipulis, *Misereor, aiebat, turba: quia triduo iam perseuerant mecum, & non habent quod manducent: & si dimisero eos ieiunos in domum suam, deficient in via: quidam enim eorum de longè venerunt.* Matth. cap. 15. Mar. 8.

Quære ELEEMOSYNA, CLEMENTIA, &c.

ALPHONSVS ARAGONVM REX.

Neque ALPHONSVS inter Principes hac laude caruit. Cùm enim Stephanus Neapolitanus, sumpto nepenthe, cerebro nonnihil læsus esset, teneretque opida quædam regia, fuerunt qui Regem ad ea ipsa repetendum incitarent: quibus ille; *Inhumanum videtur iis etiam substantiam auferre, qui-*

bus fors cerebrum & mentem abstulit. præclare insinuans, haud elle miseriam miserie superaddendam. Æn. Syl. lib. 4. de Dict. Alph.

ANONYMVS.

Refert de quodam, cuius nomen filet, B. Augustinus: quòd cùm in puteum altum incidisset, eiusque sortem quispiam miseratus, diceret; Quomodo huc miser decidisti? ille facetè respōderit: *Quid rogas, aut refert quomodo inciderim? age, ut me educas.* Ita quosdam videas proximi necessitatibus subleuandis parum attentos, inquirere potiùs quomodo eas habuerint, quàm rationem præbere subsidij vel medelæ.

Vide Apophth. de CHARITATE ERGA HOMINES, & de MISERICORDIA.

CONCORDIA.

D. LVDOVICVS REX FRANCORVM.

PErsequamur etiam læto & hilari stilo, egregium humani animi ab odio ad gratiam deflexum. Clarus in eo fuit LVDOVICVS GALL. REX, Diuorū numero adscriptus: qui non domesticos modò, sed & externos Principes, inter quos dissidium, ad concordiam reuocare satagebat. Quod cùm improbarent nonnulli, eos grauitè redarguens, *Quid, inquit, si externi me vidente, & simulante, armis dissideant: numquid per summā malitiam Regem Francorum id tolerare existimabunt; & in me regnumque aliquam perniciem machinabuntur? Præterea periculum, ne iram Dei in me prouocem, qui summo fauore prosequitur eum, qui dissentientes conciliare nititur. memor sermonis quem in loco campestri Dominus coram*

coram suis habuit : Beati pacifici, quoniam filij Dei vocabuntur. Ionuil. in vita eius cap. 89.

PETRVS ALDOBRANDINVS CARD.

Quàm autem vera sit illa Sallustij sententia ;
 Concordia res parux crescunt ; asseruit suo dicto
 PETRVS ALDOBRANDINVS : cui in ore aliquando ;
Cinium felicitas non solùm ex concordia nascitur , sed
ea etiam quasi quodam pabulo nutritur. Henricus
 Farnesius in Apophth. de Principe.

I D E M

Dixisse sæpenumerò commemoratur ; *Duo sunt*
Concordiæ vincula : beneficium & gratia : quorum al-
terum beneuolentiam connectit accipientium ; alterum
largientium amorem & studium stabili charitate con-
firmat. Ibidem.

ALEXANDER SEVERVS IMP.

Post illos primum locum postulat ALEXANDER
 SEVERVS : qui vitæ suæ postremum instare termi-
 num cùm aduertisset : filiis ad se vocatis, supremum
 hoc vale, ac æuiternum monumentum dedit : *In id*
vnum incumbite , Benè inter vos conueniat : locuple-
tate militem , ceteros contemnite. Præuidebat proui-
 dus etiam illo instanti Imperator, filios regnandi li-
 bidine de successione dimicaturos : & nisi milites
 pecunia flecterent, penitus interituros esse. Dion.
 Nic. & Xiphil. in vita eiusd.

IOVIANVS IMPERATOR.

Quid ille ? Rogatus aliquando responsum daret
 Macedonibus supplicantibus ; Odi, respondebat,
omne contentionis genus : concordiam autem unice am-
plector & amo. Verum esse illud Horatij testatus :

Felices ter , & ampliùs,

Quos irrupta tenet copula : nec malis

Diuulsus querimoniis,

Suprema citius soluet amor die.

Niceph. Call. lib. 10. cap. 40. hist. Eccles.

CONSTANTINVS MAGNVS

Meritò in hunc Illustrium numerum referendus. Cui cùm in Nicæna Synodo varij supplicantium libelli, quibus mutux querimoniæ exprimebantur, traderentur; omnibus ad concordiam excitatis, vniversos dilacerabat, dicens: *Mci muneris non est talibus in causis iudicem agere, aut proferre sententiam.* Sozom. lib. 1. cap. 16.

ALPHONSVS REX ARAG.

Verus Concordiæ patronus persæpè dicebat: *Si Romanorum temporibus vixissem, etiam templum Ioui Positorio construxissem.* Rogantiq̃ue causam, *Vt ita*, inquit, *de rebus acturi, in eo primùm conuenirent, & contentionem omnem deponerent.* Significabat autem nihil Reipub. perniciosius, quàm si cum Patribus plebs contentiones misceat. Panorm. lib. 3. de Gestis eiusdem.

COMES PALATINVS

Rogatus, quod esset potissimum Concordiæ vinculum; *Religionis*, aiebat, *similitudo, & de diuinis cultibus consensio.* Peucerus.

CONFESSIO PECCATORVM.

IESVS CHRISTVS.

CONFESSIONIS, quæ animarum salus, vitiorum dissipatrix, oppugnatrix dæmonum ab Augustino non immeritò appellatur, vtilitatem ac ineffabilem necessitatem prosequamur. quam vti DOMINVS,

MINVS ac SALVATOR noster Sacramentorum
 nouę Legis auctor instituit: ita etiam pluribus locis
 commendauit. & Petro siquidem, post insignem il-
 lam confessionem: *Tibi, inquit, dabo clauēs regni*
celorum, & quodcumque ligaueris super terram, erit
ligatum & in calis: & quodcumque solueris super ter-
ram, erit solutum & in calis. Quid enim per clauēs,
 nisi scientia discernendi inter lepram & lepram in-
 sinuatur? Quid per ligare & soluere, nisi sententię,
 post causę cognitionem, prolatio? Hoc ipsum &
 alio loco verbiſque post resurrectionem. in disci-
 pulos insufflans, dixit: *Accipite Spiritum sanctum,*
quorum remiseritis peccata, remittuntur eis: & quo-
rum retinueritis, retenta sunt. Math. cap. 16.
 & Ioan. 20.

S. ANTONIVS.

Eamdē confessionis necessitatem, atque vtili-
 tatem, confirmauit iste. *Magnam enim esse, dicebat,*
ad virtutem viam; si singuli vel obseruarent quod ge-
rerent, vel vniuersas mentis cogitationes fratribus re-
ferrent. Videbat certē ægrē peccatum cōmitti, quod
 alij debet manifestari, & quasi cū pudore profer-
 ri. Athan. in vita eiusd.

D. LVDOVICVS FRANC. R.

Et hic in id vnum incumbēbat potissimū, vt fi-
 lium natu maximum, hac Confessionis virtute im-
 bueret. Cui etiam moriturus, inter cetera salutis
 monita dicebat: *Elige tibi Confessorem, & idoneum,*
& probum: qui sapienter quid agere, quid sugere de-
beas, edoceat. O nimis disparē huius Principis à no-
 stri cui plerisq; Magnatibus animū! Ionuil. in vit.

CLAVDIVS VIEXEMONTIVS.

Vide IOCOSE DICTA.

Require Apoph. de SALVTE EIVSQ. CVRA.

CONFESSIO FIDEI.

IESVS CHRISTVS,
& PATER LVNATICI IN EVANGELIO.

Post peccatorum confessionem, eam quæ fidei est, conuenienter subdimus, sine qua prior illa nihili facienda; magni verò, si coniunctam eam habeat, æstimanda. LVNATICI PATER, (cuius meminit Euangelium) rogatus à DOMINO, *Si potes credere, omnia possibilia sunt credenti.* continuo exclamans, motus commiseratione erga filium, cum lachrymis protestabatur: *Credo Domine: adiuvata incredulitatem meam.* Et ita, vt habet Aug. Conc. 7. in Ps. 118. incredulitatem suã adhuc inhærentem, inuitò confitebatur: neque tamen fidem diffitebatur. & hinc filio sanitatem impetrauit. Mar. cap. 9.

S. PETRVS & IOANNES.

Vide PRÆDICATIO VERBI DEI.

BENIAMIN DIACONVS.

Vide CASTIGATIO MODESTA.

S. TIBVRTIVS MARTYR.

Sed & hunc meritò celebrauimus. Qui à Fabiano Præfecto compulsus, prunis ante se positis thura Diis ponere, aut easdem discalceatis plantis calcare; facto crucis signaculo, super eas ingreditur, dicens: *Depone infidelitatem Fabiane; discce solum Deum, quẽ confitemur, dominari creaturis. Tu tãtum presta in nomine tui Jouis; &, si potest, faciat te non sen-*

sentire dolorem. Sur. tom. 1. in vita S. Sebastiani.

CLERICVS ANONYMVS.

Longum foret enarrare quàm fortiter viri sancti hac Confessionis virtute vsi. quare pluribus aliis, alium in locum relegatis, quid de Clerico quodam commemoret Gregor. Turon. videamus. Ab Arrianis custodiæ traditus, cùm Personarum trinitatem in naturæ diuinæ vnitatem multis rationibus adstrueret; nec minis, nec muneribus, sententiam mutaret, induci poterat: tandem in equuleum sublatus, dum rogaretur, *Quid credis?* nihil aliud respondebat, quàm, *Credo in Deum Patrem, & in Iesum Christum, Filium eius unigenitum, atque in Spiritum sanctum, ex utroque procedentem.* Greg. Turon. de Glor. Mart. lib. 1. cap. 82.

Vide Apophth. de FIDE & FIDELITATE.

ACHEMENIDES.

Inuitant me etiam, & excitant quæ sequuntur. ACHEMENIDEM referam, qui à Tarane Persarum rege, quòd fidei semina in Perside sparsisset, accusatus; *Vniuersitatis*, aiebat, *Deum nequaquam abiuro, vt tibi amicitia iungar. Maius crimen, diuinam, quàm regiam ledere maiestatem.* Niceph. lib. 14. Hist. cap. 20.

IDEM

Illic honoris & amicitiae regiae, hinc munerum contemptor. Sumptuosis namque vestimentis à præfato Tarane donatus, postquam id factum sensit, vt ita lentis beneficiis à proposito dimoueretur; excandescens, concissas eas à se reiecit, dixitque: *Si eius gratia me Religionem longè optimam mutaturum putas, en munus tuum, vnà cum impietate, habe.* Ibidem.

CANVTVS ANGLORVM REX.

Addamus & hunc, cui præclarum huius rei testimonium præbent Annales. Cùm à coruis aulicis (Assentatores appelle) circumuentus, omnia ad nutum eius vultumque conuerti iactitarent: ille, iis inspectantibus, sedem regiam in maris litore poniturat. cui insidens, *Tu mare, inquit, ditionis mea es, & terra in qua sedeo, est mea: tibi impero, ne in terram meam ascendas: (iam enim erat maris accessus) nec membra domini tui madore perfundas.* Dixerat. Seruat suum fluxum mare, & immenso imbri domini sui sinum perfundit. Tum ille: *En, quàm ego omnibus imperito? Quin sciant omnes qui terram incolunt, vanam & falsam esse regum potentiam; atque vnum eo nomine dignum, qui verè imperium inhibet calo, terræ, mari ac diademate Cruci imposito, deinceps pietatis & modestiæ cultor exstitit.* Ita

*Regum timendorum in proprios greges,
Reges in ipsos imperium est Iouis.*

Saxo Grammat.

Vide Apophth. de CHRISTI CONFESSIOE, & NOMINE. Item de IDOLORVM VANITATE, &c.

CONIVGIUM.

IOANNIS BRITANNIÆ DVCIS F.

DE CONIVGIO dicturis, primùm se exhibet IOANNIS BRITANNIÆ DVCIS FILIVS, quem cùm pater in matrimonium tradere destinasset Isabellæ Scotorum Regis filiæ; rogat, qualis futura sibi vxor esset. Cui pater: Prudens est admodum, & decenti corporis forma: quæ, vt nostri sanguinis generisq; fiat particeps, digna est; verùm omni eloquen-

quendi venere caret. *Talem*, inquit filius, *optavi semper*: nam *satis multum prudentia mulieri inesse existimauerim*, si norit dignoscere inter thoracem & indusium mariti sui. quasi dicat: Quę nouit se moribus mariti accommodare, & malos dissimulare, bonos imitari. Corozetus de Dict. Fact. memor.

THOMAS MORVS.

Hic duas vxores successiuè habuit, & vtramque admodum paruę stature. Rogatus, cur tam exiguas duceret; illud Democriti respondit: *Quia ex duobus malis, minus putavi eligendum.* Tho. Staplut. in vita eiusd. cap. 13.

EVGENIA PHILIPPI FILIA.

Vide VIR BONVS.

Vide etiam plura in Apophth. de MATRIMONIO, MARITO, & VXORE.

CONSCIENTIA BONA.

S. TIBVRTIVS MARTYR.

BONA CONSCIENTIA, quę velut suaue nepenthes, omnem vitę mœrorem ac solitudinem repellit, & iuge conuiuiũ in Prouerbiis nuncupat Salomon, paucis illustranda. Veniat in medium TIBVRTIVS: qui dum Fabiani tyranni iussione, ocius Christi fidẽ negare variis tormētis propositis compelleretur, immota & inconcussa mente, in generosam hanc vocẽ erumpens, *Decerne*, respondit, *quod lubet. Omnis nobis vilis est pœna, ubi pura est comes conscientia.* Sentiebat autem cum Apostolo, gloriam nostram esse, conscientię proprię testimonium. Sur. tom. 1. in vit. S. Sebast.

S. HILA-

S. HILARION.

Quin & de S. HILARIONE testatur B. Hieronymus : quòd, cùm iam morti proximus, & modicus calor in corpore teperet, nec quidquam viui hominis, præter sensum, superesset, apertis oculis loqueretur : *Egredere, quid times? egredere anima mea, quid dubitas? Septuaginta propè annis seruiisti Christo, & mortem times?* Verè libenter ille moritur : & venientem (vt Christianè loquitur Seneca) nemo hilaris mortem excipit, nisi qui ad illam se diu composuerit. puta, cui conscientia mentem explet dulcedine & pace. Hieron. in vita.

LVPVS SENONVM EPISC.

Quis autem de L V P O Senonum Episcopo non malè opinetur, qui eum præcessoris sui filiam tenerimè diligere conspexisset? tamen ipse se taxari intelligens, eam in publico est amplexatus, dicens: *Non offendunt obloquentium verba, quem propria non inquinat conscientia.* Quæ res illo æuo fortassis tolerata: hoc verò, non sine graui scandalo tentanda. Marul. lib. 5.

ANONYMVS.

Illustre & illius responsum, cuius nomen silentij sigillo obseratum. Rogatus enim, quid nos potissimùm delectare soleat; *Conscientia*, aiebat, *pura, & spes bona.* Vnde non sine causa dictum à Sapiente : *Læti cordis os florescit.* Anton. Serm. de puro corde.

SEBASTIANVS LONDINENS. LVDIMAG.

Nostri æui est, quod addam. Exhibuerat SEBASTIANVS Scholæ Londinensis rector, inspectante Elizabetha Angliæ regina, Comœdiam miro cum plausu : & mercedem petere iussus quam veller,

Con-

Conscientia, aiebat, *libertate donari velim, quò Catholicam vitam impunè vivere valeam.* Veram quippe libertatem cum Periandro existimabat, Rectam conscientiam. Benè & doctè Quid. in Fastis:

*Conscia mens ut cuique sua est; ita concipit intra
Pectora, pro factò spemq; metumq; suo.*

Rastell.

Vide Apophth. de INNOCENTIA.

CONSCIENTIA MALA.

IVDAS ISCARIOTES.

AT numquam securus est reus animus: mala enim mens propriis cōscientiæ stimulis agitur: quibus etiam Regius vates sauciatus, clamabat; Peccatū meum contra me est semper. Eadē lue infectus IVDAS proditor, videns Iesum Iudæorū sententia damnatū, aliquo tactus dolore, peccati conscientia stimulante, referens triginta argenteos, iam ad desperationem ductus; *Peccaui*, inquebat, *tradens sanguinem iustum.* Cui illi respondentes, dicūt: Quid ad nos? tu videris. Insinuabant, cuiusque testimonium esse propriam conscientiam: & quæ ex eā & ab eā procedunt. Ac quemlibet nostrū

Nocte dieq; suum gestare in pectore testem.

Matth. cap. 26.

VOLSÆVS EPISCOPVS.

Fuerat hic inter primos Henrico VIII. Angliæ Regi auctor, quòd Catharinam Aragoniam repudiaret. At vt impiorum consilia rarò stabilem sortiuntur finem; non diu pòst, dum velut reus læsæ maiestatis Londinum supplicio afficiendus perduceretur; furis conscientia inquinatæ agitatus, *Vtinam,*

nam, ingemebat quasi desperabundus, nihilo magis diuina maiestatis laesa reus fuisset! Nunc autem, cum nihil prius habuerim, quàm eâ relictâ Regi inservire; & in Deum peccaui, & in Regem. Haud malè in Epigrammate suo Pictorius:

*Istud habet damni vitium inter cetera: quòd mens
Palpitat assiduo flagitiosa metu.*

N. Sander. de Schism. Anglic. lib. 1.

CONSILIVM ET CONSILIARIUM.

FREDERICVS CÆSAR.

CONSILIVM omne, à quocumque proficiscatur, à Deo esse, auctor est B. Augustinus: vnde & Consiliarios ipsos præstantiores esse cōuenit, ac vita & moribus superiores. Quis enim in cœno fontem requirat? quis de turbida lymphâ potum petat? Considerabat id FREDERICVS, qui aliquando pro concione Consiliariis suis dicebat: *Vtinam consiliarij mei in palatij vestibulo duas res deponerent! sic enim & ipsi recta consulerent, & mihi etiam de consiliis eorum iudicare esset facillimum.* Interrogantibus autem quænam illæ res essent? *Simulatio*, aiebat, & *dis-simulatio*. Docebat autem, Consiliariorum priuatos affectus sæpè obstaculo esse, quo minùs rei, bonoque publico Principes rectè consulerent. Æn. Syl. lib. 3. Comm. de Reb. Alphonfi.

IDEM

Ladislauum Hungariæ Regem, adhuc puerum, apud se educabat: neque deerant qui eum clàm perdendum suaderent: per cuius mortem vtpotè summam rerum obtineret. Verùm pius & prudens Imperator, *Cur me, inquit, diuitè potius, quàm pium de-*
sidera-

federatis? Ego sanè diuitias non ita amo, ut iis tam impium facinus, improbis vestris consiliis persuasus, attentem. Et hic iterùm suo exemplo docuit, consilia impia, eorumque auctores è Principum pectoribus aulisque extirpandos. Supra me esse debet, inquit Augustinus, cui me committere paro. Ibidem.

ALPHONSVS REX.

Rursus se hîc interit ALPHONSVS, verè magna huius operis pars. Hunc, cùm senex naturâ & ætate audacior argueret, quòd contra Patrum decreta bellum capefferet, dixit: *Regum consiliarij instar regum esse, regumque animos habere oportet. Plura tamen aliquando consiliariis priuatisque conueniunt quàm Regibus. Ita Parmenioni pecuniam cudere licuit, Alexandro non licuit. Panor. lib. 1. de Gest. Alphon. & Æn. Syl. de eiusd. Dictis.*

IDEM

Sciscitanti, quos Consiliarios maximi faceret; *Libros, respondit: quia ab his sine metu, sine gratia, que nosse cupio, fideliter audio. Panorm. lib. 3. de Gestis Alphonsi.*

IDEM

Reges ab aliis regi, ducesque ab aliis duci, per absurdum esse dicebat. Notabat autem eos, qui, cùm splendidis titulis Regni Imperiique gaudeant, suorum tamen Consiliariorum velut micipia existant. Panorm. lib. 2.

HENRICVS VIII. ANG. REX.

Vide DOCTRINA IN PRETIO HABITA.

CAROLVS VIII. FRANC. R.

Ante illum CAROLVS VIII. Rex Christianissimus, monitus à Legato Aquitaniae, ne Anglorum
consi-

consilio auxilioque vteretur, sibi satis esse virium bello suscitando: ad quemdam ex adstantibus conuersus, *Vides, inquit, sollicitantem eum, ut bellum moueam, quod ex usu Gallie futurum dicit. an & tibi idem visum?* quo dissentiente; Rex, *Sum*, inquit, Gallie studiosior, quam hic orator existimat. Cum enim vnus modò sit in Gallia Rex, vellem eam à senis Regibus gubernari. Prudentis est omnia prius experiri consilio, quam armis. Phil. Comin. lib. 4. de Reb. Gallie.

ALPHONSVS ARAG.

Eiusdem etiam mentis ALPHONSVS, quem paulò antè nominauimus. Qui, Cathalanis suadentibus, ut sibi adhuc ætate rerumque usu immaturo, septem viros prudentia doctrinaque insignes adiungeret, quorum consilio fretus, sua omnia dirigeret; laudauit consilium, adiecitque: *Si horum septem, vel vnum tantum dederitis, continuo illi regnum & regimen cessero.* insinuans, raras aues in terris esse bonos Regum consiliarios: at plerosque ex eorum genere, de quibus Iuuen.

Defossa in oculis quos sportula fecit amicos.

Panorm. lib. 2. de Gest. eiusd.

CAROLVS V. IMP.

Require supra, COGITATIO, CONTEMPLATIO, &c.
item GVBERNARE.

CONSOLATIO.

IESVS CHRISTVS.

Rationem in consolando valere plurimum, auctor est Cicero: ideoque Christiana solatia, quia in ratione fundata, solida sunt & efficacia.

Quis

Quis enim tales eas fuisse negabit, quas DOMINVS NOSTER pluries benignè est elargitus? vt autè Cananæam, Magdalenam, & alios innumerabiles trāseam, cū discipulis & Apostolis suū ex hoc mundo ad Patrem transitum insinuasset, vt mœstis medelam consolationis adferret: *Si, inquit, abiero, mittam Paracletum ad vos. & infra; Cū autem venerit ille Spiritus veritatis, docebit vos omnem veritatem.* Docet autem rebus afflictis nihil diuino solatio efficacius. Ioan. cap. 16.

S. PAVLVS APOSTOLVS.

Ille etiam veræ consolationis dulcedine perfusus, volens eam participare iis, qui secum in naui erant graui periculo expositi, aiebat: *Adstitit mihi hac nocte Angelus Dei, dicens: Ne timeas Paule, Cæsari te oportet assistere: & ecce donauit tibi Deus omnes qui nauigant tecum.* Act. cap. 27.

S. PAVLA ROMANA.

Meritò hæc Paulo supponitur, quam in rebus anxiiis hilari animo decātasse accepimus illud Psalmistæ: *Quare tristis es anima mea, quare conturbas me? Spera in Deo.* Hieron. in Epitaph.

S. LYDWINA.

Certet etiam cum hac LYDWINA, patria Bataua: quæ tanto consolationum recreabatur cumulo, vt earum pondere se opprimendam diceret, nisi aliquando etiam à Domino humiliaretur. *Bona, inquit, est consolatio, quam non tumor inflat: sed timor consolidat.* In vita eius apud Ioan. Brugman.

S. SABINA.

Eiusdem & sexus & fortitudinis illa. cui cū nefarij homines minarentur, ni Diis sacrificaret, in

L

prosti-

prostibulum coniiciendam: presenti se recreans solatio, *Sancto*, inquebat, *Deo id cura erit.* Sur. tom. 1. in vita Pionij.

PRINCEPS SARACENVVS ANONYMVS.

Huius autem egregium & memorabile dictum, ad calcem, licet extra præscriptum virorū ordinem, adiicimus. Hic quandoque ad captiuos in Ægypto Franciæ procures accessit, rogans, vtrum & illi in Deum crederent ex Virgine natum, cruci affixum, mortuum? &c. quibus affirmantibus, *Macte igitur animo*, inquit, *parum adhuc id erit, tantillum pro eo sustinuisse, qui pro vobis ad mortem vsque decertauit. Qui si tanta fuit potestatis, quod seipsum è sepulchro suscitauit, brevi vobis speranda ex his calamitatibus liberatio.* Seriam veramque consolationem fuisse, probauit secuta libertas. Ionuil. in vita D. Ludouici, cap. 42.

THOMAS MORVS.

Huius admirandam omnium rerum virtutem multa loquuntur. Quid illustrius, quàm quod carceri mancipatus, nullum dolori locum daret? & qui ad se excitandum accurrerent, ipse nouo quasi solamine recrearet? *Mundus*, aiebat, *carcer est, ex quo ad causam dicendam suis singuli diebus euocantur. Quod autem meus carcer aliorum Principum carcere sit minor, beneficij loco habeo: cum è malis minimum sit eligendum.* N. Sanderus de Schifin. Anglic. lib. 1.

Vide Apophth. de FIDV CIA IN DEVM.

Item,

RES ADVERSÆ.

CON-

CONSORTIVM, CONVERSATIO.

S. PETRVS APOSTOLVS.

Qui cum sapientibus graditur, inquit Prou. cap. 13. Salomon, sapiens erit. Vnde Apostolorvm PRINCEPS, cum multi discipulorum Iesu retrò abirent, & non iam cū eo ambularent; rogatus à Domino, Numquid & vos vultis abire? aliorum nomine respondebat: *Domine quò ibimus? verba vite eterne habes. & nos credimus & cognouimus, quia tu es Christus Filius Dei.* declarans suo dicto extra Christi consortium nusquam fidelibus tutum esse refugium. Ioan. cap 6.

S. IOAN. APOSTOLVS.

Si quantum mali ex sordidâ conuersatione emer-
gat cognoscere velimus, quantumque boni hone-
storum ac bonorum conuictus reportet, indagare;
intueamur IOANNEM APOSTOLVM. Hic enim la-
uandi gratia balneum ingressus, cum ibidem vidis-
set Cerinthum hæresiarcham, continuò exsiliens,
illotus recessit, dicens: *Fugiamus hinc, ne & ipsa bal-
ne. corrumpant, in quibus veritatis hostis Cerinthus la-
uatur.* Docebat impiorum (quorum numero ad-
scribendus Cerinthus) consortia vbique locorum
deuitanda. Euseb. lib. 3. hist. Eccles. cap. 22. Iren.
lib. 5. cap. 3.

ARSENIVS ABBAS.

Hic etiam omnium omnino conuersationem
commerciumque fugiebat. Rogatus autem, cur ita
solus viueret, cum multis ipse prodesse posset, tum
sermone, tum vitæ exemplo; *Non possum,* inque-
bat, *diuidere me Deo & hominibus, ut utrisque com-
placeam.* Sur. in vita eius, tom. 1.

S. HVBERTVS.

Aliter ille. cùm aliquando martyrij desiderio flagraret, ac meminisset necis B. Lamberti, sui quondam collegæ; inter pias lachrymarum exuberationes conquerebatur, *O infelicem me, cui tanta peccatorum congeries, ut viri tanti martyrium subeuntis consortio indignus sim.* Ita nimirum se imperfectioris arguebat, ut quò esset perfectior, eò magis sibi met videretur exiguus. Sur. tom. 6. in vita.

S. LAVRENTIVS MARTYR.

Meritò inter alios celebrandus LAVRENTIVS, qui Sixtum Episcopum ad martyrij palmam properantem conspicatus, hac voce in publico aggreditur. *Quò progredieris sine filio pater, quò Sacerdos sine Diacono properas? vide an idoneum ministrum elegeris, cui commisisti Dominici sanguinis dispensationem? & mihi iam tui sanguinis consortium negas?* Ardebat videlicet illi in morte coniungi, cui dum viueret, sæpiùs per ministerium & animi vnionem fuerat coniunctus. In vita eiusd. apud Sur. & Sulpit.

INNOCENT. VI. PONT.

Ille, ut ceteris adiiciatur, domi habere noluit nisi viros probatos; idemque facerent Cardinales, monuit. dicebat autem: *Nostra & omnium Ecclesiasticorum vita, ceteris exemplo esse debet ad imitationem Saluatoris nostri, cuius tota vita ad humani generis imitationem respiciebat.* Platina in vita.

Vide SOLITVDO.

CON-

CONSTANTIA RELIGIOSA ET PIA.

S. PETRVS APOSTOLVS.

Sequitur RELIGIOSA ET PIA Christianorum
 CONSTANTIA, quæ in Sanctis vtriusque sexus
 emicuit. Nullâ certè re, nostra hæc Religio magis
 abundat, magis se commendat, & adfirmat. Pauca
 itaque in historiis sparsa collegimus, & in iis petram
 Ecclesiæ P E T R V M: qui velut ceterorum caput &
 ductor, Christo de passione multa dicente, cùm
 audiuisset omnes in eo scandalizandos, *Et si, ait,*
omnes scandalizati fuerint, sed non ego. Qui etiam
 cùm Christus respondisset, Quia tu hodie in nocte
 hac, priusquam gallus vocem dederit, ter me es ne-
 gaturus: amplius loquebatur; *Et si oportuerit me*
commori tibi, non te negabo. Quod licet ex præsum-
 ptione dictum fuisse videatur, habet tamen aliquid
 religiosæ Constantiæ admixtum: vtpotè cùm illa
 assertio non nisi ex vehementi in Dominum adfe-
 ctu processerit. Matth. cap. 26. Luc. 22.

PACOMIVS ABBAS.

Quid de illo dicam? cui id vnum curæ semper
 fuisse commemorant, iuniores ad piam hanc & re-
 ligiosam Constantiam adhortari. Ita enim dicebat:
Frustrà ad salutis brauium currimus, nisi curramus
sic vt comprehendamus. Frustrà cum hoste confligimus,
nisi certemus vt vincamus. Marul. lib. 5. cap. 8.
 Metaphrast. & alij.

THEODORVS MONACHVS.

Hic Pacemij discipulus, professionis suæ initio,
 multùm à matre sollicitatus, ad sæculum rediret,

numquam assensum præbuit. cùm autem litteras a
Antistite loci attulisset, quibus libera ei fieret rece-
dendi facultas, Christum præterens, regredi no-
luit; *Nec, inquiens, scandalizantem oculum à me
proiectum, iteratò requirere videar.* & ita esse ma-
luit Dei filius, qui matris esse recusavit. Marul.
lib. 5. cap. 8. in vitis P P.

EREMITA ANONYMVS.

Refert Cassianus ERFMI CVLTOREM vsque adeò
vitæ solitariae flagrasse desiderio, vt dum fasciculum
litterarum è patria accepisset, ne aperire quidem il-
lum dignatus sit, sed in ignem conieceroit, hoc dicto:
*Ite cogitationes patrie, pariter concremimini: nec me
ulterius, ad ea quæ fugi, renocare tentetis.* Cassian.
Monast. instit. lib. 5. cap. 32.

DIDACVS ANDRADAS SOC. IESV.

Non immeritò illum celebramus, quem etiam
hæc virtus extulit. Erat enim P. Ignatio subcentu-
rarius: cumque pugionibus confossus in pelagus
præcipitaretur, socios ad pugnam spiritualem co-
hortatus, *Pugnemus, aiebat, socij fortiter, sanguinis
prodigi: Christi enim sanguine redempti sumus.* Quid
hîc priùs mirabimur, an admirabilem niuei pecto-
ris constantiam, an verò religiosam illam in Domi-
num suum Christum fiduciam? In vita F. Bor-
giæ, lib. 3. cap. x.

*Vide in Apophth. de ANIMI FORTITVDINE,
MARTYRIO, item FIDVCIA IN DEVM, &c.*

CONSVETVDO.

S. BERNARDVS ET ANONYMVS.

CONSVETVDO, quæ quasi secunda, & (vt cum
Augustino loquar) affabricata natura dicitur,
paucis

paucis perstringenda. cum enim vincere, dura est pugna; vicisse, maxima victoria. Certè D. BERNARDVS, cùm in Franciæ finibus agens, nobilem offendisset in tantum luxuriæ vitio deditum, vt quolibet die eodem se inquinaret; eum seuera oratione, at nihil proficiente admonuit. Qui dum se abstinere nullo modo posse assereret, *Quæso*, inquit bat BERNARDVS, *saltem aliquales cum Deo inducias facite, vt minùs ad triduum*. Annuit ille: & ecce triduo expleto, *Nunc in honorem Deiparæ*, inquit vir sanctus, *tantumdem presta*. paret: tum tertio BERNARDVS, *Semel adhuc has inducias posco in honorem omnium Sanctorum*. & ille rursus eas paciscitur: donec sponte BERNARDO se insinuans, diceret: *Nolum amplius diurnas, sed perennes cum Deo inire inducias*. Tantum prodest inueteratam peccandi libidinem contraria assuefactione sensim eradicare. In vita D. Bernardi, & 7. part. spec. Spirit. cap. de consuetud.

S. IOANNES CHRYSOSTOMVS.

Quanta verò innatæ iam consuetudinis vis sit & vsus, suo dicto asseruisse Ecclesiæ Doctore CHRYSOSTOMVM, auctores sunt Ant. & Max. Sermon. de consuetud. dicebat autem: *Nihil tam firmum est in rebus humanis, quàm veteris consuetudinis tyrannis*. Hinc verè Ethnici alteram naturam dixere consuetudinem, eiusque imperium grauissimum. nam vt rectè Iuuen.

—— *Laqueo tenet ambitiosi*

Consuetudo mali. ——

LVDOVICVS PALATINVS COMES.

Præclarus ille vir, iure inter præclaros Ciuilis ordinis, à nobis solus recensabitur. Cùm enim quid-

nam eligendum optandumque altercarentur nonnulli : interrupto sermone, *Eligenda est, ait, optima vita ratio, quam consuetudo reddet suauissimam.* Meminerat illius Stagiritæ : Multa quæ natura sua non sunt delectabilia, cùm fuerint assuetudine superata, tandem fiunt delectabilia. Timoth. Berck. in Orat. Fun. Ludouici.

ANONYMVS.

Ille autem interroganti, quidnam homini inter cetera esset suauissimum; *Id, ait, quod tota vita consuevit.* Quare Orosius de Ormesta lib. 1. præclare sentit: Dum, inquit, perpetuò in vita sua tràquillitatum & deliciarum sereno assuefacti sunt, ad omne vel modicum obductę solitudinis nubilum commouentur. Polyanthea.

CONTVMELIA.

FREDERICVS III. IMP.

SIcuti nec ob calorem Ægyptum, neque Scythiam ob frigora, fulmen sentire ferunt: ita è conuerso, nec summa potentia, neque extrema fortunæ humilitas, à CONTVMELIA hominem tutum reddit. quod eleganti dicto, felix aliàs in eiusmodi, illustrauit IMPERATOR FREDERICVS. Ille etenim Romã profecturus, cùm vidisset Cosinæ Medices opes maximas, dixisse fertur: *O quæ conuitia contumeliasque perpeffus, antequam hoc modo locupletatus est.* Innuens, eos qui ex humili emergunt, multorum odiis exponi: dum ea insita sit mortalibus natura, recentem aliorum felicitatem agris oculis intueri. Æn. Syl. de Dict. Alphonfi.

AQUITANVS ANONYMVS

Percontanti Carolo vii. Franc. Regi, qua tandem ratione fidem sibi tot præclaris rebus perspectam falleret; *Non tuo*, aiebat, *Here regno, non orbis imperio adduci possem, non omnium thesauris: contumelia tamen, & stomachosa iniuria possim.* Quod verè est contra illud vulgatum: Cadentem in virum bonum, non hære contumeliam. Æmil. in vit Lud. 12. Gall. reg.

CONVITIA ÆQVO ANIMO
PERPESSA.

FREDERICVS III IMPERATOR.

Huiusce rei exempla suppeditant S. Litteræ, & SS. vitæ. vtpotè quibus nihil magis in voto, quàm pro nomine Iesu contumelias conuitiaque perpeti. Sed neque Ciuille agmen suis hîc caret. Antesignanum agat proximè nominatus FREDERICVS: qui, dum multa in eum maledicta iactassent homines improbi, ad Proceres conuersus, *An nescitis*, inquit, *Principes quasi signum ad sagittas expositos? turres enim præaltas fulgura feriunt, humilia tecta prætereunt.* Appositè Seneca in Epist. Malis displicere laudari est, nec vllam auctoritatem habet, vbi qui damnatus est, damnat. Æn. Syl. lib. i. com. De reb. Alphon.

ALPHONSVS REX ARAG.

Proximos illi honores occupet ALPHONSVS. audierat namque quosdã de se benè meritos, linguam à conuitiis non temperare: *Regum*, inquit, *est, non solum benè facere: sed mala etiam patienter audire.* Panor. lib. i. De eius gest.

LVDOVICVS XII. GALL. REX.

Nec minor illo LVDOVICVS, qui Carolo octauo superstitite adhuc, multis & grauibus laceratus contumeliis, eo vita functo, cum in regni hereditatem successisset, & calumniatores sibi fuga consulerent, absentes suapte sponte reuocauit, dicens: *Prinati personam exui. Rex quippe constitutus, hæcce conuitia neque curo, neque vlcor.* Annal. Franc.

Vide Apophth. de PATIENTIA, MANSVETUDINE, &c.

CONVITIA IN AVCTOREM RETORTA.

IESVS CHRISTVS.

Veluti in maledicendo promptissimi sunt nonnulli, ita non minus ingeniosi alij, vt maledicta in auctoris sui caput retorqueant; mira aliquando cum elegantiâ & lepore. Calumniabantur IESVM Pharisei, quod in Beelzebub dæmoniorum principe eiceret dæmonia. at ille; *Filij vestri in quo eiciunt? & paulò post: ipsi indices vestri erunt. Omne regnum in se diuisum desolabitur, &c.* Matth. cap. 12.

INARIUS EPISCOPVS.

Vide CÆCITAS.

VITELLIVS CORNETANVS CARD.

Nuntiauerat illi Alphonsus, se Marte iudice eum arma indecenter tractantem, eò inopiæ redacturum, vt tamquam infimi ordinis sacrificulus, misfarum solènia etiam denario peracturus sit. cui ipse; *Non abnuo, aiebat, conditionem, vt magni Regis Sacella-*

cellanus efficiar. Regis nuntium quod serium videbatur, eludens. Iouius lib. 1. Elog.

RICHARDVS VITVS.

Admodum facetè ille : non minùs ingeniosè hic. Disputabat enim cum homine nefario Anglocaluinista, potentiore ad bibendum quàm differendum, de clauibus Ecclesiæ. cumque sibi eas datas constanter ille & pertinaciter assereret ; *Credo*, respondit VITVS, *tibi perinde ac Petro eas esse datas: verùm hoc discrimine, quòd huic regni celestis, tibi verò cerenisiaria cellæ. hoc enim rubicundum tui nasi promontorium indicat.* Ex Martyr. Angl.

THOMAS BIRACVS.

Neque inferiores hoc in titulo alij. Conuocarat aliquando Patriarcha Hierosolymitanus ad certam causam discutiendam plures aduocatos. cumque vnum ex illis acriùs castigasset, THOMAS BIRACVS præ ceteris liberiùs in eum erupit : cui Patriarcha, *Vt video*, ait, *malum caput habes.* At ille vt erat promptus, *Verè*, inquit, *& benè: nam si bonum caput haberem, meliori loco res nostra essent.* Te igitur culpas? infert Patriarcha. *Non me*, respondit THOMAS, *sed caput incuso.* ipsum scilicet Patriarcham, qui reliquis præerat, incusabat. Pogg. Florent.

SFORTIA COTIGNOLA.

Ei quoque dum à Sergiano magno Senecianico ad exprobrandam generis nouitatem ligonis fabula obiectaretur, *In hac*, inquit, *vt video stirpis origine conuenimus, cum Adarnus mortalius primus terram fodcrit: sed ego certè quod iure diffiteri non potes, illo meo ligone multò euasi nobilior, quàm tu tuo pene & penna.* Quo scommate lepidè hominè transfixit.

cùm

cùm in eo tanta cum inuidia dignitatem, stupro-
que sitam, & patrem eius ad Prætoris tribunal igno-
bilem scribam, adulteratoq; testamento falsi dam-
natum, scitissimè notasset. Paul. Iouius in vit.
Iac. Mutij, cap. 84.

HOSPES ILLYRICVS ET VANDALVS.

Ebrius occlusas pulsabat VANDALVS ades,

In quibus ILLYRICI sanguinis hospes erat.

Impatiensque mora, cùm nigrâ bile tumeret,

Hospite confestim non reserante domum:

Ecce quid Illyricum, clamabat, & inter asellum

Quo pecus est nullum turpius, esse rear?

Ille refert contrà: Dubius quid talia quæris?

Anne vides quòd sint inter vtrumque fores?

Ex relatis Auctori.

QVERALDVS LEGATVS REG. ARRAG.

Ad Africæ Regem missus Legatus, nobili cœna
apud eum excipitur. Aduocantur etiam procerum
nonnulli, quibus Rex mandat, clàm ossa derosa col-
ligant, & ad QVERALDI pedes proiiciant. Postquam
epulis exempta fames, mensæque remotæ; apparet
ossium cumulus. tum quispiam à Rege subornatus,
Quid hîc, inquit, ossium est? profectò lupo hîc cœ-
nauit, non homo. Cui QVERALDVS Regem intui-
tus, *Mihine, inquit, ô Rex cum lupis fuit negotium?*
Luporum enim carnem & ossa simul arrodere: quod
tui isti commessatores fecêre. ego vt homo carnem sum-
psi, ossa in humum ieci, in canum pastum & oblecta-
mentum. Pontanus.

HISPANVS ANONYMVS.

Sisterem, nisi faceta HISPANI cuiusdam & libera
responsio, quam Franc. Swertius F. inter alia mihi
suggerit, retardaret. Solimanno Mahumetano so-
lenne

Ienne erat, in loco quo alium solitus exonerare, depictas conseruare Christianorum Principum effigies. Itaque necessitate naturæ compulsus, dum eò se conferret, HISPANVM, quem inter ceteros ministros fortè alebat, ad se vocat. Et ostēsa Philippi 11. Regis imagine, Eo, inquit, honore apud me est tuus Princeps. Cui HISPANVS (mirare quòd tam liber apud Tyrannum) *Credo, ait, non sine causa M. T. hunc istī loco consecrare. Illius enim vel solūm in imagine representati aspectus, in tantum tua viscera commouet, ut sine medicorū ope, natura se sua sponte quasi deficiens resoluat, & quidquid ei superabundat, eiciat.*

SCVRRA ET TORTOR.

Vnum adhuc huius farinae à Georg. Sabino carmine descriptum, ad extremum adscribam:

Vsurpare ioco Pastoris verba Menalce,

Omniбус & solitus dicere SCVRRA fuit:

Efficiam posthac ne quemquam voce laceffas:

Ipsius hac semper verba iocantis erant.

Ast ubi iam capitis meruisset crimine pœnam,

Multa quòd intulerat probra nefanda bonis:

Cumque foret laqueo iam suspendendus, eodem

Bucolico ludens carmine TORTOR, ait:

Efficiam posthac ne quemquam voce laceffas,

Fracturus torto iam tibi fune gulam.

Require ARTIVM CONCERTATIO.

CONVIVIVM.

IESVS CHRISTVS.

CONVIVIVM omne tribus constare oportere, Cex Menalippa Varronis colligitur: Lectis viris, lecto ioco, lecto tempore. quale fuisse illud quod sub-

subiungimus, quis audeat inficiari? DEI namque FILIVS, cū Matthæum publicanum ad Apostolatū apicem euexisset, eius domum ingressus, cum eodē, & pluribus aliis publicanis ac peccatoribus, quibus extremum vale, amicorum more, Matthæus dabat, discubuit. Pharisei verò indignati, Quare, dicūt ad CHRISTI discipulos, cū publicanis & peccatoribus manducat Magister vester? quorum accusationem audiens IESVS, ait: *Non est opus valentibus Medicus, sed malè habentibus.* insinuans, quòd reficiendo nos corporaliter, etiam possimus accumbenti proximo nostro cibos suppeditare spirituales: & ea esse tum demū lectissima conuiuia, in quibus non tam curæ est corpus pascere, quàm proximi infirmitates, quæ tum vel maximè se produnt, dirigere & sustentare. Matth. cap. 9.

D. LVDOVICVS FRANCORVM REX

Viros pios & religiosos ad mensam adhibebat, cumque duos ex illis in aurem colloquentes advertisset, grauitere eos obiurgauit; *Malè*, inquit, *facitis domini mei clām colloquēdo: clara voce si quid dicendum, exponite: ne quisquam vos malè de se loqui suspicetur.* Significabat autem, non nisi urbana in conuiujs communicanda: seria & grauia, in aliud tempus & locum differenda. Ionu. in eius vita, cap. 94.

S. HVGGO EPISC. LINCOLNIENSIS.

Ille Regum & Magnatum conuiuia despiciebat. cumque venissent aliquando à Rege missi, qui aduentum eius iam diu Regem præstolari nuntiarent; *Satiùs*, aiebat, *est terrenum Regem absque me prandere, quàm eterni Regis mandatum ab humilitate mea negligi.* Erat autem singulari sollicitudine erga

erga sepulturam mortuorum. Sur. tom. 6. in vita.

PETRVS ALDOBRANDINVS CARD.

Aspernabatur hic splendor & regales apparatus, præsertim in conuiujs. Vnde cum Romæ plurimi solùm in id intenderet, vt aduentantes heroës maiori splendore & gloria exciperent, interrogatus à quodam Principe, cuius mensam maximè laudaret; *Masiniſſæ Regis*, inquit, *potius* (ille enim semel interdium vefci solitus, idque sine pulmento) *quàm Cleopatra*. quæ, vno ferculo Antonio præparato, centies sestertiũ absumpsit. Henr. Farnes. in Apophth. de Princ.

IUGO DVX CARINTHIÆ.

Vide CHRISTIANISMVS.

CORREPTIO.

S. IOANNES BAPTISTA.

INgrediamur pelagus CORREPTIONIS FRATER-
 INÆ, quæ innata vitia, aut consuetudine vitiosâ nobis insita, rectæ rationis fræno coërtet. Liberalem admodum hoc in beneficio Christum Dominum existisse, documêto sunt Sacræ litterę. In quibus etiam de eiusdẽ PRÆCVRSORE memoriæ proditum: quòd cum videret multos Phariseorum & Saducæorum venientes ad baptismum suũ, sciens eos simulato magis quàm sincero animo id agere, *Progenies*, inquit, *viperarũ, quis demonstravit vobis fugere à ventura ira? Facite ergo fructum dignum pœnitentiæ*. Seria correptione, quid faciendum esset, amicè designabat. Matth. cap. 3.

CÆCVS EVANGELICVS.

Inter cetera notatu digna in hoc CÆCO, vnum illud

lud est, quòd calumniantibus Pharisæis tam animosè, at verè responderit. & quidem dicentibus se Moysis discipulos, ac Christum nescire unde sit; *In hoc, aiebat, mirabile est, quia vos nescitis unde sit, & aperuit oculos meos. Scimus autè quia peccatores Deus non audit: sed si quis Dei cultor est, & voluntatem eius facit, hunc exaudit.* Pulchra & efficaci argumentatione, stolidas Pharisæorum calumnias corripit & refutat. Ioan. cap. 9.

LATRO POENITENS.

Quis non miretur etiam in LATRONE, cui dolores omni ex parte obrepserāt, hoc correptionis beneficiū non potuisse occultari? Videbat & audiebat commilitonem suum & supplicij socium, in Christum blasphemias iaculantem: & non sustinens, increpabat eum, dicens: *Neque tu times Deum, quòd in eadem damnatione es?* & culpam in se agnoscens, ac Domini innocentiam intrepidè confitens, subiiciebat: *Nos quidem iustè: nam digna factis recipimus: hic verò nihil mali gessit.* Luc. cap. 13.

S. IOANNES EPISCOPVS

Nolebat vniquam corripere alienos mores aut vitia. Itaque domesticos obiurgabat grauius, quòd raptorem quemdam morte dignum iudicassent. Dicebat autem: *Et quī scitis, si ille iam peccare destitit, cū vos non cessetis?* Iure ista vir sanctus. cū nemo sciat, num amore an odio dignus. M. Marulus lib. 5.

ORIENTVS ABBAS MONTIS SINA.

Æternam quoque memoriam meretur apud posteros iste. Dominica quadam die Ecclesiam ingressus est inuerso fago, ita vt de foris totus villosus appareret.

reret. Conspiciantur hoc religiosi, & Abbatem erroris monēt, ac duriusculè redarguunt, quòd ita comparuisset coram exteris. Quibus ille: *Vos euertistis Sina, & nemo quidquam vobis dicit. at ego, quòd sagum inuerterim, dicitis: Quare cōuertis sagum tuum? Ite, corrigite quod euertistis, ego quoque corrigā quod euerti.* Prat. Spirit. cap. 126.

Vide Apophth. de ADMONITIONE, CASTIGATIONE, & REPREHENSIONE.

CRVDELITAS, TYRANNIS.

LVDOVICVS XII. GALL. REX.

Nihil tam atrocis supplicij ac cruciatus excogitari potuit, quo non digni iudicati fuēre Christiani olim, sub immanissimis quibusdam Tyrannis: & nostro æuo Catholici in Anglia, sub Henrico VIII. eiusque herede Elizabetha. quare de iis hoc loco taceamus, suadet eorundem, quòd breues esse volumus, copia. Ad aliorum dicta pergitur, & facta: quorum quidam crudelitatem in suos amplexi, quidam eandem despectui habuere. Certè LVDOVICVS XII. cū aliquando de tyrannide sermo incideret, dixisse fertur: *Credite. Plebs & rustici Tyrannorum sunt pascua; Tyranni autem demonum.* Præclara & veritati conformis vox. malè enim imperando (vt habet Pub. Syrus) summum imperium amittitur. Annal. Franciæ.

CONRADVS REX NEAPOL.

Non dicto solū, sed & facto, longè alterius mentis CONRADVS NEAPOLITANVS. Ille enim expugnatâ Neapoli circa annum 1253. eiusdem muros adesque regias demolitus est, ac templum ingressus,

gressus, cū vidisset in eo equum miræ vetustatis effrenem, ilicò ei frenum addidit. utque eam quam animo conceperat seruitutem & crudelitatem declararet, eidem hoc distichon subscribi imperavit:

Hactenus effrenis, domini nunc flector habenis:

Rex domat hunc equus Parthenopenfis equum.
Corozetus, de Dictis memor.

PROSPER COLUMNA.

Ab illo etiam profecta quandoque hæc vox, cū iam Mediolanum in prædam suo militi dedisset:
Mediolanum est instar oloris, cuius plumas si extraxeris, pulchrior apparebit. Ibidem.

FREDEGVNDIS GALLIÆ REGINA.

Transgredimur ad alium sexum, & cum eo ad FREDEGVNDEM, alteram sui xui Cleopatram. Hæc enim repulsis per vim & dolum duabus Franciæ reginis, tandē etiam in coniugem Chilpericum machinatur malū. dum enim coram illo flagitium suū, quod cum Landrico genere nobili viro patrabat indies, miro casu confessa esset, isq; de vindicta cogitaret, præuenit: & Landrico ad se vocato, *Periimus*, ait, *uterque incauta mea voce.* ac rem ordine narrat, additque: *Quid stupes? virū ostende. patiendū quippe, aut patrandū est scelus.* Quā voce incitatus Landricus, Chilpericum serā nocte à venatione redeuntem conficit: rumore sparso, ab externis insidiis perpetratum scelus. An non meritò de illa etiam dixisset Ouid. quod de alio quodam?

Senior es tristi Busiride, senior illo,

Qui falsum lento torruit igne bouem:

Quique bouem Siculo fertur donasse Tyranno,

Et dictis artes conciliasse suas.

I. Lips. Mon. Pol. lib. 2. cap. 2. num. 6.

CRVX,

CRUX, CRUCIFIGI.

IESVS CHRISTVS.

STatuamus nunc præstantissimum ac ter nobile Redemptoris nostri trophæum CRUCEM. quæ Iudæis quidem scandalum, & Gentibus stultitia; iis autē qui salui fiunt, id est nobis, Dei virtus est. Videamus quanta animi alacritate ad eam aspirarint viri sancti. Et DOMINVS quidem IESVS, qui salutem humani generis (vt canit Ecclesia) in ea constituit, vt vnde mors oriebatur, inde vita resurgeret; longa illa altercatione cū Nicodemo de nocte habita, exponens & significans qua morte esset moriturus, *Sicut, inquit, Moyses exaltauit serpentem in deserto, ita exaltari oportet Filium hominis: vt omnis qui credit in ipso, non pereat, sed habeat vitam æternam* clārè insinuans, æneum serpentē à Moyse in deserto erectum, cuius adspectu sanabantur omnes qui ab ignitis serpentibus læsi, Crucis suæ imaginem adumbrasse. Ioan. cap. 3.

IDEM.

Cū Imperator Nero in Petri Apostoli necem conspirasset, plures ei, Roma abscederet, persuadebant. Id eo cogitante, & iam proximè imminens martyrium fugiente, ecce visibili specie conspiciendum se præbet DOMINVS IESVS. Agnoscit eum Petrus. & Quò inquit vadis Domine? at ille, *Vado Romam iterum crucifigi*. Intellexit Petrus sibi insinuari, quòd Romæ eum vincula & carceres, ac tandem Crucis opprobrium maneret. Egesip. lib. 3. cap. 2.

S. PETRVS APOSTOLVS.

Quare ea Domini voce accensus, cū mortis

M 2

crucif-

crucisque sententiam Neronis imperio accepisset, & iam diu Christo cruci configi desideraret, iudicem compellabat, ne eo modo quo Dominus eius cruci affigeretur: sed ut is capite, ita ille inuersis vestigiis attolleretur. Dicebat autem: *Verè non me dignum iudico, eo modo in cruce extendi, quo Dei Filius in ea extensus & passus fuit.* Ibidem.

S. ANDREAS APOST.

Neque hic minùs suo fratre illustris, in Crucis gloria suo sanguine promouendâ. Dicenti etenim tibi Præfecto Ægææ, Nisi me obtemperanter exaudieris, crucis supplicium quod tu mysterium nuncupas, in temetipso experire; Ego, respondet, *si Crucis patibulum expauescerem, Crucis gloriam non prædicarem. Ego Crucis Christi seruus sum, & Crucis trophæum optandum mihi potius quam timendum.* Sur. tom. 6. in vita.

I D E M

Crucis patibulo adiudicatus, dum ad locum venisset ubi paratam eam conspiciabatur; diuini amoris zelo tactus, & Crucis gloria ineffabili accensus, in hæc verba prorupit: *Salve crux. Securus & gaudens venio ad te: ita tu exultans suscipias me discipulum eius, qui pependit in te: ut per te me recipiat, qui per te me redemit.* Ibidem.

S. THEOPHILVS.

Ille quoque Crucis desiderio inflammatus, cum à tortore in equuleum sublatus esset, inclamare cœpit: *Ecce iam Christianus sum, quia in Cruce suspensus.* Subfannientibus autem plerisque eorum qui adstabant, *Gratias ago tibi Christe, inquit, quia in signo tuo leuari me permisisti.* Sur. tom. 1. in vita S. Dorotheæ.

B. IGNA-

B. IGNATIVS LOIOLA.

Piæ Deoque sacratę virgines, sanctitatis eius opinionem commotę, ad eum carceri inclusum litteras dederunt, Christianę consolationis plenas. In quibus & eos qui huius rei causa fuerant, accusabant: eiusque iniurias miserati, dolorem suum testabantur. At ille; *Miror*, inquit, *vos, quibus crucis Christi mysterium pertractatum esse oportuit, immensos glorię thesauros in Cruce inclusos ignorare. Ego quidem gaudeo, quod maiora pro Christi nomine sustinere dignus inueniar.* Ribad. lib. 1. cap. 15. in vit. eiusd.

LAMBERTVS CONSVL HARLEMEN.

An non dignus iste, qui cum prioribus signa conferat? A tumultuantibus Calvinistis, quod Romanę Ecclesię auctoritatę defenderet, in vincula coniectus, tandem patibulo adiudicatus est. Quod cum è longinquo intueretur, *Quid*, inquit, *extimescimus. Lignum?* Etenim si olim Dominum glorię crucifixerunt, quid nobis eius servis expectandum? *Anne maior servus domino suo?* P. Opmerus in Martyrol. Hollan. manu-scripto.

CRVCIS SIGNVM.

CONSTANTINVS M. IMP.

QVem priores illi erga Crucis trophæum honorem, eundem, aut certè non absimilem, signo eiusdem exhibuerūt alij. Et quidem MAGNVS ille CONSTANTINVS, cum Dei auxilium in se expertus esset, statim salutiferum hoc trophæum suę imagini adhibuit. idque ex ære fustum, Romę celebri admodum loco erigi mandavit, atque hæc Latini sermonis verba inscribi: *Hoc salutari signo, vero for-*

titudinis indice, *Urbem vestram tyranni iugo ereptam, in libertatem vindicari: Senatūque & pop. Rom. in pristinum splendorem restitui.* Verè illi etiam aberat gloriari, nisi in cruce Domini nostri. Euseb. lib. 9. Damasc. orat. 3. de Imag.

LIBERIVS II. ROM. IMP.

Non impar Constantino iste, sed alio in laudis genere. Dum enim (vti fit) palatium suum obambulare, aduertit tabulam marmoream Crucis signo notatam, inter alios pavimenti lapides constratam. Hæret, rei que indignatione commotus, *Indignum,* aiebat, *Crucis signum pedibus conculcari, quod hominum frontibus oporteret inscribi.* eamque ilicò leuari imperat. Paul. Diac. hist. Longobar. lib. 3. cap. 6.

THEODOSIVS M. IMP.

Veluti natalium munerisque Imperatorij splendore, ita & hac virtutis laude, cum primis illis certat perillustis THEODOSIVS. Signa namque cum Eugenio tyranno conferre paranti, cum Ordinum ductores prælium differendum suaderent, eò quòd hostilium copiarum numero superari se dicerent: religiosissimus Imp. *Absit,* inquebat, *id agamus. Exercitui meo Crux præt:* illius copias Hercules ducit. ac Cruce fretus, in hostem irruens, palmam reportauit. ratus non esse metuendum Herculem, ubi Crucis armatura adesset. Niceph. lib. 12. cap. 39.

CAROLVS V. IMP.

Neque ab his degenerauit nostro æuo CAROLVS V. IMP. Austriacus. qui in Tunetana expeditione de Polemarcho sollicitus, cum idoneum reperiret neminem, vexillum Christi in cruce pendens imaginem habens, in altum sustulit: *Et hic,* inquit,

inquit, *Dux noster erit : Rex regum , Dominus Deus exercituum.* O egregium Principem ! & , si quis alius , verè Heroum Diuorumque agmini , cœnium calculo , associandum. Ægid. Corozetus & alij in vita.

ANONYMVS.

Ille etiam rogatus , in quo potissimam Ecclesiæ gloriâ eminere arbitraretur ; *In Cruce* , respondit : *quia inter ipsas lucet ærumnas decus.* Strigel. part. 3. loc. pag. 66.

C V N C T A T I O .

FREDERICVS III. IMPER.

Tolerabat hic æquo animo omnia cunctator salutaris. Quoties enim apud eum fieret rerum comploratio , quod aut hæc illavē futura essent , respondisse ferunt : *Necdum tempus est illæ emendandi.* nec tamen illo superstite illud tempus impletum ; quando autem implendum , nescitur. Cranzius , lib. 2 , Saxon. cap. 33.

IULIANVS IMP.

Quid autem IULIANVM dicam ? dum in frequenti turba quidam eum his verbis compellaret aduersus inimicum suum : Thalassius inimicus tuus nostra per vim eripuit : *Agnosco* , ait , *ab illo fuisse me læsum ;* proinde dic illi , ut mihi potiori inimico prius satisfaciat. mandauitq ; Præfecto , ne prius cognosceret de illorum negotio , quàm ipse cum Thalassio rediret in gratiam. Quod itaque alter adduxerat ad maturandam vindictam , Cæsar torsit in cunctationem. Eras. lib. 8. Apophth.

CVRA PROXIMI.

IESVS CHRISTVS.

QVam suæ dispensationis mercedem à Principe pastorum consecuturi sint, qui proximi sibi commissi salutis & curæ aduigilant, superfluum huc in medium adducere iudicavi. Propositum itaque paucos, eosque selectissimos huiusce muneris sectatores, persequi. Ordiamur ab eo, qui hîc Principatum gerit, CHRISTO DOMINO. Concesserat aliquando in desertum, & turbæ eum detinebant, videntes admirabilem eius virtutem, ne ab eis discederet. Quibus ille ait: *Quia & aliis civitatibus oportet me euangelizare regnum Dei, quia ideo missus sum.* Insinuabat autem omnium omnino ouium suscipiendam curam, ne vlla earum, vitio & negligentia Pastoris pereat. Luc. cap. 4.

S. AMBROSIVS EPISC. MEDIOL.

Egregius commissi sibi gregis protector, cùm templo suo ab Arrianis egredi cogeretur, eoq; planè cedere; Spontè, inquebat, *hoc non fecero: ne lupis ouium septa contradere videar, aut Deum blasphemantibus.* Hîc si placet, occidite. Gloriosum ducebat, pastorem cum ouibus, & pro iisdem, in propriâ caulâ, mortem oppetere. Socrat. lib. 9. cap. 20.

S. GREGORIUS THAVMATVRGVVS.

Ille quoque sanctitate & doctrina illustris; at signis miraculisque illustrior, ob quorum præstantiam THAVMATVRGVVS appellatus; cùm innumerales Neocæsareæ & alibi ad fidem Christi suo exemplo eloquioque traxisset, è vita laboribus fractus migraturus, rogabat, quot adhuc superessent
in

in Neocæsariensi vrbe infideles: cumque respōsum esset, Septemdecim; *Gratias Deo* inquit, *totidem erāt fideles cū accepi Episcopatum*. O miram Pastoris vigilantiam: quem etiam morientem gregis sui cura sollicitabat. Niceph. lib.6. cap. 17. Breu. Rom. 17. Nouemb.

S. GODOFREDVS EPISC. AMBIAN.

Præerat adhuc, priusquam ad Episcopatum suscipiendum raperetur, Cœnobio parūm celebri & dotato: instantique Rhemenſi Antistiti, alterius, quod tum fortè Rectore carebat, longè præstantioris cū nominis, tum fortunæ, gubernacula susciperet; exclamans, *Neque, ait, possum, neque si possum, velim pauperculam sponſam diuiori præferre*. Generosè admodum significabat, magnos honores grauiora etiam onera curasque comitari. Sur. tom. 6. in vita.

S. THOMAS CANTVARIENSIS.

Præclarus ille vir, neque hoc loco silentij nube inuoluendus. Suadebat ei Antistes quidam ex suffraganeis, quò cum Rege pacem seruaret, seque extremo vitæ discrimine eriperet, Episcopatu cederet. Cui ille generoso non minùs quàm forti animo: *Non ea conditione Episcopatum suscepi, ut Regi eum tradam: sed ut pro illo meipsum etiam, si ita opus, impendam*. Vnde postmodum in exsilium pulsus, admonitus fortassis à priori illo Antistite, molliùs cum Rege ageret, æquè illustre responsum dabat: *Clauum teneo, & ad somnum me vocas?* insinuans, boni pastoris esse animam suā pro ouibus ponere. Sur. tom. 6. in vita. Th. Stapl. in Prompt. morali.

IOANNES EPISC. ROFFENSIS.

Require Apophth. de RATIONE REDDENDA.

M 5

CVRIA.

C V R I A.

LVDOVICVS XII. GALL. R.

L Vtetia Parisiorum obambulans, obuios quosdam sibi habuit è Senatu, velocissimo gressu ad Curiam properantes. & *An non* inquit ad proceres, *hi ad nundinas videntur proficisci?* Imitatus Stratonem & Dioclem, qui se mutuò ad messem auream inuitabant, Curiam nundinas appellabat. P. Æmil. in vita,

ANONYMVS.

Viderat & ille frequentius, quemdam è familiari-
bus ad Curiam discurrentē, & obuio, Quò, inquit,
tam festinus? Ad Curiam, respondit ille. Cui alter;
Imprudenter agis, an ignoras vulgatum illud:

Curia dat curas, non sit tibi Curia cura?

Curarum ergo expers esse vis? à Curia abstine.

Monebat Plutarchus, ad aulas accedēdum velut ad ignem: neque propius, ne vraris: neque remotius, ne affligaris. Gregor. Richter in axiom. Polit.

AVLICI ANONYMI.

Quàm verò curialium & aulicorum vita periculis plena, ob voluptatum copiam, & effusam libertatis ac omnium pænè flagitiorum libidinem, docuere AVLICI DVO, quorum memoriam in Confessionibus suis facit B. Augustinus. quos dicere solitos testatur, *In palatio quid non fragile, plenumque periculis? & per quot pericula deuenitur ad maius periculum!* Iure igitur miraculi loco habet Hieron. Epist. ad Saluinam, Nedibrium adolescentem nobilem, in media aula nutritum, contubernalem Augustorum, quorum mensæ ministrat orbis (verba
cuius

eius sunt) terræ & maria seruiunt, inter omnium rerum abundantiam, in primo ætatis flore, tantæ verecundiæ fuisse, vt virginalem pudorem vinceret, & ne leuem quidem obscœni rumoris in se fabulam daret. August. lib. 7. Confess. cap. 6. & refert Guil. Baldasenus lib. 1. cap. 13. in Stimulis virtutum Adolescentiæ,

Vide AVLA, AVLICA VITA.

CVRIOSITAS REPRESSA.

IESVS CHRISTVS.

Curiosum neminem dicebat Plautus, qui non sit maleuolus. Hinc rogatus Euclides, quam rem Dij potissimum detestarentur, respondit, Curiositatē. Certè DOMINVS & REDEMPTOR noster, cū accessissent ad eum Iudæi, & quidem ex illis Principes sacerdotum & Seniores, qui multa curiosius inquirebant, quā potestate omnia sua faceret; & indignos eos quibus directum daretur responsum testatus, *Interrogabo, ait, & ego vos unum sermonem: quem si dixeritis mihi, & ego vobis dicam, in quā potestate hoc faciam. Baptismus Ioannis unde erat? è calo, an ex hominibus?* dicentibus illis, *Nescimus: Nec ego, inquit ipse, dico vobis, in qua potestate hæc facio.* pulchrè reciproca hac interrogatione, eorum quæstionem eludens. Matth. cap. 21.

S. AVGVSTINVS

Inquirenti curiosius Afro, quid ante mundi creationem faceret Deus; respondit: *Curiosis parabat infernum.* profanam audaciam graui dicto compescens. Idem Apophthegma carmine redditum, adscribo ex Epigrammat. Georg. Sabini:

Dum

*Dum Libycis Christū pater AUGUSTINVS in ora
 Afferit, ac peragit munus in ade suum:
 Et miranda refert populo primordia mundi,
 Esse docens verbo cuncta creata Dei:
 Impius assurgit, verbisque procacibus Afer,
 Ergo opifex rerum quid faciebat? ait,
 Et quibus intentus fallebat tempora curis,
 Mundus adhuc nondum cum fabricatus erat?
 Praesul ad haec Libycus, Fabricabat Tartara, dixit,
 His, quos scrutari talia mente iuuat.*

SISINNIVS NOVATIAN. EPISC.

Ille bis quolibet die in balneo lauari solitus: per-
 contanti verò, cur cū esset Episcopus, bis in die
 ablueretur; *Quia*, inquit, *temporis excludor angu-*
stus, ne tertio lauer. Suidas.

ANTIOCHENS ANONYMVS.

Quid autem, vt & ciuilia recenseamus, iste? Ro-
 gabat eum Libanius Sophista Apostatę Iuliani fau-
 tor, quid nunc Fabri filius (Christum per contu-
 meliam intelligens) ageret. At is, vt erat vir bonus
 & disertus, *Non otiaur*, dicebat, *ô Sophista, quem tu*
hoc nomine appellas: parat enim Iuliano tuo loculum.
 Tripart. hist. lib. 6. cap. 44.

RVDOLPHVS IMP. AVST.

Non minùs ingeniosè, facetè tamen, & in re lu-
 dicra, hic. Tabe propè confectus, festinabundus,
 Confessore suo comitatus Spiram, quæ Ducū Cæ-
 sarumquē olim sedes, nunc tumulus, maturabat.
 causam verò rogatus; *Quia*, inquebat, *ad sepul-*
chrum mihi properandum, vt alios reges conueniam.
 Cuspinus.

FREDERICVS DVX AVST.

Nimirum curiosus rerum indagator, sæpè mu-
 tato

tato habitu solus inter agrestes versabatur, cum quibus mercede diurna, & arās, & alia quævis faciens, tam de scipso quàm purpuratis suis colloqui consueuerat. Interrogatus autem, cur id faceret; *Neque enim, ait, alio modo de me verum audire possum.*

Æn. Syl. lib. 3. Comm. in Panorm.

Vide huic simile de Duce quodam Norico, Tit. de VERITATE.

CIVIS ANTVERPIENSIS.

Addo familiare, & nostri æui solique. Non ita pridem homo facetus Antuerpiæ, merces quasdam per baiulum sacco coopertas, secum in alienas ædes asportari curabat: sciscitantiq; obuiο cuidam, *Quid mercium iste baiulus tecum defert?* respondebat: *Idco obuelari, ne quis sciret.* Idem Ægyptium quemdam olim ad similem quæstionem respondisse, auctor est Erasmus, & Plutarchus.

IOAN. FVNCCIVS.

Quàm sit autem deforme & turbulentum vitium curiositas, quàm πολυπραγμοσύνην vocant Græci, docuit IOAN. FVNCCIVS. qui Regiomonti capite truncandus, hoc distichon pronuntiasse dicitur:

Disce meo exemplo, mandato munere fungi:

Et fuge cœu pestem τὴν πολυπραγμοσύνην.

Abr. Bucholc. in Indice Chronolog.

CHABANVS COMES.

At CHABANVS COMES præ ceteris omitti non debet. Dum enim copias Ludouici XI. Franc. regis circa Lutetiam duceret, missus à Ludouico Ioannes Ballua Episc. Eboicensis, ut eas perlustraret. Quo facto, CHABANVS paulò post Regem compellat, & Oro, ait, *M. T. me Eboicas proficisci permittat.* Inquirenti autem causam Regi, *Vt, inquit, de sacer-*
doti-

dotibus sacrandis puniendisq̃ue scrutinium faciam.
 Insinuare volebat, cui libet sua in arte & munere adhibendam fidem. Rob. Gaguin. in vita Ludovici XI.

DÆMON, ET QVOMODO EI RESISTENDVM.

I E S V S C H R I S T V S.

Discamus quoque generis nostri perpetuo insidiatori technas neectere. est quippe serpens lubricus, cuius si capiti, id est, primæ suggestioni, non resistitur; totus in intima cordis, dum non sentitur, illabitur. Et quidem SALVATOR noster eiusdem impetitus insidiis in deserto, cū variis modis eius animum licet incautus venator pulsaret, eundem seuerè reprimens, *Vade*, inquit, *Satana. scriptum est enim: Dominum Deum tuum adorabis, & illi soli seruias.* Vnicum resistendi illi remedium edocens, soli Deo seruire. Matth. cap. 4.

I D E M

Cū obiiceret Iudæis, diceretq̃ue: Vos facitis opera patris vestri. responderent autem illi: Vnum patrem habemus Deum. subintulit post quædam: *Vos ex patre diabolo estis, & desideria patris vultis facere: ille homicida erat ab initio.* Ioan. cap. 8.

D. ANTONIVS ABBAS.

Magnus hic ad Dæmonum insultus impetusq̃ue propulsandos Athleta, rogatus à discipulis, quænam arma diabolicas impugnationes certò & validdè repellerent; *Signum crucis*, inquit, *& ardens in Christum fides, inexpugnabilis sunt viris Deo dicatis & aheneus murus, aduersus Dæmonum machinationes.* D. Athan. in vita.

APOLLO

APOLLO ABBAS.

Iste etiam comites de ratione Diabolo resistendi anxios adhortabatur, machinationes eiusdem in principio cogitationum propullarent. Dicebat enim, *Contrito namque capite serpentis, totum corpus extinguatur.* Palladius.

PITHYRION ABBAS.

Hic quoque Eremitis incolis dicere solitus, *Qui vult expellere à se Dæmones, is prius in seruitutem redigat prauas animi affectiones. Qualem enim animi quis affectionem superarit, eius etiam Dæmonem à se eiiciet.* Ibidem, in vita eius.

MACARIUS ABBAS.

Ille etiam fratri, quem nequam Spiritus occulta suasionem eò induxerat, ut crederet se inutiliter in solitudine vitam agere, quòd nemini benefaceret; salutare consilium dedit: ut quoties in eiusmodi cogitatus incidisset, responderet; *Hoc saltem in solitudine utiliter ago, quòd amore Domini mei Iesu, à tignariolo isto non decedo.* Cessarunt ibi præstigiatoris insidiæ, ubi amoris Christi datus est locus. In vitis sanctorum P P.

DETRACTIO.

S. AVGVSTINVS.

Ad crimina difficilem aurem habere nos oportere, aiebat Seneca, & cum eo B. AVGVSTINVS: qui nihil magis oderat, quàm detractiones & calumnias. Quare refectionis loco hoc distichon inscribi maiori charactere curauit:

*Quisquis amat dictis absentum rodere vitam,
Hanc mensam vetitam nouerit esse sibi.*

Vnde

Vnde dum quidam ab eo inuitatus, multa de alio quodam effutiret, indignatus AVGVSTINVS, *Vel, inquit, hos versus oblitterato, vel detrectare abstineto: aliàs mihi secedendũ.* Augusta illa, & verè Augustiniana vox. cui nescio, an hoc æuo parem reperiās. Monebat olim Horatius in Sermon.

--- *Absentem qui rodit amicum,
Fingere qui non visa potest, commissa tacere
Qui nequit: hic niger est, hunc tu Romane caueto.*
Possid. in vit. eiusd. cap. 21.

S. IOANNES EPISCOPVS.

Eiusdem animi IOANNES EPISCOPVS. qui etiam publicè peccantes taxari incusarive vetabat: *Fieri quippe potest, aiebat semper, ut peccatum poenitendo delcuerint. Iniquum est enim id ab homine perulenter exprobrari, quod clemèter à Deo esset condonatũ.* Verè & præclarè Hieron. in Oseam: Nihil tam facile, inquit, quàm alios viles facere: quia alterius vituperio laudari nos arbitramur. Marul. lib. 5. cap. 1.

SIGISMVNDVS IMP.

Deferebatur ad eum, Germanos passim obloqui, & honori suo detrahere. Qui subridens, *Anne, ait, vobis graue videtur, illos malè de nobis loqui, cum nos malè agamus?* insinuans, multum aliquando è nostrâ parte dependere, vtrùm benè an malè audiamus. Æn. Syl. lib. 2. de Gest. Alphonsi.

DEVS.

IESVS CHRISTVS.

COntemplemur iam summum illud bonum,
Comnium rerum A & Ω, DEVM. & quid præ-
clarè,

clarè, licet timidè aliquando, de eo dixerint nonnulli, proponamus. Mediator Dei & hominum CHRISTVS IESVS (cui, vtpote Diuinæ naturæ hypostaticè vnito, certa hac in re fides) Adolescenti roganti, Magister bone, quid faciam, vt habeam vitam æternam? respondit: *Quid me interrogas de bono? vnus est bonus* (videlicet originaliter, ex se, & absolutè) *Deus.* quasi dicat, *Qualis ego, vt homo, quem tu me solùm existimas, non sum.* Matth. cap. 19. Marc. cap. 10. Luc. 18.

S. ATTALVS MARTYR

A tyranno per contemptum interrogatus, quod nomen haberet Deus; dixit: *Qui plures sunt, nominibus discernuntur: qui autem vnus est, non indiget nomine.* Verè Simonides simile quid percontanti Hieroni tyranno, Quanto diutiùs, inquebat, considero, tanto mihi res videtur obscurior. Euseb. libro 6. Eccl. hist. cap. 3.

EVAGRIVS EPISC.

Non minùs doctè quàm argutè EVAGRIVS. qui, dum quæstio de Diuinitate incidisset; *Ego quidem inquit, Diuinitatem definiendam non esse assero, ideoque silentij tantùm oratione adorandam, quia ineffabilis est.* Venit hîc in mentem illud Statij:

Nulla autem effigies, nulli commissa metallo

Forma Dei: mentes habitare & pectora gaudet.

Socrates.

PIVS II. PONT. MAX.

Haud aliter PIVS PONT. qui quoties Dei, eiusque naturæ meminerat, illud identidem insonabat: *Diuina natura credendo meliùs, quàm differendo inuestigatur.* Platina in vita.

N

D. LV-

D. LVDOVICVS FRANCORVM REX.

Illum prioribus non iniquè adiungimus. à quo cùm in cœtu Religiosorum Seneschalcus Campaniæ sciscitaretur, *Quid est Deus?* & ille cogitabundus hallucinaretur, quæstionem resoluit, inquit: *Res adeò bona & præstans, ut nihil ea melius præstantiusque dari, vel excogitari possit.* Idem longè ante eum, Ethnicus aliàs, de suo Ioue Horatius:

Vnde nil maius generatur ipso,

Nec habet quicquam simile, aut secundum.

Ionuil. in vita eiusd. cap. 94.

DEI COGNITIO.

S. IULIANVS MARTYR.

SI cognitionis præstantiâ ab obiecto metiri necesse est, ut tradût Philosophi: ecquis eam COGNITIONEM nobilissimam negauerit, quæ circa nobilissimû ens, quale est DEVS, versatur? Haud ignorabat id IULIANVS: non Apostata ille, sed Christi Martyr illustris, cuius inuictum animum cùm emollire verbis Martianus non posset, diceretque: Extendatur ad verbera, ut vel sic eius stultitia omnibus innotescat: *Non est, inquit, stultitia Deum nosse, sed gloria.* Sur. tom. 1. in vita.

S. POLYEVCTVS MARTYR.

Eiusdem & æui & animi POLYEVCTVS. de cuius conuersione cùm Paulina vxor quereretur, ac præsertim quòd 12. idola sua comminuisset; eam suauiter irridens, *Si solus, ait, deos tuos duodecim vici & contriui, ecce deorum egena es. Adeo dum ergo mea coniux, & saxo Deum verum cognoscas.* Maximum (ut verè etiam erat) beneficium se coniugi præ-

præstiturum existimabat, si eam ad veri Dei noti-
tiã capeffendam valeret inducere. Sur. ibid. in vit.

HUGO DE S. VICTORE.

Huius item memorandam sententiam silentio
præteriisse, nefas. utpote à cuius ore profectum ali-
quando: *Sicut nullum est momentum, quo homo non
utatur, vel fruatur Dei bonitate & misericordia; sic
nullum esse debet momentum, quo eum præsentem non
habeat in memoria. Omne enim tempus in quo de Deo
non cogitas, hoc te reputa perdidisse.* Lib. 1. de
Clauſt. animæ.

DEI BENIGNITAS.

S. IOANNES BAPT.

Discutiamus etiam quàm diues in misericordia
DEVS, quàm in gratia munificus. sine quo ni-
hil firmum, nihil stabile, nihil sanctũ. Indignatione
aliquando cõmotis IOANNIS discipulis, quòd Chri-
stus baptizaret, ac multi ad eum confugerent; ait
ad illos: *Non potest homo accipere quidquam, nisi fue-
rit ei datum de celo.* Quod enim ille præ alio magi-
ster plures habeat qui se sequantur (inquit Chrysoſt.)
Dei donum est. Ioan. cap. 3.

S. MARTINVS

In Alpibus deuia & inuia secutus, in latrones in-
cidit. è quibus vnus vibrata in caput eius securi,
mortem minabatur, nisi ferientis dexteræ ictum a-
lius sustinuisset. Rogatus autẽ, num timuisset; *Mi-
nimè, inquit, numquam eram securior: sciebam enim
Dei misericordiam maximè in tribulatione adfuturam.*
In vita eiusd. Sulpit.

S. ÆGIDIUS

Amicum quo familiariter utebatur, rogabat aliquando: *Credísne te à me diligi? eoque annuente: Noli, ait, hoc credere. Solus enim creator verè diligit creaturam, cuius dilectioni amor creatura comparari nequit.* Ex Sent. aureis eiusd.

RELIGIOSVS ANONYMVS.

Hic quoque sciscitâti curiosius militi, num Deus peccatorum misereretur; *Túne, respondet, ubi chlamys tua lacera, eam protinus abiicis?* quo negante, adiecit: *Ita nec Deus. custodit quippe eos, quos ad imaginem suam creauit.* In vit. PP. fol. 300.

PETRVS ALDOBRANDINVS CARD.

Quin etiam Dei consilio Reipub. de bono Principe prouideri dicebat ille: Clemente enim VIII. in Pontificem electo, rogatus, quorum suffragiis ad tantum honorem deuenisset; respondit: *Non fit summus Princeps, sed factus de celo recipitur.* neque enim rationi consonum est, ab hominibus fieri eum qui plus potest quàm hominum vis & natura. Henricus Farnes. in Apoph. de Princ.

LIBERIVS II. IMP.

Neque erat ab hac mente alienus LIBERIVS. qui quòd in pauperes profusior, à coniuge Augusta obiurgatus, dum immensum thesaurum fortè in palatio reperisset; *Vides, aiebat, quàm fidelis est Deus noster, qui plura retribuit, quàm nos eius amore elargimur.* Paul. Diac. hist. Longob. lib. 3. cap. 6.

PHILO IVDÆVS.

Hic natione, at non religione Iudæus, missus Orator ad Senatum Romanum. A quo, quòd honorem diuinum ei deferre recusaret, crebriùs repulsam passus, re infectâ abiit: & ad legationis comites

res conuersus, dignam illam Philosopho ingeminauit sententiam: *Malte animo: cum enim humana praesidia desinunt, incipiunt diuina.* Nam vt benè cecinit Naso, 1. Pont. Eleg. 7.

*Quamuis est igitur meritis indebita nostris,
Magna tamen spes est in bonitate Dei.*
Ioseph. Antiq. lib. 18. cap. 10.

DEI POTENTIA.

IESVS CHRISTVS.

PAternæ Dei benignitati, Potentiæ eiusdem amplitudinem subiungamus. vtpote in quo, per quem, & ex quo sunt, quæcumque sunt,

—— *qui res hominum ac deorum,
Qui mare & terras, variisque mundum
Temperat horis.*

Quid autem hac de re VERBUM eiusdem INCARNATVM? Multa de diuitiarum huius sæculi inordinato amore dixerat, eoque stante, salutem acquiri non posse: cum super his mirati discipuli, rogant: Quis ergo saluus esse poterit? quibus IESVS: *Apud homines, inquit, hoc impossibile est: apud Deum omnia sunt possibilia.* quæ scilicet rerum perfectioni non repugnant, nec expressam contradictionem, si ita fiant, inuoluunt. Lubeat hîc recordari eius, quod de dîs Gentium sensit & cecinit Ouid:

—— *Immensa est, sinemq; potentia cali
Non habet: & quicquid superi voluere, peractum est.*
Matth. cap. 19.

I D E M

Indignanti Pilato, dicentiq;ue, Mihi non loqueris? Nescis quia potestatem habeo crucifigere te, &c.

respondit : *Non haberes potestatem aduersum me vltimam, nisi tibi datū esset de super.* Omnis quippe potestas à Deo. & vt præclare Seneca ad lineam,

Omne sub regno grauiore regnum est.

Ioan. cap. 19.

S. IOAN. BAPTISTA

Gloriantibus Pharisæis, quòd patrem haberent Abraham, adeoque legem acceperant, ac Dei populus essent, dicebat : *Nolite dicere intra vos, patrem habemus Abraham. Dico enim vobis, quoniam potens est Deus de lapidibus istis, (hos eos fuisse arbitrati sunt quidam, quos Dei iussu Iosue ex Iordanis alueo sustulerat) suscitare Abrahæ filios.* Matthæi, cap. 3.

S. THEOPHILVS.

Admirandum quod sequitur. Acceperat Angelico ministerio THEOPHILVS à Dorothea virgine aurea mala, & rosas, quæ ironicè ab eadem, dum ad supplicium duceretur, seq; ad Paradisum sui sponsi properare diceret, postulauerat : & in Iesu Christi laudes protinus erupit. Quare ad Sapritium Præsidem mittitur, qui ilicò, *Quid est, inquit, quod foris loquebaris? Cui ille : Laudabam Christum feliciter, quem hætenus infeliciter negavi.* Dicenti que rursus Sapritio, *Miror te hominem doctum, illud nomen voluisse vsurpare, quod hætenus tanto odio es persecutus : At hinc, aiebat, apparet, verum esse Deum, quòd me conuertit ab errore ad veritatem.* Sur. tom. 1. in vita S. Dorotheæ.

DEI DILECTIO ET HONOR.

S. MARIA MATER DEI.

PRæmissa Dei omnipotentia, beneficentiaque, quibus humanum genus ad se trahit, superest de eiusdē etiam erga eum dilectione, cultu, obsequioque dicamus. Et illa quidem suo exemplo nos docuit BEATA VIRGO: quæ accepto cælesti nuntio, cū ad montana Elisabetham visendi gratiā pergeret, & illa beatam eam diceret, innatæ humilitatis limites non egressa; *Magnificat*, inquit, *anima mea Dominum: & exaltauit spiritus meus in Deo salutari meo.* quasi dicat, Tu me beatam prædicas ob beneficia à Deo in me collata: at ego magnis laudibus collatorem ipsum prosequor. instruens nos, si gloriari oportet, in Domino gloriandum. Lucæ, cap. 1.

S. DOROTHEA VIRGO.

Et quoniam à femina propter eminentem eiusdem excellentiam, vel potiùs ab omnium fæminarum Principe orsi sumus: dabunt mihi hanc veniam viri, si & alteram eiusdem sexus, & virtutis, eis præponam. DOROTHEAM virginem ferunt, dum à Saprithio tyranno compelleretur, iuxta mandatum Principum Augustorumque suorum diis immortalibus litaret, respondisse: *Deus qui in catis est Augustus, ipse imperavit mihi, ut soli sibi serviam. quare videndum, cuinam Imperatori obtemperandum.* Sur. tom. 1. in vita.

S. FRUCTVOSVS.

Quod priùs fæminarum, nunc virorum exemplis confirmemus. A Galieno Imp. cōpulsus FRV-

CTVOSVS, idola venerari: aliàs morte mulctandus. At ille; *Nolo*, inquit, *sacrificare dñs Galieni, sed æternum Deum, ac ipsius Cesaris creatorem colo venerorq̃ue*. Ad quod alludens Prudentius, ita canit:

*Iussum est Cesaris ore Galieni,
Quod princeps colit, ut colamus omnes:
Æternum colo Principem, dierum
Factorem, Dominumque Galieni.*

In vita apud Sur.

S. EVLOGIVS FRUCTVOSI DIACONVS.

Presbyteri sui exemplum EVLOGIVS Diaconus imitatus est: qui vnà cū illo ad martyrij palmā promerendā deductus, cū rogaretur: Numquid & tu Fructuosum colis? respondit: *Non colo Fructuosum, sed eum quem colit Fructuosus*. insinuans, viros sanctos honorandos quidem, quoad etiam hoc carcere mortali detinentur: Deum verò solum adorandum atque colendum. Augustinus de diuers. Serm. 101. cap. 2.

S. THOMAS AQUINAS.

Nunc eos percurramus, in quibus mirè coruscans Dilectionis erga Deum resplenduit scintilla. Quid enim de THOMA AQUINATE dicam? De quo & illud memoriæ æternæ consecratum, cū Neapoli ad imaginem Crucifixi oraret ardentius, hanc vocem audiuisse: Benè scripsisti de me Thoma; quam ergo mercedem accipies? cui ille: *Non aliam Domine, nisi te ipsum*. Ea enim amantium natura, velle esse in amato. Breuiar. Rom. 7. Mart. Item in vita.

S. LVDOVICVS EPISC. TOLOSANVS.

Et ab huius ore quoties ad Regni clauum assidere compelleretur, profecta nobilis illa vox: *Diui-*
tie

tia mea Christus, desint cetera. Omnis copia quæ Deus meus non est, mihi inopia est. Quàm meritò cum regio Psalte huic canere permissum : Dominus pars hereditatis meæ, & calicis mei. Ex membrana vetusta in biblioth. F F. Minor. Louanij.

PRINCEPS ANONYMVS.

Lubeat etiam aliûs ordinis exempla in medium adferre. Principem fuisse accepimus, virum, vt prior ætas tulit, egregiè prudentem & pium. Hic rogatus cur munitas arces suo in regno construi vetaret, in firmum sui suorumq; præsidium ; respondit : *Vnica mihi arx est, eaquæ munitissima: ea videlicet de qua Salomon ait : Turris fortissima nomen Domini : ad quam confugiens iustus liberatur.* Georg. Richter in Axiom. œconom.

DVX ANONYMVS.

Postulabat Dux Christianus ab Indo Toparcha, cui sol erat deus, expeditum cursorem. quo impetrato: Dic age, inquit, vter vestrûm potentior, hic adolescens, an tu? Ego sanè, respōdit Toparcha, qui huic vt id præstet, impero. Tum Dux : *Ita tibi de sole sentiendum. Cursorem illum velocissimum, Regis æterni ministrum : quare non ille, sed auctor dominusq; illius adorandus atque colendus.* Placuit Christiani viri dictum, & verè quod intendebat, effecit. Ios. à Costa, lib. 5. hist. Ind. cap. 5.

ANVS ANONYMA.

Ingerit se hîc nescio quæ A N V S : cuius in vita B. Yuonis celebris mentio. Yuone enim designato Oratore à Ludouico Pio Gall. Rege ad Sultanum Damascenû; accidit, vt ANVM sibi obuiam habuerit, altera manu testam prunis plenam, altera phialam aquæ gestantem. Miratus ille, quid sibi id vel-

let, inquit. Illa, *Hoc igne Paradisum comburere, & quâ infernum extinguere volo.* Ecquid tam arduam rem moliris? inquit Yuo: *Vt nemo,* respondit illa, *imposterum benè operetur præmijs spe inductus, metuq; pœnarum nullus à scelere desistat: sed ut omnes vero amore, quem Deo debemus, accensi, rectè viuamus.* Hâc tam grauem piæ ANVS vocem obstupuit Yuo, & laudauit. Ionuil. in vita Ludouici, cap. 57.

DEI TIMOR. vide TIMOR DEI.

DISCENDI CVPIDITAS.

SALVIVS IVLIANVS.

Tantum in nobis scientiæ cognitionisq; amorem innatum refert Cicero, ut nemo dubitare possit, quin ad eum hominum natura, nullo etiam emolumento inuitata, rapiatur. In cuius quidem rei confirmationem, vnum SALVIVM IVLIANVM producemus. qui licet eximia iuris cognitione clarus, frequenter in ore habebat: *Etsi alterum pedem sepulchro immisisssem, adhuc discere desiderarem.* Placuit hoc laudatissimis viris, & meritò. cum nunc passim illæ voces, *Adultior sum quàm ut discere quicquam valeam.* Tamen, ut sapienter Cato,

Scire aliquid laus est, pudor est nil discere velle.

Refertur Pandect. lib. 4. tit. de Fid. comm. l. apud Iulianum.

ALPHONSVS ARAG. REX.

Sunt & alij huius generis: sed omnes æquat & superat ALPHONSVS. Intellexerat à familiaribus, regem quēdam Hispanum dicere consuetum, non conuenire Principi litteras; & ira commotus, *Bonus*, aiebat, *non hominis illa vox.* atque è contrario gloriabatur, se totū verus & nouum Testamentum,

vnà

vnâ cùm glossis, decies & quater euoluisse. Verè eo elogio dignus, quòd à Carolo Magno maiorem fortunâ & virtute Principem orbis non vidit.

I. Lips. Mon. Polit. lib. 2. cap. 7.

IDEM.

Neque vno illius dicto exemploq; contenti erimus. Habebatur sermo de rerum pretiosarum iactura, cùm eum persanctè affirmasse ferunt: *Malim gemmas, vniones, aut quascumque inestimabiles margaritas perdidisse, quàm vel minimum librum.* Sciebat namque in libris occultatam sapientiam, quam ex iis qui vellet, hauriret. Panorm. l. 4. de Gest. eiusd.

IDEM.

Vide CANTVS, LIBRI, &c.

CAROLVS IIII. FRANC. REX.

Hunc etiam CAROLVS imitatus, qui scholas Pragenses ingressus, magistros de liberalibus artibus altercantes, per horas quaternas mira cum voluptate & attentione audiuit: cumq; molestius id ferrent Purpuratorum aliqui, & horam cœnæ effluxisse Regem monerent: *Mihi*, inquebat ille, *minimè effluxit: nam cœna mea hæc est.* Rarum in Principe exemplum. Æn. Syl. lib. 4. Comm. in Gesta Alphonsi.

CONSTANTINVS DVCAS IMPERATOR.

Et hic licet ignarus litterarum, magnus tamen earumdem fautor & amicus exstitit. quippe qui sæpiùs illud vsurparet: *Malim ex doctrina, quàm imperio nobilitari.* Zonar. tom. 3. Annal.

Vide infra DOCTRINA IN PRETIO HABITA.

DISCORDIA. Pete ex Apophth. de

CONCORDIA.

DIS-

DISPUTATIO.

SPIRYDION EPISCOPVS, ET ANONYMI
SOPHISTÆ.

A Pud Homerum ridetur à prociis Vlysses, quòd panis frustula peteret, non enses, neque lebetes: ita & ridendi illi, qui differendo solùm id agunt, vt friuolas captiunculas obiiciant, & ipsum tractandæ quæstionis fundamentum euertant. Tales enim cùm ad Nicenam Synodum conuenissent, & quosvis cauillationibus suis impeterent; SPIRYDION vir bonus, & verus Israelita, recitata fidei formulâ, SOPHISTAM principẽ aggressus: *Si credis, inquit, constanter responde, nec logomachiis istis in Dei contemptum utere.* Illicò ille; *Credo.* & comites intuitus, *Quantum interest, ait, de rebus nudis absque fūco disputare, & inanibus sophismatibus tempus consumere?* mirantibusque subitam illam animi conuersionem assentatoribus suis, *Quamdiu, inquit, res verbis agebatur, verba opposui: at postquam cum verbis vis quædam ex ore huius senis erupit, nihil ampliùs verba aduersus eam valuerunt.* Admodum eleganter Chrysost. In aliis certaminibus laureas referunt, qui victores redeunt: at in disputationibus diuinis, solis debetur corona, qui se rei magnitudine victos ingenuè fententur. Ita Niceph. lib. 8. cap. 15. Sozom. lib. 2. cap. 3. Cedrenus, & alij.

IULIANVS CARDINALIS.

Erat in Conc. Florentino Imperator Paleologus: qui, dum grauis illa incidisset altercatio de processione Spiritus sancti, multa se in Græcorum fauorem annotasse, at domi suæ (quæ erat in Græcia) asser-

seruasse dicebat. Cui IULIANVS: *Cum in certamen se sciret sua Maiestas descendendum: non oportuit arma domi relictā, sed in contentionem allata.*

P. Æmil. lib. 10.

PETRVS ALDOBRANDINVS CARD.

Non minùs differēdo, quàm elaborando doctrinam parari insinuabat hic; dum enim quidam disputantium circulos effugeret, aiebat: *Tu id addiscendo facis, ut dum disputationem refugis, nihil addiscas.* Hinc benè Minerua armata veteribus pingitur; quia doctrina non nisi acriter pro eā disceptantibus, præda fiat. Henr. Farnes. in Apophth. de Principe.

IOANNES PICVS MIRAND.

Huiusce propositi pariter & animi IOAN. PICVS. qui percontanti, quānam disputationes maximè prodesse existimaret; aiebat: *Quæ pacato animo ad inuestigandam veritatem, priuatim, ac semotis arbitris exercentur. Obesse autē illas, quæ in propatulo fierent, ad ostentationem dumtaxat, aut captandam vulgi auram, atque imperitorum applausum.* Ioan. Franc. in vita Pici.

DIVINATIO, AVGVRIVM, &c.

S. ATHANASIVS.

NON impium illud culturæ Dæmoniorum genus Sortilegium proponimus; sed liberum & fortuitum futurorum euentuum, certum tamen frequentius prænuntium. Quod etiam in viris magnis locum suum habuisse, testes sunt historiæ. Certè ATHANASIVS ab Arrianis præstigiator habitus, dum urbem Alexandriam aliquādo ingressus esset: factum,

factum, ut cornix in aëre volitans crocitaret. quo audito, Græci eum scommate quasi impostorē persecuti, rogant quid cornix portenderet; qui urbanè & sine felle, *Cras*, inquit, *insonat: quod Latinis posterum diem designat. significat autem, crastinum diem, quo annuam hic celebratis festiuitatem, non ex animo vobis cessurum.* Ita euenit: nam postero die mandatum ab vrbe ad eos missum, inexpectati mali nuntium. Niceph. lib. 9. cap. 35.

IOANNES XXI III. PONT.

Hic antea Balthasar Cossa dictus, Bononiâ, vbi litteris operam dederat, Romam proficiscebatur. Rogatus autem cur Romam tenderet; *Vt me Pontificem faciam*, respondit. nec inuanum. haud diu enim post ab Alexandro v. ad Cardinalatus honorem euectus, ei in Pontificatu sub nomine IOAN. XXI III. successit. Bapt. Fulgos. lib. 3.

NICOLAUS V. ET PIVS II. PONT.

Simile est quod subiicimus. Erat Thomas Sarzanus Orator Eugenij IIII. ad Cæsaream maiestatem in Germaniam missus: cumque Alpes traiceret, incidit fortè in Æneam Frederici III. legatum. cumq; in eandem domum diuertissent ambo, & Æneas parcius in victu ageret; subridens Thomas, *Ecquid*, inquit, *tantopere victui parcimus: numquid vterque nostrum ad Pontificatum promouendus?* verè vterq; promotus. Thomas sub NICOL. V. & Æneas sub PII II. nomine, Pontificatus honore præfulsit. Bapt. Fulgos. lib. 1. cap. 3.

PAVLVS II. PONT.

Quo die Franciscum Ruueram ad sacrum Senatum promouit, dixisse fertur: *Hoc die successorem meum elegi.* Ridebāt alij Pontificis dictum. at Franciscus

ciscus, sumpto Sixti nomine, PAVLO vita functo
 successit. Ibidem.

CLODOVÆVS GALL. REX.

Demus etiam suum locum ciuili ordini, & qui
 eiusdem ductor, CLODOVÆO. Quid iste? inquires.
 Castra metaturus aduersus Gothos, munera Diuo
 suo tutelari Martino Turonam mittebat: mandans
 ea deferentibus: *Ingressuri templum, obseruate quæ
 futuri eventus ex bello quod paramus, coniecturâ pos-
 sent præbere.* Parent illi; & ecce templi limen sub-
 euntes, audiunt monachos, vespertinas horas Deo
 persoluētes; & quidem illud Psalmi Dauidici: *Præ-
 cinxisti me virtute ad bellum. captatæque omine
 felici, ad Regem redeunt, omen nuntiant, quod e-
 uentus declarauit non fuisse vanum.* Ibid.

LEONARDVS RVVERAS.

Erat hic Francisci illius, de quo iam antè, ex fra-
 tre nepos; angusta re & virtutis gloria homo om-
 nium ludibrio expositus. cùm namque proprio no-
 mine compellaretur, indignabundus, *Quin, ait, me
 Comitem appellatis?* Si verò de ducenda vxore ser-
 mo haberetur, *Nolim*, dicebat, *aliam, quàm pro-
 pinquam Regis.* Tulit igitur Patruī, qui tum Ponti-
 fex, fortuna; vt quæ de se per iocum prædicauerat,
 re ipsa ad effectum deducerentur. Ibid.

ANONYMVS.

Neque missum faciam quod Seuerò Imper. ex
 Anglia reduci non solùm victori, sed pace etiam
 æternùm fundata, scurra quidam factus obuius,
 hunc in modum est vaticinatus: *Fuisti Caesar, to-
 tum vicisti, iam Deus esto victor.* nec ita diu post
 vita excessit Imperator. Eras. lib. 6. Apophth.

HEN-

HENRICVS SCHVARTZEBVRG. COMES.

Spectat huc etiam quod de HENRICO COMITE apud plerosque scriptum reperi. huic familiaris erat, si quando rem quampiam facere recusaret, hæc vox : *Si hoc fecero, mergar in latrina.* tulisse autem sui interitus præsagium in hoc prouerbio, docuit secutus euentus. Elfordiæ enim in cænobio D. Petri (vbi cum Frederico Cæsare fuerat) in sordibus istis, collapsis latrinæ trabibus, suffocatus est. Phil. Cam. medit. Historic. cap. 86.

FREDERICVS ELECTOR ET IOANNES
DVCEs SAXONIÆ.

Erant hi fratres germani , Saxonix fortissimi Duces. Qui dum per Albim fluuium, recens soluta glacie , Wittebergam nauigio pergerent : factum ut congelatæ moles Albi innatantes , iter impedirent, nauemque quassarent. In ripam itaque egressi , vident naus carinam latè findi , ac latera resoluta decidere. quod interpretatus FREDERICVS, *Metuo,* ait ad fratrem, *post nos, nostra naus, id est, domus Saxonica dilacerationem.* quæ & subiecta est. Peucerus lib. De diuinat.

THOMAS MORVS.

Emicuit etiam in hoc diuinandi beneficium. Narranti enim Annam Bolenam , quam Henricus Rex coniugem duxerat, incessanter tripudiare, *Hæc tripudia,* ait, *alium lusum adferent :* nostris enim capitibus quasi pila pedaria hæc eius tripudia ludunt : quin & ipsius caput hunc ludum subibit. Euenit vtrumque. Th. Staplut. in vita.

DIVI-

DIVITIÆ.

IESVS CHRISTVS.

AD DIVITIAS orationem conuertimus : quæ ex Chilonis sententia, malorum theſaurus, & calamitatum omnium viaticum. quorumvtrumque breui hoc, at graui dicto CHRISTVS DOMINVS complexus est, cùm adoleſcentem ſe volentem ſequi, triſtem abire propter ſermonem quem dixerat, (Si vis perfectus eſſe, vende omnia quæ habes, & da pauperibus) vidiffet : *Amen dico vobis, quia difficile diues intrabit in regnum calorum. & iterum dico vobis, Facilius eſt camelum per foramen acus tranſire, quàm diuitem* (ſtante videlicet diuitiarum amore) *intrare in regnum calorum.* Non negat tamen Eccleſiaſt. quin beatus ſit diues qui inuentus eſt ſine macula, & qui poſt aurum non abiit, nec ſperauit in pecunia & theſauris. *Marth. cap. 19.*

*Sacra require tit. de DIVITIARVM & MER-
CEDIS CONTEMPTV, PECVNIA, &c.*

SIGISMVNDVS CÆSAR.

Haud aliter (quod inter politicos homines, coſque Principes, mirare) SIGISMVNDVS de diuitiarum natura & vſu ſenſit. Allata erant ad eum ex Hungaria aureorum quadraginta millia : quæ cùm ſub noctem in thalamo regio forent recondita, cogitare cœpit, quémnam in vſum tantum pecuniarum impenderet: cogitantem ſomnus deſtituit : itaque vocatis iis qui à cubiculo, conſiliarios duceſque accerſant, imperat. Vocati, intempeſta nocte accurrunt ocyùs, rem magnam autumantes. At Im-

O

pera-

perator, arca aperta, illos aureos pro cuiusque meritis distribuit, dicens: *Ite, nunc securè nobis dormire liceat. nam quod somnum mihi ademerat, procul ab erit à limine.* Rarum, & cui vix vllum par exemplum. Benè Iuuen. Sat. x.

*Pauca licet portes argenti vascula puri,
Nocte iter ingressus, gladium contumq; timebis,
Et mota ad lunam trepidabis arundinis umbram.
Cantabit vacuus coram latrone viator.*

Æn. Syl. lib. 4. Comm. in res gestas Alphonfi.

MAXÆMILIANVS CÆSAR.

Non inferior in hac laude Ludouico MAXÆMILIANVS. numquam enim penes se opum aceruum, etiam si deferretur, remanere passus. Aiebat enim: *Hominum, non opum mihi demandata custodia: quibus si semel capiar, ilicò è rege seruus futurus sum.* Nam, vt iterùm rectè Iuuen. ibidem,

—— *Plures nimia congesta pecunia curâ
Strangulat, & cuncta exsuperans patrimonia cēsus.*
Iac. Spiegel. in Comm. Æn. Syl.

ADOLPHVS NASSOVIÆ, REX ROM.

Verè igitur & præclarè iste. cùm multa de diuitiarum gloria iactari audiret, *Præstat*, inquiebat, *vir sine pecunia, quàm è conuerso sine viro pecunia. animus est qui verè diuites facit.* Hinc Lucret. lib. 5. de Nat.

*Quid? si quis verâ vitam ratione gubernat;
Diuitiæ grandes homini sunt, vinere parcè
Æquo animo. neque enim est vsquâ penuria parui.*
Golzius.

DIVITIARVM CONTEMPTVS.

S. HILARION.

ADmirabatur eum Cicero in Off. qui diuitiis ac opibus non moueretur, eumq; spectatu dignum arbitrabatur. Admiremur igitur viros inter Christianos hoc gloriæ splendore insignes, spectemus HILARIONEM, qui Constantio Imp. sibi decem auri libras offerenti, eò quòd candidatum quēdam graui nequitiae spiritu liberaffet, hordeaceum protulit panem, dicens: *Qui tali cibo aluntur, non maioris aestimant aurum, quam lutum.* Hier. in vita, cap. 8.

S. THADDÆVS APOST.

Miremur etiam THADDÆVM: quem Abgaro Edissenorum Regi, aurum sibi ob miracula perpetrata & iacta Euangelij semina offerenti, respondisse tradunt: *Si nostra relinquimus, quomodo accipiemus aliena?* Sciebat illud Osee cap. 9. Desiderabile argentum vrticam hereditabit, lappa in tabernaculo eorum. Euseb. lib. 1. Hist. cap. 15.

S. BASILIUS MAGNVS.

Vt in aliis omnibus, ita & hic magnus mirandusque BASILIUS. Cui dum Cæsareæ Præfectus suadere niteretur, in gratiam Imperatoris fidem negaret, promitteretque fauoris & opum copiam; *Hæc homini Christiano, inquit, non conueniunt: sed adolescentulis, iisque qui talibus promissis capiuntur.* Trip. hist. lib. 7. cap. 36.

S S. MAXIMVS ET OLYMPIADES.

Quo tempore Christiana pietas in Perside inuicta permanebat, Decio tyranno oblatis sunt isti. à
O 2 quibus

quibus dum facultates flagitaret, *Libēter*, inquit, *nostra enim facultates & aurum, Christus est. ad hunc accedito, & veris diuitiis abundabis.* Baronius. Lip- pel. tom. 2.

S. EUPHRAXIA ANTIGONI FILIA.

Ecquis EUPHRAXIAM magnis illis viris adiungi à nobis indignabitur? quę patricij generis adolescēti à parentibus quasi desponsata, sumpto religionis velo, continentia Deo vouit. promittentiq; Theodosio Imp. opulentam domum si acquiesceret; *Opes*, inquit, *mea Christus est: tu tuas aliis dato.* Luber hanc breui carmine etiam illustrare:

*Quam non regna iuuant, non Lydius aurifer amnis,
Nec quas terrarum sustinet orbis opes.
Hec alia cupiant: cupit hæc modò paupere cultu,
Securo Christum tramite lata sequi.*

Sur. tom. 2. in vita.

FREDERICVS IMPERATOR.

Habet & hinc suas partes FREDERICVS. cū enim Ladislaum Hungarię Regem protegeret, & in suo palatio institueret, non defuere qui clam perendum puerum dicerent: utpote cuius morte opes plurimas regnaq; consequeretur. At IMPERATOR: *Ego sanè non ita amo diuitias, ut impiis consiliis persuasus, propter eas tam impium facinus attentem. ò egregium, & verè regium sermonem!* Æn. Syl. lib. 3. Comm. de Reb. Alphonsi.

*Require Apophth. de MVNERVM CONTEMPTV,
MERCEDIS NEGLECTV, &c.*

DOCILITAS.

THEODOSIVS IMPER.

AD DOCILITATEM vela dantes, vnde melius quàm à THEODOSIO exordiemur? tradiderat filios in disciplinam Arsenio viro docto, iisq; æterna memoria dignum semper verbum proloquebatur: *Si tales vos exhibeatis, ut vitam moresq; ad disciplinam & Dei leges componatis; propensum me fore scitote, imperium in manus vestras tradere: sin minus, conducibilius erit privati vos personam agere, quàm sine ulla doctrina imperare.* Niccph. lib. 12. cap. 23. hist. Eccles.

CAROLVS MAGNVS.

Illustrius est quod addam. Instituerat CAROLVS, verus amor & delictum humani generis, Seminarium, in quo tenuioris fortunæ adolescentes non alebantur modò, sed & omni disciplinarum genere exercebantur; & alterum, in quo nobiliores instruerentur. Vbi autem illos præ his ampliorem in studiis progressum fecisse animaduertisset, eos ad dextrâ segregatos, hoc sermone compellabat: *Ma-
Eti virtute estote filioli: vos manet sacerdotia & digni-
tates non aspernendæ.* Conuersus verò ad alios; *Vos,* inquit, *comperi dicto imperioque nostro inobedientes.* *Deum testor! nihil penitus commodi honorisque à me ad vos profecturum.* Auentinus lib. 4. Annal. Boior.

DOCTRINA.

PIVS II. PONTIFEX.

DOCTRINAM, quâ pulchrior ac nobilior nulla est possessio, in præsentì adducimus, & pro ea

PIVM II. PONTIFICEM. cuius memoranda vox:
Cui plura nosse datum est, eum maiora sequuntur dubia. Cur ita? Fit namque ut ubi rem quāpiam accuratè inuestigaueris, tum demum ea in animum veniant, quæ ad rationem perfectionemq; illius plenè indagandam conducere videntur. Platina in vit.

IVLIANVS CARDINALIS.

Huic in Bibliotheca assiduè lectitanti dum quidam obiecisset, Quid hîc inter mortuos solus latitas? cur non exis ad nos, qui suauiter viuimus? *Imò,* inquit, *hi famâ viuunt: tu verò neque nomine, neque re.* Sensit & hic cum Diogene, vitam sine litteris mortem. Æn. Syl. lib. 3. Comm. de gest. Alphon.

TILIVS NOBILIS REG. FRANC.

Erat hic ex illis qui Francisci primi vestigia sectatus, litteras (quæ antea sordidæ inter nobiles reputabantur) in aulam Franciæ reduxit. cui proinde in ore frequens illud: *Litteræ Equestris ordinis dignitatem confirmant, & ab ignobilitate vindicant.* Refert Greg. Richter in Axiom. Polit.

ALPHONSVS ARAG. REX.

Iterùm ALPHONSVM compello: à quo profectum aliquando, *Malim priuatam vitam agere, quàm eruditione carere.* ita enim eum affecerant litteræ, ut Ioan. Efernitanus rari iudicij ingentique vir clarissimum hoc de eo tulerit testimonium, nisi Rex fuisset, eximium Philosophum futurum fuisse. Panorm. de gest. Alphon.

Require Apophth. de LIBRORVM
 DELECTV.

DOCTRI.

DOCTRINA IN PRETIO HABITA.

LEO IMPERATOR.

CUm tanta tamque celebris sit **ERVDITIO**, quis miretur eam magno in pretio habitam aliquando apud magnos? **LEO IMP.** qui Martiano successit, dicenti cuidam ex Eunuchis, quòd Eulogio philosopho frumentariam tessaram dari mandasset, militibus eiusmodi largitionem faciendam; respondit: *Vtinam is semper sit meorum temporum status, ut mihi liceat militum stipendia in litterarum magistros transferre!* Suidas.

ALEXANDER SEVERVS.

Ille Macedonem Alexandrum imitatus, quotquot in Italiam se conferrent viri doctrina præstantes, suo fauore complectebatur. ita vt aliquando apud exterarum nationum Legatos gloriari solitus sit: *Rari in orbe docti, quibuscum aut verbo aut scripto non fuerim locutus.* Laus digna Regibus, & quàm hereditariam illis esse decet. **I. Spinæus lib.4. de Tranquill. animi.**

SIGISMVNDVS IMP.

Miro etiam fauore complectebatur eos, quos in litterarum studio profecisse intelligebat. reprehensus autem, quòd litteratos, obscuro aliàs genere & loco natos, foueret; *Quid ni, respondebat, amem eos, quos natura ceteris voluit antecellere?* Videbat certè ingenij ornamenta longè præclariora externis corporis donis. **Iac. Spieg. in Æn. Sylu.**

I D E M.

Quin idem ipse Georgium Fiscellum legis Doctorem

Etorem equestris militiæ insignibus donauit. Cum-
 que is Basiliensem Synodum vnà cū SIGISMUNDO
 subiisset, & doctoribus equitibusque suis deputa-
 retur locus, dubius hæsit, cuinam se ordini associa-
 ret. tandem ad equites declinat. cui ilicò SIGIS-
 MUNDVS: *Stultè agis, qui litteris militiam præfers:*
nam ego milites mille vna die fecerim, Doctorem verò
mille annis non fecerim. meritò doctrinam militiæ
 præponens. Æn. Sylu. lib. 4. Comm. in Gest. Alphonfi.

ROBERTVS REX NEAPOLIS.

Huic item & litteræ & litterati vsque adeò cha-
 ri, vt aliquando audita ab eo regia illa vox: *Cario-*
res mihi litteræ regno. Utinam etiam ea mens in aliis
 regibus nostri orbis! I. Lips. lib. Monit. Polit.
 cap. 7.

ALPHONSVS ARAG. ET NEAP. REX.

Eiusdem vt regni ita & animi ALPHONSVS. quem
 non semel in hanc vocem prorupisse tradunt: *Ma-*
lim regnorum omnium (septem ea numerabat) *iactu-*
ram facere, quàm minimam doctrinæ. Affectum pro-
 bauit effectus. Bibliothecas enim instituit, exorna-
 uit, auxit: viros doctos, non secus ac Mæcenæ ille
 Horatianus, amore & honore summo est prosecu-
 tus: verè dignus longiori æuo princeps. Ibidem.

IDEM.

Et vt priori illud annexam: intellexerat quos-
 dam Europæ principes viros ad Basiliensem Syno-
 dum destinatos: & quasi indignabundus; *Parum*
decere, aiebat, cū de iure diuino humanoque sit dis-
ceptandum, nobilitatem potentiàmve iactare: sed do-
ctrinam & eruditionem requiri. Æn. Syl. lib. 3.
 Comm. in Gest. eiusd.

IDEM.

I D E M.

Quò magis progredior, eò me in altum magis in-
ue[n]io. dabitis mihi ergo hanc veniam viri il-
lustres, si ALPHONSVM rursus propono. Ille equi-
dem erga omnes beneuolus, solos illitteratos despe-
xit; vixdum hominis eos nomine dignatus. En-
nianum enim illud subinde obmurmurabat, *Vul-*
turis (genitiuus pro nominatiuo ad ritum priscum)
in syluis miserum mandebat hominem. ægrè eos ho-
mines vocitabat; in quibus nihil hominis, effigiem
præter, animaduvertebat. Panorm. lib. i. de Gest.
Alphonfi.

HENRICVS VIII. ANGLIÆ REX.

An dignus est, qui inter hos locum habeat HEN-
RICVS? homo nefarius & crudelis, vnâ tamen (licet
ad impium finem) voce, meritis fortassis clemētis-
simis optimisq; accenseri. Cogitabat de repudian-
da Catharina legitima sua coniuge, quam & repu-
diauit postmodum: vnde excidia hæc & bonorum
clades: & summa ope enitebatur præclaros quos-
uis in suam sententiam pertrahere, adeoque Tho-
mam Morum: cuius solius ad stipulationem tanti apud
eum facta fuisset, vt diceret: *Malim solum Morum,*
quàm dimidiam regni mei partem, decreto institutoque
meo assentiri. At neque ad eam impietatem pertra-
ctus Morus, sed ad veram gloriam: iste ad æternam
pœnam. N. Sander. lib. i. de Schism. Angl.

MARGARETA SCOTIÆ REG.

In Scotiam transeo, vbi MARGARETAM Regi-
nam video, iure primis illis annumerandam, si non
præferendam. Obambulabat, vt fit, palatium, &
ecce conspicatur Aliam Chartiet, virum notæ de-
formitatis, at eruditionis eximiæ, obdormiscentem

inter subsellia procubuisse. Accedit palàm, cum amplectitur, eleuat, & mirantibus (quis hæc facientem Reginam non miretur?) quòd virum tam deformem exoscularetur: *Virum*, inquit, *amplexata non sum: sed os illud, ex quo tot insignes prodiere sermocinationes.* Vnicum quod sciam in fæmina exemplum. inuisa namque eruditioni bona pars illius sexus. Auët. Serm. memorab.

FRANC. SFORTIA.

Erat hic litterarum experts, amantissimus tamen eorum qui illas fouebant. Rogatus autem, cur litteras nesciret; *Quia*, inquit, *non didici vnâ eademq; manu librum tenere & gladium.* P. Iouius.

DOCTRINA FACTIS CONSENTANEA. *Require.*
Apophth. de ACTIONE.

DOLOR.

PASTOR ANACHORETA.

BEatos eos qui hîc lugent, quoniam postmodum consolabuntur, inquebat Saluator. eiusque dicti memor PASTOR ANACHORETA, cùm Arsenium lachrymis madentem esset cõspicatus, dicebat: *Beatus verè es Arseni, quòd cùm teipsum in hac vitâ luxeris, non erit opus lachrymis in futurâ.* Sur. tomo 4. ex Palladio.

F. BORGIA SOC. IESV.

Quantum autem vtilitatis successiui dolores homini Christiano adferant, tacitus secum considerabat FRANC. BORGIA: cuius assiduæ illæ ad Deum preces, vt deliciæ in cruciatum verterentur, ac dolores voluptati essent. Itaque Lermæ Comitissam cùm mœstam videret, hoc dicto solabatur: *No-*
lenti

lenti dolores Deus immittit, postulanti negat. Ri-
 bad. lib. 4. cap. 5. vitæ eius.

DOLVS ET FRAVS.

LVDOVICVS XII. GALL. R.

Sinceritati contrarium DOLVM FRAVDEMQUE
 Siro ingenij acumine in Antonio Viuonio equi-
 te detexit carpsitque LVDOVICVS. Cùm enim apud
 eum referret Antonius se aliquando iuuenē adhuc
 vituli pelle contactum, solitum in aucupium de-
 scendere, quò aues falleret: ille hominem callidū &
 fucatum perstringens, *Verè, ait, tu haud omnino ad-
 huc eam pellem exuisse videris.* astutos enim & frau-
 dulentos, vulpino nomine vulgò nuncupamus. Ita
 olim Persius in Satyris Damam seruum corripiens,
 dicit:

*Pelliculam veterem retines, & fronte politus,
 Astutam vapido seruas sub pectore vulpem.*

Annal. Franc.

MILES ANONYMVS.

*De tribus exigeret cùm vilibus Euclio drachmis
 Fœnus ab urbano milite; MILES ait:*

Ne diffide, dabo: dubiisque sefellit auarum

Dictis, accepto nam dedit are fugam.

Ex collectis & relatis Auctori.

DVX BONVS.

ALBERTVS AVSTRIACVS.

VT sumptum elleborum concitatis prius om-
 nibus, ipsum se imprimis prodit, & egreditur:
 ita fortissimum Ducem, cohortatis & in ordinem
dispo-

dispositis suis, inter primos egredi oportere, testatus est AUSTRIUS ALBERTVS. Cùm enim copias in Bohemos duceret, priusquam Romanis imperitaret, ac rogaretur, quèmnam suo exercitui ductorem præficeret; animosè profectò: *Si alium quàm me ductorem exercitus petitis, frustra me Austria Ducem appellatis.* eum Ducis nomine dignum reputabat, qui reliquos duceret, & quem fortiter pugnante, reliquus exercitus sequeretur.

-- *Cogit enim tantos perferre labores
Sola Ducis virtus, qui nuda fusus arena
Excubat, atque omni fortunam prouocat horâ.*
vt ait Lucan. Æn. Syl. lib. 3. de Gest. Alph.

LAVRENTIVS ALMEIDA LV SIT.

Æquè fortiter atque animosè iste. cum Mahometanis nauali prælio decertabat; eaquè quâ vehabatur naus, in supremum videbatur discrimen adducta: monitus ergo salutis suæ prospiceret, quasi minabundus istius consilij auctoribus, *Non, ait, mihi decorum id periculum euitare, & commilitones in eadem constitutos deserere: non mortem, sed infamiam extimesco.* Ofor. lib. 3. Hist. Eman.

ALPHONSVS ARAG. REX.

Dicebat aliquando ille: *Magnum est populi aduersus hostem Ducem esse: maius tamen ciuibus ad virtutem.* quare non ineptè olim Pausanias Plistonactis F. percontanti quonam pacto debellari possent Thraces; Si, inquiebat, eum belli ducem delegerimus, qui vir optimus est. vt videlicet non minùs ad virtutem, quàm aduersus hostem ducatum præbeat. Panorm. lib. 4. de eiusd. Gest.

I D E M

Vt erat clementissimus, dum parca de hostibus
meino-

memorabili victoria triumpharet : victos captosq;
in triumphum adduci non est passus. dicens: *Potius
ob servatos hostes, quàm casos, triumphandum.* nam

--- *Ignoscere pulchrum*

Iam misero, pæneque genus vidisse precantem.

Panorm. lib. 1. de eiusd. Gest.

EBRIETAS.

BASILIVS MAGNVS.

TUrpissimum dicebat Augustinus vino obrui
eum, qui ferro vinci nequireret: potandi libidine
superari, qui bello non posset. Certè BASILIVS,
quid esset EBRIETAS, percontanti, respondit: *Est
Demon spontè admissus in animum per voluptatem.
Mater malitia, impugnatio virtutis, ex forti timidum
facit; ex modesto lasciviam, iustitiam ignorat, pruden-
tiam abolet.* Ant. & Max. Serin. de Ebriet.

F. BERNARDINVS PALOMVS.

Huic autem sæpiùs in ore: *Vinum duo potissimùm
mala comitantur: si namque dilutum sumas, ipsum
corrumpis: si non diluas, ipse corrumperis.* Floresta.

ALHONSVS ARAG. REX.

Considerabat eadem ille. ideoque rogatus, cur
præter Magnatum morem vini expers viueret; re-
spondebat: *Vino sapientia obscuratur. quare non de-
cet Regem, ut huius immodica computatione in animo
extinguat illud, sine quo Imperatoris aut Regis nomen
tuèri non posset.* Sciebat enim quòd

Nox, & amor, vinumq; nihil moderabile suadent.
Panorm. lib. 2. de eiusd. Gestis.

I D E M

Aliàs per oportunitatem rogatus, cur vinum
tanta

tanta aqua dilueret? *Ne me, inquit, inebriet. Scio namque quantum Macedonis Alexandri gloria obfuerit ebrietas.* Ibidem.

• I D E M

Rursus simile sciscitanti, cur videlicet in tantum Ebrietatem detestaretur, respondit : *Quia scio Furorē & Libidinem eius filias esse.* Probè igitur monet Horatius:

*At ne quis modici transfiliat munera Liberi;
Centaurea monet cum Lapythis rixa super mero
Debellata. ——— Ibidem.*

GERMANVS ANONYMVS.

Instituerat Ferdinandus Imp. ludos publicos in nuptiis Hyppolitæ & Alphonsi filij sui. ad quos cum omnis generis sexusque homines conuenissent, eorumque celebritatem admirarentur; in media laudantium plaudentiumque corona, GERMANVS quidam vocem efferre, & inclamare cœpit : *Valeant ludi quibus nemo bibit.* Hem ! egregium virum, & verè Epicuri de grege porcum, cuius omnis animus (vt inquit ille) in poculis & patinis ! Pontanus.

CAROLVS V. IMP.

Addo facetum hoc nostri quondam Principis. Monebatur aliquando in castris Germano militi legem daret, ebrietatis vitandæ gratia. At ille, *Quid inquit, Germano Ebrietatem interdicerem ? perinde id foret, ac si Hispanis furta aut rapinas inhiberem.* Corozetus, & alij.

Require Apophth. de CÆCITATE.

ECCLE.

ECCLESIA EIVSQUE IMMUNITAS ET AVCTORITAS.

IESVS CHRISTVS.

PROsequamur nunc ordine Æterni Regis Sponsam in terris, columnam & firmamentum veritatis, ECCLESIAM : cuius auctoritatem potestatemque insinuans ipse eius D O M I N V S, dum de obedientia illi præstanda sermocinaretur, *Si, inquit, Ecclesiam non audierit, sit tibi sicut Ethnicus & Publicanus.* id est, Si Ecclesiæ obtemperare noluerit; ne consortio eius utaris, siue in diuinis, siue in humanis. Ita enim Iudæi habebant Ethnicos & Publicanos, ut eorum mensâ & consortio se pollui arbitrantur. & verè non habebit vñquam Deum patrem, qui ECCLESIAM noluerit habere matrem. Matth. cap. 18.

S. HVGGO EPISCOPVS LINCOLNIEN.

Immunitatis Ecclesiasticæ vindex & protector eximius, numquam se conscio quicquam in Ecclesiæ præiudicium attentari permisit. vnde & Regum malleus, eâ ætate nuncupatus. Rogantibus autem amicis, ut maioris periculi euitandi causa, in re parui momenti, Regi contra Ecclesiæ auitum ius ad stipularetur, dixisse fertur: *Absit, ut me viuo laici, cuiuscumq; etiam dignitatis, Ecclesiasticæ libertatis privilegium infringant.* Sur. tom. 6. in vita.

I D E M

Cùm fortè Diocesis visitandæ causa iter ageret, obuiam habuit hominum sine ordine discurrentium turbam, qui furem ad supplicij locum de more deducerent. Reus Episcopum adesse ratus, propius

piùs pro consequenda benedictione adduci postulat. Eo viso EPISCOPVS, misericordia motus: *Soluite, ait, & finite abire. ubi enim Episcopus cum fidelium populo congregatus est, ibi est Ecclesia: neque minor immunitas debetur lapidibus vivis, quàm mortuis. Ibidem.*

S. THOMAS CANTVARIEN.

Et hic quoque in hoc amoris & sollicitudinis genere excelluit. mortem quippe sibi minitante sicario: *Ego verò, aiebat, pro Domino meo mori paratus sum, ut Ecclesia Anglicana meo sanguine pacem & libertatem assequatur.* Thom. Staplut. in Apolog. & Sur. in vita eiusdem.

INNOCENTIVS II. PONT. ET FREDERICVS II. ROGERIVS IMP.

Erat is FREDERICVS, qui in id solùm incumberebat, ut Ecclesiæ auctoritatem integritatemque eneruaret. Quare à pluribus summis Pontificibus iustè diris deuotum, despexit INNOCENTIVS, ac Cæsaris nomine indignum iudicauit. Ille autem ore procaci hoc disticho in Pontificem lusit:

*Roma diu titubans, variisq; erroribus acta,
Corruet, & mundi desinet esse caput.*

cui PONTIFEX, ut erat summo ingenio, rescripsit:

Niteris incassum nauem demergere Petri:.

Fluctuat, ast numquam mergitur illa ratis.

At sui impos FREDERICVS, denuò INNOCENTIVM perstringens, subiecit:

Fata volunt, stellaq; docent, aniumq; volatus,

Quòd FREDERICVS ego mallens orbis ero.

Verùm intemperatum illud augurium eludens INNOCENTIVS, ita ad extremum respondit:

Fata

Fata volunt, Scriptura docet, peccata loquuntur:

Quòd tibi vita brevis, pœna perennis erit.

In Paralip. Ab. Vrsip. Ioan. Wolf. tom. i. Lect. memor. p. 323.

THEOLOGVS ANONYMVS.

Dignus item ille, qui se prioribus associet. Erat Regis Angliæ curator, homo nefarius, & Caluini lacte nutritus. Hic dū fortè DOCTORI THEOLOGO in conuiuio, die ieiunij ab Ecclesiâ indicti, affideret, carnesq; nolenti administraret, diceretque: *Quam Scripturam adfers domine Doctor contra hunc cibum hodie comedendum? confestim ille verba Apostoli subiecit, inquit: Nos talem consuetudinem non habemus, neque Ecclesia Dei.* quo dicto obstupuit alter, & obmutuit. Corozet.

PIPINVS REX GALL.

Magis admirandi laudandique hi, quò ab Ecclesiastico ordine sunt remotiores. In Galliam itaque secedenti occurrit PIPINVS REX, verus, si alius vllus, Ecclesiæ fautor & protector. Dum namque aduersus Longobardos castra mouisset, suos adhortatus, tandem hoc dicto sermonem finiit: *Eo consilio arma induimus, vt Apostolicam sedem ab omni mortalium iniuria vindicemus.* Hinc meritò ei nomen Christianissimi obtigit: quod ab eo, licet non eodem iure, omnes posteri vsurparunt. Barland. in Chron. Duc. Brab.

ALPHONSVS ARAG. REX.

Emittat hîc etiam suos radios ALPHONSVS: qui Piceno suo Marte Sedi Apostolicæ recuperato, cùm ab Eugenio P P. vrbes aliquot dono offerrentur, fortiter recusauit, dicens: *Nequaquam questus aut prada, sed Ecclesiæ tuenda gratiâ hanc expeditionem*

suscepi. Heu! vbi nunc ille Principum feruor & zelus? Panorm. lib. 3. de Gest. eiusd.

ECCLESIÆ BONA.

CLEMENS IIII. PONT.

ERat hic, priusquam sacris initiaretur, Bononiæ legum Doctor & Professor. Itaque cum ob merita & virtutes ad Romanæ Cathedræ honorē euectus esset, eiusque filia, quas ex priori coniugio binas habebat, dotem paternæ conditioni æqualem postularent, respondebat: *Papa non habet filias: sufficiens vobis sit, relicta à maioribus parentibusq; hereditas.* & ita inanes, raro, sed illustri exemplo dimisit. Bap. Fulgos. lib. 4. cap. 3.

LAVRENT. IUSTINIANVS PATRIARCHA
VENETVS.

Illud in Pontifice, hoc equè illustre in PATRIARCHA. Habebat namque consanguineum IUSTINIANVS tenuioris fortunæ quàm animi: qui cum apud eum instaret frequentius, filia suæ, quam vnicam habebat, ampliori dote succurreret, quo nobiliori marito desponsaretur; prudens hoc & pium ab eo responsum accepit: *Considera queso, frater, si parum dedero, non est quo opus habes: sin' multum, defraudauero multos, ut vni satisfaciam. ac proinde quidquid meum est, ad cibos pauperum potius, quàm ad intortos crines aut margaritas, ab Ecclesia relictum est.* In vita eius apud Surium tom. I.

Vide Apophth. de BENEFICIIS ECCLESIAST.

AB ECCLESIA ARCERE INDIGNOS.

BABYLAS EPISCOPVS.

Magno sanè pioque Ecclesię Dei zelo succensi
olim viri sancti, inidoneos ab eadem arce-
bant. domum Dei quippe per eos contaminandam
rati, qui se illa fecissent indignos. & quidem BABY-
LAS Deo sacrificium immaculatum offerens, cùm
videret Numerianum per Ecclesię cancellos intro-
spicientem, magno ei animo obstitit, dicens: *Non
licet tibi cruore & idolorum sacrificiis polluto, tam pe-
tulanter in domum Dei ingredi, & diuina mysteria
contaminatis oculis contemplari.* Nicephor. lib. 6.
hist. cap. 34.

POLYEVCTVS PATRIARCHA.

Neque minùs animosè ille. Ioanni enim Zimi-
sco, qui Nicephorum Phocam, cuius imperium af-
fectabat, interfecerat, ad imperij apicem euecto,
dum in templum Constantinopolitanum diadema-
te iam iam insigniendus properaret, factus obuius,
ita eum aggrediebatur: *Non decet talem ingredi Ec-
clesiam, cuius manus adhuc stillant recenti sanguine
sui cognati.* Cedr. Cusp.

THEODOSIVS IMP.

Hunc autem zelum viris illustribus defuisse, ne
quisquam dicere audeat; monet THEODOSIVS IM-
PERATOR. dum enim de vniendis pacificandisque
Ecclesiis cogitaret, Demophilum Arrianę pestis
præfectum, eò quòd à scelerato dogmate discedere
abnueret, his dictis compellauit: *Si pacem concor-*

diamque declinas, fugere te etiam à sacris Basilicis præcipio. Indignum eum iudicabat sacra limina contingere, in quibus auctor pacis domicilium fixisset. Socrat. hist. Trip. lib. 8. cap. 10.

Plura require infra de EXCOMMUNICATIONE.

ECCLESIASTICI HONORANDI.

CONSTANTINVS IMP.

SI stulta illa & superstitiosa deorum cultrix antiquitas, nescio quid diuinum in Sacerdotibus Flaminibusque suis suspicata, summo eos honore ac veneratione prosequebatur: quis miretur eundem nunc impendi iis, quos Deus ipse, tamquam operis sui vicarios, Sponsa que suæ perpetuos protectores, constituit Ecclesiæ ministros. Quorum honorem reuerentiamque ita in omnibus tuendam existimabat CONSTANTINVS, ut illorū vitam detrectantibus, aures clauderet, diceretque: *Si in Episcopum aut Monachum fornicantem incidissem, sustulisssem chlamydem, ei que imposuisssem, ut à nullo oculo videretur.* Sciebat autem prudens Imp. talium delicta, leui & malignanti populo magnum ad vitia præbere incitamentum. Sur. to. 1. de S. Ioan. Eleemos.

PHILIPPVS AVGVSTVS F. R.

Et hic non nomine dumtaxat, sed re etiam ipsa AVGVSTVS. Ad quē cū deferretur, Ecclesiasticos nimis latè suæ iurisdictionis limites extendere, ac crebrius Regi præiudicare, respondit: *Credo rem quandoque se ita habere: at memor beneficiorum Dei, malim auferri mihi iura mea, quàm cum seruis Dei litigare, aut cum Ecclesia contendere.* Ita ille olim:
nunc

nunc autem sola ea spolia iusta reputantur, quæ Ecclesiæ, eiusque ministris, quouis tandem modo detrahuntur: ita ut nostri sæculi pseudoprophetæ, pro concione non erubescant populo annuntiare, præcepto de nō furando, Ecclesiasticorum prouentuum rapinas non vetari. Ionuil. cap. 93.

HENRICVS II. F. R.

Eodem in regno & virtute successor HENRIEVS. Cū Lutetiam more maiorum ingressus, publico epulo in palatio exciperetur, ambigerentque Ecclesiastici & sæculares Principes, quānam dextram sinistramve Regis clauderent; *Meam*, inquit Rex, *dextram Ecclesiæ dedi, dedicatique*. Iussitque Ecclesiasticos Principes, non sine multorum fremitu, ad dexteram suam accumbere. Lud. Aurel. ex Annal. Franc.

EDVCATIO LIBERORVM.

S. LVDOVICVS F. R.

TOtius Reipub. fundamentum, LIBERORVM EDVCATIONEM dicebat Diotogenes Pythagaræ auditor: quia facile est tenellos animos componere, & quasi sub pollice ad quoduis ducere. Cuius rei exempla à LVDOVICO auspicabimur. qui priusquam se quieti componeret, vocatis filiis, facta dictaque Principum proponebat; tam eorū qui laudabilem vitam duxerant, quā qui nefariam. monebatque; *Illorum exempla animis vestris inculcate: ut & meliores euadere, & ab omni flagitio, prouectiores effecti, abstinere valeatis*. Significabat enim in iis potissimum instituendos adolescentes, quibus vsuri sunt, cū ad virilem peruenerint ætatem. Ita glo-

riatum de seipso legimus Persium, quòd à Cornuto, viro erudito & Philosopho eximio, adhuc puer liberalibus disciplinis imbutus fuisset. ait enim Sat. 5.

*Cumq; iter ambiguum est, & vita nescius error
Deducit trepidas ramosa in compita mentes;
Me tibi supposui: teneros tu suscipis annos
Socratico Cornute sinu: tunc fallere solers
Apposita intortos extendit regula mores,
Et premitur ratione animus, vinciq; laborat,
Artificemq; tuo ducit sub pollice vultum.*

Ionuil. in eius vita, cap. 87.

I D E M

Vt erat pietate & modestia eximius, cuicumque se operi daret, salutaris crucis signo frontem, petusq; & os præmunire solitus. Dicebat enim: *Ita me mater puerum instruxit.* Corozetus.

S. ANSELMVS.

Egregius hic morum vitæque institutor. qui intelligens cœnobij cuiusdã Præpositum durius cum iis agere, qui se religioni eiusque obedientiæ deuouerant, eosque deteriores indies euadere; *Quàm benè*, inquebat, *nutrimentum expenditis, qui de hominibus bestias nutriuistis?* Surius in vita, Edinerus, & alij.

I D E M.

Eiusdem etiam paterna illa vox, dum de liberorum educatione interpellaretur: *Capitis*, inquit, *pueros optimis ornari moribus? necesse est, ut cum seueritate disciplina, paterna pietatis & mansuetudinis lenamen eis impendatis.* Ibidem.

GISBERTVS DVVENORDIVS.

Quid verò iste? Erat vir genere & religione nobilis:

bilis. cui cū agyrta quidam stigmaticus, magistri
sui proponeret sequenda vestigia; *Quid ais, inquie-*
bat, sodes? non est quod me quæte quæ fatiges. quæ enim
puer imbui, senior respuam? Sanè,

Quo semel est imbuta recens servabit odorem

Testa diu.

P. Opmerus in Mart. Holl. manuscr.

ELECTIO.

APOSTOLI CHRISTI.

AD ELECTIONIS exempla progredientes, unde
meliùs quàm ab APOSTOLIS CHRISTI ordie-
mur? qui graui illa oratione à Petro habita, propo-
fuerunt eligere virum aliquem ex iis qui Christum
secuti fuerāt, in locum proditoris Iudæ, vt vnà cum
eis testimonium præberet resurrectionis Domini.
Et statuerunt duos, Barsabam & Matthiam: oran-
tesque dixerunt, *Tu Domine qui nosti corda omnium,*
ostende quem elegeris ex his duobus vnum, accipere lo-
cum ministerij huius, & Apostolatus, de quo præua-
ricatus est Judas, vt abiret in locum suum. Quo-
rum exemplo monemur, non nisi certa delibera-
tione, ac personarum cognitione præuia, per di-
uini nominis inuocationem, ad quamuis electio-
nem procedendum. Act. cap. i.

HONORIVS IIII. PONT.

Hunc vnicum dumtaxat Ioannem Buëcamatium
Episc. Tusculanum ad sacrum Senatum suo Pon-
tificatu adsciuisse tradunt: ac pluribus ob id indi-
gnantibus, dicebat: *Boni tantum & docti, in tantum*
collegium adoptandi. Plat. in vit.

SIGISMVNDVS IMP.

Non longè à scopo hoc aberrabat SIGISMVNDVS, qui diu multumque de Procerum delectu in suam curiam sollicitus; *Eos reges, inquit, in terris beatos existimo, qui eiectis ex sua curia superbis, viros mansuetudine & misericordia præclaros, assessores habent.* Æn. Syl. de Dict. Sigism.

VALENTINIANVS IMP.

Æuo superior, ast animo hic par cum priori VALENTINIANVS. Contendebat apud eum Episcoporum concilium, vt Mediolanensibus Antistitem deligeret. Verùm ille, *Maior, inquit, hac pronincia, quàm quæ nostris viribus queat sustineri. vos itaque diuinâ repleti gratiâ, melius hocce negotiũ transigetis.* Neque id malè. decet enim electionem ab iis fieri, qui paris ordinis aut conditionis cum eo qui eligendus, Theodoret. lib.4,

ELEMOSYNA.

IESVS CHRISTVS.

AD ELEMOSYNAM transitum facimus, quæ ardentium criminum globos beneuolentiæ suæ fonte refrigerat, & irriguo largitatis obruit incendia delictorum. Huius autem præstantiam dignitatemque paucissimis verbis expressit SALVATOR, dum ad prandium vocatus à Phariseo, accubisset; ac intra se reputans Phariseus diceret, quare non esset baptizatus ante prandium. reprimens enim insulsam eius intentionem mentemque DOMINVS, tandem subdidit: *Verumtamen quod superest, date eleemosynam: & ecce omnia munda sunt vobis.* Ita olim pauperum pater Tobias: Eleemosyna ab
omni

omni peccato & à morte liberat, & non patietur animam ire in tenebras. Luc. cap. 11.

ZACHÆVS PVBLICANVS.

Hæc cùm ita sint, quis non excussio tenacis avaritiæ compede ad liberalitatem gradum feret, & de iis saltem quæ suæ supersunt necessitati, aliorum indulgebit inopiæ? ZACHÆVS publicanorum princeps, & ipse diues, ante Dominum constitutus; *Ecce, ait, dimidium bonorum meorum do pauperibus.* verè dignus, cuius domui salus facta est à Domino. Luc. cap. 16.

SERAPION MONACHVS.

Neque hic immemor diuinæ promissionis, Qui pronus est ad misericordiam, benedicetur. Cùm enim præter tunicam, pallium, & codicem Euangeliorum haberet nihil, duobus pauperibus factus obuius, alteri pallium, alteri tunicam obtulit. cumq; ià nudus sederet, interrogatus, *Quis te despoliauit?* protento codice quem sub alis gestabat; *Hic, inquit, me nudauit.* Alios postmodum conspiciens mendicantes, codicem vendidit; pretiumque illis distribuit, dicens: *Domini verbum est: Vende omnia quæ habes, & da pauperibus.* quod necdum se impleuisse putabat, donec seipsum postmodum in seruum venderet Gentilibus, vt eos ita Domino lucraretur. Verè pius ac misericors SERAPION, & meritò Seraphicis ordinibus post mortem adscribi dignus. Pallad. in Vitis P P.

S. LAVRENTIVS MARTYR

A Decio tyranno quæstione agitur, vt argentum indicaret quod Philippum Philippi Augusti filium olim Ecclesiæ obtulisse constabat; protensa in pauperes manu, quibus illud iamdudum erog-

uerat: *Apud hos, inquit, Philippi argentum depositum
seruatur. At Decius illudi sibi putauit: qui, vbi veræ
diuitiæ veraque gloria esset, ignorauit. Ambros.
Off. lib. 2. Prudent. in Peristeph.*

S. IOANNES PATRIARCHA ALEXANDRINVS.

Quid autem de illo dicam? cui in pauperes in-
nata liberalitas & beneficentia, Eleemosynarij no-
men peperere. Ministris enim conquerentibus, quod
iis qui peterent eleemosynas, intermiserent se puel-
la quædam comptæ ac ornata, rogarentque num
illis quidpiâ dari vellet? ille in omnes æquè bene-
uolus; *Si, inquit, discipuli ac distributores mei &
Christi esse vultis, parete diuino eius iussui, qui iubet
dari petentibus. Quod est contra illos qui nimium
curiosè inquirunt de vita & statu mendicantium,
vt eis quidquam elargiantur. Sur.tom. i. in vita.*

I D E M.

Quin & de eodem illo posteritati relictum, quod,
dum in ærarium publicum Reipub. necessitatibus
subleuandis referre iuberetur, quidquid in paupe-
rum vsus indies erogabat, respōderit: *Iustum non est,
vt quæ celesti Regi sunt consecrata, terreno prodan-
tur. Ibidem.*

S. LVDOVICVS FRANÇORVM REX.

Neque obscurum benignæ liberalitatis exem-
plar iste. vt enim erat genere, ita & largitate vitæ-
que innocentia clarissimus: nam quocumque loco-
rum se conferebat, centum & viginti (duplicato au-
tem numero tēpore quadagesimali) pauperes per
singulos dies cibus regiis alebat. quibus etiam, ma-
ximè solennibus diebus, ministri & pincernæ offi-
cium exhibebat. Quare cū ob id cauillarentur fa-
milia-

miliares ; *Meliùs , aiebat , hos sumptus in pauperes conféro , quàm in luxum. Hac enim ratione , opes regnumque stabilitur.* Ionuil.in vita, cap.84.

VRBANVS PONT. MAX.

Ea autem quæ in sinu miserorum reconduntur, in cælum inferri , palàm testatus est VRBANVS. à quo cùm Cæciliæ martyris thesauri, quos dispensandos acceperat, poscerentur: quoniam indigentibus eos impenderat, aiebat: *Cæcilia thesauros manus pauperum in cælum sustulerunt.* Faciamus ergo nobis amicos de Mammona iniquitatis, vt cùm defecerimus , recipiant nos in æterna tabernacula. nam vt benè etiam Martial.

Extra fortunam est, quidquid donatur amicis.

Quas dederis, solas semper habebis opes.

In histor. Cæciliæ. Marul. lib.1. cap.2.

ALEXANDER V. PONT. MAX.

Celebratissimus quoque hoc in genere ALEXANDER. qui vsque adeò in egenos munificus , vt aliquando vix quidquam sibi superesset in vsum. Vnde & per iocum dixisse commemoratur: *Fui diues Episcopus, pauper Cardinalis, mendicus Pontifex.* Exulabat ergo ab eius pectore impius habendi error, qui aliàs cū re & ætate solet accrescere. iuxta illud:

Crescit amor nummi, quantum ipsa pecunia crescit.
 Platina in vita,

AIDAMVS LINDIFARNENSIS EPISC.

Erat Osualdus Angliæ rex, egenorum alumnus inenarrabilis. vtpote qui omnes ad palatium confluentes , in atrio sustentabat. Cumque aliquando maior esset numerus quàm apparata cibaria, ne vacuos dimitteret, escaria lance comminuta , argenti fragmen-

fragmentis suppleuit, donauitque. Quam regis liberalitatem AIDAMVS (qui fortè aderat) miratus, & apprehensam munificam illam dexteram exosculatus; *Tam prompta, inquebat, in dando manus senescere non debet.* At neque cōsenuit. aiunt enim eamdem adhuc integram, reliquo corpore absumpto, in tumulto asseruari. Beda hist. Anglic. lib. 3. c. 6.

ARCHIEPISCOPVS ANONYMVS.

Memoratu dignus etiam hic. qui, Oecono suo, conquerente quòd plures domi aleret quàm necessitas exigeret; omnium nomina, tam eorum qui necessarij, quàm qui inutiles videbantur, separatim scribi mandauit. Illis itaque visis, aiebat: *Hos dicis necessarios, illos verò inutiles. Alantur igitur hi, quia eorum ego indigeo: illi autem, quia mei indigent.* Sufficiens eam causam pauperum inopiæ subleuandæ ratus, quòd nostri indigeant. Phil. Diez tom. 2. part. 4. Serm. in Dom. Palm.

PIVS V. PONT. MAX.

Claudamus inclyto exemplo, quod ætas nostra sensit, & vidit. Lue contagiosa Urbem deuastante, crebrius ingentem auri vim verè PIVS tum PONTIFEX MAX. ægrorum inopiæ subleuandæ erogabat: cuius etiam tali Pontifice digna audita vox: *Ea nunc tempora sunt, ut & calices aureos & Ecclesiæ thesauros oppignerari velim, quò Christi membris subueniatur.* Ribad. in vit. Borgiæ lib. 3. cap. 5.

S. PAULA.

In eodem sanctitatis genere Fæminæ quoque æternæ sibi laudis locum vendicant: quæ eodem etiam impulsæ spiritu, hunc affectum Christo in pauperibus exhibuerunt. Te te igitur compello,
PAV-

PAVLA: cuius in largiendo profusa benignitas æternum apud Superos trophæum statuit. Tu enim, ne rogantes vniquam repulsam paterentur, pecuniam mutuò, imò ad vsuram accipere solita; ac prodigalitatis accusata, *Deum testor, inquis, me pro illius nomine cuncta hæc agere. Et id vnum in votis mihi, ut ipsa mendicans moriar, & alieno sindone hoc meum corpusculum involuatur. Ego enim si petiero quidquam, multos inueniam qui mihi tribuant: mendicus si à me non acceperit, quæ etiam de alieno possum retribuere, & mortuus fuerit; à quo requiretur anima illius?* Sic lampadi infundens oleum, id est, virginitatis decus misericordiæ operibus exornans, admissa es ad spōsi nuptias, ineffabili etiam misericordiâ sempiternum fruitura. Hieron. in Epitaph. Paulæ.

S. LVCIA.

Et tu etiam in hunc virginum chorum referenda: quæ omnibus bonis ad votum erogatis, cum diis litare compelleris, hoc vnicum obmurmuras, & inclamas: *Sacrificium Deo acceptissimum est, visitare pupillos & viduas in tribulatione eorum.* Verè beata, quam nunc misericordiæ remunerator Deus inter cælestes illas sponas sponsam suam collocauit. Martyrol. Sur. tom. 6.

S. ELIZABETH PAUPERVM MATER.

Hæc item nondum marito Lantgrauio viduata, ob assiduam in pàuperes benignitatē, MATER eorumdem parensque nominabatur. Quos enim in plebe oppressos aduertebat, illis familiariter admodum utebatur. Rogata autem, cur tam nobilis fæmina talibus se coniungeret; *Vt, inquebat, eis subueniendi liberior mihi dætur facultas.* Quid? cum esset Regis Pannonum filia, quoties suis ipsa manibus

bus neuit texuitque, vt de laboris sui peculio eleemosynas largiretur? ita vt non incongruè de illa dici possit; Manum suam misit ad fortia, digiti eius apprehenderunt fufum, &c. Conrard. Minor. Concion.

IOANNES GANDIÆ DVX.

Et ne solis iis qui in sacrato hoc ordine, totā hanc laudem attribuisse videamur; IOANNEM GANDIÆ DVCEM referemus. & hic in egenos paterno animo. cū enim Curiaē praeffectus pares eleemosynis rationes facultatesque non esse expostularet: *Ita*, dicebat, *statuo; mihi potiùs omnia ad vitam necessaria deesse, quàm Christi membris, patiar.* Est sanè manus pauperis gazophylacium Christi; & quidquid pauper accipit, Christus acceptat. Da ergo pauperi terram, vt accipias cælum: da micam, vt accipias totum.

Quisquid enim cupide non expendenda recondit;

Quæ nulli tribuit, pauperibus rapuit.

In vita Borgiæ, lib. 1. cap. 11.

AMEDÆVS SABAVDIÆ DVX.

Vide IN PAUPERES LIBERALITAS.

PLACILLA THEODOSII VXOR.

Par misericordiæ exemplum cum prioribus fuit hæc. Reprehensa à suis, quòd bonam vitæ partem pauperum miserabiliumque personarum miseriæ curandæ absumeret, suasque facultates liberaliùs in eos distribueret: non minùs fortiter, quàm magna illa Elizabeth, respondit: *Imperatori conuenit id aurum elargiri: mihi verò manuum opus pro imperio ipso, ei qui id semel contulit, offerre.* & appositè hæc sibi eam laudem vindicabit, de qua Sapiens:
Manum

Manum suam aperuit inopi, & palmas suas extendit ad pauperem. Niceph. Call. lib. 12. cap. 42.

ELOQVENTIA.

PETRVS ALDOBRANDINVS CARD.

Mercurio Caduceum in manu affinxit vetustas. quo significatum voluit, ELOQVENTIÆ interuentu statim omnes controuersiarum cadere tempestates: nam

Illā regit dictis animos, & pectora mulcet.

Vnde dixisse commemoratur CARDINALIS ALDOBRANDINVS: *Nullum est imperij vallū firminus, quā quod in eloquentiæ campo est fundatum.*

Addit enim inualidæ robur facundia causa,
vt habet Lucan. Henr. Farnes. in Apoph. de Princ.

IDEM

Interroganti, quis felicissimè regeret; *Non, inquit, qui opulentia aut robore plurimum pollet, sed qui eloquio & facundia.* verè Alciatus:

Cedunt arma toga, & quæuis durissima corda

Eloquio pollens ad sua vota trahit.

Ibidem.

PRINCEPS ANONYMVS.

Rogabat hunc quispiam, quænam artes hominem in altissimo honorum culmine collocarent; *Dne, ait, una Imperatoris, altera Oratoris boni.* Nec id malè: ab hoc enim pacis ornamenta retinentur, ab illo belli pericula repelluntur. Greg. Richt.

EPI-

EPISCOPVS.

S. IULIANVS MARTYR.

A Vt nullum esse, aut rarum Episcopum, qui omnia ad tantum ordinem requisita habeat, auctor est lib. 1. aduers. Pelag. Hieronymus. Episcopos nihilominus, quòd paternam suorum curam gerant, vel saltem vt id agant, sedulò incumbere debeant, patres appellabat S. IULIANVS. percontanti namque Præfecto, num Episcopi illi quos secum aggregauerat, eiusdem discipuli effecti essent; respondebat: *Discipuli non sunt, sed patres: per ipsos enim veram natiuitatem suscepimus.* Non existimabat itaque indignū cum his patribus ad veram patriam properare. Sur. tom. 1. in vita.

S. AMBROSIVS.

Huic Calligonus, qui Valentiniano à cubiculo, insultabat sæpiùs, rogabatque, Tu me viuo contemnis Valentinianum? caput tibi auferā & vitam. At ille verus pastor, suo gregi inuigilans, *Vtinam, aiebat, impleas quod minaris. Ego lubens patiar quod Episcopi: tu facies quod spadones.* Episcoporum quippe aduersa quæuis perpeti potiùs, quàm commisso gregi vinqūā paterna sollicitudine, saltem in iis quæ necessaria sunt, deesse. Ambros. Epist. 33.

SISINNIVS NOVAT. EPISCOPVS.

Fuit hic eruditione ac dicendi lepore summus. qui cū Acacium Episcopum inuideret, quidā sciscitatus, cur veste Episcopo insueta vteretur; & vbinam scriptum reperisset, presbyterum alba veste vti posse. Cui ille; *Tu, inquit, mihi dicito, vbinam scriptum sit, Episcopum nigra vti debere.* & adiecit: *Salomon*

lomon

Iommon nos cohortatus est : Sint tibi vestimenta alba. & Saluator noster eadem etiam usus, & in eâ Moysen & Eliam Apostolis exhibuit. Socrat. lib. 6. Hist. Eccl. cap. 20.

ATTICVS EPISC. CONSTANTIN.

Venerat hic consecraturus Episcopum in Nicæam. Vbi cùm Asclepiadem Antistitem reperisset, ætate maturum, quot in Episcopatu annos transigisset, inquit : eoq; dicente, *Quinquaginta : Felix homo es, inquit, tanto tempore boni operis curam agens.* Alludebat ad illud Apostoli: Qui Episcopatum desiderat, bonum opus desiderat. Tripart. hist. libro 12. cap. 11.

CHRISTIANVS II. ARCHIEPISC. MOGVNT.

Quid verò ille? Rogabat eum Guilielmus Imperator, sibi consilio suo in militari negotio subueniret. ad quem CHRISTIANVS non nomine dumtaxat, sed re ipsa; *Episcopi, inquit, est docere verbum Dei, non pugnare : Christus namque Petro mandauit, enssem cohiberet.* Brusch. in Episc. Germaniæ:

ARCHIEPISCOPVS ANONYMVS.

Erat in Granatensi regno Archiepiscopus, vir vnicè in egenos munificus ac liberalis : quorù etiam familiam domosque visitabat interdum. Rogatus itaque à Ferdinando de Talanera, cur, cùm esset Archiepiscopus, in tantum se deiiceret, vt etiam ad populares casas se conferret, præter decorum illius status; respondit: *Tu crede, si fores Episcopus, amplius admirareris quæ non facio, & deberem facere, quàm ea quæ nunc præsto.* Floresta.

S. LVDOVICVS EPISC. TOLOS.

Quapropter celebrandus ad extremum etiam iste. qui dum ex longa huius mundi nauigatione in

Q

salutis

salutis æternę portum volens libensque properaret; memor occupationum quibus in Episcopali munere fuerat irretitus; *Vero verius est*, inquit, *Episcopalem dignitatem non tam grandis esse nomen honoris, quàm oneris.* In vita eiusdem, impressa apud Moretum, cap. xviii.

CONSTANTINVS IMPERATOR.

Verùm Episcopalis muneris dignitatem primus inter Christianos Principes CONSTANTINVS MAGNVS agnouit. quem ita ad Episcopos locutũ commemorat Eusebius: *Ego communis quidam Episcopus sum, sed vos eorum quę in Ecclesia; ego verò eorum quę extra eam sunt, à Deo constitutus Episcopus, seu speculator & superintēdens, videor.* Quā etiam distinctionem in Regum coronatione ipsi Reges ab Ecclesia accipiunt. ita enim, dum à Pontifice inunguntur, ad eos dicitur: Accipe coronam regni tui, quam sanctitatis gloriam & honorem, & opus fortitudinis intelligas significare: & per hanc te participem nostri ministerij non ignores: vt sicut nos in interioribus pastores & animarum rectores intelligimur; ita & tu contra omnes aduersitates Ecclesię Christi defensor existas. ita Pont. Rom. Euseb. de vit. Constant. lib. 4. cap. 24. Th. Staplut. Dom. 22. post Pent. in Prompt. morali.

EVANGELIVM.

S. ANTONIVS EREMITA.

Fortissimus sanctę Ecclesię paries & fundamentum EVANGELIVM sese offert pertractandum. De quo sanè etsi nullum esset aliud, præclarum habemus ANTONII EREMITÆ testimonium.

Vene-

Venerant ad eum iam senem Religiosi, qui vitę normam pręscribi sibi postulabant. Ille sumpto Evangeliorum codice, *Ecce, ait, omnia hęc, ad benę beateq; viuendum necessaria.* Dicere poterat illud Dauidis, Lucerna pedibus meis verbum tuum, & lumen semitis meis. Balæus Cent. i.

S. BARTHOLOMÆVS APOSTOLVS.

Inciderat apud eum mentio de Euangelicę doctrinę vtilitate & fructu. de quo iste : *Euangelij lex brevis est, & longa.* Notabat autem Euangelij codices numero & litteris paucos & breues: explicatione verò, ac potissimum imitatione, operosos ac longos. Dion. cap. i. Theol. myst.

SERAPION ABBAS.

Quin & ille, cū iam se omnibus indumentis exspoliasset, vt Christi membra contegeret, & nudus sederet; roganti, Quis te pater spoliauit? prolato, quem sub alis habebat, Evangeliorum codice; *Hic, inquit, me nudauit.* Propter fidem enim Euangelij, in quo tam pręclarę promissiones Eleemosynis factę leguntur, ita se exspoliauit. Palladius.

SIGISMVNDVS POLON. REX.

Hic quoque cū esset verē Catholicus, à nonnullis Lutherano elleboro dementatis sollicitabatur, vt puram reformatamq; noui Euangelij doctrinam (ita eam appellant) suo populo proponi pateretur. quibus heroico animo; *Non est, inquebat, meum de Euangelij puritate inquirere: Episcoporum id munus, quorum ego iudicio lubens me libensq; submitto.* Prudenter cum Vlyssę aures claudebat, ne Sirenarū fallaces voces in sui exitium excipere cogeretur, instar aspidis surdę, & obturantis aures suas,

quæ non audiuit vocem incantantium. Surius in Comm. Rerum in orbe gest.

IOANNES RVRIAS MINISTER EDENBURG.

Quo laudis honorisve priores, eodem vituperij gradu collocandus iste. Dum namque nouatæ religionis buccinam palàm inflaret, binas ad suggestum bombardas deferre solitus, asseribat autem, *Fratrem Euangelicum paratum esse debere, non verbo tantum, sed & armis, si opus foret, Euangelium propugnare.* Guill. Rastellus.

THOMAS MORVS.

Reiiciendos verò eos Euangelij interpretes, qui propriis viribus fisi, à communi Ecclesiæ explicatione sponte aberrant, testis est THOMAS MORVS. Obiiciente namque Tindallo (quem MORVS reprehenderat, quòd vocem Ecclesiæ in congregationem, & Presbyteri in seniore verterat) dulcissimum eius Erasimum ita vertere, respondit: *Si dulcissimus meus Desiderius praua illa intetione sic vertisset, qua Tindallus; dulcissimus meus Desiderius, ne quidem mihi dulcis esset.* Th. Staplut. in vita.

EVCHARISTIÆ SACRIFICIUM ET SACRAMENTVM.

IESVS CHRISTVS.

AMplectamur nunc spirituale illud alimētum, quod sumptū reficit, nec deficit: miremur augustum illud nouę Legis sacrificiū, verè, si vllum aliàs, propitiatorium. cuius proinde dignitatem exprimens DOMINVS IESVS, Pharisæis dicentibus patres eorum manducasse manna in deserto,
iuxta

iuxta illud; Panem de cælo dedit eis manducare; aiebat: *Non Moyses dedit vobis panem de cælo: sed Pater meus dat vobis panem de cælo verum. Panis enim Dei est, qui de cælo descendit, & dat vitam mundo.* Ioan. cap. 6.

I D E M

Litigantibus Iudæis, & inuicem cauillantibus, quomodo carnem suam dare posset ad manducandum; respondit: *Amen dico vobis: nisi manducaueritis carnem Filij hominis, & biberitis eius sanguinem, non habebitis vitam in vobis, &c.* Quibus verbis, & EUCHARISTIÆ dignitatem, & miram necessitatem explicauit. Facessant igitur, qui hîc verum Christum sub speciebus contineri negant: cùm ille suam carnem & sanguinem, non in figurâ aut signo, sed verè ac realiter, nec per fidei apprehensionem tantùm, sumi ac manducari expressis verbis præcipiat. Ibidem.

S. ANDREAS APOSTOLVS.

Egregius Christi athleta ANDREAS, magnum etiam augustissimo huic Sacrificio splendorem suo dicto addidit. Ægeæ namque Proconsuli Achaiaë crucis supplicium minitanti nisi idolis sacrificaret, respondebat: *Ego omnipotenti Deo, qui vnus & verus est, omni die sacrifico, non thuris fumum, nec tauro- rum mugientium carnes: sed immaculatum agnum. cuius carnes posteaquam omnis populus credentium manducauerit, agnus qui sacrificatus est, integer perseuerat & viuus.* Ex passione eiusd. scripta à Presbyteris Achaiaë, Sur. tom. 6.

S. LAVRENTIVS PATRIARCHA VENET.

Quàm verò præclara res sit, crebrior huius Sacrificij oblatio, documento sit B. LAVRENTIVS PA-

TRIARCHA. utpote qui numquam valens ab eâ cessauerit, ex quo die eam faciendi potestatem acceperat. Percontantibus autem, cur tam assiduus sacris operaretur; dicebat: *Qui, cum posset domino suo frui, non fruitur; facile declarat se curam eius non habere.* Hinc venerabilis Beda asserit, Sacerdotem non legitime impeditum, qui celebrare omittit, quantum in se est, priuare sanctam Trinitatem laude & gloria, Ecclesiam spirituali Christi beneficio, ac seipsum medicina & remedio. Sur. tom. 1. in vita.

HUGO DE S. VICTORE.

Huic animam agenti, cum Monachi SS. Eucharistiam, quam anxie sibi dari expetiuerat, ob continuum vomitum diu dare detrectassent, tandem non consecratam hostiam ritu ceremoniarumque consuetis deferunt. Quam cum æger esset intuitus: *Misceatur, inquiebat, vestri Deus: cur mihi illudere voluistis? non est iste Dominus meus.* Illi rubore confusi, sacratam adferunt: qua visa, exspirauit. Hugo Ranulphus lib. 7. cap. 19. in Polychron.

S. NICOLAUS DE TOLENTINO.

Ille ad extremum usque spiritum sacro hoc Eucharistiae alimento reficiebatur. unde in extremo vitæ discrimine, ipsoque agone, id ipsum in viaticum petiit sibi administrari. rogantiq; cur tam ardenti desiderio in illud ferretur; *Vt, aiebat, tanto viatico munitus, non deficiam in via, ad patriam celestem profecturus. & si ob demerita mea improbus Belial hostis mihi occurrerit, possim fidenter dicere; Dominus mihi adiutor, & ego despiciam inimicos meos.*

Sur. tom. 5.

B. FRANC. XAVERIVS.

Et quoniam in tam augusto mysterio diabolicæ frau-

fraudis malitia irrepsit, qua verum in eo Christi corpus contineri ambigat humana fragilitas: præsentissimum huic malo remedium dicebat XAVERRIVS. rogatus namque, quo tandem modo occurrentes super hoc scrupulos quis animo eximeret, respondit: *Pia & diligenti ipsius mysterij frequentatione.* Horat. Tursell. lib.4. c.23. vit. eiusd.

CORNELIVS MVSIVS.

Fuit is M V S I V S, quem Delphi Bataui sedulum Pastorem habuerant, & in immeritam crucem intempestâ nocte egerant. Is ergo, sui populi insano furore percepto, cùm plures in sacrario superessent consecratæ hostiæ, ne in impiorum manus deuenirent, mente ad Deum conuersa, omnes absumpsit, dicens: *Hoc sumpto viatico armabor ad martyrium: nec deficiam tam salutari refectus sacramento.*

P. Opm. in Mart. Holl. manusc.

D. LVDOVICVS F. R.

Sed quid illos tantoperè miremur, quos ad tam ardua mysteria consignauit vocauitque ipse eorundem institutor & auctor Christus Dominus: cùm & alij æmulæ posteritati consecrati sint, qui nō minùs in hoc genere Religionis præstantes? Ducat hanc aciem Christianiss. Rex LVDOVICVS, cuius hac de re celebris memoria. Sciens namque pius & religiosus Princeps, quòd Fides non habeat meritum, vbi humana ratio præbet experimentum; & quòd in augustissimo hoc mysterio, vt doctè in Hymno suo D. Thomas Aquinas,

*Quod non capis, quod non vides,
Animosa firmet Fides
Præter rerum ordinem.*

dum fortè Missæ sacrificio cum Proceribus in palatij Parisiensis sacello interesset, & illi puerulum formæ præstantissimæ in manibus celebrantis conspicerent, & admirarentur, Regemque vt videret impellerent, respondit: *Qui non credit, vadat & videat. Ego credo, & fidei meritum libens conseruo.* noluit enim sibi aliquando à Domino dici, Quia vidiſti me, credidiſti. Beati namque qui non viderunt, & crediderunt. Refert præter alios, F. Ioan. Viguerius, in Instit. ad Christian. Theolog. cap. de Eucharistiæ sacramento.

RVDOLPHVS IMP. AVSTRIACVS.

Proximum Ludouico locum sibi vendicat AVSTRIACVS RVDOLPHVS: in quo quàm varium pietatis studium emicuerit, subiecto exemplo illustratur. Erat adhuc in modicâ fortunâ, nec nisi comes Hapsburgensis: & vt nobilitas illa solet, cum paucis equis ad venationem exiuerat. pluuius & infernus erat dies, viæ sordentes & fractæ. Ecce occurrit Parochus ægro viaticum pedes laturus. Is aspectus pium pectus perculit, & equo desiliens; *Me vehi, inquit, & te qui Saluatorem meum portas, pedibus incedere? indecorum vel impium sit: conscende, & equum hunc cape.* Paret alter. & hic capite nudato subsequitur, ad ipsas ædes infirmi deducit, ab iis eodem habitu reducit. Sacerdos officio attonitus, & mente à Deo motâ, benè abeunti dixit, & simul Imperium ipsi posterisque prædixit. & ab hac religiosa stirpe, illustris illa & omni pietate insignis Austriaca domus, quæ etiam modò Christianum orbem moderatur, incrementum sumpsit.

I. Lips. Mon. Polit. lib. 1. cap. 4.

PHILIPPVS II. HISP. REX.

Verùm inter cetera Austriacæ domus exempla, minimè nobis omittendum, quod de PHILIPPO II. Hispaniarum Indiarumque rege suggessit à se obseruatum ex historia Gallica Petri Matthæi, Ioannes Brantius Antuerpiæ vrbis Grapharius. Cordubæ (quæ Hispaniæ ciuitas) anniuersario ritu Christi corpus circumferebatur. dies æstiuus erat, & feruens. comitabatur reuelato capite PHILIPPVS, solisque ardorem Austriaca pietate superabat. At è dynastis vnus, regiæ salutis anxiam curam gerens, monet æstum vitare. cui pius Princeps: *Isto quidem die, sol aut ledere aut offendere quemquam nequit.* Sole namque iustitiæ suos radios emittente in tantum incalescebat, vt alterius ardores etiam vehementes pro nihilo duceret. verè dignus ea laude Princeps, quòd ex nobili illa stirpe, vix vllum pietate & religione parem habuerit, superiorem autè neminem.

LAVRENTIVS MEDICES.

Hic quoque admiratione imitationeque dignus. cui dum fatali lecto decumbenti, SS. Eucharistia toties expetita deferretur; è lectulo quasi exsiliens; *Procul à me absit,* inquit, *vt patiar Iesum meum, qui me finxit, qui me redemit, ad me venire. tollite hinc obsecro, vt Domino occurram.* dicebat quippe cū Centurione Euangelico: Domine non sum dignus, vt intres sub tectum meum. Ang. Polit. in Epist.

HENRICVS VIII. ANGLIÆ REX.

Liceat & hunc superioribus addere: qui licet ab obedientia Sedis Apostolicæ desciiuisset, maximo tamen honore SS. Eucharistiæ Sacramentum est prosecutus. Itaque non diu ante mortem, sub vnica

Q s

specie

specie communicaturus, cum è sella assurgeret Christi corpus adoraturus, & Zwingliani, posse regem illà inualetudine sedentem Eucharistiam percipere, dicerent: *Si me, inquit, non modò usque ad terram deicerem, sed & sub ipsam terram submitterem: ne sic quidem satis honoris sanctiss. huic Sacramento viderer delaturus.* Utinam in omnibus talis! & fuisset profectò, nisi perditorum consiliis, ac propriis concupiscentiis nimium acquievisset. Sanderus lib. 1. de Schism. Angl.

THOMAS MORVS.

Henrico Angliæ regi eiusdem regni Cancellarium subiicio. quem nullo vnquam die Missæ sacrificium neglexisse, memorant historiæ: ita vt aliquando cum illi intenderet, à Rege vocatus nō discederet, donec integrè absolutum foret. Vrgentibus autem, Regem eius aduentum præstolari, aiebat: *Meliori Domino obsequium præsto, & id mihi primum erit perficiendum.* Th. Staplut. in vita.

EXCOMMVNICATIO.

ARSENIUS ABBAS.

HActenus de augustissimo illo Ecclesiæ Sacramento: nunc de censoria eiusdem virgâ, quam EXCOMMVNICATIONEM nominant veteres, dicendum. quâ qui tacti & notati, Ecclesiæ castris excluduntur, & magni illius Sacramenti, aliorumque benedictione, fratrumque communicatione priuantur. Prouidum illius vsum expressit ARSENIUS: qui in iuniores etiam grauitè delinquentes, rariùs hūc mucronem stringebat. dicebat enim: *Iuuenis excommunicatus vinoulum illud spernit: pronectior verò velo-*

velociter eius dolore corrigitur. Socrat. lib. 8. cap. 1.
Trip. Hist.

GREGORIUS VII. PP.

Hunc meritò subnecto; quem nullus aut fauor, aut metus, à iusta huius mucronis iaculatione dimouit. Conceperat in animo Henricum IV. Imp. hoc anathematis gladio coërcere. obstant magnates, & Regem non ita facilè anathematizandum clamant. Quibus PONTIFEX: *Dum Petro Ecclesiã suam Dominus committeret, dicens: Pasce oues meas. excepitne reges? Non excepit sanè. generalis enim tradita potestas, Quodcumque ligaueris & solueris super terram, &c.* Platina in vita.

B. FRANC. XAVERIUS.

Cùm autem ij qui hoc Excommunicationis gladio feriuntur, extra Ecclesiæ limen eiciantur: meritò eorum commercia colloquiaq; vitanda erunt. Et quidem FRANCISCVM XAVERIVM ad Sinas pergentem cùm rogaret magni nominis vir, Præfectum diris deuotum salutaturus cōueniret: *Egon aiebat, hominem fidelium cōmunionem exclusum ad eam saluandi causa? & post pauca: Me quidem amicum non habebit, quamdiu habuerit inimicum Deum.* Hor. Tursell. lib. 3. cap. 14. in vita.

VALENTINIANVS IMP.

Neque ab hac mente alieni fuere ciuilis ordinis viri primates. Quid enim de VALENTINIANO dicam? Acceperat is à fratre Arriano litteras, quibus auxilium contra Gothos efflagitabat. Quibus ille: *Nefas homini bellum gerenti cum Deo opem ferre; cuius potius temeritas meritò coërcenda.* Theodor. libro 4. hist. Eccl. cap. 28.

THEO-

THEODOSIVS IMP.

Ab Ambrosio Episcopo anathemate ictus, cum admissum scelus lachrymis vbertim detergeret, venit ad eum Rufinus, tanti doloris causam sciscitatus. Cui IMPERATOR, *Tu, inquit, Rufine ludis, & mea mala non sentis? ego gemo calamitatem meam, quia seruis & mendicantibus patent templa Dei, & Dominum suum exorantes ingrediuntur: mihi verò ad eum ingressus non pater, insuper & celi mihi clausi.* An non hic etiam, ut plerique Principes, se vi & armis anathematizati Episcopo opponere potuit? potuit certè. at diuinæ potestati, quam Ecclesiæ suæ in hereditatem reliquit, obsistere nec debuit nec voluit. •Socrat. Trip.hist. lib.8. cap.10.

OTHO BRANDEBURG. PRINCEPS.

Quàm autem fœda res sit cum Excommunicatis familiariter uti, etiam ratione carentia animalia exemplo nobis sunt. Anathemate ob demerita percussus à Ludolpho Antistite OTHO BRANDEBURGENSIS, per ludibrium mensæ assidens, canibus frustra carniū obiecit: *Videamus, inquit, an ab excommunicatis (quod vulgò dicitur) carnes accipere recusent canes?* Certè recusarunt. Ille saturitatem causatur, canemque tridui inediâ maceratum adduci iubet. at nec ille carnes obiectas attigit. eoque miraculo territus, Ecclesiæ paruit. Chronic. Magdeburg.

EXEMPLVM.

IESVS CHRISTVS.

INstructus redditur animus in futuris, quando præteritorum commouetur exemplis: auctor est Cassia-

Cassianus. hinc MUNDI REDEMPTOR transiturus ad Patrem, postquā abluisset pedes discipulorum, rogabat eos; *Scitis quid fecerim vobis? & paucis interiectis: Exemplum dedi vobis, ut quemadmodum ego feci vobis, ita & vos faciatis.* Ille demum magister aliorum vocari dignus, qui se illis præbet bonorum operum exemplum. Ioan. cap. 13.

S. MARTINVS EPISCOPVS TVRON.

Detinebatur ille vi februm in lectulo per multos dies: neque tamen idcirco à Dei opere cessabat. & pernox in oratione ac vigiliis, fatiscentes artus spiritui seruire cogebat, nobili illo strato cilicio & cinere recubans. Rogatus autem ut saltem vilia ac modica stramenta suo corpori pateretur supponi; *Non decet, aiebat, filij, Christianum nisi in cinere mori. Ego si aliud vobis exemplum relinquo, ipse peccaui.* Probè ac scitè ille:

Sic agitur censura, & sic exempla parantur,

Cum iudex alios quod monet, ipse facit.

Sulpit. in vita.

MACARIVS ABBAS.

Simili etiam modo MACARIUM respondisse tradunt. Cùm enim apud eum verba faceret religiosus quispiam de abstinentia, eamque sibi admodum duram videri diceret; ille, *Confide fili, ait: per annos viginti, ego neque pane, neque aqua, neque somno satiatus sum.* Ita suo exemplo alterum ad abstinentiæ virtutem incitabat. Socrat. lib. 8. hist. Trip. cap. 1.

S. TRANQVILLINVS.

Audiuerat iste Zoën uxorem Nicostrati pro Christo neci dandam; eiusq; exemplo permotus, *Quid, inquit, femine nos ad martyrium precedant? indignum.*

gnum. Itaque se Christianum professus, lapidibus obruitur. Sur. tom. i. in vit. S. Sebast.

S. LUDOVICVS F. R.

Et de illo memoriæ proditum, quòd, cùm inquisi-
fuisset ex quodam aulicorum, lauarétne suorum pe-
des feriâ quinta maioris hebdomadæ, & ille sibi
hoc indecorum videri diceret, subintulerit: *Quid,
indecorum? non debes abhorrere quod suo nobis exem-
plo exhibuit Dei filius, qui hoc die discipulorum pedes
lauit. Quanto minùs tu faceres, quod modò Angliæ
Rex, qui leprosum pedes hoc die non lauare tantum,
sed exosculari etiam consuevit.* Ionuil. vitæ eius
cap. 84.

RELIGIOSVS ANONYMVS.

Factam de Ludouico mentionem, haud iniuria
sequetur FRANCISCANI cuiusdam RELIGIOSI pru-
dentia. Aperuerat huic Ludouicus Caroli II. Si-
ciliæ Regis filius, dum in Cathalonensi detinere-
tur custodia, se votum Deo fecisse perpetuæ casti-
tatis, & capiendi institutum D. Francisci. cùmque
dubius hæreret, quo tandem loco propositam rem
exequeretur; pius pater dilationis periculo ob ocu-
los posito, quantumque suo exemplo splendoris
aliis allaturus sit, demonstrato, *Cogita, inquit, quan-
tum exempla bona prosunt: magnorum namque viro-
rum non minùs memoria, quàm presentia est utilis.*
Ex vita S. Ludouici Episc. Tolos. cap. xi. impressa
apud Ioan. Moretum.

S. DOROTHEA VIRGO.

At in femina quoque satis illustre habemus ex-
emplum. Dicente Sapritio Præsidi virgini DORO-
THEÆ, diis sacrificaret, ni legibus acta amaris,
exemplum timoris dare eligeret, hoc responsum
dedit:

dedit : *Omnibus dabo exemplum timoris Dei : ut hi qui timent Dominum , homines rabidos non timeant.*
 Sur. tom. 1. in vita.

FRANCISCVS I. GALL. REX. .

Prodeat hîc etiam in arenam FRANCISCVS. quem solitum dicere iis , qui è Cæsario carcere reducem ad restaurandas copias incitabant , auctor est Peucerus : *Vos non interfuistis prælio ad Papiam.* ita semper animo se offerebat infelicis illius prælij crudele exemplum. Peucerus in lect. Chron. anni 1574.

EXPROBRATIO.

LVDOVICVS XI. GALL. REX.

VEluti in quibusdâ carpendi reprehendendiq; , ita in aliis mira exprobrandi venustas. quæ lanè, si in vlllo alio, certè in LVDOVICO XI. emicuit. Intellexerat namque is Nicolaum Paulinum Burgundiæ Cancellarium, suis opibus hospitale exteris recipiendis erexisse, & dotasse. Fuerat autem ille seuerus admodum in exigendis multis, & (vt vulgò fertur) ad rem familiarem attentus. Quod festiuè notans LVDOVICVS; *Hoc, inquiebat, rationi consentaneum , ut qui plures pauperes effecerit , tandem illis excipiendis hospitale instituat.* Taxabat simul iudicium in multando rigorem, in pauperum verò causis ignauiam & teporem. Corozetus.

BRISÆVS PRÆSES.

Priorem Ludouicus, hic artem arte deludens, ipsum Ludouicum aggressus. Iuerat ad venationem exiguo vectus equo, & Præsede suo BRISÆO comitatus : cumque esset proprij & consilij, & cerebri, neque facile consiliariorum decretis auscultaret,

taret, oportune rogabat BRISÆVS: Vnde sereniss. Rex tam robustū nactus est equum? cui Rex: Quomodo hæc tibi in mētem veniunt, cum sit adeo pusillus? *Quia te*, respondit ille, & *consilium tuum fert.* Gaguinus, in vita Ludouici xi.

PETRVS NANVS.

Nomine pusillus, magnus ingenio ille PETRVS. Erat apud Canem Scaligerum cum Vguccio, perditis iam Luca & Pisis Italiae urbibus: cumque illis esset conuiua, & de Edonibus mentio incidcret, Vguccius illato sermone, se iuuenem quaternos altiles capos, perdices totidem, & plura eius generis, vnicā cœnā absumere solitum narrauit. At PETRVS dictum excipiens; *Non est*, inquit, *quod hac à te iuene comesta admiremur: cum iam maturus, nec planè dentibus instructus, duas vrbes vno prandio absumpseris.* Fama quippe erat, Vguccium, si se ab inchoato prandio temperasset, satis temporis habiturum fuisse ad sedanda nascentis tumultus initia, & vtrāque urbem saluandam. P. Iouius lib. i. Elog.

ANONYMVS.

Audiamus quid etiam illè. Vidit matronā quampiam cultu fastuque tumescentem, ac veste indutam, in quam bonam fundi & agrorum partem absumperat. cumque illa conquereretur, quod nimio indumentorum pondere grauaretur: *Quis miretur*, inquit ille, *cum amplius quàm quattuor terra ingera circumferas.* In Epigram. Tho. Mori.

AMALABERGA FRANCIAE REG.

Et ne ab hac dicendi venere immunes feminas arbitremur, AMALABERCAM ad calcem damus: quæ indignè ferens conjugis in bello ignauiam, & iniquam sortem, dum fortè illustriores aliquot conui-

uas

uas ille præstolaretur, dimidiam ei triclinij partem apparat. Percõtanti marito, & ægrius ferenti, quidnam id rei esset; respondit: *Qui parte regni exuitur, etiam triclinij parte cedat oportet.* P. Æmyl.

FACETE DICTA.

S. MARTINVS.

SI omnia illa persequi voluerimus quæ in hunc locum adduci possent, cùm de ratione Apophthegmatis sit, habere coniunctã faceto acumini grauitatem; vereretur quòd manus scribentem deficeret, & solus hic titulus operoso volumini materiæ subministraret. Ne tamen hîc etiã nostris partibus deesse videamur, è multis pauca libauimus, huic loco propria. Viderat fortè B. MARTINVS ouem iam recens tonsam, &, *Euangelicum*, inquit, *mãdatum ista compleuit: duas habuit tunicas, & vnã largita est non habenti.* & ad discipulos conuersus; *Ita & vos facere oportet.* Sulpit. in eius vita, Dial. 2. cap. 12.

I D E M

Subulcum in veste pellicea conspicatus, *En*, inquit, *Adam eiectus de Paradiso in veste pellicea sues pascit: sed nos, illo vetere deposito, nouum Adam potiùs induamus.* Ibidem.

MARCVS EPISCOPVS ARETHVSÆ.

Quin & in re seria iocari aliquãdo plures. MARCVS quidem Arethusæ Episcopus innumeris cruciatibus ab infidelium turba affectus, & in sublime feruentissimo æstu leuatus, vt apuin vesparumque configeretur aculeis, in tortores iocatus; *Abiecti vos*, inquit, *qui humi repitis: erectus verò ego, & excelsò loco collocatus.* Verè excelsus, quem victrix to-

R

leran-

lerantia fecerat omni humanâ crudelitate superiorem. Theod. lib. 3. hist. Eccl. c. 16.

EPHRAIM SYRVS.

Bellè etiam iste. Transegerat ieiunio plures dies, cibumque à ministro deferri sibi mandat. at is ollam confringit, & obsonio pauimentum perfudit. quem pudore pariter ac timore correptum conspiciens; *Bono animo, ait, fili : quandoquidem enim obsonium ad nos venire reuult; age, nos ad illud accedamus.* & ad ollæ fragmenta confidens, comedit. Nicephor. Call. lib. 9. cap. 16.

NICOLAUS V. PONT. ROM.

Intellexerat hic quosdam in Vrbe, qui bonos doctosque versus concinnarent : &, *Bonos*, aiebat, *esse nego. cur enim ad me illi non deferuntur ; qui etiam malis pateo ?* Molestè ferebat homo sapiens, esse in sua Vrbe viros doctos, & à se ignorari. Hermol. Barbarus, in Præfat. Castigationum suarum in Plinium.

LVDOVICVS CRASSVS F. R.

Fastidio eiusmodi narrationum. Quis enim modus, si omnia enumerauero? tamen vt ad politicum latus me conferam, pauca ex illo depromā. & quidem in Frácia, video LVDOVICVM CRASSVM. Hic in prælio contra Anglorum regem ab equite quodam vrgebatur, qui etiam apprehenso per frenum equo Regem captum inclamabat. at ipse, gladio exerto, equitem obtruncat, dicens : *At ne quidem in latrunculorum ludo solus Rex capitur.* Corozet.

LVDOVICVS XII. GALL. REX.

Eiusdem vt nominis & regni, ita lepôris heres iste. Intellexerat Franciscum, qui postmodum regni gubernaculis successit, spe prouentuum percipiendorum,

dorum, magno se ære alieno grauari. vnde anxium eum compellat; *Vacuo*, inquit, *animo sis oportet.* & hanc fabellam subiungens, *Equitabam*, dicebat, *quandoque cum patre, & proximus mihi videbar urbi: visisque templorum pinnis, cùm in via languerem; En, aio, pater, confecta via. Aberamus adhuc stadiis pluribus: ille autem ad me; Adolescens, inquit, ne post-hac visis templorum pinnis, iter te executum arbitrere.* tacitè innuens, indignum esse, spe & specie largitionis, nondum adepti principatus commoda percepturum se existimare. P. Æmil. in vita.

IDEM

Cuidam ob vulnerum cicatrices in facie acceptas glorianti; *Hæ ipsæ verò*, inquit, *tibi monumento futura, ne fugiens umquam faciem auertas.* Corozetus.

ROBERTVS NORMANDIÆ DVX.

Quanta verò in hoc Principe venustas, audite. Profectus erat religionis ergo Solyman, & in itinere morbum contrahit, qui eum à progressu retardaret. Quid tandem? Locorum agrestes, dato pretio, accersiri imperat. qui Principem humeris suis per reliquum viæ deferant. Interea è domesticis vnus Normandiam repetit, & num quid suæ genti nuntiatum velit, Regem interpellat. ille; *Dices vidisse te demones ferentes Robertum Ducem in cælum.* innuens se ab idolorum cultoribus gestari, quos dæmonibus comparabat; & Hierosolyman, cælo. Pol. lib. 8.

IDEM.

De eodem quoque memoriæ proditum, quòd Constantinopolim profectus, cùm perbenignè à Constantino exciperetur, qui & altiores sellas sine

R 2

pului-

puluinaribus tam illi quàm ceteris Normandiæ Ducibus apponi curauerat, continuò vestē exuerit, eamque globi instar complicatam sibi supposuerit. quod ipsum etiam comites imitati. Exemptâ autem iam epulis fame, omnes veste relictâ recelsere. Monet abeuntes Constantinus subridens, indumenta resumerent. Ad quem Dux: *Non est, inquit, mos Normannis, sedes secum deferre.* Ibidem.

MAXÆMILIANVS IMP.

Hic item à mendico frater salutatus, & fraterno amorì condignam eleemosynam elargiri rogatus; vbi ab Adami stirpe hanc consanguinitatem deduxerat, obolum vnum dumtaxat dari iussit, adiiciens: *Abi, & à quolibet fratrum si tantumdem receperis, crede, breui me diuitiis superabis.* Corozet. de Factis memor.

ALPHONSVS REX. ARAG.

Serius ille quidem in omnibus, & supra modum prudens, in faceto etiam hoc agmine non infimum locum accepit. Senensibus quippe, qui se bello Italico quasi medios continuerant, ita vt in neutram partem inclinarentur, per diuisos iam milites spoliatis, dicebat: *Verè Senensibus euenit, quod iis solet, qui mediam domum incolunt; vt ab infernè habitantibus fumo, à supernè verò urinâ vexentur.* Panor. lib. 4. de Reb. gest. Alphonfi.

IDEM.

Habebat Iacobus Alamanus, homo Christianus quidē, at Iudæis parentibus natus, venale D. Ioannis aureum simulachrum, quingētorum aureorum pretio coëmendum. Ad quem ALPHONSVS subridens: *Non tu sanè ineptus es, & maioribus tuis dissimilis, discipuli & præcursoris imaginem tanti æstimans,*

mans, cum illi Ioannis magistrum & Regem Iudaorum non nisi triginta argenteis vendiderint. Panorm. lib. 1. de Gestis eiusd.

ANONYMVS PICTOR.

Ferunt etiam Coloniae Agrippinae pictorem, sed & potorem (hoc enim illi generi commune) solitum Christi imagines apud caupones pignori dare: rogatumque, cur non diuenderet potius ampliori pretio; respondisse: *Ergo me Iudaeum, quam Christianum mauultis? absit.* Aen. Sylu. lib. 1. Comm. de Reb. gest. Alphonsi.

THOMAS MORVS.

Ille quoque suam grauitatem tot Reip. muneribus comprobata, ita suauis quadam urbanitate condidit, ut nescias an fuerit Senator grauior, an amicus iucundior. Proponebat Cardinalis Wolsæus in Concilio, expedire Reipub. eligeretur aliquis qui Regis absentis personam repræsentaret: seque pro eo declarandum insinuabat. Annuunt omnes, vno MORO excepto. quem irâ commotus Cardinalis compellans, Ostendis, ait MORE, te stultum Confiliarium, qui solus resistas. Cui MORVS euestigiò: *Magna ergo gratiae Deo agenda, quòd maiestas Regia in hoc suo Senatu unicum tantum stultum habeat.* Th. Staplut. in vita, cap. 13.

IDEM

Theatrum, supplicij locum, conscensurus; manum sibi, quò facilius ascenderet, porrigi postulabat, dicens: *Iuuam me ut conscendam, in descensu nemini molestus futurus.* Ita ex facilitate ingenij similes facetias, etiam rebus grauissimis insparfit. Th. Staplut. cap. 13. vit. eiusd.

NICOLAVS FLORENT.

Intuebatur ille equitem plurimis aureorum torquum circa collum spiris incedentem; & egregiè ludens, *Hem! inquit, ceteri stulti unica vincti catena tenentur: at huius tanta est insania, ut pluribus vix queat coërceri.* Poggius in Facetiis.

ANONYMVS COQVVS.

Hic item cùm præ senio Mediolanensium Principi ampliùs deseruire vix posset, vnicum ab eo in gratiam omnium meritorum postulauit sibi præstari. quo rogâte, *Quidnam illud? Ut asinus etiam fiam,* respondit. ac stultæ petitionis causam sciscitanti Principi, *Quia,* aiebat, *video eos quos extulisti adeò ambitione & superbia inflatos, ut iam panè in asinos transferint.* Ibid.

ANONYMVS MERCATOR

Mare insuetum peragrabat, & fortè præ nimia agitatione stomachum euacuare cōpellebatur. cui ex adstantibus alius: *Verè tu gratus es & beneficij memor: quòd pisces, qui te toties pauere, repascas.* Th. Morus in Epigram.

CONVIVA ANONYMVS.

Eiusdem lepôris etiam istud. Ad conuiuium vocatus inurbanus quidam, poculum ab altero accepturus, vidit in eo muscas demersas. quas dum collegisset, hausto poculo, rursus eas iniecit. mirantur conuiuæ, & cur id agat inquirunt. ad quos ille: *Ego quidem muscas numquam sumo: sed nescio, num quis vestrùm eas pro deliciis habeat.* Breui Epigrammate id complexus est Thomas Morus:

*Muscas è cratere tulit conuina, priusquam
Ipse bibit: reddit rursus ut ipse bibit.*

Addidit

*Addidit & causam, Muscas ego non amo, dixit;
Sed tamen è vobis nescio num quis amet.*

F A M I L I A.

NICOLAVS V. PONT. MAX.

Magnam virtutis morumque documentum
 esse probè instructam FAMILIAM, suo dicto
 testatus est NICOLAVS PONTIFEX eius nominis
 Quintus. à quo dum sciscitaretur quispiam, prius-
 quam esset in Pontificem electus, qualis haberetur
 Eugenius quartus tunc superstes; *Faci'e id cognitu,*
aiebat: qualem enim familiam vides, talem illius re-
ctorem Principem esse puta. Auct. Scem. conuiual.

F E S T I N A T I O.

NICOLAVS III. PONT. MAX.

Rem opportunè aliquando & nulla interposita
 mora aggredi, admodum vtile iudicabat NI-
 COLAVS III. PONT. utpote qui vacantibus Eccle-
 siis pluribus, in id incumberebat assiduus, ut eis de
 viris timoratis prospiceret. causamque tantæ celeri-
 tatis interrogantibus, *Magnum, dicebat, tum in mo-*
ra est periculum, cum non desunt, qui diuina etiam
cupidissimè occupata diriperent. Summa itaque in
 agendo erit prudentia, si rerum temporumque quali-
 tati res nostras accomodemus. Platina.

PETRVS ALDOBRANDINVS CARD.

Huius quoque non minùs egregium dictum. In-
 quiebat autem: *Vbi urget temporis angustia, accele-*
randum non est, sed maturandum. Illud enim incon-
 siderati est animi, hoc verò prudentis. Henr. Far-
 nes. in Apophth. de Princ.

FESTI DIES.

THOMAS MORVS.

DEos genus hominum miseratos dicebat Plato, quòd remissiones laborum illis statuerent, solemnia videlicet *FESTA*. At Christianis alio in usu eorum institutio: vt iis videlicet omnium largitori Deo gratiæ agantur; aut ij quos apud eundem patronos habemus, digna veneratione celebrentur. vnde tâta religione eadem obseruasse dicitur THOMAS MORVS, vt iis etiam, dum in carcere solus degeret, vestibus melioribus sibi allatis indueretur. Mirantibus verò, cur solus cùm esset, id faceret; respondit: *Non ad conspectum populi, sed ad Dei honorem festa colo, & honestè induor.* Volebat certè non interno mentis tantùm, sed & externo corporis splendore dies festos celebrari. Thom. Staplut. in vita.

I D E M.

Neque prætereundum, quòd cùm accepta mortis sententia, diutiùs ab eius executione quàm vellet detineretur, tandem instante festo Translationis S. Thomæ Cantuariensis, *Cras*, aiebat in Vigilia, *vehementer gestio ad Deum migrare: esset enim ille dies mihi admodum conueniens.* eumque quem optabat diem, suo Martyri Deus suauissimè concessit, in quo & Patroni, cuius nomen gerebat, & sancti Apostoli (incidit enim illud festum in Octauam S. Petri) pro cuius primatu sanguinè fundebat, celebris memoria in Ecclesia fieret. Thom. Staplut. in vita, cap. 19.

FIDES,

FIDES, FIDELITAS ERGA
 DEVM ET HOMINES.

IESVS CHRISTVS.

FIDEI FIDELITATISQVE bonum exequimur, si-
 ne quo nulla inter homines, imò & Deū ipsum,
 consistere potest aut debet societas. Cumque Fides
 alia Theologica sit, Moralis alia : de vtraque nobis
 sermo. Priorem autem crebris in locis insigni sua
 commendatione exornauit SALVATOR. & quidem
 à se postulantibus cælestem cibū, dicebat : *Ego sum
 panis vitæ: qui venit ad me, non esuriet : & qui credit
 in me, non sitiet in æternum.* quod aliàs etiam Mar-
 thæ insinuauit, cū diceret: *Qui credit in me, etiamsi
 mortuus fuerit, viuet.* Verè Christiani ædificij fun-
 damentum & basis est F I D E S , per quam Ecclesiæ
 auctoritas integritasque firma & stabilis perseuerat.
 Ioan. cap. 6.

I D E M

Deprecantibus eum super sua infirmitate duo-
 bus cæcis, Creditis, aiebat, quia hoc possum facere
 vobis ? quibus dicentibus : Vtique Domine. con-
 tingens eorum oculos, adiecit: *Secundùm fidem ve-
 stram fiat vobis.* & aperti sunt oculi amborum. Tan-
 tum apud Deum impetrare potest firmus nostræ
 mentis circa eiusdem potentiam assensus. Mat-
 thæi cap. 9.

I D E M

Quærentibus quibusdam, Quid faciemus, vt
 operemur opera Dei ? respondit, dixitque : *Hoc est
 opus Dei, vt credatis in eum quem misit ille.* Opus er-
 go diuinum est, credere. Præclarè Augustinus Ser-

mone 18. sup. Ioan. Ambula per fidem, ut peruenias ad spem: spes non ædificabit in patria, quem fides non consolatur in via. Ioan. cap. 6.

I D E M

Dicenti sibi Marthæ, cum Lazarum suscitaturus aduenisset, Domine, iam fœtet, quatrduanus enim est; respondebat: *Nonne dixi tibi, quia si credideris, videbis gloriam Dei?* Ioan. cap. 11.

S. PAVLVS APOST. ET SILA.

Quid autem illi? Seruabantur Philippis in custodia, viditque carceris custos vtrumque diuinâ ope vinculis exutum: & mente mutatâ in melius, procidens ad eorum pedes; Domini, inquebat, *quid me oportet facere ut saluus fiam?* qui dixerunt: *Crede in Dominum Iesum, & saluus eris; tu, & domus tua.* Act. cap. 16.

S. PHILIPPVS.

Vide Apophth. de BAPTISMO.

S. MARTHA.

Contendunt etiam cum his Feminae, & quidem in prima acie. Soror Lazari MARTHA roganti Domino, crederetne ea quæ de fidei firmitate & resurrectione paulò antè dixerat; *Vtique*, aiebat, Domine, *ego credidi, quia tu es Christus filius Dei viui, qui in hunc mundum venisti.* Ioan. cap. 11.

S. ZÖE MARTYR.

Sed dicet fortassis quis veritatis calumniator, facile fuisse mulierculam spe resurrectionis fraterne in hanc vocem erumpere: alia proinde adducenda exempla. Quid igitur ZOE Christi sponsa, & martyr? Orabat in Natali Apostolorum ad cōfessionem S. Petri, & ab improbis paganis circumuenta, ad

Præ-

Præfectum ducitur. Instat hic, & Marti sacrificet, compellit. Cui illa: *Mulierem Marti sacrificare compellis, ut ostendas Martem vestrum, utpote libidinosum, feminis oblectari. At verò si ille potuit impudicissima Veneri pudorem eripere, mihi certè Trophæum fidei in fronte gestanti præualere non poterit. Quis non hîc cum Ecclesia concinet,*

Fortem virili pectore

Laudemus omnes feminam.

Sur, tom. i. in vita S. Sebast.

S. AGNES VIRGO ET MARTYR.

Vide ANIMI FORTITVDO.

FLECTIVS CONIMBRICÆ PRÆFECTVS.

Ad ciuilia exempla vela damus, & ea quidem quæ non Theologicam illā vti prima, sed moralē fidem, quam & fidelitatem dicimus, repræsentant. Primum suggerit Hispania in FLECTIO viro nobili, arcis Conimbricæ atque vrbi à Sanctio Rege Præfecto. At Sanctius improuidè regnum administra-
bat; ita vt Pontifice (is Innocentius fuit) auctore, cura tutelaque regni ad Alphonsum eiusdem fratrem transferretur. Constans & fidelis suo regi FLECTIVS, & oppugnationem & arma Alphonti excipit; nec flectitur, donec Sanctium in exilio Toleti mortem obiisse renuntiatum. Incredulus tamen inducias postulat, quò Toletum ipse ire, & coram arbitrari valeat. impetrat. Cùm ergo venit, Regemque suum fato functum sepultumque videt, tumulo aperto, cum suspiriis, ipsas vrbes Conimbricenses clau-
es in manus demortui Regis dat, hæc verba miscens: *Quamdiu te viuere ô Rex indicabam, quidquid à fideli homine, & in tua verba iurato, exigì expectarique potuit, id præstiti. Vnum superest, vt clauibus*
tue

tuae urbis tibi redditis, solutum me iuramento omnibus denuntiem. Ita abiit, & legitimo pro Rege Alphonsum agnouit. I. Lips. Mon. Polit. lib. 2. cap. 13.

EMANVEL PORTUGALIÆ REX.

Ille quoque seditionis in Castellæ Regem excitatæ auctores, cùm suis rebus diffidentes suppetias poscerent, acriter redarguit. cumq; ipsum regnum offerrent, dicebat: *Numquam ullum imperij additamentum, fide & officio antiquius habiturum me scitote.* Osor. lib. 12. de reb. Emmanuel.

TRIVMPARA REX COCINI.

Vestrâ pace, Christiani Principes, hominem gente quidem & solo, at non animo & mente barbarû, vobis adiungo: Regem orientalis Indiæ TRIVMPARAM. Venerant ad eum Lusitani, cum quibus etiam fœdus pacemq; panxit. Mox in suspectam gentem conspiratio, omniumque vna mens, Regem Cocini pertrahere, Lusitanos quos suæ fidei creditos acceperat, traderet necandos. Ille verò obniti, & palàm negare, dicereque: *Omnia se potius, quàm fidem amissurum.* Vitæ enim, aiebat, *spatium breue ac definitum: perfidia macula sempiterna est.* Iamque ob id victus pulsusque, cùm antiquum fortunæ statum rursus offerrent; hac lege, si eos traderet; abnuit, dicens: *Sceptrum & vita eripi potest, fides non potest.* Verus fidei amator & cultor nouerat, quod ante eum Seneca, Fidem sanctissimum esse humani pectoris bonum; quodque nulla necessitate ad fallendum cogitur, nullo præmio corrumpitur. I. Lips. Mon. Polit. lib. 2. cap. 13.

THEDORICVS AFRICÆ REX.

Quid præterea hic? Domesticum habebat, quo
faini-

familiariter utebatur, magnum fidei cultorem. qui cum Regi gratificari se posse confideret, si eiusdem cum eo Religionis normam acciperet, ad Arrianos defecit. Quo cognito, Rex amicum suum ultimo supplicio affici mandat, dicens: *Si Deo tuo fidem servare recusas, quomodo mihi, qui homo sum, eam servabis?* Theod. lib. 2. Collectaneorum. Cedrenus in Anastasio.

FRANCISCUS PRIMVS GALL. REX.

Claudamus inclyto & memorabili exemplo, quod magnus ille Galliarum Rex FRANCISCUS nobis donet. Ille Carolum Quintum Cæsarem in turbidos Gandenses properantem, comiter ac regaliter deduxit, sola fide Regis, & suâ fortunâ nixum. Mirantibus Galliæ proceribus Regis sui comitatem, quòd tam bellam occasionem recuperandi Mediolanensem Ducatum præterlabi passus esset, hominemque à quo rei summa dependebat, ita dimisisset, in celebri conventu cum multa in sui defensione adduxisset, adiecit: *Etiam si fides toto orbe exularet; tamen Regibus tenenda erit: qui eâ solâ, & nullo metu vique astringi possunt.* Notatu digna vox. & res sic habet. Alios Lex aut Pœna coërcet, Principes Pudor & Fides. I. Lips. suprâ. Idem de Carolo v. commemorat Guil. Zenocarus in vita eiusd.

RVDOLPHVS DVX SVEVIÆ.

Tenet me ne aliò digrediar RVDOLPHVS, & illustribus viris si non inseri, annumerari tamen postulat. Dederat fidem Henrico IIII. Imp. à quo cum descivisset postmodum, & in prælio quod contra eum ante Mersburgum gerebat, dextram amisisset; iamque ex vulnere langueret; ostensa sibi manu, conuersus ad eos qui eius prælij auctores, ac fidei
datae

data memor; *Ecce, inquit, hac est manus quâ fidem Henrico domino meo dedi: nunc tandem considerate, num iuste ab eius obedientia defecerim.* Strigelius 2. Sam.

FIDVCIA IN DEVM.

S. HVGGO EPISCOPVS LINCOLNIENSIS.

Fidei vt agnata est FIDVCIA; ita non incongruè eiusdem tractationem, illius subsequetur explicatio. Nocte quadam grauib; infestatus curis HVGGO LINCOLNIENSIVM PRÆSVL, cùm eas excutere non posset, turbari animo cœpit. ac primo mane ad se reuersus, grauiter ingemiscens, *Heu!* inquebat, *deliqui, quòd non uti hominem Christianum decet, omnem curam super Dominum, iuxta Prophetam monita, iactavi.* Sur in vita.

S. ANTONINVS

Præclarus vir, vocauerat ad prandium amicum quemdam: cumque panariæ cellæ præfectus eius iussu omnes panes in egenos distribuisset, bile actus quòd hospitem adduxisset, nihil prandio superesse dixit. at Præsul, *Ne diffidas,* ait, *nam qui inmentis oportuno tempore escam tribuit, is certè nos homines pascere non tardabit aut negliget.* F. Vincent. Mainordus in vit. Sur. tom. 2.

P. FRANCISCVS BORGIA.

De hoc traditum est, cùm Hispali moraretur, accidisse, vt nec cibum domi nec pecuniam haberet. datoque signo, cùm in triclinium conuenirent, ille paululum se colligens, Deum precabatur: moxque hilariore vultu, *Deo fidite,* inquit: *illi cura sumus.* Dixerat: & ecce pulsans ad ostium, ciborum canistrum

strum defert. quem is conspiciatus, *Discite*, ait, *filij*
Deo fidere: cuius si gloriam quærimus, animis corpori-
busque nihil umquam defore, pro explorato habetote.
 Ribadin. lib. 2. vitæ eiusd. cap. 10.

PHILIPPVS AVGVSTVS F. R.

Ducebat item ille copias aduersus Othonem
 Imp. causa Ecclesiæ tuendæ. cumque suos ad forti-
 ter pugnandum inuitaret, aiebat: *Viri commilitones,*
spem capimus rei benè gerendæ, præsertim cum aduer-
sus sacris interdictos & Ecclesiæ spoliatores dimicemus.
Nos enim etsi per humanæ fragilitatis tenuitatē pec-
catores sumus; communionem tamen tenemus fidei &
religionis Catholicæ. Grandis fiducia: Deum non de-
 fore iis, qui pro sui nominis gloria dimicant. Ga-
 guinus lib. v. 1. de reb. Gall.

Vide Apophth. de DEI CVRA ET
 PROVIDENTIA.

F I N I S.

FREDERICVS IMPERATOR.

FINEM esse id cuius gratia quidpiam fit, auctor
 est Aristoteles: estque verè illud, quod actus no-
 stros probat. vnde FREDERICVS, percontanti quid
 homini optimum possit contingere, respondebat:
Bonus ex hac vitâ exitus. Verè, — *dici beatus*
Ante obitum nemo, supremaque funera debet.
 Æn. Syl. lib. 4. Comm. in res Alphonsi.

•IDEM.

Erat dux Witenbergensis supra modum animo-
 sus, & vehemētior quàm æquitas aut ratio postula-
 bant. hunc FREDERICVS vir summa modestia co-
 hortabatur aliquando, temperatiùs & moderatè
 ageret.

ageret. cumque is monita negligeret, solitus erat dicere FREDERICVS : *Cuius finis bonus, ipsum est bonum.* insinuans eam vehementiam (vti accidit) Duci aliquando nocituram.

Sic Cræsum quoque vox iusti facunda Solonis

Respicere ad longæ iussit spatia ultima vitæ.

Phil. Camer. 3. part. Medit. hist.

F O E D V S.

FREDERICVS III. ELECT. IMP.

NVlla fœderum societas diuturna. multa siquidem incidunt quibus destruitur : animis præsertim vera beneuolentia non coalescentibus. Dicebat FREDERICVS III. *In omni fœdere illos esse loco deteriore, qui fœdera seruarent.* Cur ita? quòd eos durissimè plecti videamus ab hominibus, qui artissimè fœdera custodiunt. Strigelius in Chronico part. 5.

ALCIATVS

Percontanti cui nam fœdera comparari possent, *Testudini*, respondit: *in quâ cum una solūmodò chorda discrepare incipit, tota harmonia turbatur.* Ibidem.

IACOBVS STVRMIVS.

Fieri autem vt sociorum vel noua semper confœderatorum accessione maior fiat voluntatum dis-iunctio, testatus est suo dicto IACOBVS STVRMIVS. Intuebatur ille Principes se vndeque fœderibus munire, eorumque fiducia multa attentare. at videns quantum ea parerent voluntatum & opinio-num dissensum; *Quò magis*, inquebat, *accrescit numerus confœderatorum, eo magis etiam decrescit unio*
volun-

voluntatum, ex quâ omne robur & quies speranda.
Peucerus in lect. Chron.

FOENVS ET VSVRA.

ALPHONSVS ARAG. REX

A Qui cultor egregius, intemperatam illam
habendi libidinem, quæ per iniquas vsuras
suo æuo dominabatur, detestatus, rogabatur quid-
nam sibi videretur FOENVS; *Nihil aliud, inquie-*
bat ille, quàm anima funus. ita enim ante eum Au-
sonius: ——— *Sic turpia lucra*

Fœnoris, & velox inopes vsura trucidat.
Panorm. lib. 3. de Gest. Alphonſi.

IDEM

Percontanti, quo apud eum honore essent Fœne-
ratores; *Eodem, dicebat, quo Harpyia.* Illæ enim ex
rapto viuunt, sicuti & isti. Panorm. lib. 4.

FORMA.

BARTHOLOMÆVS CAPRANVS EPISCOPVS
MEDIOLANENSIS.

Q Vantum ancipiti hoc FORMÆ bono oblecta-
tus fuerit hic, vel ex eo colligimus, quòd num-
quam, nisi quos natura etiam corporis habitu exor-
nasset, in suam familiam adsciuerit. Rogatus autem
cur id faceret; respondit: *Quia turpes animi, tur-*
pia corpora incolunt: improbitas in egregio corpore
vix comperta. Ita quidem ille. Cautiùs tamen & ve-
riùs Iuuenalis:

——— *Rara est concordia forma*
Atque pudicitia: sanctos licet horrida mores

S

Tra-

Tradiderit domus, ac veteres imitata Sabinas.
Æn. Syl. lib. 2. Comm. de Gest. Alphonsi.

PETRVS ALDOBRANDINVS CARD.

Etiam in Principe, præter virtutum splendorem, externam corporis formam suam habere laudem assererat illustriss. Cardinalis ALDOBRANDINVS. dicebat enim: *Etsi faciendum sit de Principe iudicium ex moribus: habet tamen Principis forma & decor non minimum ad maiestatem ponderis.* Henricus Farnes. in Apophth. de Principe.

FRANCISCVS BORGIA DVX.

Et quis hîc DVCEM BORGIAM transeat, verum humani generis delictum? Viderat Isabellæ Augustæ cadauer (quod à Cæsare iussus in regium monumentum efferri curabat) omnino deforme, & pectore obsitum. ac ingemens, cùm secum tacitus præsentia præteritis adunaret, tandem erupit: *Nimirum hæc rerum humanarum vicissitudo. I nunc, fragile illud formæ bonum demirare.* Hæcce tanti spectaculi consideratio ita eius mentem commouit, vt deinceps non nisi de interiori animæ forma cogitaret. Eleganter & doctè Ouid. lib. 2. Amor.

Forma bonū fragile est, quātumq; accedit ad annos,

Fut minor, & spatio carpitur ipsa suo.

Nec semper viola, nec semper lilia florent,

Et viget amissâ spina relicta rosâ.

Ribadin. lib. 1. Vitæ eius, cap. 7.

FORTITVDO ANIMI, vide ANIMI

FORTITVDO.

FOR-

FORTITVDO BELLICA.

IOAANNES ZISCA DVX HVSSITARVM.

NVnc illum virtutis actum proponimus, cuius ponderosissima vis, & efficacissimi lacerti, in BELLICA FORTITVDINE consistūt. nec me præterit, ZISCA Dux inclyte, principatum tibi in hac saltem scena assignari oportere. Erat Dux Hussitarum bellicosissimus, licet vtroque oculo priuatus: cumque iam morti proximus rogaretur, quomodo vellet tumulari; ille: *Pellem demortuo demite, ex eoque tympani operimentum conficite. Hostes enim, ut viuentis adspectum ferre non potuerunt, ita nec mortui sonitum ferent.* Æneas Sylu. lib. 3. Comment. de Gestis Alphonſi.

CAROLVS IX. FRANC. R.

Illi proximus CAROLVS; qui, cæso in acie Montmorantio, cuius erat ensem Regi præferre, quibusdam eum honorem ambientibus respondebat: *Satis virium mihi est ad gestandum ensem.* Annal. Franc.

ALPHONSVS ARAG. REX.

Redeo ad ALPHONSVM: qui naufragos auxilium implorantes cū vidisset; suos cohortatus, opem ut ferrent. Quod cū facere pertimescerent ob exortam tempestatem, ipse nauem soluit; *Satius est, inquit, unā cum sociis viris fortissimis occūbere, quā illos videre ante oculos extrema pati.* Panor. lib. 2. de Gest. eiusd.

I D E M.

Vide PERICVLVM.

CAROLVS - V. IMP.

Exiturus erat iste ad prælium contra hostes: stabatque in acie intra vallum & stationes armatus. at hostis magna balistarum vi eum repellere conatur. monentibus autem suæ salutis prospiceret, id solùm obmurmurabat: *Canes qui latrant non sunt extimescendi: neque est quòd timeatis, cùm presidio Dei satis vallati simus.* Franc. Robertellus in Orat. funeb. habita Bononia.

PETRVS SABAVDIÆ COMES.

Hic autem feudum apud Othonem IIII. petiturus, duplici ante eum habitu comparuit. Latus dextrum auratis vestibus, sinistrum armis insigne. Othoni verò, quid inusitatus hic vestium habitus modusque portenderet, sciscitanti; *Aurum*, inquit, *bat, gesto in dextra, ad honorandam maiestatem Imperatoriam: arma autem laeva sustinet, ut contra eiusdem maleuolos ad extremum usque spiritum dimicem.* P. Camer. medit. Hist. cap. VI.

LVDOVICVS XII. GALL. REX.

Eiusdem virtutis & fortitudinis iste. Pergebat cum exercitu Mediolanum, & in itinere nuntium accipit, hostem oppidulum quod in transitu situm occupasse; tardiusque aduentare hospitio inibi diligendo. At ille: *Ego super corpora eorum hospitium accipiam, vel illi in meo.* Corozetus de Dict. memor.

STEPHANVS CONTARENVS.

Claudat hoc totum de bellica virtute CONTARENVS, natione Venetus. Hic Senatus iudicio rei maritimæ in Benaco lacu præfectus, dum quippiam aduersi nuntiatum esset, domum properans, euocata de superiori suarum ædium parte coniuge; *Scias,* aiebat,

arebat, me Benacensi ora' præfectum, Senatu iubente.
 Tu itaque intra paucos dies, aut latum à me partæ vi-
 ctoria nuntium exspectato, aut mortis meæ litteras, qui-
 bus hoc meum cadauer auita sepultura mandes.
 Ioan. Bapt. Egnat. lib. 6. cap. 4.

FORTVNA.

VILLEGISVS ARCHIEPISCOPVS MOGVNTIN.

Volubilis FORTVNÆ rotas voluimus, & simul
 in eis admirandam in magnis viris mutatio-
 nem: eamque licet iniquam quandoque, æquo ta-
 men fortiq̃ue pectore toleratam. Videamus ergo
 quot beneficiorum gradibus VILLEGISVM bearit
 rerum domina FORTVNA. Patre rhedario natus, ab
 Othone 111. derepentè primus inter Electores ad-
 optatur. ne autem repentinus ille honor, cum su-
 pra id quod erat, efferret, sæpiùs ructabat: *Vide*
quis sis, memento quis fueris. Vnde & rotas suo Mu-
 sæo appingi curauit, iisq̃ue subscribi: *Villegise prioris*
meæ FORTVNÆ memor, quis nunc sis confidra. Hæc
 rota postmodum insigne Archiepiscopatui Mogun-
 tinensi fuit, atque ab Henrico 11. Imp. confirma-
 tum. Obseruabat ergo hic illud Ausonij:

Fortunam reuerenter habe, quicumque repentè

Dives ab exili progrediere loco.

Ioan. Zieglerus de Viris illust. Ioan. Nauclerus ge-
 ner. 32. Bruschns de Episc.

BENEDICTVS XI. PONT. MAX.

Ille etiam genere obscuro ortus, ac tenui fortuna,
 virtute ad Pontificatus apicem euectus, primaræ
 paupertatis memor erat. Venerat namque ad eum
 mater: quã splendidiori cultu, ac tali filio digno, or-

nauerāt matronæ Rom. quæ, vbi in conspectū eius-
dē venisset, dissimulauit Pōtifex se eam agnoscere.
ac monitus adesse matrē, *Egon*, ait, *tam specioso ami-*
Et tu matrem esse credam? non agnosco. matrem enim &
pauperem scio, & ignobilem. Erubuēre cuncti, matri-
que eductæ pannosas exuias reddidēre. quibus
indutam, reducunt. Tunc genitricem amplexatus,
Hoc, inquit, habitu matrem reliqui, & talem libenter
agnosco, recipioque. Cranz. lib. 8. Metrop. c. 46.

FRANCISCVS PRIMVS FRANC. R.

& CAROLVS V. IMP.

Horum vterque maxima Fortunæ luctatio fuit.
omnes enim illius insultus fortissimè & constanter
sustinuēre. Captus à Cæsarianis FRANCISCVS apud
Ticinum amnem, custodiæ in Hispaniis traditur.
quò perductus, aduertit muro palatij, quod ei car-
ceris loco erat, inscriptum illud C A R O L I symbo-
lum, *Plus ultra.* & studio id factum suspicatus, vt
nempe suæ conditionis memor esset, variam & an-
cipitem belli aleam considerans, eodem charactere
subiunxit: *Hodie mihi, cras tibi.* quod intuitus post
dies paucos CAROLVS, firmum se formatumq; ad
omnes rerū euentus contestatus, laudabilem illam
sententiam subiunxit: *Homo sum, nihil humani à me*
alienum puto. Auct. Serm. memorab. Peucerus de
Diuinit. Richt. in Axiomat.

GELIMERES VANDALORVM REX.

Quid verò huic simile ætas nostra aut sensit aut
vidit? Ducebatur iam victus & vinctus vnà cum
coniuge, liberis, familia regia, à Iustiniano Imp. in
triumphum: & non tactus iniquæ sortis casibus,
pleno & cachinnabili risu defluxit. cumque eum
ob

ob nimium dolorem mente alienatum existimarēt,
dicebat: *Rideo Fortuna vicissitudines, ut qui modò
Rex fuerim, iam seruiam.* Et ita obtinet illud Lyrici;

*Fortuna lato seua negotio, &
Ludum insolentem ludere pertinax,
Transmutat incertos honores,
Nunc mihi, nunc alij benigna.*

Philipp. Camer. in Oper. success. cap. 12.

REX ANONYMVS.

Gelimeris exemplum aliud illi par non indecorè
sequetur, quod Nicephorus postumæ ætati conse-
crauit. Erat Sesostris Ægyptiorum Rex illustris, &
felix, qui Reges quàm plures & maximas nationes
suo imperio subiecerat. Verùm ex eo successu in
proteruam arrogantiam sublatus, currum aureum
& gemmatum construxit; in quo confidens, quat-
tuor ex deuictis Regibus qui eum protraherent, iu-
go imposito adhibuit. quod cùm crebriùs fieret,
factum vt celebri quodam die vnus è quattuor istis
Regibus, oculis conuersis, assiduè volubilitatē rotæ
intueretur. Quem cùm Sesostris rogasset, cur tam
frequenter oculos in rotam coniiceret; respondisse
ferunt: *Admiror, & cum stupore rotam considero;
dum eam instabili modo volui, & nunc quidem subli-
mia demittentem, rursus autem demissa sublimantem
conspicor.* Mouit ea responsio, & magis, cuius illa
index erat, rerum humanarum vicissitudo, ne illi
deinceps currum traherent: & Fortunæ inconstan-
tia, Sesostris suspecta, & despecta esse cœpit.

——— *Sic omnia verti*

*Cernimus, atque alias assumere robora gentes,
Concidere has. sic magna fuit censuque virisque,
Perque decem potuit tantum dare sanguinis annos,*

*Nunc humilis veteres tantummodò Troia ruinas,
Et pro diuitiis tumulos ostendit anorum.*

Niceph. lib. 18. cap. 29. P. Ioan. Daud in Orbi-
ta Probitatis, cap. 18.

ANONYMVS.

At nostri sæculi & soli est quod subiicio. Occupa-
rat Alexander Farnesius Parmæ Dux, vrbium Chri-
stiani orbis ocellum Antuerpiam: cùm à viro nobi-
li admoneretur Marti valediceret, gloriam suam ad
summum apicem attigisse. & inquebat: *Solet For-
tuna, cùm ad summum venit, rotam voluere; & sum-
ma imis commutans, numquam diu stare.* Quis vati-
cinium illud verum fuisse negabit, qui subsequutam
eius fortunam mente complectitur? Ianſonius
lib. 5. Mercurij Gallo-Belg. pag. 500.

F V G A.

D. ATHANASIVS.

S Aluti per fugam oportune aliquando consulen-
dum, confirmavit prudētissimus ATHANASIVS:
qui ab Alexandriæ Præfecto crebris insidiis peti-
tus, necessarios suos de eiusmodi procellis alloquēs,
*Secedamus, aiebat, ad tempus. Nubecula est, quæ ci-
tò euanescet.* Socrat. lib. 3. hist. Eccl. cap. 12. &
Theod. lib. 3. cap. 8.

I D E M

Probro illi dantibus hæreticis quòd fugeret, di-
cebat: *Si fugere mihi turpe; vobis, innocentem me per-
sequi turpius.* Socrat. lib. 3. hist. Eccl. cap. 6.

ALPHONSVS ARAG. REX

De fuga fugiendique ratione differentibus, Pra-
clare mihi dixisse videntur, inquebat, *qui fugienti
hosti argenteum pontem extruendum arbitrati sunt.*
Existi-

Existimabat enim optimus Princeps, vel multo optabilius hostem in fugam vertere quàm occidere; vel certè pecunia sollicitandum, ab acie illæsus discedat. Panorm. lib. 4. de Reb. eiusd.

F V R T V M.

ALEXANDER SEVERVS IMP.

Quia ad ceteras virtutes & vitia cursum flectimus, FVRACITATIS etiã infamiam redarguamus: veluti & eandem redarguit olim ALEXANDER SEVERVS. qui tãtus huius delicti vindex exstitit, vt per præcozem edixerit frequentius: *Nemo principem salutet, qui se furem cognoscit.* Æl. Lamprid.

I D E M.

Quin & Furti suspicione infames ne intueri quidem sustinebat: adeò, vt cùm Septimus Arabinus, qui famosus furtorũ crimine sub Heliogabalo fuerat, inter Senatores Principem salutatum venisset, exclamarit: *O numina! ô Di immortales! Arabinus non solum viuit: sed in Senatum venit. fortassis de me sperat? tam fatuum esse me iudicat?* Vnde iactabat etiam frequentius illam sententiam cognitã furibus:

Ο πολλὰ κλέψας, ὀλίγα δὲς, ἐκφεύγει.

Qui multa furatur, & pauca dat, effugit.

D. LVDOVICVS F. R.

Et ille furari dicebat pessimum, & pænè inter vitia supremum. rogatus autẽ causam; *Quia*, inquit, bat, *res ablatas iusto domino restituere, ita molestum est; vt verbum ipsum dum profertur, os & linguam exulceret.* Alludebat autem ad verbum Gallicum (*rendre*) quod propter consonantiam duplicis *r*, dissonum & duriusculum redditur. Ionuil. in Vita eius, cap. 94.

FREDERICVS DVX SAXONIÆ.

Et de hoc ferunt, quòd monitus, Quæstoribus ampliora stipendia constitueret, ne cogerentur aliquando præ inedia decerpere ex alieno, responderit: *Libens ego eis maiora stipendia assignauero, si certum mihi foret eos à furtis cessaturos.* Ita Nazianzenus elegantissimè dixit, plures ex iis qui præsunt, rapere ex facultatibus publicis, Briarei manibus: fuit enim (iuxta Poëtarum commentum) Briareus Gigas, cui centum erant manus. Philip. Camer. in Postil. part. 3.

HENRICVS BOCKHOREN APOSTATA.

Longè aliter iste, quem & carnis & æris sacrilega libido à fide & sacro ordine amouerunt. ~~Habita namque re Venera cum eis quibus erat à cōfessionibus,~~ & ablatis quarumdam Ecclesiarum pretiosis vasis, quæ, vt ruralis Archipresbyter, ad se deferri conseruanda mandauerat: meritos carceres perhorrescens, ad commune sacrilegorum receptaculum Calvinistas fugiens, tandem Bredano Brabantia opido impostor præficitur. Hic, dum iam pridem sacras aras, quæ in Beginasij sacello inuiolatae remanserant, demoliri curasset, ipsumque sacellum in suum vsum coaptari, & simul Decalogum ritè in eo describi; Religiosus ordinis Cisterciensis fors illi aderat. Cui dum isthæc conspicienda exhibuisset, tandem percontatus ille, Quo iurè hæc veris dominis erepra, in vestrum vsum coaptatis? an fortassis Decalogi, quem hîc inscripsisti? Nil cunctatus IMPOSTOR, sermone patrio, *Papistarum*, ait, *ea bona sunt, & cuiusvis rapina subiecta, neque Decalogo comprehensa.* Ita diuinis præceptis sacrilegum illud genus indies illudit. Ex relatu Religiosi præfati.

GAR-

GARRVLITAS.

SENEX RELIGIOSVS ANONYMVS.

COrnicem à Pallade repulsam tradunt veteres, quòd meditationũ peruigilio infesta sit, mentisque agitationem sua garrulitate obturbet. Eadem de causa repulsum hoc GARRVLITATIS vitium à Religioso quodam viro maturo, accepimus. Hic namque cum fratribus pergens ad S. Antonium, semper tacebat; illis mirum in modum garrientibus. ventum tandem ad Antonium, qui præuia salute, Mi Pater, ait, admodum facundos & bonos, vt video, naçtus es comites. Cui ille: *Boni sunt quidem, sed habitatio eorum non habet ianuam: quicumq; vult, intrat in stabulum, & soluit asinum.* Indicabat autem eos supra modum loquaces, quidquid in buccam venerit effutire. In Vita S. Antonij.

ADRIANVS VI. PONT.

Mirum in modum facetus hic fuit. Venerat enim ad eum quis ex clericis domesticis, homo intemperatæ linguæ, postulans Archiepiscopatum de Calliard in Hispaniis. Cui ille ad postulata alludens, (calliar enim tacere Hispanis est) *Quomodo, inquit, eam dignitatẽ tibi conferri desideras, cui tu omnino contrarius es, & impar?* Ingeniosè nimiam eius in dicendo libertatem reprimens. Floresta.

ALPHONSVS ARAG. REX.

Considerabat etiam ille in multiloquio non deesse peccatum. hinc garrulos intuitus, *Videte, aiebat, has vesicas.* Vesicæ siquidem humoribus infusis distenduntur & tumescunt, donec eum respuant: ita loquaculum illud genus. Panorm. lib. 4.

ANO-

ANONYMVS

Quidam iactabat se apud omnes maximum φιλολόγον. cuius ostentationem de audientibus vnus reprimens, *Non, inquit, φιλολόγον te, sed λογοφίλον conspicio.* pulchrè eius loquacitatem mutato nomine redarguens. Theat. vitæ hum.

*Vide Apophth. de LIBERE DICTIS,
SILENTIO, &c.*

GLORIA.

S. BASILIVS.

TAndem Virtuti suum præmium rependimus, GLORIAM. Exiguum quippe nobis vitæ virtutisque exercitiæ curriculum natura circumscripsit; immensum verò sempiternumque honoris & gloriæ: ad quæ sola via est Virtus. Hinc de illis differens aliquando D. BASILIVS, *Si gloriam, inquebat, quæris, & cupis superior multis videri, & in rebus mundanis clarus fieri, sis iustus, temperans, prædens, fortis & patiens in aduersis pro religione suscipiendis.* Ant. & Maxim. Mon. Orat. de gloria.

ANTONIVS SYLVERIA LV SIT.

Denique non paruas animo dat Gloria vires: quæ etiam arripuit attraxitq; ANTONIVM SYLVERIAM, arcis Diensis Præpositum. Viderat ad eam expugnandam copiosam Turcarum classem aduentare; & ad nobiles suos serenâ fronte conuersus, *En, inquit, viri, tempus nunc, acceptam à maioribus gloriam bellicam, debitamque tum Deo tum Regi nostro fidem, nobis ob oculos ponendi. quæ si intueamur, omnes hostiles apparatus periculaque pro nihilo ducemus.* Profuit præ-

præfens Ducis animus ad palmam de tanta classe
obtinendam. P. Maff. hist. Ind. lib. 11.

HIERONYMVS OLGIVS.

Non illum perinde fax honestæ mentis accende-
rat, sed eum imitatus qui Dianæ Ephesinæ fanum
exusserat, in Galeatium Sfortiam Mediolanensem
Ducem sicarij munus obiuit. Rogatus autem, quî
tantum facinus attentare ausus; *Solo*, inquiebat, *glo-
ria & nominis postumi desiderio permotus*. Cumque
iam suo corpori gladium admoueret carnifex, pau-
lulum se colligens; *Age*, dicebat, *Hieronyme, stabit
vetus memoria tui facti: mors acerba, fama perpetua.*
Quam doctè & verè Iuuenalis:

—— *Patriam tamen obruit olim*

Gloria paucorum, & laudis tituliq; cupido

Hæsuri saxi cinerum custodibus.

Egnat. lib. 8. cap. 15.

COMES DOSSVNÆ HISP.

Non minimus vanitatis huius auceps iste. Ob-
uius namque cuidā è regio palatio venienti, *Quis-*
nam, ait, de me in palatio sermo? alter pudore &
rubore pariter suffusus, *Nullus*, respondit; neque
qui ad laudem faciat, neque qui aduersus eam. Au-
dit ille, & indignatur propter adstantes, qui eum
virum magnum reputabant, & in omnium labris:
ac innocentem fustibus excipi, deinde 50. aureis
donari mandat, dicitque: *Iam tibi materies laudis &
vitæperij: utere, & adhibe in palatio.* Floresta.

SEBASTIANVS DE FLECKENSTEIN.

Fuit hic nobilitate, rei que militaris peritia, insi-
gnis. cui dum inter dimicandum Turca quidā sac-
culum nummis plenū, velut redemptionis pretium,
obieciisset; eum tamquam victoriæ remoram ex equi
sella

sella deiecit; *Ad Ditem vestrum*, inquit, *abite diuitie. non enim hic aurum, diuitias, aut alia malorum irritamenta querimus: sed virtutis premium potius, & gloriam militarem.* Melch. Soiterus de bello Pannonico, lib. 2.

GLORIÆ VANÆ CONTEMPTVS.

IESVS CHRISTVS.

Quamuis iustam gloriam, quæ veræ virtutis honestissimus est fructus, repudiare levis sit animi: inanem tamen aucupari rumorem, umbrasque falsæ gloriæ (quæ bonorum spiritualium latro, secundum Basilium) conſectari, non minor leuitas iudicanda est. Talis autem est ea omnis quæ humanæ opinioni & laudi innititur. Hæc erat mens, hæc doctrina Mediatoris nostri CHRISTI. quem dum admirarentur Iudæi super eruditione & doctrina sua, dicerentque: *Quomodo hic scit litteras, cum non didicerit? verus humilitatis magister, Mea*, inquit, *doctrina non est mea, sed eius qui misit me.* Ita quoties admiranda quædam opera fuerat executus, semper ne cui diceret vetabat. nos instruens, ut si gloriari velimus, in Domino gloriemur: non enim qui seipsum commendat, ille probatus est. Ioan. cap. 7.

S. MARCELLVS ABBAS.

Sui magistri verus discipulus MARCELLVS, cum Energumenos exorcismo & precibus curaret, dæmonemque possessam mansionem relinquere compelleret, clamaretque ille; Iube nos exire, quia in nos accepisti potestatem; nihilominus in oratione perseuerat. Siscitanti autem, cur dæmonibus cessuros

tos se confitentibus, nihil præciperet; *Quoniam*, ait, *dicentes me in eos accepisse potestatem, non agebāt aliud, quàm ut me vanæ gloriæ laqueis implicarēt.* In vita eius apud Sur.

S. DOMINICVS.

Quid? nōne & DOMINICVM inanis hæc aura afflauit? Non afflauit certè. cū enim Tolosæ plures ad Christi fidem conuertisset, tamen Carcosiæ figebat domicilium. Rogatus cur non potiùs Tolosæ moraretur; *Quia*, inquit, *plures ibi me honorant: hic verò me omnes impugnant.* Maluit vir sanctus se persecutionis quàm inanis gloriæ stimulis confiendum exponere. In vita eius, lib. 4. cap. 10.

S. ANTONIVS ABBAS.

Quin & hunc tradunt Martiano militum præfecto, pro filia quam nequitia spiritus possederat supplicanti, respondisse: *Ne me opem poscas, nam & ipse peccator sum: si in Christum credas, eidem pro filia tua supplex fiam.* Unica responsione tria simul expressit bona: humilitatis obseruationem & gloriæ fugam, fidei virtutem, infirmitatis remedium. Athan. in vita.

S. IOAN. CANONICVS REGVL.

IN ANGLIA.

Et de illo memoriæ proditum, quòd cū Inclusam visitaret, vt spiritualibus eiusdem frueretur alloquiis; illa quasi primis verbis se visionem habuisse diceret, aquilæ videlicet circumuolantis; adderetque: Tu pater illa aquila es, pro excellen tia meritorum tuorum. Quo audito ille recessum parat, dicitque: *Nos eo fine accessimus, vt mutuis sermonibus Dei gratiam conciliaremus. At video, malus demon vitiorum nostrorum sagax explorator, per has inanes landes*

laudes aditum sibi in animos nostros parat. Ita virgines illæ, dum de virginitate sua gloriam foris expectunt; veluti fatuæ, in vasis suis oleum habere noluerunt. Sur. tom. 5. in vita eiusd.

S. PACOMIVS ABBAS.

Erat quoque hic admirabilis sanctitatis & prudentiæ: cum namque aduerteret quemdam ex suis duas paruas storeas à se vno die factas (cum reliqui non nisi vnam confecissent) ex aduerso sibi posuisse, ut ab eo laborantis prædicaretur industria, dixit adstantibus gemens: *Frater iste à manè ad vesperam usque laborans, totum suum opus demoni consecrauit.* ac rogantibus eius rei causam, respondit: *Quia nihil sibi fructus ex eo opere reliquit, cum plus amarit gloriam hominum, quæ contemnenda erat, quam Dei largitoris, quæ maximè diligenda.* Quare eum seuerè puniens, conceptæ vanitatis vitium præsentī medicīna sanauit. Ibid. tom. 3. in vita.

SARA ABBATISSA.

Etiam fæminis hîc sua laus. SARA quidem Abbatissa, Deo deuota, cum dæmonis suggestionē diu vexata, tandem eam repressisset, ei que humani generis hostis apparens diceret: Fateor, tu me vicisti: *Non ego, inquebat, te vici, sed Dominus meus Christus.* In vitis P P.

IOAN. PICVS MIRANDVLA.

Et ne alterius ordinis viros hoc honore priuemus: quis IOANNEM PICVM sileat, qui humanam gloriam fumo persimilem æstimabat? dicebat autem: *Fama viuīs nonnihil, mortuis minimè profutura.* tantumque quod sciret ipse æstimabat, quantū Ecclesiæ vtilitati, eliminandisque erroribus, conducere posse sciebat. Eleganter Boëtius lib. 2. Met. 7.

Qui-

*Quicumque solam mente præcipiti petit,
Summumque credit gloriam:
Latè patentes ætheris cernat plagas,
Arctumque terrarum situm:
Breuem replere non valentis ambitum,
Pudebit aucti nominis.*

CAROLVS V. IMP.

Require Apophth. de CHRISTI HONORE, &c.

LYDOVICVS XII. GALL. REX.

Addamus, quamquam aucto dissitum, sensibus & huic loco tamen assitum, LYDOVICI eius nominis duodecimi exemplum. Qui rogatus causæ Benedicti Scaligeri aduersus Venetos patrocinaretur (illi enim Veronam aliaque opida Scaligeris extorserant) *Non his*, respondebat, *mihi opus, qui pro diuitiis titulos & tumulos auctorum demum ostentare soliti sunt.* innuens vanam illam & sine re esse ostentationem, ac de eâ gloriari, stultum & stolidum. Hinc acutè nobilem quemdam, & desidiosum adolescentem redarguens Persius, ita loquitur:

*Hoc satis? an deceat pulmonem rumpere ventis,
Stemmata quòd Tuscorum millefime ducis,
Censorumve tuum vel quòd trabeate salutas?
Ad populum phaleras. —*

P. Æmil. in vita.

GLORIA CÆLESTIS.

IESVS CHRISTVS.

INani illa præmissa, superest, ut VERAM ÆTERNAMQUE GLORIAM nostræ menti infigamus. Cuius non immemor Petrus Apostolus, ad eam anhelans,

helans, eiusdem retributorem DOMINVM rogabat: Ecce nos reliquimus omnia, & secuti sumus te; quid ergo erit nobis? qui scintillam aliquam illius Gloriæ præfigens; *Amen dico vobis*, ait, *quòd vos, qui reliquistis omnia, & secuti estis me, in regeneratione, cùm sederit Filius hominis in sede maiestatis suæ, sedebitis & vos super sedes duodecim, iudicantes duodecim tribus Israhel. Et omnis qui reliquerit domum, &c. centuplum accipiet, & vitam æternam possidebit.*

Matth. cap. 19. Mar. 10. Luc. 3.

S. FRANCISCVS.

Mirum in modum huius Cloriæ ardore succensus FRANCISCVS. Cùm enim interrogaretur quomodo tam tenui amictu hiemalis algoris asperitatem temperaret; respondit: *Si superna flammâ patriæ per desiderium contegeremur, facile nos ab hoc frigore tueremur.* Sur. tom. 5. in vita.

IDEM

Dum ob assiduas lachrymas oculorum imbecillitatem adeptus esset, ab eisque sibi temperandum dicerent, ni corporei visus vsu priuari vellet: *Non est*, inquit, *ob amorem luminis quod nobis cum muscis commune est, visitatio lucis æterna vel modicum repellenda: non enim propter carnem spiritus, sed propter spiritum caro lucis beneficium accepit.* Ibid.

S. FVLGENTIVS EPISCOPVS RVSPENSIS.

Fulgebat quoque hoc CÆLESTIS GLORIÆ amore FVLGENTIVS: qui Arrianorum persecutionem iuxta Christi mandatum fugiens, Romæ cùm peregrinaretur; visa vrbis magnificentia, ad collegas versus, in hæc verba prorupit: *Quàm speciosa esse potest Hierusalem celestis, si ita fulget Roma terrestris? & si in hoc seculo datur tanti honoris dignitas diligentibus*
vani-

vanitatem, quanam prestabitur sanctis diligentibus veritatem? Magna certè, quam nec oculus vidit, nec auris audiuit, nec in cor hominis ascendit.

Sur. tom. 1. in vita.

S. PORPHYRIUS.

Similis etiam sententia est, quam in re non omnino dissimili protulit PORPHYRIUS Gazæorum Episcopus. dum namque ex causa quadam Constantinopoli existens, Theodosij iunioris infantem ingenti cum pompa ad sacrum Baptismatis fontem deduci cerneret: Nos (inquit vitæ eius scriptor) mirati tantam gloriam. admirantibus autem dicebat S. PORPHYRIUS: *Si ea quæ paulò post evanescent, tantum gloria splendorem habent; quantum habitura sunt caelestia, quæ parata sunt sanctis & electis Dei?* Consideratione dignum quod ait S. Augustinus, Soliloq. cap. 21. & Enarrat. in Psal. 85. Peccatoribus se indies blasphemantibus dat Deus cælum, terram, fontes, fructuum ubertatem. Qui autem talia peccatoribus largitur, quid eum putabis servare suis fidelibus? Sur. tom. 1. in vita. Th. Staplut. Domin. Septuag. in Prompt. morali.

IULIANVS ABBAS.

Videbat & is socios sua domicilia ampliare: &, *Vereor, inquiebat, ô viri, ne dum terrena dilatamus habitacula, minuiamus caelestia: atque hac nobis ad modicum tempus conveniunt, caelestia verò aterna.*

In Vitis P P.

S. LUDOVICVS EPISC. TOLOS.

Erat is Caroli Regis Siciliae ex Maria Hungariae Regina filius, de quo frequens nobis & illustris sermo. Hic terrenum regnum splendidam servitutem vocitabat: &, *Si domum*, inquiebat, *et paternum*

regnum contempler, paruum id est contemplantis ingentia illa spatia, quæ sursum sunt: in quorum possessionem animus admittitur, si se homo erexerit supra se. Ex membr. vetusta in Biblioth. Fratrum minorum Louani.

THEODORICVS EPISC. COLONIEN.

Vide Apophth. de MORBO.

S. DOROTHEA VIRGO ET MARTYR.

Prosequamur etiam ardens huius Gloriæ in infirmiori sexu desiderium. DOROTHEA VIRGO, à Fabricio Præfecto aliquamdiu torta, cùm iam ad capitale supplicium duceretur; *Gaudeo, inquit, me ad sponsum pergere, cuius Paradisus omnium florum ferax amœniùs vernat, quàm dici posset.* Verè non erit ibi ampliùs neque luctus, neque clamor, sed nec vllus dolor: quæ prima abierunt. Sur. in vita, tom. 1.

S. MARIA OEGNIACENSIS.

Illi comitem se præbet hæc. rogata enim, num ex laudibus humanis, aut diuinis reuelationibus, se vanæ gloriæ stimulis titillari aliquando sentiret; responderebat: *Comparisonem veræ gloriæ quam ego exspecto, nihil est, aut aestimari potest omnis humana gloria, aut prædicatio.* Sur. in vita.

RECAREDVVS HISP. REX.

Require ÆTERNITAS.

AMEDÆVS SABAVD. DVX.

Vide IN PAUPERES LIBERALITAS.

GRA-

G R A T I T U D O.

S. TRANQVILLINVS MARTYR.

Optima beneficiorum custos est ipsa eorumdem memoria, & perpetua gratiarum confessio. vnde contendentem Agrestium Praefectum, Solem summo iure pro numine habendum; TRANQVILLINVS hoc modo compescuit: *Num, inquit, nauibus tibi alimēta ferentibus gratia agenda potius, quàm Regibus? Si ergo Regibus asportata adscribitur annona; quanto magis uni Deo gratia agenda, cuius nutu omnia elementa nostris vsibus deseruiunt.*

Sur. tom. 1. in vita.

S. SABA.

Hic Cænobiorum multorum pater, Agarenis per cellam transeuntibus, apposuit melagriorum & arundinum radices. neque enim aliud ei in cibum. Illi regressi, caseos & dactylos referunt. Tum SABA, *Heu mihi!* inquit, *Barbari isti, parui nostri beneficij memores, referre gratiam munificè studuerunt: nos, qui bonis creatoris fruimur indies, nullam ei studemus referre gratiam per mandatorum observationem. Quæ venia? quæ excusatio?* Sur. tom. 6. in vita.

S. RYMOLDVS ARCHIEPISC.

Contendebant apud illum parentes, heroinam stemmate illustrem in coniugem, & simul Scotiæ adscisceret gubernacula. At ille soli Deo vacans, *Quid, inquebat, Imperium, quid mulierum amplexus, mihi propediem emigraturo profutura sunt? cū nihil tunc sim habiturus, quod gratitudinis loco Deo, omnium bonorum largitori, queam referre.* Ex vita eiusdem.

B. IGNATIVS LOIOLA

Cum linguæ Italicę puritati nequicquam incumberet, & vix vlla profectus spes superesset; Ego, aiebat, *à bonorum largit ore non plus accepi, conferam tamen in eius laudem hoc quidquid est, quod ut Deo redderem, ab ipso accepi.* Ribadin. in vita lib. 3. c. 3.

THEODOSIVS IMP.

Spectabilis insuper in THEODOSIO hæc Gratitude fuit. Exhibiturus erat suo populo Circenses ludos, & nuntium accipiebat, Tyrannum Ioannem in Occidente interemptum: cæptoque desistens, populo qui spectatum aduenerat, denuntiat: *Relinquamus hoc propositum, & ad Ecclesiam properantes, Deo gratias agamus, cuius manus Tyranni præsumptionibus obuiavit.* Dixerat. & ecce fit frequens ad Ecclesiam concursus, gratiæque ter maximo Deo redduntur. Socrat. Trip. hist. lib. 11. cap. 18.

ALPHONSVS ARAG. REX.

Ille etiam hac gloriâ illustris, sæpius ad amicos dixisse commemoratur: *Deo tribus potissimum de causis incessanter gratias ago: quòd me rationale animal esse dederit: quòd Christianum: quodque inter Christianos, Regem.* An non meritò Platoni præferendus? qui, cum etiam sibi de primo gratularetur; adiecit, se diis gratias habere, quòd ciuis esset Atheniensis, ac Socrate magistro vsus. Æn. Sylu. de dict. Alphonfi.

CAROLVS V. IMPERATOR.

Conquerebatur apud eum domesticorum quispiam, quòd cum suæ Maiestatis obsequio omnem operam impèdisset, minùs tamen sibi de celebriori officio prouideri, quàm ceteris. At CAROLVS, *An nescis*, ait, *quò Soli Luna est vicinior, eò minus ab illo acci-*

accipiat luminis? Significabat autem id Magnatibus usu venire, ut qui illis officio aut ministerio propinquiore, sint à promotione remotiores.
 Chyt. in Orat. de vita Caroli.

GRAVITER DICTA.

ALPHONSVS ARAG. REX.

VT facerè & iocosè dicta suum leporem & venustatè, ita graviter prolata suam etiam energiam habent & gravitatem. Durante inimica illa contentione, quæ erat inter Franciscum Sfortiam & Nicolaum Picinium, sciscitabantur Matricienses Legati ex ALPHONSO ARAGONIO, vtrum illorum sibi in amicitiam adsciscere vellent? Quibus ille: *Vtrosque tamquam amicos habeo, & ab utrisque velut hostibus cauendum mihi existimo.* Sentiebat quippe perdifficile ita vnius familiaritate uti, ut alterius qui huic hostiliter insidiatur, offensam non incurras. Panorm. lib. i. de Gest. Alph.

DVX VENETIARVM ANONYMVS.

An aliud à VENETORVM DVCE expectandum? Galliarũ Rege ad Ticinum capto, factũ ut eiusdem Orator, subtristi vultu Regis sui cladem nuntiaturus, adueniret in Palatium: quo tempore etiam Imperatoris Caroli legatus Ducem præstolabatur, lætus admodum, obtentæ iam palinæ deferens nuntium. conspicatusque vtrumque DVX (ut erat prudentissimus) quò se in neutram partem inclinari testaretur; *Faciam*, inquiebat admodũ graviter, *iuxta mandatum Apostoli: Gaudebo cum gaudente, & flebo cum flente.* Eoque dicto vtriusque animum placavit. Auct. Serm. memor. Corozet.

GVBERNARE.

SIGISMVNDVS IMPERATOR.

Velut is qui in puppi sedens flectit gubernacula, simul nauem ipsam flectit reflectitque: ita ad Reipublicæ clauum constitutus, eam regit dirigitq;. Quis illud ipsum intellexisse SIGISMVNDVM inficiabitur? apud quem dum quispiam gloriabundus urbanos Magistratus despiciendos diceret, militumq; tribunos extolleret, excandescens, *Tace*, inquebat, *ô Thraso: nullâ nobis militiâ foret opus, si suas quisque ciuitates & imperia iustè rectèque gubernaret.* Significabat bellorum fomitem Prælatorum socordiam: adeoque nihil verius, quàm illud Horatij:

Quidquid delirant Reges, plectuntur Achini.
Æn. Syl. de Dict. Alph.

FRANCISCVS BORGIA DVX.

Quare prudenter dixisse fertur iste: *Qui ceteris præesse volunt, non vnâ omnes qui parent regulâ metiri oportet: sed bonos milites imitari; qui pro fistula captu, machinam bellicam sulphureo puluere implent, ne dissiliat.* Ribad. lib. 4. vitæ eius, c. 8.

ALEXANDER SEVERVS IMP.

Tempora confundimus, sed in re cadem. Suspectos habebat SEVERVS IMP. eos, qui vtrò honores ambirent, eosque Reipub. perniciosos existimabat. Itaque cum vrbi suæ Præfectum designasset, isque fugam capesseret, ne publico isti muneri deseruaret; retractum, reluctantem, & inuitum eodem nihilominus ornauit, dicens: *Inuiti, non ambientes in Rempublicam collocandi.* Æl. Lampridius.

PETRVS

PERVS ALDOBRANDINVS CARD.

Dignitate & ordine ceteris prior, non item æuo ille. rogatus, quisnam benè gubernaret: respondit; *Qui vim habet numinis.* Sensit autem cum Homero, neminem rectè gubernare, nisi ex dono Dei. Henricus Farnes. in Apophth. de Principe.

HÆRESIS, HÆRETICI.

AGATHON ABBAS.

INfandam humani generis luem perniciemque cum formidine attingimus. quâ infecti, velut caupones pessimi (vt est apud Hieronymum in cap. i. Isaïæ) faciunt ex vino aquam, cum è conuerso Christus aquam mutarit in vinum. Verè monstrum horrendum, informe, ingens, cui lumen omne tam diuinum, quàm naturale ademptum: Deo inimicum, bonis omnibus inuisum; & inter illos AGATHONI Abbati. Cui dum varia per calumniam imponerentur crimina, & ille humilitatis ergò omnia in se libens agnosceret; postremum eum Hæresis labe pollurum obiiciunt. Tum ille: *Absit hoc malum ab animâ meâ.* Quærentibus autem, cur ad Hæresis nomen commoueretur, alia verò crimina tam æquo animo sustineret; *Quia, ait, peccatorem me scio: hæresim autem quæ à Deo separat, non fero.* In vitis PP. de patient. & humilit. Part. 2.

APHRAATES MONACHVS.

Ille hanc pestem minimè in semetipso: at neque in aliis hic sustinebat. Cum namque Valens Imp. Antiochenos crudeli modo diuexaret, quòd Arrianum dogma suscipere recusarent; APHRAATES eos confirmaturus, celeri gradu processit. Vidit eum Impe-

rator è porticu; & quo properaret, rogat. *Oratum*, ait ille, *pro tuo imperio*. At hoc domi factum oportuit, inquit Valens. *Rectè dicis*, subdit APHRAATES, & *verè feci, donec Christianis in pace esse licuit. Tu autè nunc turbatis Ecclesiis ignem iniecisti, quem pro virili restringere conabor*. Huius ignis (proh dolor!) nimis evidens & frequens testimonium exhibet Belgicum hoc solum: in quo vix pedem ponas, qui non ilicò exustas exesasque templorum machinas contingat. Theod. lib. 4. cap. 26.

S. POLYCARPVS MARTYR.

Iste Marcioni fortè obuiam factus, rogatusque ab eo, An me agnoscis POLYCARPE? *Agnosco*, respondit, *primogenitum Satanae*. Hac laude dignos eos reputabat, qui ab Ecclesiæ gremio transfugissent. Euseb. lib. 4. hist. Eccles. cap. 14.

HÆRETICI FUGIENDI.

PAPHNVTVS MONACHVS.

CVm ergo tam nefanda pestis sit HÆRESIS, quis nō eam velut colubrum fugiet, & ut summam perniciem summo etiam conatu detestabitur? Viderat PAPHNVTVS Maximum Episcopum inter hæreticos quadam occasione consedis; & assurgens, manuque eum trahens, *Haud patiar*, inquit, *venerabilem Episcopum in cathedra pestilentia sedere, & cum impuro hoc grege verbo communicare*. Hic erat antiquus ille feruor & zelus primorum Athletarum: qui simul etiam cum illis pænè interiit abiitque. Sozom. lib. 2. cap. 24.

MOSES ABBAS.

Quid verò hic? Missus à Valente Imp. rogatu
Mauia

Mauie Saracenorum Regina Alexandriam, vt Episcopali infula insigniretur; vidit Lucium Arrianum paratum sibi imponere manus. cui MOSES: *Absit, vt tua manus me consecret. Tua namque inuocatione Spiritus sancti gratia in neminem descendit.* Cui Lucius: Vnde isthæc coniicis? *Non coniicio, inquit alter, sed certissimum id mihi. pugnam etenim contra doctrinam Apostolicam, ei que contrariam proponis, verbisque blasphemie impiè facta coniungis.* Insignis castigatio, & ab omnibus laudata. Theod. lib. 4. cap. 21. Sozom. lib. 6. cap. 8.

SS. ALEXANDER ET CAIVS.

Illi item capite damnati, dum vnà cum Marcionistis ad supplicij locum ducti essent, vnicum illud deprecabantur, vt separatim ab iis occiderentur. *Ne, inquebant, sanguis noster cum illis misceatur, qui parum rectè de Catholica fide fuerunt opinati.* Tam timorata per ea tempora fuerunt Christianorū mentes, vt ne mortui quidem hæreticis se commisceri sustinerent. Bapt. Fulgos. lib. 1. cap. 3.

S. ALEXANDER EPISC. ALEXANDRIÆ.

Huius etiam præclara vox: *Par est, vt nos qui sumus Christiani, omnes qui contra Christum loquuntur, tamquam Dei hostes & corruptores animarum deitemus.* Et sanè, quæ participatio iustitiæ cum iniquitate? quis consensus templi Dei cum idolis? Socrat. hist. Eccl. lib. 1. cap. 3.

S. ANTONIVS.

Quid autem, ceteris si non præferendus, meritò tamen adiungendus, ANTONIVS? qui ne verbis quidem Manichæos vnquam dignatus. dicebat enim: *Taliū amicitia atque sermones, non nisi mera animæ perniciēs.* ac de Arrianis aliquando ita sentiebat,

bat, ut serpentibus deteriores diceret eorum conciones. Athan. in Vita.

FRANCISCUS I. FRANC. REX.

Lubeat his etiam annectere priscum illum Christianorum Principum feruorem, & quidem Christianissimi Regis FRANCISCI; qui, quamuis fœdus cum Henrico VIII. Angliæ Rege inierat, nūquam tamen à Sedis Apostolicæ obedientia se subtraxit. quin Henrico per Oratores contra Rom. Pontificem suppetias postulanti, respondit: *Aliis in rebus fraternum animum exhibiturus sum; sed in his quæ Religioni aduersantur, nulli me associauero.* Verè digna tali Rege vox, & à Polo, qui tum superstes, non parùm laudata. N. Sanderus, lib. 2. de Schism. Anglic.

IDEM.

Quin æternæ memoriæ consecrari dignum, quòd sæpè adstante Procerū conuentu, in hæc verba proruperit: *Si scirem brachium meum hæresi infectum, rescinderem, & comburerem.* Utinam nihil ab illo mutati Regni illius successores! Auctor rerum Memorab.

PVERI ANONYMI.

Habeat & hîc suum locum PVERILIS ætas, & exemplum præbeat bonæ laudatæque indolis, & cū hac huiusce virtutis. Narrat Theodoretus, PVEROS quosdam Christiana fide imbutos, in tantum hæreticos abhorruisse, ut cū fortè pilâ in foro luderent, eaque è manibus prolapsa, sub Lucij hæresiarchæ asinū transiret, eiusq; calcem tangeret; eam contrectare noluerint, sed inclamauerint: *Contaminata est, polluta est; neque, nisi per ignem expietur, contrectanda.* Lib. 4. hist. Trip. cap. 14.

HISTO-

HISTORIA.

ALPHONSVS ARAG. REX.

TE te rerum omnium, & Principum potissimum virorum, curiosa indagatrix compello: quæ res gestas Regumque Ducumque, & tristia bella ad feros nepotes transnittis. Oblectatur tui præsentia ALPHONSVS, dum Capuæ decumbens ex febris, nihil solarij in morbi sui molestiis persentisceret. Q. Curtij Alexandrum in manus sumens, omnem ægritudinis languorem superavit, dixitque: *Valeat Avicenna, valeat Galenus, & alij medici: vivat unus Curtius restitutor sanitatis meæ.* Ant. Panorm. de Gest. illius, & Æn. Syl. de eiusd. Dictis.

CAROLVS V. IMPERATOR.

Sed & Historiæ scriptorem, virum bonum prudentemque, ac propositi tenacem esse debere, docuit nostri & futuri fortassis sæculi decus & æternum ornamentum CAROLVS V. IMP. Austriacus. Audiebat Ioan. Sleidani historiam, quæ res à se gestas continebat, coram se legi. & identidem dicebat: *Mentitur nebulo.* ad extremum adiciens: *Quenam istorum scriptis veritas fidesque insit, cum veritatis fideique lucem in seipsis extinxerint?* In vita Caroli apud Surium & alios.

FREDERICVS SAXONIÆ DVX.

At quæ non utilitas ex historiis? Curabat sibi præscribi historiarum epitomen Elector FREDERICVS, quam etiam in grauíssimarum rerum deliberatione adhibebat: nec rarò dicebat: *Haud voluptatis ergo tantum historiarum cognitione oblector; sed potissimum, quòd ea ad benè beateque vivendum vana exem-*

exempla & commonefactiones ob oculos ponant. Historia namque meritò hoc encomio gaudere debet,

— quòd gestis praesit custodia rebus,

Et dei, quod caueas, quodq; sequaris iter:

Priscaq; ne veteris vaneſcat gloria ſacri,

Gaudeat inuiſis eruere è tenebris:

Et ſua virtuti dare premia, & impia rurſum

Sedula famoſis mittere facta notis.

Georg. Richt. in Axiom. Oeconom.

H O M O.

ISOCASIUS QUÆSTOR LEONIS IMP.

IMbecillitatis fragilitatiſque exemplum HOMINEM producimur, & ſimul ISOCASIVM Quæſtorem. qui, traditus ab Imperatore Leone ob certa quædam flagitia Iudici examinandus, cùm in habitu condemnati ad prætorium duceretur, percontanti, Viden' quo in ſtatu ſis? *Video*, inquit, *neque nouum id mihi, ſi homo cùm ſim, humanis caſibus ſubiiciar.* & hic, vt quòdam ille, nihil à ſe humani alienum exiſtimabat. Zonar. lib. 3. Annal.

CAROLVS V. IMP.

Require FORTVNÆ INCONSTANTIA.

ÆNEAS SYLVIVS.

Antequam primo illo honore præfulgeret, audiebat differentes quosdam de humanæ ſortis fragilitate. &, *Comædia*, inquebat, *eſt vita, cuius vltimus actus in morte agitur. nemo bonus poëta habetur, niſi ad finem uſque omnes actus prudenter explicet.* Præclare pariter & doctè monet Ethnicus:

Disciteq; ô miſeri, & cauſas cognoſcite rerum,

Quid

Quid sumus, & quidnam victuri gignimur, ordo

Quis datus; humanâ quâ parte locatus es in re.

Lib. 3. Comm. eiusd. de Reb. Alphonſi.

FERDINANDVS IMP.

Ille etiam humanæ conditionis memor, HOMI-
NEM cælo, terra, mari, arboribus brutisque dicebat
longè inferiorem. & sciscitanti causam, *Quia omnia*
hæc, inquebat, tempestatem præsentunt; solus homo
mala sua nec sentit, nec prospicit.

Nam gens hominum fertur rapidis

Obuia fati, incerta sui.

Stygias ultrò querimus undas.

Chron. German. Imp.

FRANCISCVS BORGIA DVX.

Hanc Ferdinandi considerationem nulla conue-
nientiùs quàm FRANCISCI BORGIAE subsequetur
sententia. Grauitè cum affligebat Tertianæ, ita ut
penè ipsas medullas suo æstu concoqueret. cum-
que vi morbi debilior factus iaceret; se recolligens,
Heu! suspirabat, *quàm iam didici nihil esse in huma-*
nis perpetuum. Quod idem mente aliquando com-
plexus Iustus Lipsius V. C. Epitaphio suo, quod
Louanij visitur, ipse inseruit:

HVMANA cuncta fumus, umbra, vanitas,

Et scenæ imago, & verbo ut absolnam, NIHIL.

Ribadin. in vita Borgiæ.

THOMAS MORVS.

Quin, quòd. tota hæc vita nostra nihil aliud sit,
quàm ad mortem damnatorum, in hoc mundo tam-
quam in carcere positorum, continua expectatio;
quò alij ocyùs, seriùs alij euocantur, hac hypothesi
docuit vir & sapientia & sanctitate celebris THO-
MAS MORVS. dicebat enim: *Velut qui è carcere ad*
pati-

patibulum ducitur, quò duæ quidem viæ ducunt, una brevis & recta, per circuitum altera; nescit quanam ducatur, nec longiorem sibi viam promittit propter alterius viæ incertitudinem: ita iuuenis, etsi videat senem per circuitum duci ad mortem, & ignoret an eò ipse ducatur, longiorem tamen ob id sibi vitam promittere non potest. Quis enim inter homines

—— tam Diuos habuit fauentes,
Crastinum ut posset sibi polliceri?
Res Deus nostras celeri citatas
Turbine versat.

In vita Th. Mori, cap. 12. apud Staplut.

H O N O R.

ABBAS DE BAIGNE ANONYMVS.

Virtutem velut umbra sequitur HONOR: cuius proinde appetitus si moderationis fines non transilit, reprehensione caret. Habuisse eum quemdam ABBATEM DE BAIGNE meminit Corozetus in suis Memorab. à quo cùm Ludouicus XI. peteret, Abbatiâ cederet; subtiliter & modestè, *Quadraginta*, inquit, *annis vacavi, ut priores alphabeti litteras A B addiscerem: at iam totidem requiro, ut subsequentes D C ediscam.* Significabat autem, se demùm post annũ suæ professionis quadragesimum in Abbatem electum, & velle annis totidem eodem munere perfungi, priusquam cederet.

ALPHONSVS REX ARAG.

Esse autem vnicam ad honores viam, Virtutem, hoc modo declarabat ALPHONSVS. Suadenti enim sibi cuidam familiari, tranquillè dum posset & securè viueret, neque se tot tantisque periculis obiectaret,

Etaret, respondisse fertur: *Non temerè à Romanis, & iis quidem sapientioribus, Honoris templa Virtutis fanum coniunctum est: ut in id nemini, nisi per illud, transitus pateret.* Non itaque per voluptatem & otium; ——— *sed semita certè*

Tranquilla per virtutem patet unica vita.

Panorm. lib. 1. de Gest. eiusd.

I D E M

Interrogatus, quid honor esset sine utilitate; *Perinde*, respondit, *ac si peracutum cernas, sed offensus caligine in tenebris oberres.* Anne fortassis innuere volebat illud Poëtæ,

——— *Virtus sine censu languet ubique.*

Panorm. lib. 2.

LYDOVICVS XII. GALL. REX.

Vide Apophth. de MANSVETVDINE, &c.

REX ANONYMVS.

Quàm verò apud quosdam illud obtineat, Honores mutāt mores, at rarò meliores, docet is quem subnectimus. Erat filius Carbonarij homo humili loco natus, qui populi sui suffragiis in REGEM deligitur: quo audito pater accurrit lætus, natumque splendore regio conspicatus, cū se ab illo non videri existimaret; An, ait, me cognōscis fili? cui ille, *Quid, inquit, pater, ego meipsum non cognosco, & quomodo te agnoscam?* Gotscal. Sermon. 17. Part. æstiuālis, lit. C.

ANONYMVS.

Aliud insuper adiiciam. Dum electus esset in Archiepisc. Tolosanum Franciscus Simenez, amico, quem summum habebat, felicem suarum rerū successum nuntiavit. Cui ille; *De successu*, respondit,

V

qui

qui tibi ex animo euénit, gaudeo plurimum: & simul non parum doleo, me amicum nunc amisisse. respiciebat namque ad vulgatum illud, Honores mutant mores. Hinc laudatur illud Poëtæ:

*Natura celas vitia, es dum pauper: at illa
Imperium nactus conspicienda dabis.*

Floresta.

HONORIS CONTEMPTVS.

S. PETRVS APOSTOLVS.

CLaro illucescente Sole, minor vmbra corpori comes: ita, quò plures quibusdam virtutum radij, eò minorem honorum vmbra sibi comitem desiderant, in solum virtutum omnium largitorem Deum, quidquid est honoris & gloriæ, referentes. Præstolabatur Cornelius vir iustus B. PETRVM ad se accersitum, eique obuius factus, ad pedes procidit & adorauit. At PETRVS eo se honore reputans indignum, eumque manu eleuans, dixit: *Surge, & ipse homo sum.* Actor. cap. 10.

S. MALACHIAS EPISC. HIBERNIÆ.

Hunc etiam honoris tituliq̃ contemptum in MALACHIA habemus. qui vocatus & compulsus ad onus Archiepiscopale, omnibus quibus potuit modis, renuit. Anathema verò, ni pareat, minitantibus; tandem acceptauit, dicens: *Ad mortem me ducitis, sed obedio spe martyrij.* O virum insignem! nec honorem affectantem, neq; mortem pro Christo formidantem. Sur. tom. 6. in vita.

S. FRANCISCVS.

Et quid verus pauperum & humilitatis pater FRANCISCVS? Rogatus à domino Hostiensi (qui ordinis

dinis eiusdem protector, ac postmodum sub nomine Greg. ix. Pontificatum administravit) vtrū suos fratres etiam ad Ecclesiasticas dignitates vellet promoveri; dignam FRANCISCO vocem respondit: *Minores ideo vocati sunt fratres mei, ne maiores fieri præsument.* Sur. tom. 3. in vita.

S. ANTONIVS EREMITA.

Hic item frequentibus litteris à Constantino Imperatore vocatus, venire recusavit: ne maiori honorū pondere grauaretur. dicebat autem: *Siquidem ad Imperatorem venero, Antonius ero: sin minus, Abbas Antonius.* Niceph. Callist. lib. 8. Eccles. hist. cap. 40.

FRANCISCVS BORGIA SOC. IESV.

Memorabilis etiam illius contra omnes honorum insultus constantia. abdicato quippe illustri Ducatu, mundiq; pompa pro nihilo habita, sepius oblatum Cardinalatus honorem recusavit. dicebat autem: *Deum precatus sum, ut mihi vita prius abire liceat, quàm titulis iterum bonisq;ue onerarer inuitus.* Erat tamen ille, cuius, si vllius alterius, virtuti meritiſſimus debebatur honos. Quā benè & verè Boët.

Quid dignum stolidis mentibus imprecet?

Opes, honores ambient,

Vt cum falsa graui mole parauerint,

Tum vera cognoscant bona.

Ribadin. in vita, lib. 2. cap. 3.

IDEM.

Venerant ad visendum eum officij causa Dynastæ. cumq;ue speciosis nimium titulis vterentur, tædio affectus, rogabat titulis temperarent; Ne, inquiens, Deo exprobrasse videamini, quòd in me eximium vocationis beneficium contulerit: nève pluris

V. 2. facere

facere videar quæ abieci, quàm quæ assumpsi. Idem
cap. 8. lib. 2.

IDEM

Vlyssiponam dum ingressus; Ioan. 111. Rex misit,
qui eum saluaret. Hic cùm, fessùsne de via esset, in-
terrogaret; & (Domini) nomen iterùm atq; iterùm
repeteret; FRANCISCVS lepidè respondit: *Fes-
sus quidem sum de via: sed magis (Domini) quàm me
onerat potius quàm honoras, appellatione.* Idem
lib. 4. cap. 1.

BENIVOLVS QVÆSTOR.

Claudat hunc ordinem ille. Vocabat eum Iustina
Valètiniani mater, religione Arriana, & mādabat, le-
gē cōtra Catholicos promulgaret. id recusantē, ma-
ioribus cingulis inuitat. Ille verò se discingens, bal-
teum ante pedes Augustæ proiecit, dixitque: *Neque
hunc honorem, neque maiorem expeto pro impietatis
mercede.* Tripart. hist. lib. 9. cap. 20.

ALEXANDER SEVERVS.

Ingeramus calamū ciuilibus exēplis, & ex iis pri-
mum omniū depromamus ALEXAND. SEVERVM,
honores titulosque despicientem. Imperator crea-
tus, vix tertio lustro suæ ætatis emenso, ob virtutes
eximias, magnificis titulis à Senatu decoratus, nū-
quam præsens eos est passus. Aiebat enim: *Oportet
ut res gesta, maturiorque ætas ea nomina pariat.* Ita-
que nomina quæ alij ad honestandam fortunā om-
nibus studiis sibi adsciscere laborarunt, ipse adhuc
adolescens, oblata non admisit. Lamprid. Ful-
gos. lib. 4.

CONSTANTINVS MAGNVS.

Vide tit. de LAYDE CONTEMPTA.

GODO-

GODOFREDVS BVLIONIVS.

Et quis hunc pro merito laudauerit? Erant eius consilio & armis expugnatae Solymæ: vnde Christiani principes, suis humeris subuectum, vno ore Regem proclamarunt. Hic verò regni titulum rogatus non abruit, auream autem coronam suo capiti superimponi omnino noluit, dicens: *Indignum est, aureo illic diademate hominem uti, ubi Rex regum* CHRISTVS *pro hominum salute spineam portauit.* Platina in vita Palchalis 11. Pont.

CAROLVS MARTELLVS BRAB. DVX.

Neque in hoc vllum incrementum habuit regni tituli que libido. Nam cum in Regem Franciæ post mortem Chilperici expeteretur, renuit, inquiens: *Imperare Regibus, quàm Rex esse malo.* Vnde hoc ei Epitaphium inscriptum:

*Ille Brabantinus Dux primus in orbe triumphans,
Malleus in mundo specialis Christicolarum.*

Dux Dominusque Ducum, Regum quoque Rex fore spernit,

Non vult regnare, sed Regibus imperitare.

Barland. in Duc. Brab. pag. 16.

CAROLVS MAGNVS.

Est hîc etiam illustris CAROLVS. deletis Saxonibus, & finitimis populis debellatis, cum admodum metuerent ne tandem Imperator factus, se de illis totaque gente vindicaret; ad eum prostrati veniunt, seque obsequio suo lubentes deuouent. quibus ille in brachia acceptis; *Nolo, inquit, vos mihi seruire, sed Deo.* Vera Christiani Principis vox.

Seb. Munst. lib 9. Cosmog. c. 19.

WENCESLAVS BOHEMIÆ REX.

Non minoris animi WENCESLAVS. Rudolpho

Austrio vitâ functo, illi Romanû deferebatur imperium. sed quâ virtute promeruit, eâdem modestiâ recusavit, asserens; *Satis superque mihi laboris est, paternam ditionem aqvis legibus gubernare: externis libens abstineo, eisqve me dignioribus cedo.*

Munst. de German. lib. 3. cap. 499.

IOVIANVS IMP.

Require IMPERIVM EIVSQVE ADMINISTRATIONIO.

FRANC. SFORTIA DVX MEDIOL.

Non parum etiam laudis meritus est SFORTIA, cum Mediolanensium & totius pænè Lombardiæ parto imperio, urbem Mediolanum esset initurus. præparatum enim sibi cum triumphali honore auratum currum conscendere detrectavit, dicens: *Eiusmodi ornamenta Imperatoria maiestati debentur.* Quo facto, victoria illa, quæ rara erat, & hostes, & insolentis animi affectus, qui plerumque victoriam comitantur, superavit. Fulgos. lib. 2.

HORÆ CANONICÆ.

S. HUGO LINCOLNIEN. EPISCOPVS.

HORARIAS PRECES, Clericorum pensum, statuto tempore & ordine persoluisse, Deo gratum esse & acceptum, suo exemplo docuit Lincolnensium Antistes HUGO. qui etiam in itinere constitutus, numquam ab hac debita persolutione cessavit. quin, cum aliquando ceteri comites primo mane abirevellent, ille: *Quoniam ibimus, Horis matutinis nondum recitatis?* quibus eas differentibus, & iter accelerandum ne latronibus præda fierent asserentibus; HUGO, *Vos quod lubet facite*, inquit. Ego
sanè

sanè hinc non exeo, donec solito more preces persoluam.
Mira res ! solus ille postmodum subsecutus, liber
transiit: aliorum verò hi capti, illi spoliati, in prædo-
num manus deuenerunt. Sur. tom. 6. in vita.

S. LVDGERVS PRIMVS EPISC. MONASTER.

Memorable illud factum dum recolo, aliam
LVDGERI viri sanctissimi pietatem nec obliuisci
possum, nec prætereundam censeo. Euocatus hic à
Carolo Magno Imp. dum sub vesperâ venisset, pri-
mo diluculo ab Imperatore accersitur: eâ ipsâ horâ
persoluendis de more Canonicis horis insistebat.
cumq; his expletis vêturum se respondisset, & iam
tertium à Cæsare nuntium acciperet, tandē in con-
spectum Caroli venit. qui, cur venire distulisset,
subiratus rogat. Ille vultu & mente intrepida; *Ego,*
Imperator, tuum mandatum ita in omnibus exequen-
dum putavi, vt Deum tibi ubique præferendum non
dubitarem. Quo responso delectatus Imperator,
gratias egit, quòd talem eum experiretur, qualem
esse crediderat. Thom. Staplut. in vita Thomę
Mori. Sur. in vita.

THOMAS MORVS.

Hic etiam isto in genere pietatis admodum fuit
liberalis; qui pro more, Sacerdoti, superpellicio in-
dutus, cōcinebat: monitus autem hunc humilitatis
modum Regi minimè placiturum, tamquam digni-
tati eius minùs congruum, respondit: *Domino meo*
Regi displicere non potest, quod ipsius Regis Domino
obsequium impendo. Ibidem apud Staplut.

HOSTIS.

HENRICVS IIII. IMP.

Non parum solatij mortem Inimici etiam cum gloria obitam adferre, paucis confirmabimus. Vitâ functo Rudolpho Imp. cùm eius cadauer mirifico apparatu tumularetur, quidã HENRICI IV. assentatores id haud æquo animo tulêre, eò quòd vix vniquam inter eum & Imperatorem conuenisset. At HENRICVS; *Sinite, inquit. Quàm velim omnes qui mihi aduersantur, hoc cultu fastuque tumulari.* Matt. Castrit. de heroic. virt. Princip.

CAROLVS IX. FRANC. REX.

Nec multum dissimili modo hic. Conspicabatur in furcâ suspensum Gasparis Colignij perduellis cadauer; & comitatui fœtorem non ferenti, *Hostis, inquebat, mortui bonus est odor.* Annal. Fr.

ERGA HOSTES CLEMENTIA.

RVDOLPHVS IMP. AVSTRIACVS.

Magna profectò ea virtus est; quæ, vt infinitam gloriam, ita & summum amorem laudemque apud omnes meretur;

Parcere subiectis, & debellare superbos.

Benè igitur RVDOLPHVS dicenti cuidam, se Ottacarum Bohemiæ Regem è medio sublaturum, si factò præmium apponeretur, respondebat: *Etsi noster hostis sit, non efficiet tamen, vt iustitia & moderationis fines transcamus.* Æn. Syl. lib. 3. Comm. de Reb. Alphonfi.

IOAN.

IOAN. IMPERATOR.

Pari clementiæ iustitiæque zelo efferbuit IOAN-
NES. Cui dum insinueret quidam se facile Henri-
cum suum ad regnum Bohemiæ cōpetitorem vene-
no sublaturum, aiebat: *Si me inscio hoc perpetrasses,
& subornasses fugam ad me, Crux tibi merces futura:
& tu me modò huius sceleris auctorem petis?* verè imi-
tatus Vatis Regij mansuetudinem, qui etiam suo-
rum hostium interfectores numquam est passus es-
se inultos. Ibidem.

SIGISMUNDVS IMP.

Quid autem de SIGISMUNDO loquar? cuius man-
suetudinem potentissimi affectus, ira atque gloria,
quaterere non potuerunt. Hic enim hostes bello supe-
ratos, non modò à delicti offensa liberare, sed &
inter familiares adoptare solitus: & ob id à Lauren-
tio Hungariæ Palatino reprehēsus, *Tibi, inquit, inquit,*
utile videtur hostem occidere, quia mortui bella non
excitant. At ego inimicum occido, dum parco: & ami-
cum facio, dum extollo. Præclarè sentiebat præclarus
Imperator, pulchrius esse benefaciendo, quàm po-
tentia hostē vincere. Tibi ergo CÆSAR clementiss.

Et tecum hoc commune deis, quod utriq; rogati

Supplicibus vestris ferre soletis opem.

Idem.

I D E M

Obiurgatus à suis, quòd fugatos hostes non in-
sequeretur, comprehensos verò occideret; *Satis, di-*
cebat, vicit, qui hostes fugauit. Utinam & nostri or-
bis Monarchis persuaderi posset, illam tum demum
esse victoriam, quæ sine sanguinis effusione contin-
git. Æn. Syl. lib. 2. de Gestis Alphon.

ALPHONSVS ARAG. REX.

Age. ALPHONSI ARAGONII clementia, quàm clarum quamque memorabile exemplum haberi debet? Cùm namque expugnato Stephato, Centuriones ac milites, qui Regi maledixerant, mirà cū humanitate excepisset, quos tamen morte mul- Etandos iudicabant alij; respondebat: *Malim ex clementia & humanitate erga hostes, quàm ex victoria laudem pacisci.* Quæ illa vox? egregia sanè, & verè regia: ac dignus qui eam protulit, eo elogio celebretur, quo Augustum Ovidius olim extulit, quòd

— *nec ALPHONSO Deus est moderatior ullus,*

● *Iustitiâ vires temperat ille suas.*

Panorm. lib. 3. de Gest. eiusd.

I D E M.

Caietam urbem obsidebat, & compulsi Opidani præ inedia ad bellum inutiles vrbe pellere. In quos cùm incidisset ALPHONSVS, monitus à circumstantibus eos trucidaret; *Nequaquam, ait, bellum contra puellas, feminas, senes, ac innocentem iuventutem suscepimus: sed contra viros armatos, manu nobiscum de victoriâ concertantes.* & ita imbelli ætati sexuique pepercit. Hanc pietatem nostra tempora clamant, & desiderant: quibus (heu!) gloriosum, si trucidatis infantibus ac senibus, eam ætatem abducunt, quæ vel libidini apta est, vel labori, vel utrique. Panorm. lib. 1. de Gest. eiusd.

Require CLEMENTIA.

HVMILITAS.

IESVS CHRISTVS.

EXempla etiam eorum percurramus, qui à iactantiæ vitio remoti, virtutum omnium alumnam,

nam, veramque custodem, toto conatu sectati sunt. qui tanto maiores in cōspectu Dei apparuere, quanto se apud homines reputarunt minores. Ut autem SALVATORIS nostri summam humilitatem taceamus, certè præclara eiusdem de hac virtute dicta iudiciaque nullatenus erūt prætereunda. Cū persoluto statere, à discipulis inquireret, quānam de re inter se altercarentur? accedentes rogabant: Quis putas maior est in regno cælorū? & aduocans IESVS paruulum (quem alij fuisse Ignatium Episc. Antiochenum existimant; alij veriùs Marcellum Pont.) statuit eum in medio eorum, dicens: *Amen dico vobis, nisi conuersi fueritis, scilicet ab hac stulta contentione & ambitione, & efficiamini sicut paruuli, nempe quoad sinceritatem, qua alter se alteri non præfert: non intrabitis in regnum calorum.* Quicumque ergo humiliauerit se sicut paruulus iste, videlicet humiliter de se senserit per virtutem, ut ille per ætatem; *hic maior est in regno calorū.* Hinc præclare Ambros. Quisquis cupit diuinitatis tenere fastigia, humilitatis ima sectetur. Matth. cap. 18.

S. HILARIUS

Miræ humilitatis vir. Venerat euocatus ad Synodum, Leonis papæ auctoritate coactam, sed tardius quàm oportuerat: vetuit Leo ne quis assurgeret venienti. Ille conspicatus sibi locum non dari inter Episcopos, nihil molestè ferens, humi resedit; inquit: *Domini est terra, & plenitudo eius.* Herm. Gigas.

S. FRANCISCUS.

Ille etiam hanc virtutum omnium altricem mirificè coluit. cū namque mensæ accumberet, & qui ex ordine refectionis tempore legebat, de Virginis

ginis Deiparae angustiiis quædam in medium proferret, continuò assurrexillè dicitur, ac humi pro-nolutus, dixillè : *Numquid ego peccator ad mensam sedere debeam, cum Dei genitrici in diuersorio locus denegatus fuerit?* Marulus lib. 1. Exempl. cap. 8.

FR. ÆGIDIUS COMES S. FRANCISCI.

At quanta humilitatis vis sit & efficacia, non minus piè quàm acutè FR. ÆGIDIUS hoc simili explicauit : *Humilitas, inquit, mihi fulminis instar esse videtur, quod ferit quidem, sed nulla post se sui vestigia relinquit.* Ita sanè Humilitas omne peccatū non odit solūm, verūm etiam dissipat, & tamen vt homo in oculis suis nihil sit, efficit. Libet hîc attexere, quomodo humilitatis vim complexus sit Iac. Billius in Antholog. sacra; vbi ait:

O Deus! ô quantis vita est humana periclis

Subdita! quis tali vitet ab hoste necem?

Quoquò oculos verto, subeunt discrimina mille,

Tensa anime cerno retia mille mea.

O Deus! ecquisquam fugiet tot retia? Vano

Mens ea quæ fastu libera semper erit.

Surius tom. 7. in vita. Th. Staplut. Dom. iv. Ad-
uent. in Prompt. Morali.

S. HUGO LINCOLNIEN. EPISC.

Admirabatur summam eius humilitatē Guilielmus Lincolniensium Cancellarius: ac dubitare cœpit, num qua mentem eiusdē attigisset elatio. dixit-
que : Domine, S. Martinus leprosum osculo sana-
uit; cur & tu leprosos quos oscularis, non sanas? cui incunctanter ille : *Osculum Martini leprosum sana-
uit, osculum autem leprosi animam meam sanat.* Illa
est vera humilitas, ait in Moralibus Gregorius, quâ
quis

quis de se parua æstimat, & bona alterius sine liuore commendat. Sur.tom.6. in vita.

S. GREGORIUS MAGNVS.

Quid tantoperè priores illos miramur? Ipse GREGORIUS ad supremum honoris apicem præter voluntatem euectus, & dictis & factis in tanta dignitate humilitatem seruauit maximam, ita vt aliis de se præclara testimonia ferentibus diceret scriberet-que: *Ego nihil sum aliud, quàm seruus seruorū Dei.* Quo nomenclaturæ titulo deinceps gauisi summi Pontifices. Ioan. Diac. lib. 2. cap. 1. Marul. libro 1. cap. 5.

B. IGNATIUS LOIOLA.

Et ille summa spectantibus, ab imis suadebat incipiendum: nève altum saperent, sed humilitate sibi viam ad excelsa munirent. dicebat autem; *Tum demum ædificium stare poterit, si humilitatis fuerit fundamento constitutum.* Ribadin. lib. 5. vitæ eius, cap. 3.

FRANCISCVS BORGIA.

Hic quoque virtutum omnium & humilitatis potissimum cultor, quod die Hebdomadis maioris Christum discipulorum pedes abluentem Ecclesia recolit, ad Tyrones verba faciens; *Nullum, inquit, hodie in mundo locum reperi. Sextum enim iam annum ad Indæ pedes illum mihi fingebam; nunc dum Christum attentè considero iis aduolutum, lauare, tergere, osculari, nullum mihi inde expulso relictum video locum.* Idem lib. 4. cap. 1.

I D E M.

Quin & de eodem meminit præfatus auctor, quòd, cùm in Præpositum generalem adscitus esset, electores collegas suos obnixè rogarit, se orationibus

bus & consilio iuuantur; *Iumentum*, inquiens, *factus sum apud vos. Si oneri ferendo par non sit, onus cum clitellis tollitur. Idem vos facite, imperium tollite, si tanto oneri impar videar.* Ibid. lib. 3. c. 1.

S. MARIA MATER DEI.

Nunc ancillarum Christi humilitatem referamus: eo enim nomine se dignam dumtaxat reputabat DEI GENITRIX. ab Archangelo namque salutata, & Altissimi mater nuncupata, nullatenus eo titulo elata fuit; sed innatam humilitatem professa, *Ecce, inquit, ancilla Domini, fiat mihi secundum verbum tuum.* Luc. cap. 1.

S. PAVLA.

Graccharum hæc stirpe nobilis, humilitate nobilior; cum omnibus propter Christum exuta, hominum tamen aculeos euadere non posset, seque stultam à pluribus reputari intelligeret, in hanc vocem erupit: *Theatrum facti sumus mundo, & angelis, & hominibus. nos stulti propter Christum. sed stultum Dei, sapientia est hominibus.* Marul. lib. 5. cap. 2.

ROMANVS IMPERATOR.

Neque fuit ab hac virtute alienus ROMANVS. qui, cum in cœnobio, in quod à filiis dominandi libidine accensus fuerat detrusus, argueretur à fratribus quòd domum mundaret, respondisse fertur: *Luculentius regnat, qui seruorum Dei humilitatibus deseruit, quàm qui potentibus mundi peccatoribus imperat.* Benè in eundem ferè sensum Horatius:

*Latius regnes, an idum domando
Spiritus, quàm si Lybiam remotis
Gadibus iungas, & uterque Pœnus
Seruiat uni.*

Luitprandus lib. 5. cap. 1.

CARO-

CAROLVS V. IMP.

Sed & inuictissimi Cæsaris nostri insigne ad humilitatem documentum est. Postremo eiusdem ex Germania recessu, cùm Vlissinge ventos nauigationi propitios expectaret, factum, vt cum Seldio Ferdinandi fratris Legato in seram noctem de rebus seriis ageret. Iam & nox & lumina somnum postulabant: lignoque nolâ dato, nullo è ministris somno vinoque sepultis accurrēte, ipse CAROLVS candelam arripit, Seldio quouis modo renitenti præfert: eiūque per gradus ad quietis locum deducto; *Hoc tibi monumentum, ait, Cæsaris illius CAROLI habeto Seldi, tot exercitibus & satellitibus quondam stipati. quem nunc solum, & à familia etiam desertum vides, & cui tu tot annis seruiisti, ille tibi seruiit, & lumen prætulit. Quid hoc Principe humilior? quid modestius? Sanè*

——quò fortuna altiùs

Euexit ac leuauit humanas opes,

Hoc se suppressere magis felicem decet.

Cythr. Orat. de Carolo v.

HVMILIS SVI ÆSTIMATIO.

S. IOANNES BAPTISTA.

SVbiiciamus magnæ huic virtuti suū effectum, qui est contemptus sui. Humilis enim hoc solo superbus (vt habet Bernardus Serm. 16. in Cant.) quòd laudes contēnit. Ita Dominici aduentus præcursor & prænuntius, cùm benè admodum & præclarè apud omnes audiret, & Iudæi mitterent Hierosolymis Leuitas, qui prædicationis eius excellentia permoti, sciscitarentur quis esset; tamen neque

sc

se Christum, neque Eliam, aut vnum è Prophetis confitens, aiebat: *Ego vox clamantis in deserto. Cumque instaret illi, quam potestate baptizaret; protestatus suum baptismum non esse tantæ excellentiæ, ac futurum erat illud nouæ Legis à Christo instituentum; subiiciebat: Ego baptizo in aqua, medius autem vestrum stetit, quem vos nescitis: ipse est qui post me venturus est, qui ante me factus est: cuius ego non sum dignus, ut solvam eius corrigiam calceamenti.*
 Ioan. cap. 1. Mat. c. 3. Luc. c. 3.

CENTVRIO EVANGELICVS.

Quis illius humilitatem pro merito admiretur, quam ipse Saluator noster tantoperè admiratus perhibetur? miserat quippe ad eum amicos, seniores Iudæorum, qui super infirmitate filij deprecarentur. per quos etiam dicenti Domino, Veniam & curabo eum, ipse responderi iussit: *Domine noli vexari: non enim sum dignus, ut sub tectum meum intres, propter quod & meipsum non sum dignum arbitratus, ut venirem ad te; sed dic verbo, & sanabitur puer meus.* Luc. cap. 7. Matth. c. 8.

S. PETRVS APOSTOLVS.

Ille quoque conspiciatus se ad Domini præceptum conclusisse multitudinem piscium copiosam; procidens ad genua eiusdem, aiebat: *Exi à me, quia homo peccator sum Domine.* Luc. cap. 5.

S. FRANCISCVS.

Quid de isto dicemus? quæ, dum rogabatur quam de seipso opinionem conciperet, respondisse tradunt; *Maximi peccatoris.* inferenti quæ alteri, tuta ipsum conscientia id asserere non posse, inquit: *Si quantumcumque sceleratum hominem tantam fuisset Christus misericordiam prosecutus, arbitror sanè, quòd multo*

multò me gravior exstitisset. Sur. tom. 5. in Vita,
& Bonauent. cap. 5.

S. ÆGIDIUS COMES S. FRANCISCI.

Huic id vnum curæ, sui magistri præuiis insisteret vestigiis. Rogabatur aliquando, *Quidnam agis pater? ille: Vix quidquam, nisi malum.* at, Quo pacto, ait alter, cum sis Minorita? quem iteratò compellans ÆGIDIUS, *Vter, inquit, paratior est: Deusne ad dandam, an homo ad percipiendam gratiam?* Dicente illo, Deus proculdubio ad dandam. Ergo, subintulit, *viden' me vera dixisse, malè me facere, qui Dei gratiam etiam paratam, non semper recipiam; nec in ea, uti par est, ambulem.* Sur. in Vita tom. 7.

S. LVDOVICVS EPISC. TOLOS.

Vtebatur religioso quodam consultore LVDOVICVS TOLOSANVS ANTISTES, priusquam sacro ordine & habitu S. Francisci esset initiatus: dumque maturè cum eo deliberaret, & humilitatis sibi vestigia præfigeret, tandem ita orsus: *Scio nihil tam gratum Deo, quàm si vita merito magni, tamen non magni, sed humilitate infimi videamur: cum tanto quis Deo sit pretiosior, quanto propter eum est vilior sibi.* Ex Vita eiusd. cap. xi. impressa apud I. Moretum.

SYLVANVS EPISC. TROIANVS.

Erat hic etiam vir sanctissimus, qui admiranda à Deo orationis virtute impetrauerat. Et ecce importunè eum sollicitant incolæ, ut nauem onerariam, quæ immobilis permanebat, in mare suis precibus deduceret. Ille humili vultu voceque, quasi indignabundus, *Absit, inquit, à me, qui peccator sum, istud postuletis: neque enim id attentare est mearum virium, sed insti alicuius.* Ita humiliter de se sentiunt veri

Dei ministri, quo inanis gloriæ inquietos stimulos euadant. Tipart. histor. lib. 12. cap. 8.

FRANCISCVS BORGIA SOC. IESV.

Priores illos minùs admirabitur, qui mentem oculosque in BORGIAM coniecero. Venerat de via fessus, & hospitium extra opidum subire compellitur, ac in illo stramineum thorum. accubat cum eo Bustamantius, qui tota nocte imprudens emissio phlegmate (laborabat enim tussi) collegam fœdabat. primo diluculo, cōperto quod res erat, veniam precatur. cui humilis pater: *Non est quòd ea ex re labores: nec enim dignior vsquam me locus spūto aspergi aut fœdari potuit.* In vita eiusd. lib. 4. c. 5.

I D E M

Acceperat impostorem quemdam triremibus addictum, quòd se Franciscum Borgiam simulasset, iactassetque. quo intellecto; *Si, ait, triremibus addicitur, qui meum nomen sibi vendicat; quid de me fieri par est, qui non inane nomen porto peccatoris?* Ibidem cap. 1.

HYPOCRISIS.

I E S V S C H R I S T V S.

DEduxit me scribendi æstus ex salutifera humilitatis valle, ad impios subdolosque omnis nequitiae vertices, HYPOCRITAS. quorum conuersatio congregatioque, quia noxia & sterilis, ideò eos tanta diligentia & cura à nobis eliminandos, toties insinuauit DEI FILIVS: & luculenter quidem, pluribus concurrentibus ad audiendum eum. *Attendite*, dicebat ad discipulos, *à fermento Pharisaorum, quod est hypocrisis.* eiusque naturam & conditionem, alio

alio in loco, præsertim Matth. cap. 23. latè deduxit.
 Prouidè etiam monet Ethnicus:

*Cedamus patriâ, viuat Arturius isthîc,
 Et Catulus, maneant qui nigrû in candida vertât.*

Luc. cap. 12.

EVGENIVS CARD.

Quapropter non malè sensillè dicendus est iste.
 Percontanti enim, quósnam Ecclesiæ maximos re-
 putaret hostes; *Hypocritas*, replicauit. Quid ita? illi
 enim falsis veri imaginibus, velut quadam Gorgo-
 ne armati, cuncta euertere moliuntur: quamuis in-
 terim cælum ipsum ne corruat, humeris sustinere
 videantur. Au&. dict. Memorab.

FREDERICVS III. IMP.

Memorabilis quoque & non silenda huius vox.
 Audiebat dicentem quemdam è domesticis, se ali-
 quando in ea loca peruenturum, in quibus nulli fo-
 rent hypocritæ. & dicebat: *Ultra Sauromatas ergo,
 & glaciale Oceanum tibi eundum: sed neque cum eò
 veneris carebit hypocrisi locus, si modò & tu homo es,
 non Deus.* Neminem inter homines reputabat, qui
 non aliquâ sui parte fictus fucatusq; sit. Æn. Syl-
 uius de Frederico III.

ALPHONSVS ARAG. REX.

Æquè illustre est quod sequitur. Cùm post Afri-
 canâ victoriâ in Ænariam insulâ venisset ALPHON-
 SVS, audiens Antoniû Picentem ordinis Eremitarû,
 magnû hypocritâ vermiculari morbo absumptum;
 dixisse fertur: *Ideò Deus tantoperè in hypocritas sa-
 uit, quia dum homines decipiunt, Deum ipsum tam-
 quam sceleris mediatorem interponant. Ideoque ad-
 huc viuentes vt plurimum plectuntur, vt intelligant
 mortales, quanta ea culpa sit, qua Deum etiam in ipsa*

vita habeat indubitatum ultorem. Panorm. de
Gestis. & Æn. Syl. de Dict. eiusd.

IACTANTIA, *vide* OSTENTATIO.

IDOLA DII GENTIVM.

S. IULIANVS MARTYR.

DÆMONIA GENTIVM DEOS pertractamus: de
quorum superstitiosa vanitate quia alio in lo-
co egimus, vnicum dūtaxat vtriusque sexus exem-
plum in præsentī proferemus, quo clarè nobis pa-
teat, quàm liberè eam aspernati olim viri sancti.
Et quidem compulsus iis litare IULIANVS, abdicato
veri Dei cultu, hac voce Præsīdem compellabat:
Dij vestri lapidei sunt, aut arei. Si arei, meliores eis sunt
cucumæ, quæ ad hominum vsus è metallo conflantur.
Sin' lapidei, respuendi sunt: quia ex ipsis sternuntur
platea ad euadendum lutum. Sur. tom. 1. in vita.

S. ANASTASIUS MARTYR.

Vide ARGVTE DICTA.

S. CÆCILIA.

Nec minùs prudenter & animosè sponsa Chri-
sti CÆCILIA. quæ iussa ab Almachio Præfecto ido-
lorum acerrè thus imponere; *Nescio, aiebat, ubi-*
nam tuos oculos amiseris: nam quos tu deos dicis, ego
& omnes qui sanis oculis sumus, videmus esse lapides,
as, & plumbum.

Heu miseri! qui vana colunt, qui corde sinistro
Relligiosa sibi sculpunt simulachra, suumque
Factorem fugiunt, & quæ fecere verentur.

Idem tom. 6. in vita.

S. AGATHA.

Vide ARGVTE DICTA.

Require

Require Apophth. de CHRISTO, & CONSTAN-
TIA RELIGIOSA ET PIA, &c.

I E I V N I V M.

IESVS CHRISTVS.

ARdentes dæmonū sagittas IEIVNII frigore re-
stinguēdas, dicebat Hieronymus: eoq; corpo-
ris passiones certo certius sanandas, si debito modo
adhibeatur. Et quidē discipuli Ioannis accesserūt cū
Pharisæis ad IESVM, rogantes: Quare nos & Phari-
sæi ieiunamus frequenter, discipuli autem tui non
ieiunant? audierant enim dicentem eum, se cū pec-
catoribus versari, vt eos ad pœnitentiam vocaret:
vnde quasi inferūt, Quare ergo non doces discipu-
los tuos ieiunare? quibus ille, ex congruentia tem-
poris argumento sumpto, *Non possunt, ait, filij sponsi
lugere, quamdiu cum illis est sponsus: venient dies, cum
auferetur ab eis sponsus, & tunc ieiunabunt.* Signifi-
cabat autem præsentiā suā esse causā lætitiæ
& hilaritatis se sequentibus: non luctus aut doloris,
cuius index est ieiunium. Matth. cap. 9.

SYLVANVS ABBAS.

Hic in deserto Scythiæ vnā cum Zacharia disci-
pulo die ieiunij iter faciens, ad cœnobiū quoddam
diuertit: vbi comiter exceptus, manducauit. cumq;
inde secederet, discipulum in via bibentem repre-
hendit, quòd eo potu ieiunium solueret. qui, Iam
vterque illud soluimus in cœnobio, ait. cui SYLVA-
NVS; *Minimè, inquit: nam illud non ieiunij solutio, sed
charitatis communicatio fuit.* Existimabat itaq; pos-
se aliquid prægustari in sodalitiō exterorum: eum-
que morem Ægypti monachis celebrem fuisse, au-

Et or est Cassianus. Sabellicus lib. 2. Ebor. de Castig. corp.

ANONYMVS ANACHORETA.

Venerant ad eum Cassianus & alij quidam, quos admodū liberaliter accepit. Rogatus autem, cur in fratrum susceptione regulā ieiunij more Palestinæ non obseruaret; respondit: *Ieiunium semper meū est, vos verò non semper. & quamuis ieiunium res sit utilis & necessaria: in nostrā tamen voluntate est. Charitatis autem plenitudinem lex Dei exigit à nobis.* In vitis P P. cap. de Hospital.

ANONYMVS.

Eiusdem mentis iste. Diuerterant ad eum quoque duo Eremi illius incolæ: quos, licet ipse vespere de more cibum non caperet, humaniter ad cellam & mensam deduxit, dicebatque: *Ieiunium suam mercedem habet. Qui manducat propter charitatem, duo mandata implet: quoniam propriam voluntatem à se abdicat, & mandatum implet, reficiens fratres.* Ibidem.

MARCIVS ANACHORETA.

Neque minori admiratione dignum reor MARCIANVM: qui cū Anitum se inuisentem ad vescendum hortaretur, & is recusaret quòd ante vespere cibum non sumeret; Nos quoque, inquit, *eandem quam tu viam amplectimur & vitam: ieiunium cibo præferimus, quo etiam ante vespere non utimur: at charitatem ieiunio præstantiorem scimus, utpote quæ lege Diuinā præcipitur, cū illud sit nostri arbitrij & voluntatis.* Theod. in histor. Sanctorum Patrum, cap. 3.

S. BERNARDVS.

Arguebatur aliquando hic, quòd ad hospitum aduen-

aduentum extra ordinem cœnasset. at, *Non ego, inquit, sed charitas comedit & bibit.* Æn. Sylu. lib. 2. Comm. in Panorm.

S. LEO PONT.

Quantæ verò utilitatis sit cum bona rectiq; conscia mente ieiunium, crebriùs inculcatum à LEONE accepimus. cui in ore ea vox: *Parum fructuosè corpori esca subtrahitur; nisi mens ab iniquitate renocetur.* Hinc in quadragesimali Hymno canit Ecclesia:

*Sic corpus extra conteri
Dona per abstinentiam,
Ieiunet ut mens sobria,
A labe prorsus criminum.*

In vita eiusd.

S. HIERONYMVS.

Ille etiam Saluiam ad hanc corporis castigationem cohortatus, *Melius, inquebat, est stomachum tuum dolere, quàm mentem: imperare corpori, quàm seruire: gressu vacillare, quàm pudicitia.* In Epist. ad eamdem.

YPERICIVS ABBAS.

Hic autè percontanti, quid esset Ieiunium; *Frænum,* aiebat, *Monachis aduersus peccatum. Qui autem illud abiiciet, velut equus furens desiderio feminae rapietur.* In vitis PP. part. 2.

THOMAS MORVS.

Valet autem in Ieiunio, quod in aliis virtutum operibus locum habet, illud: Fides libenter accipit quidquid arduum videtur incredulis; vt de Quadragesimali ieiunio scripsit Augustinus. at nostri temporis Politici & hæretici, iuxta Persarum & Ægyptiorum institutum (cui adhærere malunt, quàm Ecclesiæ Catholicæ & S S. Patrum decretis) non

nisi propter modestiã quamdam, & carnis infrenatę
dominium abstinent, quocumque tandem die. qui-
bus non minùs sapienter quàm facetè respondit
THOMAS MORVS, Christi martyr celeberrimus;
*Hoc si ita est, inquit, nec coniugati facile ieiuna-
bunt, qui facilius remedium in promptu habent: ne-
que etiam virgines, ne impudici iuvenes eas à carnis il-
lecebris titillari aduertant: denique nihil hoc aliud est,
quàm vt suam quisque libidinem prodat.* Th. Sta-
plut. in vita eius, cap. 12.

*Lege tit. de ABSTINENTIA & CASTIGA-
TIONE CORPORIS.*

IGNORANTIA.

COMES AVIONENSIS.

IGNORANTIAM, quę, Boëtio teste, miseros trami-
te deuiò abducit, plures in seipsis laudasse acce-
pimus; neque expendisse illud Senecę in Octauia:

Inertis est, nescire quid liceat sibi.

Ita Ludouicus Franciæ Rex, non ille quem pietas
& doctrina commendauit, COMITEM AVIONEN-
SEM in cœuobio S. Martini de Turri, inter canon-
icos in choro Psalmos decantantem, scommate & ri-
su excepit. qui non minùs liberè, quàm eleganter
subintulit: *Rex indoctus, est asinus coronatus.*

Corozetus.

ANONYMVS.

Venerat ad presbyterum illitteratum & ignarum
quispiam homo (vt apparet) facetus. qui dum multa
ex eo inquireret de Scripturarum explicatione, alter
se nescire fassus, hunc locũ in medium attulit; *Lit-
tera occidit.* quod scitè excipiens ille: *Benè canisti,*
ait,

ait, *mi Domine, ne te littera occideret, quia nullam cal-*
les. De quo ita lufit Th. Morus in Epigramm.

Magne pater, clamas, Occidit littera: in ore
Hoc unum, Occidit littera, ſemper habes.

Cauifti benè tu, ne te vlla occidere poſſet
Littera: nam nulla eſt littera nota tibi.

Vide Apophth. de DOCTRINA IN PRETIO
HABITA. item, INSCITIA.

IMPERIVM, EIVSQUE AD- MINISTRATIO.

IOVIANVS IMPERATOR.

IMPERIVM ob oculos ponimus: cuius prudens
 Irectaque adminiſtratio, populũ ſervitutis atq; in-
 teritus euidentibus periculis eripit. Qui Iuliano
 Apoſtatę ſucceſſit IOVIANVS, cùm ad imperiũ con-
 cordibus populi votis vocaretur; clamabat: *Ego*
Chriſtianus ſum, infidelibus nolim imperare. inſi-
 nuans non eſſe poteſtatem niſi à Deo, eaque vten-
 dum non eſſe apud eos qui Deum ignorant.
 Niceph. lib. 10. cap. 13. Eutrop. lib. 11.

LEO MAGNVS IMPERATOR.

Et huius cæleſte dictum. Dum quidam ab eo vr-
 bis præfecturam petiſſet, eaque alteri contra ſpem
 data eſſet; apprehenſa Imperatoris purpurâ, *Qui,*
inquiēbat, tali purpurâ ornatur, mentiri non decet.
 Cui IMPERATOR: *Sanè hoc quoque Imperatorẽ decet,*
nemini cedere, aut ſubditum eſſe, maximè ubi id cum
Reipub. incommodo fieret. Cedrenus in Leone.

MICHAEL IMP.

Quid autem iſte? Hortabantur eum amici, ſe for-

titer Leoni opponeret, remque armis experiretur. At is agrè ferens se ad bellum ciuile incitari, misso ad Leonem diademate & purpura, vtrò imperio regnoque cessit, dicens: *Malim vitam propriam amittere, quam vel unam Christiani sanguinis guttam effundere, aut meo nomine effusam cernere.* Cedren. in vita.

THEOPHILVS IMP.

Eiusdem Cedreni auctoritate constat, THEOPHILVM Imperatorem contemplatum quādoque è vestibulo palatij nauē onerariam plenis velis portum petentem, rogasse cuius ea esset: dicentibus quibusdam, Theodoræ tuæ coniugis; *Quid, inquit, nescitis me diuinitus in Imperatorem euectum, vxorquē mea nauclerum me facit? Anne vlla umquam reperta est Augusta, qua maritum suum viderit mercatorem?* iussuque è vestigio nauem cum mercibus & armamentis flammis tradi. Ibid.

SIGISMVNDVS IMP.

Interrogatus, quem virum imperio dignum existimaret; *Eum, aiebat, quem neque res secunda extollerent, neque aduersa deprimerent.* Benè Claudian.

—— *Tunc omnia iura tenebis,*

Cum poteris Rex esse tui.

Æn. Syl. lib. 4. Comm. de Reb. Alphonfi.

VALENTINIANVS IMP.

Quamuis autem eximia laude non careat recta imperij regni que administratio, suas tamen difficultates habet & pericula. ita vt verissimū sit illud, Honores onera. Cōtemplatus est id VALENTINIANVS Imp. à quo dum Salustius quidam, pro nauatâ in eiusdem electione operâ, eam gratiam posceret, vt præfecturæ oneribus quâ perfungebatur, liberare-

beraretur; *Ideòne*, ait, *hanc mihi molem imposuisti, ut ne digito eam attingeres.* Zonar. tom. 3. Annal.

ALPHONSVS ARAG. REX.

Voluebat idipsum animo ALPHONSVS. qui non ignorans perdifficilem regni imperiiq̃ue adinistrationem, eo quòd tam varia essent subditorum ingenia & sensus; dicebat: *Quàm optarem quemuis popularium meorum Regem fuisse! tum demum quippe experti, Regum Principumve citras agnoscerent.*

Panorm. lib. 3. de Gest. eiusd.

Vide Apoph. de REGE & REGNO, ac PRINCIPE.

IMPIETAS. *Require BLASPHEMIA,*
IN CHRISTIANOS ODIVM, &c.

INCONTINENTIA. *Vide LIBIDO.*

INFERNVS.

ABBAS OLYMPIVS.

SVbea nunc animum inextinguibilis ille ignis, Sin Dei furore (vt loquitur Scriptura) succensus: qui succensione non indiget, & ardore quo impios adurat, non caret: cuius vel sola cogitatio peccati libidinem refrenat, & in Dei amore proficiamus, impellit. Ita ABBAS OLYMPIVS, cùm cellulam perexiguam incolet, quam & æstus impetebat & cyniphum aculeata turba, rogatus, quî in ea tanto tempore moraretur; *Libens*, respondebat, *istâ tolero, ut futuris cruciatibus eripiar. Cyniphes quippe perfero, ut immortalem effugiam vermem; Ignem verò, sempiterni ardoris supplicia, perhorrescens.* Climac. in Prat. Spirit. cap. 141.

ALE-

ALEXANDER ABBAS.

Venerat ad eum quidam è fratribus Eremitis querulus quòd acedia animique torpore infestaretur: ideoq; locum mutare se velle affirmabat. Cui ALEXANDER: *Fili. signum est te neque celorum neque inferorum regnum in mente habere: nam qui ista concipit, crede, acediam non sentit.* Ibid. cap. 142.

FRANCISCVS BORGIA DVX GAND.

Et quis BORGIAM non eloquatur? Tertianâ laborabat graui & ardente: cumque alterno ac nouercali die recurrente, ignis medullas concoqueret; *Ecquanam, inquit, illos flammæ vrunt, qui ob flagitia apud Inferos æternas pœnas sustinent: quiq; expiante igne, cum certa beatitudinis spe purgantur.* Ribad. in Vita, cap. 5.

THOMAS MORVS.

Prodeat hîc etiam MORVS: vir, si alius vllus, religiosus & timoratus. qui percontanti, quænam expeditum magis ad Inferos iter redderent; dicebat: *Luxus & libido.* quod etiam hoc disticho, Progymnasmatibus suis inserto, indicauit:

*Si quis ad infernos properat descendere Manes,
Huc iter accelerant Balnea, Vina, Venus.*

In Epigramm. Th. Mori.

SENEX ANONYMVS.

Res mira quam refert venerabilis Beda. Senex quidam vitæ restitutus in Eremum cōcessit: vbi supra hominem austeram & religiosam vitam duxit. Increpabant vicini, quòd se enecaret. quibus ille in lacrymas solutus: *O utinam vobis datum ea videre, quæ ego vidi! certo certiùs adfirmo, has pœnas nihil esse ad æternas illas, quæ mihi visæ.* Beda de Gest. Angl.

ANO.

ANONYMVS.

Fuit hic Ministellus Lutheranorum, qui magna vocis contentione in Purgantem ignem fuerat debacchatus, ita vt illum iam planè se sustulisse gloriaretur. cui vir quidam primarius: *Tu quidè Purgatorium dicendo sustulisti, utinam etiam infernum auferres.* Nimirum, vt omni prorsus timore sublato, liberè in quoduis scelus prolabamur. Hist. nostri temporis.

INGRATITVDO.

CASTRVTIVS LVDOVICI IMP. PRÆFECT.

Quemadmodū nihil rationi conformius, quàm beneficium beneficio cōpensare: ita nihil magis ab ea remotius, quàm beneficiorū acceptorum obliuisci, & gratiā ingratitudine præmiari. Cōquerenti apud Pilas corā Ludouico Imp. de CASTRVTIO, quòd se probris affecisset, Guidoni Tarlato, ei-que ingratitudinem obiicienti, germano sermone respondit CASTRVTIVS: *Bestiæ calcaribus & sustibus opus suum exequuntur: nec de ingratitudine credendum ei, qui numquam fuit gratus.* Imperatore verò in cachinnum soluto, Tarlatus, eo non salutato, equū conscendit, & abiit. Auct. Serm. Conuiui.

ALPHONSVS ARAG. REX.

Obiurgabatur, quòd in Aluarum Lunam, hominem planè sibi ingratum, tanta cōtulisset beneficia, quorū ne memoriam quidem haberet. &, *An ignoratis, inquit, ingenti beneficio non nisi ingenti ingratitudine satisfieri?* Et sanè:

Obruit ingentes ista procella viros.

Panorm. de Gest. eiusd.

FRAN-

FRANCISCUS BORGIA DVX.

Huius item frequens illa vox, præsertim cùm aucupio vacaret: *Carniuoras feras agreste ingenium exuere, atque mansuetas reddi, quis non miretur? hominem verò rationis & orationis participem, tot tantisq; beneficiis ornatum, adeò ingratum, ut vocanti Deo parere nolit?* Ribad. in Vita, lib. I. c. 5.

ANONYMVS.

Quidam multis beneficiis affecerat hominem rusticum & agrestem: qui tamen benefactorē suum miris modis laceßere non desinebat. quod intuitus ille, *Hem! inquit, quàm verum est commune adagiũ:*

Si vngis, pungit: si pungis, rusticus vngit.

Auct. Serm. Conuiual.

BELLISARIUS IVSTIN. IMP. PRÆFECTVS.

Require INVIDIA.

ALPHONSVS ARAGONIVS.

Quid? iam ingratitude limits emensum reuocat me & reducit ALPHONSVS. qui offensus cuiusdam, de quo optimè meritus erat, ingratitude, hoc se dicto repressit: *Quare ego isti succenseo? cùm Deus ampliora in me beneficia contulerit, & ego longè Deo ingrator sim, quàm hic erga me fuit?* Ita hæc virtus in magnis & heröicis animis elucet: cùm indomitæ mentis sit, indomitæ etiam iræ laxare frēnos.

Ioan. Strigelius.

THOMAS MORVS.

Videbat vir inclytus & summus, homines tam facilè beneficiorum obliuisci, tardè autem maleficiorum. & ait; *Beneficia pulueri; si quid mali patimur, marmori insculpimus.* Thom. Staplut. in Vita, cap. 11.

INSCI-

INSCITIA.

ARSENIUS ABBAS.

*S*cire aliquid laus est, pudor est nil discere velle,
 Saiebat magnus Cato. Sunt tamen qui etiam IN-
 SCITIÆ suos fructus & emolumenta adscribunt. Et
 quidem ABBAS ARSENIUS, percontanti Euagrio
 monacho Græcarum litterarū peritissimo, cur mo-
 nachi Ægyptij rudes alioquin & indocti, tantis es-
 sent virtutibus ornati præ aliis; respondit: Nos, qui
 alienis confidimus laboribus, nō possumus ita tamquam
 ex propriis fructum percipere: y verò qui in propriis
 laboribus occupantur, meritò etiam proprios fructus
 colligunt. Sur. tom. 4. in Vita.

S. ANTONIUS.

Famâ nominis eius permoti quidam Philosophi,
 cū ad eum venissent, & velut indoctum despexis-
 sent; ad illos conuersus, *Quidnam*, inquit, prius est,
sensus, an litteræ? item: *Sensûsne ex litteris, an è con-*
uerso, ex sensu litteræ? Asserentibus autem sensum
 esse auctorem & inuentorem litterarum, Ergo, in-
 tulit ANTONIUS, *cui sensus incolumis est, hic litteras*
non requirit. Athanas. in Vita.

S. AVGVSTINVS.

Quid ille? audiuerat mira narrantem Potitia-
 num de conuersione quorundam aulicorum ex le-
 ctione vitæ S. Antonij: & Alipium qui fors aderat,
 inuadens, *Quid?* inquit, *surgunt indocti, & calum-*
rapiunt: & nos cum doctrinis nostris siue corde. Ecce
ubi volutamur in carne & sanguine. Coll. ex lib. 8.
 Confess. cap. 8.

DOMI-

DOMINICVS IDIOTA.

Erat is religiosæ & laudabilis vitæ, at planè inscius. cui cùm aliquando Gerardus à Nazaretho vellet litterarum elementa tradere, eaque addiscere ei esset perdifficile, dicebat: *Verè magis Deo placere potero iustè viuendo, quàm si tempus perdidero horum quidquam inutiliter addiscendo.* Gerard. à Nazareth, cap. 6.

ANONYMVS

Roganti cuidam, cur inscij & indocti vsque adeò amplectantur suas commentatiunculas, & si quid fortè oportunius dicant; *Miraris?* inquit. *Quòdnam quæso animal impensius amat suos fœtus, asino & simiâ?* Appositè certè, inscios asinis & simiis comparabat. Ita enim eorum personam induens Persius, cauillatur:

*Non ego cùm scribo, si fortè quid aptius exit,
Laudari metuum: neque enim mihi cornea fibra est.*
Auct. Serm. conuiual.

*Huc refer Apophth. de IGNORANTIA,
DOCTRINA, & ERVDITIONE.*

INTEGRITAS VITÆ, INNOCENTIA.

IESVS CHRISTVS.

INNOCENTIÆ puritatem, verum omnium virtutum fontem, amplectimur: quam Christianum populum decere, vel maximè ex eo constat, quòd DOMINVS NOSTER suos adhortatus, subiūgat quasi concludens: *Estote ergo prudentes sicut serpentes, & simplices sicut columba.* Et iterùm alio loco oues eos nominat, & agnos: oues quidem, vt innocen-

tia

tia Christiana ouibus æquetur; agnos, vt aghorum naturam simplicem, mentis simplicitas imitetur. Matth. cap. 10.

Require CONSCIENTIA BONA.

ALPHONSVS ARAG. REX.

At in ALPHONSO etiam admirabilis hæc virtus fuit. qui percontantibus suis, cur rariùs satellitio stipatus incederet; respondebat: *Innocentiam comitem habeo*. Innuebat autem Rex prudentissimus, eum demum ab omni improborum incurſu munitum, qui propriam innocentiam habet comitem: adeoque verum esse illud Horatij:

Integer vita, scelerisque purus,

Non eget Mauri iaculis, nec arcu, &c.

Panorm. lib. 2. de Gest. eiusd.

ALBVQVERTIVS PROREX INDIAE.

Veniat & ex vltimis orbis finibus ALBVQVERTIVS. qui, dum grauis tempeſtas ingrueret, & quâ vehebatur, nauis in discrimine eſſet, vidit puerum aquis in nauim deſluentibus penè ſuffocatum. quo, & ſimul animo arrepto, *Huius*, aiebat, *innocentiâ fretus, confido me Chriſti benignitate è fluctibus emerſurum*. Audiit Chriſtus, adfuit, & emerſit. Oſor. lib. 8. de Reb. Eman.

INTEMPERANTIA.

MACARIUS ABBAS.

Quemadmodû omnes appetitiones ſedat Temperantia, & efficit vt rectæ rationi pareant: ſic huic inimica INTEMPERANTIA, omnem animi ſtatum inflâmat, conturbat, incitat. Vnde MACARIUS accedenti ad ſe è fratribus cuidam ſub meridiem,

Y

qui

qui præ æstu aquam ad restinguendam sitim postulabat, eiusdem intemperatum bibendi desiderium temperavit, dicens: *Umbratibi sufficiat: multi namq; nunc iter agentium, aut nauigantium, hac releuatione priuantur.* Socrat. Trip. hist. lib. 8. cap. 1.

ALPHONSVS ARAG. REX.

Neque caruit hac laude ALPHONSVS: qui, contemplatus quàm insatiabilis esset humanus animus, & ——— quòd nemo quam sibi sortem

Seu ratio dederit, seu fors obiecerit, illa

Contentus viuat:

dicebat: *A diis olim, Ioue, Neptuno, & Plutone, omnia trifariam sorte diuisa; & quisque ea contentus, quæ sibi obtigit. Homini verò, neque quod satis, neque quod minus, satis umquam est.* Panorm. lib. 4. de Gestis Alphonsi.

INVIDIA.

BELISARIVS IVSTIN. IMP. PRÆFECTVS.

Aggredimur, -quo Siculi non inuenère Tyranni
Mains tormentum, ———

INVIDIAM, dirum homini exitium. Cuius viuum exemplar est BELISARIVS. dum namque subactis Vandalis, actoq; de Persis triumpho, Iustiniano Imp. suspectus redderetur, oculis eius iussu orbatur. At is tugurium ad viam regiam cōstrui curauit, vbi stipem à prætereuntibus sibi erogari, hac verborum formula postulabat: *Viator da obolum BELISARIO: quem Virtus extulit, cecauit INVIDIA.*

Procop. & Crinit. lib. 9. cap. 6.

CAROLVS V. IMP.

Quid autem magnus ille CAROLVS? Postulabat
ab eo

ab eo Dux Gandiæ Borgia, sæculum deferendi facultatem; & non obstante quòd prudenti eiusdem consilio opus haberet IMPERATOR, impetrauit. Tū adstantes ita compellans CAROLVS; *Ego de hoc facto, ait, sic sentio: plures eius amulos futuros, quàm imitatores.* Legerat fortassis illud Silij Ital. lib. 1. Bell. Pun.

Dum malus obtreētat facta immortalia liuor,

Non sinit adiutas ductoris crescere laudes.

Ribadin. in vita Borgia, lib. 1. cap. 20.

ACTIVS SINCERVS.

Re & nomine sincerus ACTIVS, hanc etiam pestem exosam habuit. cumque aliquando coram Frederico Cæsare altercatio incidisset inter Physicos, quidnam potissimum oculorum perspicuitati conducere; variis varia suadentibus, subintulit ille: *Nihil usque adeò huic morbo medetur, quàm Invidia.* Obstupuēre Imperator & medici. ad quos ACTIVS: *Numquid invidia omnia facit maiora & ampliora?* protulitque Ouidianum hoc distichon:

Fertilior seges est alienis semper in aruis,

Vicinumque pecus grandius uber habet.

Pontanus.

ANONYMVS.

Habebat hic Demeam, hominem inuidum, sibi familiarem. de quo rogatus, cur ita demisso in terram vultu & luminibus incederet; *Quia, inquit, alterius prosperitate dolet.* Hoc enim inuidorū proprium, obstipo capite lumine terram figere, & ex porrecto labello aliorum felicitatem trutinari. Ex relatis Auēt.

IOCOSE DICTA.

CLAVDIVS VIEXMONTIVS.

POterat sub aliis præsens titulus contineri : at quia urbano Ioco sua elegantia & lepos non deest, hunc etiam sub breuitate transcurrimus. CLAVDIVM VIEXMONTIVM referunt, dum confessionem cuiusdam excepisset, qui clandestinas demonis suggestiones detegere trepidabat, iocatum: *Na tu es fidelis diabolo secretarius. quippe qui times, ne fidem apud eum perdas, si peccata ab eo suggesta, in confessione prodas.* In Instit. de sal. Pœnit. peccator.

S. FRANCISCVS.

Commemorat de isto Nauarrus, quòd rogatus quàm perrexisset homicida, qui iuxta eum transierat; manus per manicas emittens, respondit : *Isthac non transiuit.* videlicet per manicas. Vnde concludit cū Adriano Nauarrus: Qui sic iniquè interrogatur, potest optimè respondere quod nescit, intelligendo non eo modo se scire, quo illud dicere teneatur. In Manuali cap. 12. num. 8.

LVDOVICVS XII. GALL. REX.

Lubens hunc infero, eiusque iocos laudo. Narrabat apud eum Alexander vir doctus, ex veterum monumentis, sacerdotes olim solitos & cane & capella abstinere: ut non attingere modò, sed ne nominare quidem eis liceret. & ille; *Pessimè, inquit, hoc seruatur ab Alebreti filio (erat is S. R. E. Cardinalis) qui & capra carnibus, Biarnensium imitatus mores, pro deliciis utitur; & agmen canum venandi gratia sustentat.* Paul. Æmil. in Vita.

IDEM

I D E M

Referenti cuidam, Valentinum Borgiam à Con-
saluo contra iusiurandum retentum, & vinctū mis-
sum ad Ferdinandum; *Ergo, ait, posthac pro Punicâ
Hispanicam fidem sumus celebraturi.* Idem.

ALPHONSVS ARAG. REX.

Claruit etiam hoc dicendi lepore ALPHONSVS.
quo Virgiliana lectione occupato, & quidem vbi de
Didonis morte agitur, dum fortè terræmotus con-
citatus esset, aliis obstupentibus, *Anne, dicebat, mi-
rum vobis videtur, si in morte tam celebris Regina
terra intremiscit?* Panor. lib. I. de Gest. eiusd.

MINACIVS.

Quidam hoc nomine, dum alexæ iactu pecunias
& vestes perdidisset, nudus ante tabernam conse-
dit, grauitè eiulans. Cui è familiaribus vnus: Cur
in tantum ploras? quid habes? Ille, *Nihil,* inquit.
Cur ergo ploras? subintulit alter. *Ideò,* inquit M I-
NACIVS, *quòd nihil habeam.* Pog. in Facetiis.

DECOCTOR ANONYMVS.

*Dum sua DECOCTOR subeuntem limina furem
Quærere sperat us nocte videret opes;
Nocte quid in nostris circûspicis adibus? inquit:
Hic ego nil mediâ cernere luce queo.*

ANONYMVS.

Habebat hic ancillam obesam & præpinguē, cui
pro deliciis erat frequens vsus salis & vini. rogatus
ille, cur ea ita perpetuò sisteret & excitaret sitim; ait:

*Ne caro præpinguis, sale non condita, putrescat,
Nostra vorat multum Phyllis obesa salis.*

*Hinc ne concipiat duros vesica lapillos,
Se liquido semper perluit illa mero.*

Collig. ex G. Sabini Poëmatib.

I R A.

IOANNES ABBAS ET PESIVS ANACHOR.

IRAM, quam Infanię initium nuncupavit Ennius, in proscenium post locos adducimus, quòd hi plerisque aliquando subitę iracundię causa & fomes. IOANNES monasterij in Scythia ABBAS, cùm ad P E S I V M Anachoretam visendum venisset, ab eoque inquisivisset quantũ in solitudine (in qua per annos 40. vixerat) profecisset; respõsum hoc ab eo accepit: *Sol omnia perlustrans, numquam me adspexit manducantẽ.* cui ilicò adiunxit IOANNES: *Neque me iratum.* Haud minoris meriti existimans nō irasci, quàm corpus quotidiano ieiunio atterere. Benè monet Statius 8. Theb.

—— *Ne frena animo permitte calenti,
Da spatiũ tenuemq; moram: male cuncta ministrat.
Impetus.*

Marul. lib. 3. Ebor. De pace & concord.

PASTOR ABBAS.

Mirum, quantum primores illos Eremiti incolas & Anachoretas deterruerit IRACUNDIA, & ad eam proclivitas. Rogabat PASTOREM familiarium quispiam, quo sensu illud Euangelij accipiendum esset, Qui irascitur fratri suo sine causa, &c. Qui iustę irę causam definiuit hoc modo: *Tum demum ex causa irasci potes, si à Deo timeas separari: qui ob alias iniurias irascitur, sine causa irascitur.* Quàm remoti ab hoc sensu ij, quibus ob atomum excitatam bilis finditur. Ita vt

—— *Arcadię pecuaria rudere credas.*

In vitis PP. Marul. suprà.

MONA-

MONACHVS ÆGYPTIVS.

Illum prioribus subnecto, utpote eiusdem cum illis sensus. Interrogatus enim, cur in tantū se omnibus corporis voluptatibus subtraheret; respondit: *Vt hac ratione omnem Iræ causam præcidam. Iræ enim ut de voluptatibus generatur, ita etiam voluptatum suppressione sopitur.* Nic. Call. lib. ii. hist. Eccl. cap. 43. ex Euagrio.

MACARIVS MONACHVS.

Addi meretur MACARIVS. qui sciscitanti, quid ita iniuriarum erga homines memoriam tenentes, vim animæ reminiscendi enecaremus; aduersus demones autem, cum acceptorum ab eis malorum reminiscimur, detrimentum nullum sentiamus; respondit: *Ideo hoc fit, quod prior illa affectio præter naturam, posterior secundum naturam sit.* Ibid.

IRRISIO.

FLANDRI POPVLI.

A Bominabilis est Domino omnis IRRISOR; & illusores deludit: ut habet inter Prouerbia Salomon. Quod FLANDRIÆ POPVLO olim euenit: rebellabant & tumultuabantur aduersus Ludouicum suum Comitem; qui Philippum Valesium Franc. Regem in auxilium vocabat. Quo audito, illi Gallum gallinaceum lineo panno expressum editori loco collocant, & cum eo hanc vocem inclamant: *Cum hic gallus resonabit, Rex repertus* (ita Philippum, quasi illegitimè ad regnū vocatum, appellabant) *Castetum occupabit.* Ast & illud paulò post, & omnes eos occupauit: magno & merito eorundem damno. Ann. Franciæ.

Paullò mitior ille. Promouerat ad consilium hominem indoctum & inexpertem. accurrunt ad eum plures, qui de eiusdem inscitia conquerantur. quibus ille: *Quot numero estis in palatio?* alij, Cētenario, inquit. Infert LVDOVICVS: *Quid? vos tanto numero non sufficitis ad rem quamuis discutiendam?* & ita confusos dimisit. Corozet.

STEPHANVS MOLDAVIÆ COMES.

Irruperant in eius fines plura Turcarum millia; quibus se ita fortiter opposuit, vt breui tēporis spatio omnes fuderit, profligarit, & bonam partem ceciderit, ac Oratores ad Byzantij Imp. cum muneribus & hoc dicto mittit: *Latrunculi aliquot Turcici, nescio cuius instinctu, meos fines depopulare ausi: sed, Deo comite, suæ temeritatis mihi pœnas dedere. Si similes illis adhuc tibi supersint, velim ad me eos destinari, quò & illi meritas pœnas luant.* & ita tanti Imperatoris potentiam quasi sibilo & cachinno excepit. Paral. Ab. Vsp. pag. 452.

IVDEX, IVDICIUM.

IESVS CHRISTVS.

AD IVDICIUM properamus, & IVDICEM: qui, vt sol non alius pauperi est, alius diuiti, sed omnibus communis; ita nec personam spectare debet, sed rei æquitatem. Reprehensus COÆTERNVS DEI FILIVS apud homines agens, quòd Sabbato curasset; *Nolite, respondit, secundum faciem iudicare, sed iustum iudicium iudicate.* Iudicare dignè de subditis nequeunt (inquit Greg. in Moral.) qui in
subdi-

subditorum causis, vel gratiam vel odium sequun-
 tur. Ioan. cap. 7.

I D E M.

Quin & verum illud Terentij esse, Iudicem vide-
 re oportere, ne quid accusandus sit; idem clarè edo-
 cuit, dum ad eum Scribæ & Pharisei adducunt mu-
 lierem in adulterio deprehensam. inclinans enim
 se deorsum, digito scribebat in terram: cumq; per-
 seuerarent interrogantes, erexit se, dixitque: *Qui si-*
ne peccato est vestrum, primus in illam lapidem mittat.
 Quo audito, vnus post alium abiit. Natura quip-
 pe Apophthegmatis est, compescere aliis insultan-
 tes. Ioan. cap. 8.

CÆCVS EVANGELICVS.

Tantum autem meritò iudicare cuilibet licere,
 quantum in seipso expertus est; docuit suo exemplo
 CÆCVS ille EVANGELICVS, qui à Domino visum
 recepit. Iudæi quippe eum vocantes, compellant,
 Da gloriam Deo, nos scimus quia homo peccator
 est. qui respondit: *Si peccator est, nescio: vnum scio,*
quia cecus cum essem, modò video. Ioan. cap. 9.

LIBERIVS EPISCOPVS.

Rogabat hunc Constantius Imperator, subscri-
 beret proscriptioni & excommunicationi Athana-
 sij. qui prudenter & discretè, *O Imperator, inquit,*
iudicia Ecclesiastica decet cum maximâ proferri iusti-
tiâ. Trip. hist. lib. 5. cap. 17.

BOSO REX ARELATENSIS.

Hunc eo iustius liber addere, quòd verè iustitiæ
 iudicii que in seipso exemplum exhibuerit. Cum
 namque ob alapam Episcopo suo sacris operanti in-
 flictam, apud Othonem primum Rom. Imp. capi-
 tis damnatus esset, & Archiepiscopus cum clero pro

illo intercederet; ipsemet reus se eorundem supplicationi opponens, *Non est æquum*, inquit, *ut rectum Imperatoris iudicium executioni non mandetur: cum non conveniat vel vllum verbum è principis ore frustra egredi.* Munsterus libro 2. Cosinogr. de Arelato.

ALPHONSVS ARAG. REX.

Clementissimus etiam ALPHONSVS, nūquam ita mansuetudinis & noxiæ lenitatis ingressus est fines, vt iudicij æquitatisve planè sit egressus. Quare cum equitum suorum quispiam multa per luxum & libidinem absorbuisset, & grauitè ære alieno opprimeretur; intercedentibus aliis, ne quod ære nō posset, corpore lueret; respondit: *Si tantum pecunia in sui regis aut patriæ commodum expendisset, audirem. nunc quoniam tantas opes impendit corpori, par est vt corpore luat.* Panorm. de Gest. eiusd.

TROCHONVS PRÆSES.

Habeat inter ceteros locum TROCHONVS Græcianopolitani Senatus Præses. Erat vir nobilis, qui furore potius percitus, rusticum ense districto aggrediebatur. Hic fugam capit: at frustra, altero instanter eum consequente. quid faciat? machæram, quam fortè secum habebat, educit: minas adiiciens iustæ defensionis. Alter vitæ prodigus, innocentem vrget & pellit: donec ab eo ipso, & loco & vita per machæram pellitur. Res ad TROCHONVM iudicem delata: qui, æquitate causæ attentâ, *Licuit*, inquit, *machæra se contra ensẽ tueri.* & id rectè. cum liceat vim vi repellere, adhibito (vt dicunt Canonistæ) inculpatæ tutelæ moderamine. Eiusd. Trochoni, in Decretis Curia.

PRINCEPS ANONYMVS.

Adiiciam & aliud facetū. Quodam PRINCEPE ad venationem egrediente, Astronomus qui fortè in illius aula, rogatus qualis aura futura esset; serenam prædixit. quod audiens colonus, pluuiam asserit, idq; euidētibus signis. Vix nemora ingressus PRINCEPS, densissimus imber oboritur. Laudat itaque colonum suum; & , *Ita censco*, inquit, *astrorum cursui posthac intendas: tu verò* (ad Astronomum versus) *ad rastra te promptius conferes.* Idem Georgius Sabinus ita expressit:

*Dixerat Astrologus celum sine nube futurum,
Principe silvarum lustra petente suo.*

*Dixerat e contra ruiturum nubibus imbrem,
Vertere consuetus bobus arator humum.*

*Vix ingressus erat Princeps nemus ilice densum,
Cum subito pluviæ præcipitantur aque.*

*Laudat aratorem Princeps, ipsumq; doceri
Astra: sed Astrologum sumere rastra iubet.*

INDEX CORRUPTVS.

INNOCENTIVS VI. PONT.

ABduci nōnumquam, imò plerumq; hoc quo, Iudices, & excæcari largitionibus potentūm, testis est experientia. Quod suis tribunalibus vitium proscribere conatus INNOCENTIVS, sacri palatij auditoribus stipendia cōstituit, ne muneribus pellekti, contra æquum decernerent. Dicebat autem: *Fameliici non facile alieno cibo abstinent, si quouis modo oblata sit edendi facultas.* insinuās quod in Sermonibus Horatius, — *Malè verum examinat omnis*

Corruptus index.

Platina in Vita.

ALE-

ALEXANDER SEVERVS IMP.

Re & nomine SEVERVS iniustitiæ vindex & victor iste. Intellexerat Vetronium Thurnium virum genere nobile, munera ab his & illis accipere, quibus multa se apud Cæsarem posse persuadebat. eum itaq; comprehensum & palo alligatum, fumo suffocari iussit, & per præconem clamari: *Fumo puni-
tur qui fumos vendidit.* Et mirum in modum suo favore prosequebatur eos,

—— est animus quibus
Rerumque prudens, & secundis
Temporibus dubiisque rectus;
Vindex auaræ fraudis, & abstinens
Ducentis ad se cuncta pecunia.

Ex Chion. orbis refert Georg. Richter.

IVDICIVM NON TEMERE FERENDVM.

NICODEMVS.

Sapientiam Iudicis ex eo spectari, ut non solum quid possit, sed quid debeat etiam; neque quantum sibi permissum, sed quatenus commissum, ponderet; auctor est Tullius. His enim perpensis, non temerè quis ad ferendum de quoniam IVDICIVM se ingeret: quod etiam sentiebat olim NICODEMVS. Nam cum Pharisei multa de Christi operibus ex seruis Pontificum aliisque audirent inuiti, eos acrius perstrinxere, seductosque esse, imò & maledictos inclamare, quibus NICODEMVS (ille, qui venerat ad Iesum nocte) *Numquid lex nostra iudicat hominem, nisi prius audierit ex ipso, & cognouerit quid faciat?* Non temerè ergo, sed ex causæ & æquitatis cogni-

cognitione procedendum insinuat. Ioan. cap. 7.

MOYSES ABBAS.

Quid de illo? accerseretur ut de fratre qui deliquerat, sententiam diceret. Venit, saccumque arenâ plenum humeris deculit. Rogatus, quidnam illud esset; *Peccata, inquit, mea sunt, quæ vix ferre praevaléo, minimè ergo aliena iudicanero.* Iac. de Vorag.

PASTOR PRESBYTER ET MONACHVS.

Venit ad PASTOREM religiosus quispiam, de cœnobio exire contendens, eò quòd cum fratre, qui malè apud quosdam audiebat, remanere nollet cui ille: *Ne facile malum credideris quod audiuisti.* cumque alius se ex relatu viri fidelis id accepisse assereret, adiecit: *Si fidelis esset, numquam id tibi dixisset.* Idem.

S. FRANCISCVS.

Id ipsum nobili exemplo etiam testatus est FRANCISCVS. qui, dum iter agens, incidisset in hominem miserum & nudum, ingemuit, eiusque nuditati condoluit. At frater illi comes; Quid, inquit, mœrore consuueris pater? etsi hic indumentis indiget, abundat forsan concupiscentiis. FRANCISCVS amoris fraterni non dissimulato, iussit protinus suâ se tunicâ detegeret, & pauperem contegeret; addens: *Disce non tam temerè de proximo tuo iudicium ferre.* ab eoque veniam supplex peteret, mandauit. Fulgos. & alij in Vita eiusd.

Vide Apophth. de CONSCIENTIA BONA.

IUDICIUM DEI.

HENRICVS MOGVNTINVS ANTISTES.

I VSTVM IVDICIUM iustitiamque commendauimus. At vt quilibet discat non reputari apud Deum infontem, si quis ea violat aut contemnit; exempla mira & supra fidem, sed à fidis scripta, proponam. Frederico Ænobarbo Imperante, HENRICVS MOGVNTIÆ PRÆSVL, vir imprimis pacis cupidus, Romæ accusatus, tamquam ad tale munus prorsus inutilis & ineptus: idque instigantibus per Arnoldum, qui ei successit, maleuolis. Eò ventum, vt duo Cardinales Moguntiam missi, de causâ inquisiuerint, HENRICVM damnauerint, & Episcopatu abdicauerint. Tulit HENRICVS, neque quidquam questus, quàm, *Iniuste iudicastis: Iesum Christum equissimum Iudicem appello, apud quem me exhibebo: venite.* Illi ioco illudentes, Cùm præcesseris, inquiunt, sequemur. nec vanè. iste enim post annum ferè & dimidium vitâ functus: quem hi vno die secuti. I. Lips. Mon. Polit. lib. 2. cap. xi.

ABBAS HERVELDENSIS.

De hoc etiam memoriæ proditum non absimile priori exemplum. Erat Burchardus Halberstadiensis Antistes, qui iniquam diu litem cum ABBA TE HERVELDENSI, manu magis quàm iure sustinebat. neque spes illi aut potentia, aduersario resistere. Ecce paucis ante mortem diebus, quam & rei illius vexatio consciuerat, vel saltem accelerauerat, Comitem Palatinum ad se vocat; & per eum extrema hæc Antistiti denuntiari rogat: *Scio me lege meliorem, lite tamen imparem simul cum vitâ cedere. ad Deum iudicem*

*dicem appello. Paret ergo se, ut causa coram eo tribu-
nali dicatur, ubi gratia & potentia speretis, sola iustitia
potest polletque. Neque diu post ABBAS interit, &
Antistes cum equum conscenderet, velut fulmine
ictus conidit, desitque hac voce: Abripior ad diui-
num tribunal iudicandus. Lambertus Schafna-
burgensis, circa annum .LIX. I. Lips. suprâ.*

PETRVS ET IOANNES CARVAIALII.

At notior res, & cognomine prodita in Ferdinãdo
quarto Hisp. rege. Erat is in iudicando præceps &
rigidus. quò factum, ut duos fratres in occulta cede
suspectos, at suspectos tantùm, nec conuictos, de
editâ rupe præcipites dari iusserit. Cum id sit, cla-
mant & vociferantur: *Insontes morimur; at quoniam
Regis aures iustissima defensionis obstructæ sunt, eum
ad summum Iudicem pronocamus, diemq; trigesimum
ab isto qui nobis ultimus, dicimus. Dicta nihil value-
runt: sententia tenuit; etiam ipsorum vadatio, nec
tempore nec die fallax. Quis neget diuinum illud,
& serium monitum:*

Discite iustitiam moniti, & non temnere Diuos?

I. Lips. ibidem.

IOANNES HAYNVS PRESB. ANGLVS.

Eiusdem etiam propositi iste. Erat ex iis quos
Anglia Christo martyres peperit. Iam enim mortis
sententiam, Elizabethæ Reginae iussu contra se in-
auditum prolata, intellexerat: & ad iudicem Gau-
dæum conuersus, *Si ita, inquit, Senatui & Reginae
visum ut moriar, ad summi & immortalis Iudicis
tribunal causam meam reseruo. Martyrol. Anglic.
anno 1582.*

FREDERICVS ROM. IMP.

Claudebam, sed FREDERICVS interuenit, ut
etiam

etiam personam suam exhibeat in hoc theatro. Principe immiti & crudeli nihil apud eum magis exosum. unde dixisse eum ferunt: *Vae vobis Principes.* & causam reddens, *Quales, dicebat, se dum vivere aliis prastiterunt; tales, cum moriuntur, in se iudices experturi.* & quid mirum? nam

Si quis quæ fecit patitur, iustissima pœna est.
Æn. Syl. de Dict. Alphonsi.

IVDICIVM EXTREMVM.

IESVS CHRISTVS.

ET hoc quidem occultum DEI IVDICIVM, aliud erit longè maius, longè horribilius, publicum illud, quo omnes nos adstabimus ante tribunal Christi, vt referat quisque prout gessit in corpore: & vt Manilius,

*Quasitor scelerum veniet, vindexque reorum,
Qui commissa suis rimabitur argumentis.*

Cuius iudicij districtam discussionem crebris parabolis insinuauit eiusdem futurus iudex CHRISTVS: idque vel maximè, vbi ad Phariseos conuersus, dicebat: *Quoniam omne verbum otiosum quod locuti fuerint homines, reddent de eo rationem in die Iudicij.* Intelligunt autem per verbum otiosum, illud, quod iustæ necessitatis aut piæ intentionis ratione caret. Matth. cap. 12.

REX ANONYMVS.

Legimus in vita S. Iosaphat, fuisse Regem potentissimum, qui vitam in luctu & mœrore peragebat. Miratus & indignatus frater, eum increpat. ille ingemens responsum suppressit, & non ita diu post, mittit de nocte tibicines ad fratris ædes, qui horribiles

biles ederent clangores (hoc enim illo æuo solenne erat, quoties in aliquem capitis sententia ferretur.) Quid faciat hæc inaudiens frater? turbatur, clamat: & atro habitu sumpto, ac cinere conspersus caput, primo manè ad regiam adproperat, Regis ad pedes supplex prouoluitur, delicti, si quod esset, veniam postulat. Cui REX: *Si tu tantum me timeas fratrem tuum, quem numquam laesisti; numquid ego meritò timeam diem illum, quo coram supremo Iudice, quem toties offendi, mihi erit comparandum? Si tu in tantum horrueris tubam illam humanam; quis non horreat diuinam, quâ omnes qui in monumentis sunt, audient vocem Filij Dei.* Præclarum, & verè imitandum Regis exemplum. Refert Bernard. de Busto in suo Rosario. item Spec. Exempl.

IVRAMENTVM, PERIVRIVM.

IESVS CHRISTVS.

IVRAMENTVM, quod omnis controuersię est finis, cum reuerentia adhibitum, licitum semper fuisse & sanctum, ex usu omnium gentium & tribunalium euidenter constat. quamuis in vanum & sine causa usurpatum, reprehensibile sit: obligans nihilominus, in re honestâ, iurantē. Significauit vtrumque Euangelij auctor CHRISTVS, dum visis turbis in montem secedens, eas doceret, inquiens: *Ego autem dico vobis non iurare omnino, neque per calu, &c. Sit sermo vester, Est, est; Non, non. quod autē his amplius est, à malo est.* Quo loco non vetuit ne quis iuraret (vt nostri Anabaptistę fingunt) sed duos Pharisæorum errores correxit, qui putabant quauis occasione iurandum per creaturas; & tale iuramen-

Z tum

tum non esse obligatorium. Dicit ergo nullo iuramento iurandum, nisi necessitas compellat. quia quod extra necessitatem adhibetur, à malo, id est, diabolo est introductum: ut explicat Maldonatus. Matth. cap. 5.

D. LUDOVICVS FRANC. REX.

Huius doctrine sedulus imitator iste, frequenter dixisse commemoratur: *Libens lubensque candentis ferri adustione paterer, si iuramenta eo pacto regni mei finibus proscribere possem.* Audiuit hæc qui vitam eiusdem conscripsit Ionuillus, & refert cap. 83.

IDEM.

Eodem auctore accepimus, dum ad pactum cum Saracenis de captiuorum redemptione stabiliendū, genus quoddam iuramenti pietati Christianæ dissentaneum exigerent, recusasse se eā formā iuraturum. Instantibus verò Proceribus, eo pacto iuraret, nisi captiuos omnes periculo vellet expositos; *Integrum*, inquit, *eis sit facere quod lubet: ego malim certe pius Christianus occumbere, quàm irato Deo beataque Virgine vitam ducere.* Ibid. cap. 46.

MARCELLVS II. PONT.

Et is Pontificatu inito, rogatus à Cardinalibus, ut de more illi diplomati subscriberet, quo iuramento obligaretur, se certum tantum Cardinalium numerum assumpturum; ratus non esse sufficientem iurisiurandi necessitatem, tenuit, dicens: *Re id prestiturus sum, verbis nolim.* Onuph. Panor. in Vita.

CONSTANTINVS MAG. IMP.

Iurauerat apud illum Arrius, se numquam eis opinionibus adhæsurum, propter quas eum Alexander Episc. Ecclesia eiecerat. Libertati itaque ab IM-

PERA-

PERATORE restituitur, hoc dicto: *Si recta est fides tua, benè iurasti: sin' autem impia, & tamen iurasti, Deus de celo de te ferat iudicium.* & ita Imperatore eluso, abiit: at Dei ultionem non euasit. Theod. lib. 1. Eccl. hist. cap. 14.

IVTHA OTHONIS II. FILIA.

Exemplis quæ de Iuramento scribere cœpimus, IVTHA OTHONIS II. FILIA finem imponet. Nutriebatur apud Ratisponam in Cœnobio religiosarum virginum. Unde eius fama permotus Vdalrici regis Bohemiæ filius, eam vi rapuit, & matrimonio iunxit. Detestatus illud facinus Imperator, iureiurando affirmat exercitum se in Bohemiam ducturum, & Vdalricum, eiusque filium pœnas sceleris daturum. Castra mouet, hinc Otho, illinc Vdalricus: cùm IVTHA (victa magnitudine periculorum muliebri pauore) per media tela patris colloquium, priusquam furor ardeat amplior, exposcit. Impetrat non alloquium tantùm, sed & pacem: at iusiurandum quo se obstrinxerat, vrget pater. Cui illa; *Vana est religio quæ sceleri locum facit. vim criminibus sacramenta non addunt.* Prudenter notabat iuramenta impia seruanda non esse. Munsterus de Germ. lib. 3. cap. 499.

IVRISPRVDENTIA.

PETRVS ALDOBRANDINVS CARD.

Iudicibus, qui IVRIS SCIENTIA carerent, Midæ auriculas affingebant veteres. neque aliud ad stolidos iudices ornamentum deuenire potest. Quantum verò Reipub. utilitati, imò & necessitati, conferat hæc scientia; docuit CARDINALIS ALDO-

BRANDINVS. Ille enim, *Facillimum est*, inquit, *sine Iuris prudentia ius ipsum peruertere: difficillimum etiam ius dicere, nisi cognoscatur.* Henricus Farnes. *suprà.*

I D E M

Iuris scientiam in Actione magis quàm cognitione consistere dicebat. Rogatus namque, quæ inter Principes maximè iustum existimaret; *Eum, ait, qui vite potiùs exemplo populum, quàm vocis testimonio instruit.* Ibidem.

IVSTITIA.

S. PAVLVS APOSTOLVS.

Commendemus etiam virtutum omnium dominam atque Reginam IVSTITIAM. sine quâ (vt habet Cicero in Officiis) nihil præclarum, nihilque laudabile homini euenire potest. Vnde eam in seipsum exerceri optabat Gentium Doctor PAVLVS: qui Festo se roganti, an Hierusalem ascendere vellet, & ibi iudicari; fortiter respondit: *Iudeis non nocui. Si enim nocui, aut dignum morte aliquid feci, non recusò mori.* Act. cap. 25.

LIBERIVS EPISCOPVS.

Require IVDIX, IVDICIUM.

MARTINVS V. PONT.

Nullum tam crebrò, quàm IVSTITIÆ nomen ex eius ore prodibat. vnde sæpiùs ad Satrapas suos, vrbiumque Rectores, illud regij Vatis vsurpabat: *Diligite iustitiam, qui indicatis terram.* Plat. in Vita.

PETRVS ALDOBRANDINVS CARD.

Veritatis testimonio inductus, solitus est dicere: *Neque Iustitia sine Principis auctoritate, neq; Principis*

eiſus auctoritas ſine Iuſtitia quidquam valet. Nihil enim aliud eſt IUSTITIA, quàm vis & robur Atlantis, quo mundum ſuis humeris ſuſtentat. Henr. Farnes. ſuprà.

I D E M

Interroganti, quid de Iuſtitia ſentiret; reſpondit:
Ars eſt & viuendi & vincendi. illa quippe
—— *Vtilibus rectum proponere ſuadet,*
Communeſq; ſequi leges, iniuſtaque numquam
Largiri ſociis.

Ibidem.

FREDERICVS & RVDOLPHVS IMP.

Vide CLEMENTIA, & MANSVETVDO.

ALPHONSVS ARAGONIVS

Æqui cultor iuſtiſſimus perſæpè in ore habebat:
Principes qui Iuſtitiam negligunt, perſimiles ſunt il-
lis, qui morbo comitiali laborantes, cadunt. Sciebat enim animæ nutrimentũ eſſe Iuſtitiam: quâ à Principe ſublatâ, nihil ei ſupereſſet ad veram vitam. Panor. & Æn. Syl. de Dict. Fact. Alphonſi.

IUSTINVS BYZANTII IMP.

Inter priores haud indecorè ſe offert IUSTINI Imperatoris, licet ætate longè prioris, virtus. Cùm enim eſſet corpore morbido, ac rarò ius diceret, iniuria & lites creuerant. quid ageret? Præfectum plena poteſtate ad coërcendum deputat. Qui ſumptis factæ poteſtatis infulis, pro Tribunali ſedebat. accuſatur primò vir nobilis, & in Aula gratioſus. Is ſpernit ſe ſiſtere, & in Aulam pergit. Pergit etiam Præfectus, & ad Principem (apud quem hic reus) intrepidè querelas defert, & ſimul inſignia acceptæ poteſtatis. Hic Imperator, non ſecùs ac Veſpaſianus olim, *Tu, inquit, quod es, eſto: & ius tuum in me,*

quidni meos? exerce. Duc, si peccavi, sequor: duc, si quis hic alius, sequetur, vel trahetur. Præfectus oculos & manus in Senatorem coniecit, eumque iudicio conuictum verberibus afficit, & magno ære mulctat. Ita paucis diebus vim & vitam Iustitia recepit. Coll. ex Mon. Polit. l. Lips. cap. 10.

L A B O R.

AGATHON ABBAS.

AMplectimur illud, sine quo nihil mortalibus dedit vita, vèdidere dii: cuius memoria dulcis, finis iucundissimus. de quo interrogatus aliquando AGATHON, utrum antecelleret laborem custodia interior, an verò è còuerso; respondit: *Homo arbori similis, cuius velut folia, sunt labor corporalis; fructus, custodia interior.* In Vitis SS. PP.

DOROTHEVS MONACHVS.

Huic etiam solene quotidie lapides ad mare colligere, è quibus annuatim hospitium fabricabat ægrotis. Cui dum quidam diceret, Cur in tantum conficis corpus tuum? *Quia*, inquit, *me illud occidit.* Sciebat enim (vt est apud Faustum Andrelinum in distichis) quod

Corrumpant forti celsas cum pectore mentes

Otia plumoso desidiosa toro.

Sozom. Trip. hist. lib. 8. cap. 1.

S. EPHRAÏM.

Nullus etiam hunc LABOR deterruit, quem tam seria vox commendat & ornat. ita enim Religiosum consodalem affari solitus: *Ne molestus tibi sit labor: nam multi etiam nihil agentes, à negligentia & torpore turbati sunt. Disce igitur operans, ne discere cogare*

cogâre mendicans. Idem in illud, Attende tibi,
cap. 5.

S. EVSTACHIUS.

Missos à Traiano milites, hospitio & conuiuio
excepit: hospiti verò pro solutione sollicito; *Ne ve-
reâre*, inquit, *mea seruitus & hæ manus exoluent mer-
cedem.* Quàm benè cum Apostolo de se dicere po-
tuit, Nullius vestem concupiui, sed ad ea quæ mihi
opus erant, ministrauerunt manus istæ. Sur.
tom. 6. in Vita.

SENEA ANONYMVS.

Sciscitanti cuidam, quid esset humilitas, quæve
eius viæ; dixit: *Humilitas magnum quid est & diui-
nam*; *viæ verò eius, Labores corporei.* Dorothe.
Doctr. 2.

ALPHONSVS ARAG. REX.

Quis hîc ALPHONSO aditum præcluserit? qui à
Matthæo Siculo notæ pietatis viro reprehensus,
quòd propriis manibus laborasset; subridēs, *Num-
quid*, ait, *Deus & Natura, nequidquam Regibus
manus contulere?* Panor. lib. 2. de Gest. eiusd.

IDEM.

Venerat ad eundem Senior, non modico vino
madidus. qui, vt intemperantiam suam excusaret,
dicebat: Verè lac senum est vinum. Cui ille subiun-
xit: *Sed Regum cibus est honos; quem dij immortales
non otio aut luxu, sed improbis laboribus & multo su-
dore homini vendunt.* quia, vt rectè C. Manilius,

—— longa dies acuit mortalia corda,

*Et Labor ingenium miseris dedit: & sua quemque
Aduigilare sibi iussit fortuna premendo.*

Ibidem.

L A V S.

IOANNES PONTIFEX.

QUod rebus fortiter gestis honesta subsequatur commemoratio, admodum LAVDABILE dicebat Seneca. & quamvis omnem laudem abominati sint viri sapientes; nihilominus IOANNES PONTIFEX, cum immodicè à quodam laudaretur, *Etsi, aiebat, plurima mihi affingat, multum tamen hac laude oblector.* Cur ita? quia per eam monebatur, qualis esse deberet. Æn. Syl. lib. i. de Gest. Alph.

S. GREGORIUS P P.

Magna etiam fuit huius erga laudantes se modestia. nam cuidam se mirificè extollienti respondisse fertur: *Deum precare frater, ut his quæ de me prædicas, dignus efficiar: sicut & tu dignus es, cuius opinio improbari non debet. Quare licet me tua commendatione inferiorem agnoscam, charitati gratias ago.* Ita prudentiss. PONTIFEX & laudanti se satisfacit, & humilitatis limites non excessit. Ioan. Diac. lib. 4. cap. 62.

S. CONSTANTIVS MONACHVS.

Haud parum est & exiguum, esse laudabilem, & laudari nolle; sed arduum & excelsum. Quo in genere emicuit supra alios CONSTANTIVS Anchaonitanæ Ecclesiæ MONACHVS. nam cum è longinquis terris quidam, eum videndi gratia, aduenisset, ostensumque sibi despexisset, eò quòd staturâ esset pusillâ & breui, (quasi corporis vitium animi virtutibus officere posset) irrisorem suum osculo excipiens, *Quàm lator, inquit, quòd tandem nactus sim hominem, à quo iure parvipendendus existimor.* Ego sanè
ut

ut habitu, ita & virtute pusillus sum. Quo facto dictoque satis declaravit, quantum ab humanæ gloriæ concupiscentia abesset, qui sic exultabat contemptus & irrisus.

*Sic qui fauoris gloriam veri petit,
 Animo magis, quam voce laudari volet.*

Greg. Dial. lib. 1. cap. 5.

CONSTANTINVS MAGNVS.

Et hunc beatum dicebat quidam Antistes, qui hîc in terris dignus esset, cui rerum summa committeretur, quique in cælis cum Dei Filio regnaret. At is eiusmodi sermonem indignè ferens, *Noli, inquit, hac verba in vanum fundere: Deum potius orato, ut & in hac & in futura vita, eius famulatu inueniar dignus.* Euseb. de Vita eiusd. lib. 4. c. 48.

ALPHONSVS REX ARAG.

Etiam inter hos sibi locum & laudem vendicat ALPHONSVS. Mirum in modum eum extollebat è Proceribus vnus, quòd esset regis filius, regis frater & nepos. verùm ille: *Nihil minori apud me loco est. Laus enim illa non est mea, sed maiorum. à me itaque elicienda, si qua erunt ornamenta.* Panorm. lib. 2. de Alphonso.

IOANNES HVNIADES.

Simili mente iste. Vocauerat Huldricum Cilix Comitem, ad se veniret in castra. at is renuit; Egon, inquit, Comes & Princeps ad te hominem nouum? Erat enim IOANNES non ita pridem in nobilium collegium adscitus. cui ille: *Non tuis maioribus, sed tibi me comparo: quamquam nec illis cedam, qui pugnando pro Christiana religione nobilitatis titulo accepto, maius lumen posteritati meæ comparauit.* Significabat cum Alphonso, gloriosius à seipso inclarescere,

rescere, quàm ab anis atavisque suæ claritatis radios
desumere. Panorm. suprâ.

CAROLVS V. IMP.

Vide Apophth. de ADVLATIONE.

LECTIO.

S. CYPRIANVS.

PERLEGE quodcumque est memorabile, monet Au-
sonius: & ut tibi profit, inquit,

Conditor Iliados, & amabilis orsa Menandri

Euoluenda tibi. - Et verè nihil adeò ad morum
vitæque instituendæ rectam rationem facere, ac le-
ctionem clarissimorum Scriptorum, auctor est cum
aliis CYPRIANVS. Qui in Tertulliani lectione ita
fuit assiduus, vt nullo vnquam die ab eâ vacaret: &
Paulo Scribæ crebrius diceret, *Porrige magistrum,*
nempe Tertullianum. Hier. in Catal. vir. Illust.

S. BERNARDVS.

Ille Prophetarum & Apostolorum scripta, quibus
inhærebat assiduus, magno in pretio habebat. &
*Verè, aiebat, hi sunt fontes veritatis, quibus per deno-
tam meditationem inherendo plus proficiunt homines,
quàm longos commentarios euoluendo.* Proinde apud
amicos iocari solitus, *Nullo ego, praterquam quercu-
bus & fagis, magistro sum usus.* Auct. vitæ, lib. I.
cap. 4.

ALPHONSVS ARAG. REX.

*Vide Apophth. de DISCENDI CVPIDITATE,
LIBRIS, &c.*

LEX.

L E X.

P I V S V. P O N T.

AD LEGES me conuerto, sine quibus nec hominum vniuersum genus stare, nec rerū natura omnis, neque mundus ipse diu potest. quas non ita ab omnibus æqualiter obseruari, quæ tamen omnes æqualiter obstringebant, indoluit quandoque P I V S V. P O N T. & veterum illud vsurpabat: *Leges sunt velut aranearum tela, quibus muscæ irretiuntur, quasque hirundines perrumpunt.* Hinc vulgus etiam non ineptè per aranearum telas ac retia, Hieroglyphicè, Legum notat inæqualitatem. Auct. Serm. mem.

P I V S II. P O N T.

Haud aliter iste, licet ætate in hoc sacro ordine prior, dixisse fertur: *Leges sanctæ sunt, & vaganti frana licentia imponant: ea tamen in plebem vim habent, in potentes muta sunt.* Platina in Vita.

L I B E R I V S P O N T.

Ille item Constantio Imp. sibi dicenti, hæreticarum Ecclesiarum communionem amplecteretur, & sic Romam, quā exulabat, rediret; respondit: *Iam Romæ fratribus valedixi. nam leges Ecclesiasticas obseruasse, pluris faciendum censeo, quàm Romæ habuisse domicilium.* Theod. lib. 2. cap. 17.

L A V A C R I V S P R Œ S E S F R A N C I Æ.

Neque tantum Legum obseruantiam in pretio habuisse laudem meretur; sed & iniquas præcauisse, suam gloriam habet. Ita Ludouico XI. Gall. Rege exitium Curie Parisiorum minitante, nisi latas à se leges iniquissimas promulgarent & approbarent; re
intel-

intellectâ, Regem adeunt Patres. quos cùm ille rogaret, *Quânam de causa huc aduenistis ? aliorum nomine LAVACRIVS, Ut mortem, respondit, oppetamus potius, quàm iniquas leges ferri patiamur.* Rex tali responso permotus, leges scriptas sua manu dilaceravit. Bodinus in Method. Hist. cap. 6.

CAROLVS MAGNVS.

Quid verò ante illum CAROLVS; quem fortitudo, constantia, pietas, MAGNI nomine apud posteros decoravit? Ille capulo cui insignia propria insculpta erant, edicta signabat. dicebat enim; *Eiusdem est & confirmare & defendere leges.* Corozet. de Dict. Fact. memorab.

ALPHONSVS ARAG. REX.

Æquissimum autem esse illud Aufonij, Pareto legi, quisquis legem sanxeris. ostendit suo dicto ALPHONSVS. cui frequens in ore: *Ineptè agunt Principes, qui aliis honestè beateq; vivendi leges proponunt; ipsi verò nihilo temperantiores melioresq; se præbent.* Panor. lib. 5. de Gest. eiusd.

LVDOVICVS XII. GALL. R.

Et ille, cùm Subpræfectum Aurelianensem, quocum familiariter fuerat usus, quemque sæpius iniustitiæ reum liberarat, capite damnalet; admirantibus nonnullis, *Contendi, inquiebat, priuatus pro amico: regnum adeptus, leges tueri debeo.* Non ignorabat, quòd

Inde data leges, ne fortior omnia posset,

Cœptaque sunt purè tradita sacra coli.

Exiit feritas, armisque potentius æquum est.

Et cum cine pudet conseruisse manus.

Annales Franc.

VITOL-

VITOLDVS LITVANIÆ DVX.

Alia mente VITOLDVS. cui pro deliciis erat, differente se moribus & habitu à popularibus præbere, ac dicere: *Plebs legi, Principi lex subiecta esto.* quasi magistratum, utpote legum custodem fidelissimum, non deceat primum imperatis parere, ut subditi ad eorum imitationem incitentur.

Æn. Syl. Comm. in Res gest. Alphonsi.

LIBERALITAS.

LEO X. PONT.

Non ita claudenda est res familiaris, ut eam aperire non valeat BENIGNITAS; nec ita reseranda, ut omnibus pateat, inquit in Officiis eloquentie pater. sed considerandum, ut pro dignitate cuique tribuatur. Ad cuius rei gloriam ardentius nemo anhelavit LEONE X. PONTIFICE, cuius egregia illa vox: *Principis loco indigni sunt, qui fortune muneribus beneficâ manu uti nesciunt.* Quare merito suum etiam Proculcium hoc versu celebrat Horatius:

*Viuet extento Proculeius auro,
Notus in fratres animi paterni:
Illum aget penna metuente solui
Fama superstes.*

P. Iouius in Leon. x. lib. 4.

PETRVS ALDOBRANDINVS CARD.

Rogabatur ille, quodnam beneficium existimaret maximè gratum; & respondit: *Quod non fuit petatum.* præclare certè. Quò enim quis sua sponte impensius benefacit, eò magis naturam immortalium deorum attingit. quia

Gratia

Gratia quæ tarda est, ingrata est: gratia namque

Cùm fieri properat, gratia grata magis.

Henricus Farnes. suprà.

IDEM

Dicere solitus, *Principum LIBERALITATE Musas esse pascendas.* Musæ enim quæ honesta, non quæ quæstuosæ, sequuntur. Ibidem.

CAROLVS IX. F. R.

Erat hic inter Principes sui ævi munificentissimus. Qui reprehensus quòd pecunias non daret, sed profunderet; *Regem*, aiebat, *in dando facilem esse oportet. Nam populus fluminis instar pecunias in fiscum ceu ad Oceanum defert.* Annal. Franc.

ALPHONSVS ARAG. REX.

Quid & ALPHONSVM loquar? Res pernota est, bonum fuisse & prudentem; sed & liberalem, dicta eiusdem & facta loquuntur. Deferebatur ad eum summa decem millium aureorum, cumque ex adstantibus quidam se eâ beatum fore diceret; *Accipe*, inquit ALPHONSVS, *quantacumque ea est, & beatus esto.* Verè huic dicere poterat, quod alteri accommodat Ouid. in Fastis:

Quid moror, & variis onero tua pectora causis?

Eminet ante oculos quod petis ecce tuos.

Panorm. lib. 4. de Gest. Alph.

RICHARDVS BRITANNIÆ REX.

Eadem laude clarus RICHARDVS. qui cùm apparato conuiuio aduerteret duos equites attentius colloqui, & vasa quædam sumptuosiora adspicere & mirari; accessit, & quibus de rebus verba facerent, sciscitatur. confitetur vnus; Dicebamus, ait, voto nostro tum demum fore satisfactum, si duo ex hoc vasorum numero nobis obtingerent. Cui Rex subri-

subridens; *Ne ob id contenti esse desinite, en vasa hac vestra sint.* An non hîc de illo exclamaret Claudianus, quod de Eutropio;

Nil negat, & sese vel non poscentibus offert?
Bap. Fulgos. lib. 4.

I D E M.

Natalitiis Saluatoris, dum sacellum auro gemmisque exornari curasset, & Aquensis Antistes Bonefacij Pont. Legatus in eo rem diuinam peregisset; iamque paramenta vestesque pontificias exueret; Rex nihil de ornamentis amoueri iubet, apprehensaque Legati manu, *Æquum, ait, mihi non videtur, Pontificium Legatum alienâ veste ornamentisque sacrificare: quare quidquid in hac æde est ornamentorum, tuum esto.* Ibidem.

CAROLVS V. IMPERATOR.

Huic in hoc virtutis splendore similis CAROLVS. cuius illa vox: *Regis Liberalitas aptissime cum Sole conuenit: nam velut is indurat lutum, & emollit ceram; ita hæc quorundam animos emollit, quorundam indurat.* Collig. ex Cyt. in Orat. de Vita eiusd.

LIBERE DICTA.

S. PAVLVS APOSTOLVS.

Multos in dicendo commendauit gratia & venustas, plerosque commendat & iuuat audacia & libertas: præsertim si is qui dicit, iustè & cum ratione dicit. quo modo fecisse APOSTOLVM PAVLVM Sacræ testantur litteræ: dum enim in carcerem missus, & cæsus ob sanatam puellam Pythonissam, tandem per magistratum dimitti iuberetur; *Cæsos, dicebat, nos publicè, indemnatos, homines Romanos,*
mise-

miserunt in carcerem; & nunc occultè nos eiiciunt? Non ita, sed veniant, & ipsi nos eiiciant. quasi dicat, Veluti nos publico probro affecerunt, ita & publicè nos inculpatores & infontes ostendant.
Actor. cap. 16.

IDEM.

Quin idem in concilium productus, cùm se bonâ conscientia ante Deum usque in illū diem conversatum diceret; Princeps Sacerdotum Ananias os eius percuti iussit. Ad quem PAULVS, *Percutiet te Deus paries dealbate*, inquit. *Et tu sedens iudicas me secundum legem, & contra legem iubes me percuti.*
Actor. cap. 23.

S. ANASTASIUS EPISC.

De ANASTASIO autem accepimus, interrogatum, cur ita pecunias suas profunderet, per cauillationem liberè respondisse: *Ideo, ne à communi perniciie Iustino auferatur.* Niceph. Call. lib. 17. c. 36.

PRÆTEXTATVS ROTHOMAG. EPISC.

Erat Fredegundis Franciæ Regina, improbitatis omnis & inhumanitatis sentina. Hęc PRÆTEXTATVM PRÆSVLEM, cui eximiam virtutem & vitæ innocentiam inuidebat; lethali vulnere percuti iusserat. ac mœsta (vt simulabat) accurrit (crediderim, vt oculos in eius angore pasceret) questus & iram miscuit, quòd in talem virum patratum esset scelus, & auctor lateret: at PRÆTEXTATVS vicinâ morte liberior, *Minimè*, inquit, *latet, fateor me eius scelere percussum quæ reges occidit.* Per dolum quippe Chilpericum maritum suum occidi curauerat. I. Lips. Mon. Pol. lib. 2. cap. 2.

IOANNES PAYNVS PRESB. ANGLVS.

Fuit hic ex iis, quos Angliæ laniena sub Elizabetha

betha absorpsit: qui dum Eleoti cuiusdam testimonio, læsæ Maiestatis reus denuntiaretur, liberè & impavidè; *Est*, ait, *contra legem diuinam & humanam, ut unius infamis hominis testimonio reus condemnatur.* Martyrol. Angl. an. 1582.

S. PELAGIA.

Quid verò viros hîc persequor? quasi hac dicendi libertate constantiaque caruerit fæmineus sexus. Vnicam PELAGIAM propono, quæ ad boué æneum condénata, ac iussa à Diocletiano vestimenta exuere, magna voce eum appellans; *Recordare*, ait, *uxores pellicesque tuas eadem quâ ego carne indutas. vestibusque reiectis, nuda ad succensam machinam properauit.* Metaphrast. in Vita.

SIGISMVNDVS IMP.

Ciuiilia adscribam, & inter ea primùm SIGISMVNDVM IMP. Dum namque quidam Constantiæ omnem libertatem ademptam quereretur, inquebat: *Secus se res habet. Quin si deesset hîc summa libertas, tu numquam tam liberè loquereris.* Indicabat magnæ libertatis signum, liberè posse loqui. In dictis Sigism. apud Æn. Sylu.

MILES ANONYMVS.

Graue illud & serium. iocosum hoc à Ducis Saxonix milite profectum:

*Tempore quo bellum cum Casare Saxo gerebat,
Seria festiuo hæc res fuit acta ioco.*

Bellica Saxonici quidam Ducis arma secutus

MILES, ab aduerso milite captus erat.

Ex quo Casareus cupiens resciscere Princeps,

Esset quanta Ducis copia, quanta manus?

Ille suis aquilam qui territat ensifer armis

Saxo tuus, quantum roboris, inquit, habet?

MILES *ad hæc*; Demiror, *ait*, cur talia quæras:

Cum Duce luctatum mène fuisse putas?

Georg. Sabinus in Epigramm.

LIBERTAS.

MATTHIAS CORVINVS.

LIBERTATIS (cui proprium testatur Cicero, sic vivere ut velis;) portum ingredimur. & quis inter homines non libens eum subeat? MATTHIAS CORVINVS Ladislai Regis Bohemiæ filius, cum in Georgij Pogiebraci (qui postmodum regno successit) potestatem deuenisset, multoq; apud eum tempore, non indecoro tamen carcere, detineretur: tandem ad Hungariæ regnum adscitus est. mittuntur nuntij in Bohemiam. Quibus auditis, Georgius adolescentem regium sibi cœnanti, præter morem, ex imo loco assidere iussit. eoque percunctante, & attonito cur ita id fieret; Quid, inquit Rex, mihi exsolueris MATTHIA, si læti nuntij te reddidero certiore? Cui ille: *Nihil mihi, ô Rex, libertate aut lætius aut gratius euenire potest; quam si concesseris, me æternum tuo honori deuinctum scito.* Verè & scitè Comicus:

Liber captiuus aui ferè similis est.

Semel fugiendi si data est occasio,

Satis est. numquam post illum possis prendere.

Munsterus de German. lib. III. cap. vlt.

ALPHONSVS ARAG. REX.

Verum longè alia Sapientibus LIBERTAS, non corpus tantum, sed & animum afficiens: de qua locutus aliquando ALPHONSVS perhibetur. Percontanti namque quisnam foret liber; assumens illud
Hora-

Horatij, aiebat : ——— *Sapiens, sibi que imperiosus,
 Quem neque pauperies, neque mors, neque vincula
 terrent.*

In Dictis Alphonfi.

LIBIDO.

S. WOLSTANVS EPISC. WIGORNIENS.

Q*Varuit in vetitum damni secura LIBIDO,*
 paucis perstringenda ; & quomodo eam in se
 extinxerint viri sancti. quorum plerosq; licet alium
 in locum transtulerimus , prodeunt tamen hîc in
 scenam nonnulli , quorum ductor sit WOLSTANVS
 ANTISTES : in cuius concupiscentiam dum matro-
 na quædam nobilis exardesceret, in tantum vt resi-
 stere tentationi nequiret, eiq; suum desiderium ma-
 nifestaret , ille , sermone interrupto, facto que cru-
 cis signaculo, *Fuge, ait, comes Lasciuia, Mortis filia,
 vas Satana.* ei que alapam summo nisu inflixit, & sic
 velut alter Ioseph, lasciuiam muliebrem animo re-
 spuens, manu compescuit. Sur. tom. 1. in Vita.

S. VRSINVS PRESBYTER.

Mirus & magnus in hoc pugnae genere VRSI-
 NVS. qui, dum post legitimum cum coniuge diuor-
 tium, Nursiæ presbyter ordinatus esset, ita ab eâ erat
 alienus, vt nulla ex causa, ne ad colloquium quidem
 eam admitteret. Annis autem 40. in tanta continen-
 tia constantia que transactis, cum graui morbo cor-
 reptus , animam exhalasse putaretur ; aduenit ipsa,
 & admota ad nares aure, periculum faciebat an ad-
 huc spiraret. res mira. Sensit mulieris attactum,
 qui se vix sentiebat : & à se absens, mulieris præsen-
 tiam considerabat. Atque hanc vocem inexpectatò

edit: *Recede mulier, nondum penitus extinctus est ignis, tolle paleam.* In Vita.

S. EPHREM ET MERETRIX.

Vide OCVLORVM CVSTODIA.

S. FRANCISCVS.

Quid verò Minorū Pater & Institutor S. FRANCISCVS? Cū summa curā vtriusque hominis puritatem seruaret, circa conuersionis suæ primordia, brumali tempore in fossam glacie plenam se collo tenus quandoque mergebat, vt & domesticum hostem superaret, & candidum sui pudoris velamen à voluptatis incendio præseruaret. & *Tolerabilius viro spirituali incōparabiliter fore assererat, magnum sustinere frigus in carne, quàm carnalis libidinis ardorem vel modicum sentire in mente.* Vnde cū grauis eum carnis tentatio apprehendisset, mirus castitatis amator, depositā veste, flagello è funibus contexto, in suum corpus desæuiebat; *Eia, inquit, frater Asine, sic te decet manere, sic subire flagellum. Tunica religioni deseruit, sanctitatis signaculum præfert: furari eam libidinoso non licet. si quò vis pergere, perge.* S. Bonau. in Vita, cap. 5.

S. LVDOVICVS EPISC. TOL.

Non hominis, sed Angelica putari debet continentia, qua ornatus fuit TOLOSANVS PRÆSVL. Detinebatur obses in carcere adhuc etate florens: cumque custodes suaderent, vt carceris dolores mulierum amplexu solaretur; pro monstro eam vocem accipiens, *Nōne satis est, inquit, corpus meum à vobis captum detineri, an animum quoque vinctum vultis? Absit, vt hoc meum corpus Deo dicatum, velociter abeunte adulterem voluptate.* summotoq; improbo homi-

homine, auersum ab omni Venere animum declarauit. Ex Vita eiusd. imp. apud Moretum, c. xiv.

S. LVCIA VIRGO.

Verum & in fæminis tanto hæc laus erit illustrior, quanto infirmior ad resistendum ille sexus. Et quidem virginitatis flos & ornamentum LVCIA, senserat ob oculorum pulchritudinem suæ virginitati periculum imminere, quod eos maximè expecteret insana Tyranni libido. Illos itaque eruit, & ad Tyrannum hoc dicto misit: *Scito nihil amplius in me superesse, quo à te mihi timeam iniuriam.* verè implens illud Euangelij: Si oculus tuus scandalizat te, erue eum, & proice abs te. Sabell. lib. 3.

Require Apophth. de CASTITATE.

LIBRI.

PIVS V. PONT.

NVllum esse LIBRVM tam malum, qui non aliqua sui parte prodesset, dicebat Plinius. Quo factum, vt PIVS PONT. eius nominis quintus, dum apud eum quispiam magni pretij gēmas supra modum extolleret, manu in LIBROS extensa diceret: *En in his vera gemma.* Corozetus.

MARTINVS SILICÆVS ARCHIEP. TOLET.

Nec minus laudabile est quod de ARCHIPRÆSVLE MARTINO SILICÆO, præclaro suo testimonio adfirmat R. P. Andreas Schottus Societ. IESV Presbyter, singulari eruditione & humanitate vir. Ille enim vt erat prudentia scientiaque clarissimus, vnde & studiorum Philippi II. Hisp. Regis Catholici magister institutus; dum ad bibliopolarum tabernas librorum comparandorum gratiâ se conferret,

ferret, haud umquam passus eos per famulos deferri: quin ipse suismet brachiis dulce onus sustinebat. Vrgentibus verò amicis, aliis concederet; *Non fecero*, respondebat. *Libri me honorarunt, quid in eos vicissim gestando honorem?*

PIVS II. PONT. MAX.

Sed non omnium LIBRORVM eadem est utilitas: quidam enim licet honestatis aut modestiæ colorem præ se ferant, turpium flagitiorum veri præcones sunt: &, vt in Tuscul. Cicero, molliunt animos nostros, neruos omnes virtutis elidunt. Quod cum non ignoraret P I V S II. PONT. & meminisset per ætatem iuuenilem excidisse sibi quædam non satis modesta, quæ sub nomine Æneæ Syluij (hoc enim ante Pontificatum gerebat) in lucem prodierant: grauitè pœnitens, hoc vnicè laborauit, vt isti veluti monstrosi partus supprimerentur: omnesque rogabat, vt posterius consilium priori temeritati anteferrent. dicebat autem: *Seni magis quàm iuueni credite: nec priuatum hominem pluri quàm Pontificem facite. Æneam reiicite, Pium suscipite.* Vos etiam Rectores, vos Patres, pestiferam hanc segetem stirpitis euellite, & memoria retinete illud Ouidianum:

Eloquar inuitus, teneros ne tange Poëtas:

Submoneo dotes impius ipse meas.

Guiliel. Baldesanus in Stim. virt. adolesc. cap. 13 libro 1.

IULIANVS IMP. APOSTATA.

At verò utilium librorum vsum & oblectamentum, veluti quoduis aliud bonum, Christiano populo inuidebat, postquam à Religione descuiisset, IULIANVS. vtpote iam Deo exosus, cauit ne vlli Galilæorum filij (ita Christicolæ vocabat) Poëtarum, Rhetor-

Rhetorum, aut Philosophorum scripta legere aut penes se retinere præsumerent. Rogatus causam, hanc dedit: *Quia propriis (ut est in Proverbio) pennis vulneramur: ex nostris enim armati conscriptionibus, in nos bellum suscipiunt.* Sozom. histor. Tripart. lib. 6. cap. 17.

ALPHONSVS ARAGONVM REX.

Percontanti, quânam forent optimi consiliarij, *Mortui*, inquit, Libros designans; *ab his enim sine metu, sine gratia, quæ nosse cupimus, fideliter audimus.* Æn. Syl. de Dict. eiusd.

IDEM

Cùm de Neapolitanâ arce restaurandâ cogitaret, Vitruuij de Architecturâ librum ad se deferri iussit. Qui cùm totus incomptus & illigatus deferretur; *Non decet*, inquit, *Librum hunc, qui nos quo modo contegamur instruit, detectum esse.* quare cum vsui coaptari, & decenter vestiri mandauit. Panorm. lib. 1. de Gest. eiusd.

LAVRENTIVS MEDICES.

Aliud insuper de LAVRENTIO MEDICES, à Ioan. Brantio nostræ vrbis Graphiario ex eiusdem laudatione funebri obseruatû, adiungo. Ille enim tanto amore Libros & Librorum cultores prosequeretur, ut sæpenumero auditus sit dicere: *Optarem ea mihi à Nicolao Leonicensi & Ioanne Pico (viris probitate ac eruditione conspicuis) addi incitamenta ad emendos libros, ut necessariis deficientibus, ipsam tandem suppellectilem oppignorare compellerer.* Ita diuite librorum suppellectile gaudebat; quorû non ut plerique tantû spectaculo, sed & studio perfruebatur.

THOMAS MORVS.

Quis MORVM, vnicum ingratae Britanniae orna-

376 LAURENTII BEYERLINCK
mentum & decus prætereat? Carceri inclusus, quòd
Henrici VIII. impiis decretis dissentiret, totos dies
reuoluendis piorum scriptis transigebat. Inuidit rex
improbus, & librorum copiam eripi mandat. At il-
le, obseratis fenestris, soli Deo vacabat. Percontan-
tique, quid ita in tenebris moraretur; *Quid me age-
re vultis?* inquit. *Nonne sublatis mercibus, claudenda
est officina?* Libros merces appellat, quòd per illos
quasuis dignitates & honores mercemur.
N. Sanderus lib. 1. de Schism. Anglic. Thom. Sta-
plut. in Vita.

ANONYMVS

Venerat ad Collegium quoddam illitteratorum
hominum: quorum Bibliothecam, quæ admodum
erat instructa, nisi quòd libros omnes catena vnde-
quaque vinctos detineret, dum ingressus esset, ait:

Haud secùs ac duro fugitinos carcere seruat

Vestra catenatos Bibliotheca libros.

Quid mirum, si nulla viget doctrina, colendi

Doctrinæ auctores hîc ubi vincla gerunt?

Ex relatis Auctori.

NOBILIS ANONYMVS.

Claudebam hoc agmen, nisi alius vt genere, ita
etiam hac laude nobilis interuenisset. Hic enim non
ita pridem doctam hanc mercem comparaturus,
dum ad Bibliopolam venisset, & is moram soluen-
di pretij indulgeret, noluit eam sibi gratiam præsta-
ri; & in egregium illum sermonem erumpens, *Pa-
rum*, inquit, *equum id foret. Aliarum enim mer-
cium, quæ solùm corporis aut voluptati aut necessitati
deserviunt, pretium honestè ac tuto differatur: at Li-
brorum, quibus animus ipse pascitur ac reficitur, præ-
stantia, præsentì pecuniâ compensanda est.* Ita veræ
Nobi-

Nobilitatis, quæ in sola eruditione & virtute consistit, custodes & magistros (Libros appello) æstimare doctus, alios suomet, licet raro, exemplo ad imitandum prouocabat. Ex relatis Auctori.

AVLICI ANONYMI.

Diuersi à priori illo hi. Inter aulae strepitus versabatur assiduè, & ut nobilitas ea solet, armorum non litterarum studio inuigilabant. Vnde cum Ioannes I. Hildesheimensium Præsul, illius muneris suscepisset gubernacula, dictosq; suos NOBILES de Bibliotheca interrogaret, quò otio litterario quandoque sibi vacare liceret; ostenderunt ei armaimentarium, & *Non hîc, respondent, aliam Bibliothecam requiras oportet. Ex hac enim libros desumes, quibus & hostem à te repellas, & Episcopatus tui iura & immunitatem conserues.* Quàm dispar eorum mens ab illo, qui ex libris arma & armorum iura se didicisse gloriabatur. Brusch. in Episc. German.

LIS ET CONTENTIO.

PIVS II. PONT.

LITIVM & CONTENTIONVM omniû, quæ charitatis mutuae vincula disrumpunt, hostis acerrimus fuit PIVS II. PONT. quem de illis non raro iocatum fuisse, auctor est Platina: *Litigatores sunt aues; forum, area; iudicium, rete; aucupes verò, Patroni.* Platina in Vita.

CAROLVS IX. GALL. REX.

Sed & de iis qui lites proscribere studuerunt, CAROLVS NONVS in Gallia nuper fuit. Is huic prurigini sistendæ pecuniarium vectigal excogitauit, illudque ita edixit: *Quicumque litem orditur, depen-*

a s

dito

dito in fiscum Regium duos aureos : recipiendos si iure litigasse indicetur; sin aliter, omittendos. At leue nimis remedium in tam grandia & vetera mala. I. Lips. Mon. Polit. lib. 2. cap. 10.

L V S V S.

S. IOAN. EVANGELISTA.

Homines quamuis in rebus turbidis, tamen si inodò homines sunt, interdum animis relaxari, docuit IOANNES EVANGELISTA. qui reprehensus, quòd matura iam ætate, aliquando cum auicula tēpus falleret, iussit Aristarchulum reprehēsores, arcum quem humeris gestabat, aliquoties tendere. quod cū fecisset, & arcus remissior factus esset, eius causam sciscitatur. Qui se neruum arcui detraxisse respondit, ne continua intensione inutilis redderetur. Cui extemplo IOANNES: *Et ego interdum cum aliis honesto exercitio relaxor, ut maioribus deinde viribus, orationi & ieiunio insistamus.* Appositè Statius lib. 4. Sylu.

—— *Nostra fatiscit
Laxaturque chelys : vires instigat alitque
Tempestina quies. Maior post otia virtus.*
Fulgos. lib. 8. cap. 8.

Require Apophth. de CLEMENTIA.

L V X V R I A.

BARNABVS PRINCEPS, ET CLERICVS.

Deo & virtuti inimicam LVXURIAM leuiter attingemus, ne dudum illi inhæsisse videamur, quæ velut omnis criminis stimulus, numquam manere

nere quietum patitur affectum. BARNABVM Principem Luxuriæ inquinamento deprauatum, reperit quandoque superueniens fortè quasi in ipso actu, ordinarius eiusdè CONFESSOR. turbatur, & pudore suffectus Princeps; Dic pater, inquit, si tecum decumbentem haberes iuueneculam, quid ageres? quod insulsum dictum falsè & prudenter reprimens, *Quid factururus, ait, forem, verè nescio: scio autem quid à me fieri deberet.* Auët. Serm. memor. anonym.

CACANVS PRÆFECTVS.

Singulari etiam memoria dignum quod sequitur. Erat CACANVS militiæ præfectus Imp. Carolo Magno: qui, occiso Gisulpho Foriulij Comite, de ipso solo terrisq̃ue occupandis cogitabat. at opposuit se Romilda cæsi Comitis vxor. Verùm vt erat æstu libidinum feruens, vbi CACANVM viribus & specie insignem vidisset, è muris eum vocat, vrbes & regna offert, si se ducat vxorem. Lætus hac oblatione hostis, parere per nuntium iurat. Habita ergo in suâ potestate vrbe, eaq̃ue contra datam fidem vastata, iurisiurandi memor, Romildam in coniugem accipit, vnicâ eaq̃ue primâ nocte vtitur, ac postera die 12. robustissimis militibus prostituentdam tradit, & palo deinde affigi; dicens: *Tali digna honore est femina, quæ libidinis explendæ causâ, patriam in hostium manus tradit.* Quid hîc extollam, meritam libidinis pœnam, an iniustam contra iusiurandum CACANI seueritatem? Gaguinus lib. 4. de Reb. Gall.

*Require Apophth. de ADVLTERIO,
& LIBIDINE.*

MAGI-

MAGISTRATVS.

PIVS II. PONTIFEX.

MAGISTRATVM Legem loquentem dicebat Tullius, sine cuius prudentia ciuitas esse non potest; quorum descriptione omnis Reipub. moderatio continetur. ideoque magnoperè in eius delectu insudandum. Ita PIVS II. aliquando dixisse commemoratur: *Magistratus alios mereri, & non habere; alios habere quidem, & non mereri. Dignitates autem non viris, sed viros dignitatibus dandos.* Est enim ei, cui Respublica commissa est, necessaria oratio & sapientia, vt habet lib. 1. de Legibus Cicero. Platina in Vita.

I D E M.

Vide supra AFFABILITAS.

ALPHONSVS ARAG. REX.

Non erat ab hac mente alienus ALPHONSVS, qui dicere solebat, si quando de Magistratu cōferendo sermo fieret; *Qui aliis præsunt, tanto priuatis hominibus meliores esse oportet, quanto honoribus & dignitatibus antecellunt.* Panor. lib. 6. de Gest. eiusd.

I D E M

Interrogatus, cuīnam Magistratum similem diceret; Coti, inquit. *Quia veluti argentarij cote iudice vtuntur ad probandum aurum & argentum: ita Magistratu Reges ad hominum ingenia exploranda.* quasi dicat, tum demum hominis mores perspicui, si publicam personam sustineat. Ibid.

FREDERICVS III. IMP.

At multa dissimulanda interdum ad publicam
tran-

tranquillitatem conseruandam, iis qui Reipub. clauum tenent, asserebat IMPERATOR FREDERICVS; cui in ore persæpè:

*Qui regnare volunt, multis dormire, sagaci
Multaq; consilio dissimulare solent.*

Reinh. Hadam. In Instit. Princ.

SIGISMVNDVS IMPERAT.

Et hunc, cùm cœnanti verbosus quidam & importunus senex nimium verbis obreperet, exclamasse ferunt: *Asinorum conditio longè potior, quàm Regum: illis enim dum pascuntur domini parcunt, Regibus nemo.* Idem Alphonso tribuit Æneas Syluius.

*Vide Apophth. de AFFABILITATE,
& ELECTIONE.*

MAGNIFICENTIA.

PETRVS ALDOBRANDINVS CARD.

Nemo potest sine re amplâ verè esse magnificus. Id enim tam augustum nomen importat. Quod cùm non ignoraret CARD. ALDOBRANDINVS; rogatus, quis esset MAGNIFICVS, respondit: *Qui muros urbis, qui Naualia, Theatra, Porticus, eaq; omnia exstruit, quæ ad communem vsum faciunt ciuitatis. Domus verò, inquiebat, Magnifici, non auro, non ebore (vt sensit Homerus) sed hostium spoliis adornanda est. Sentiebat enim, illa esse Incontinentiæ blandimenta; hæc monumēta virtutis.* H. Farnes.

I D E M

Rogatus, quidnam sibi videretur maximū; *Non vinci*, inquiebat, *à beneficiis.* Illū magnificum existimabat, qui à rebus magnis non superatur. Ibid.

MALE-

MALEDICENTIA.

S. BASILIVS.

QUod Bonafus animal, id homo maledicus: ille enim, si Plinio fides, quoniam cornibus implexis lædere non valet, finum aufugiens reddit, cuius contactus insequentes adurit: ita hic, dum coram non audet, à tergo sparsis probris, proximum contaminat. & nihilominus percontanti, an ne maledici diligendi essent; BASILIVS respondit: *Omnino diligendi. Quia eorum operâ eam beatitudinem consequimur, de quâ Christus dixit: Beati estis cum maledixerint vobis homines.* Collig. ex Reg. fus. disp. q. 176.

PIVS II. PONT.

Maximam quoque MALEDICENTIÆ tolerantiã in Pio II. PONT. arbitrari debemus fuisse. Numquam enim malè de se opinantes aut loquentes coercuit. Volebat namque in libera ciuitate omnes liberè loqui. Conquerenti verò cuidam, quòd maledictis laceraretur; *De me etiam, inquit, qui malè sentiant, si ad campum Floræ te conferas, multos audies.* Volebat omnium Principum mores priuatorum imprudentiæ impudentiæque subiectos esse. Platina in Vita.

FRANC. SFORTIA.

Venerat ad eum Nolanus eques transfuga, qui, ut sibi gratiam & fauorem conciliaret, referebat Tarralianum hominem improbum omnibus maledictis eius famam dilacerasse: idque, ut sibi fides haberetur, iureiurando sæpius affirmabat. At SFORTIA: *Non est opus ut multum persuadendo labores, cum Tar-*

Tartalia numquam verbum de quoquam protulerit, quin maledixerit. P. Iouius de Dict. Fact. Sfortiæ, cap. 85.

MANDATA DEI, EORVMQVE OBSERVATIO.

IESVS CHRISTVS.

Qui veram requiem post hanc vitam querit, etiam hinc eam inter amarissimas vitæ molestias gustabit, si eius, qui eam promisit, PRÆCEPTA dilexerit. quare ÆTERNVS DEI FILIVS, quo nos coheredes haberet, rogante Thadæo postquā de se manifestando locutus esset, Domine quid factum est, quia manifestaturus es nobis teiplum, & non mundo? respondebat: *Si quis diligit me, sermonem meum seruabit, & Pater meus diliget eum, & ad eum veniemus, & mansionem apud eum faciemus.* Ioan. cap. 14.

IDEM

A discipulis sollicitatus vt māducaret, dicebat: *Ego cibum habeo manducare quem vos nescitis.* Cumque non intelligerent, subiecit: *Meus cibus est, vt faciam voluntatem eius qui misit me, vt perficiam opus eius.* Innuebat veram Christiani hominis alimoniam consistere in obseruatione MANDATORVM DEI. Ioan. cap. 4.

IDEM.

Sciscitanti insuper adolescenti, Magister bone, quid faciam vt habeam vitam æternam? *Si vis, respondit, ad vitam ingredi, serua mandata.* Matth. cap. 19. Mar. 10. Luc. 18.

IDEM

I D E M

Dum rursus loqueretur ad turbas, mittunt mater & fratres, qui eum vocarent ut sumeret cibum. At ille nuntianti, *Quæ est, ait, mater mea, aut qui fratres mei?* (non negans aut cõtemnens cognationem, sed causæ præsentis, videlicet Euangelicæ prædicationis, executionem vrgens) & extendens manum in discipulos; *Ecce, inquit, mater mea, & fratres mei.* (quos scilicet diligo ut fratres, & honoravi matrem) *Quicumque enim fecerit voluntatem Patris mei qui in calis est, ipse meus frater, & soror, & mater est.* insinuans talem sibi fore coniunctissimum. Matth. cap. 12. Mar. 3. Luc. 8.

S. HUGO EPISC. LINCOLNIEN.

Vide CONVIVIVM.

S. DOROTHEVS.

Cùm de mandatorum Dei, & præsertim eorum quæ Decalego continentur, observatione, sermo apud eum fieret; *Hæc, ait, verè sunt vectigalia magno Regi debita: quæ, qui non persolvit, malè multatur.* S. Dorothei. doctr. 1.

SABA ABBAS.

Vide GRATITVDO.

S. MARIA MATER DEI.

GABRIEL ARCHANGELVS.

SI communis omnium parens Terra, recepti seminis debitum liberali usura suo domino refundit: quanto æquius est, ut, si ne minimam debiti portionem, quo magnæ VIRGINI magnæ DEI MATRI obstringimur, refundere possimus, grato saltem animo eius laudes dignis præconiis celebremus.

mus. Quod cū inter homines nemo primus ag-
gredi præsumpserit, non inconueniens erit, si etiam
à primo eoque maximo earumdem præcone exor-
diar. Salutem humani generis operaturus eiusdem
auctor & princeps Deus, prædestinata reparationi
huic suæ pietatis remedia (quæ inter ipsa mūdi pri-
mordia præsignauerat) interueniente Angelicâ lega-
tione, MARIÆ VIRGINI denuntiauit. vtpote quæ
semen illud productura erat, quod serpentini capi-
tis elationem suâ virtute contereret. Ingressus itaq;
ad eam magnus ille heros, solam sine comite, solam
sine teste, cælestibus dumtaxat contemplationibus
intentam, hoc præconio salutat: *Aue gratia plena,
Dominus tecum: benedicta tu in mulieribus.* Cuius
dicti splendorem quis non videt? dum cælestibus
donis non ornata tantum, sed repleta, imò exun-
dans, eorumque largitori præsens, & sola, præ aliis
sui sexus benedicta, idque per Angelum, salutatur.
Huius autem salutationis sensum Sanazarius Poë-
ta clarissimus eleganter expressit his versibus:

——— *Oculis salue lux debita nostris,
Jampridem notum calo iubar, optima Virgo:
Cui sese tot dona, tot explicuere merenti
Diuitiæ superum: quidquid rectique probique
Æternâ de mente fluit: purissima quidquid
Ad terras summo veniens Sapientia calo
Fert secum, & plenis exundans gratia rinis.*

S. ELIZABETH.

Neque satis erat, si vno præcone Thesaurus hic
mundo innotesceret, alium insuper suscitauit im-
mēsa illa Dei maiestas; ELIZABETHAM. Cū nam-
que ad eam VIRGO pergeret, vt salutationis Ange-
licæ redderet participem, vbi limen domus tetigit,

b

& vir-

& virginiei oris claustra dissoluit; diuino repleta Spiritu ELIZABETH, voce magna dixit: *Benedicta tu inter mulieres, & benedictus fructus ventris tui.* Eadem autem voce ab ELIZABETHA, qua à Gabriele benedicitur; quatenus, inquit Beda, & Angelis & hominibus veneranda monstretur. Ibid.

DIONYSIVS AREOPAGITA.

At veniant antiqui illi Poëtæ, & multo verborum fuco depingant pulchritudinem Narcisci, Medusæ, Deianiræ; Nympharum venustatem admi-
rentur: accedant Hebræi cum illis, quos Sacræ litteræ à corporis formâ extollunt. Nihil profectò omnes illi, in comparatione huius Virginis: quam non interno solùm, verùm externo etiam splendore & pulchritudine decorauerat magnus ille Plastes. Hinc DIONYSIVM Philosophum ferunt, fidei principiis per doctrinam Pauli Apostoli imbutum, motum famâ intemeratæ VIRGINIS, eius videndi tactum desiderio: cumque Hierosolymam perrexisset, eiusque vultum intueretur, primùm quasi hasisse attonitum; & recepto spiritu, dixisse: *Nisi crederem in filium tuum, de quo mihi per Paulum annuntiatum est; tuis plantis prouolutus, vnum te diuinæ maiestatis insigne adorarem. Et nisi fides suaderet, haud crederem orbis auctorem Deum te pulchriorem.* Verùm ille incomprehensibile lumen inhabitat, à quo hæc Virgo, velut radius ad nos destinata est, vt illuminaret eos, quos prima mulier cæcos pepererat. Refert Bernard. de Busto in Mariali, part. 2. Serm. 4. de Natiuit. Virg. & alij.

S. HVGGO LINCOLNIEN. EPISCOPVS.

At velut inter ignes Luna minores promicat, ita hæc inter omnes sui sexus: vtpote à qua splendorem

rem hauriunt & dignitatem. Quare piè admodum & sapienter S. HVGGO, *Satis*, dicebat, à *famineo sexu diligi Deus promeruit*, cum nasci de femina dignatus est. Nam cum viro concessum non sit, ut vel dicatur, vel sit pater Dei; hoc tamen præstitum femina, ut sit mater Dei. Sur. tom. 6. in Vita cap. 13.

ABBAS THEODORVS ÆLIOTAS.

Si ergo tanto gratiarum cumulo in terris fuerit decorata Virgo sanctissima, quantâ gloriâ existimandum est adornatam esse in cælis, vbi læta contemplantur auctorem & sponsum suum, apud quem sedula pro nobis in hoc exilio relictis intercedit. Quare cum iucundo eius aspectu priuemur, piè admodum eam in expressâ imagine veneratur Ecclesia, eiusque per id iugem & viuam memoriam seruat. Vnde refert Damascenus, Monachum fuisse in monte Oliuarum: qui, cum à fornicationis spiritu acriter infestaretur; à demone, se in forma humana conspiciendum exhibente, intellexit non se liberandum ab oppugnatore spiritu, nisi imaginem quam cellulæ affixerat (erat autem Virginis Christum gestantis) venerari cessaret. quod cum ad THEODORVM ÆLIOTAM retulisset; ille protinus: *Satiùs tibi, ut nullum sit in urbe. prostibulum quod non ingrediaris, quàm ut matrem Domini nostri adoraturum te neges.* Sciebat Virginis cultor eximius, nihil roganti matri à filio, fideli ancillæ à Domino, Virgini sponse à suo sponso denegari. Damascenus lib. 1. de Imag. & Pratum Spirituale.

S. GREGORIUS MAGNVS.

Quo tempore seua pestis Romanam urbem olim miserè affligebat, GREGORIUS PONT. religiosam in die Resurrectionis supplicationem instituit; in

qua DEIPARÆ imago, à D. Luca ad viuum expref-
fa, in publicum efferretur. Et ecce piam circunge-
stationem præfenti miraculo Virginis filius cōpro-
bat. quacumque enim imago deferebatur, pestilen-
tis cæli grauitas depulfa, & optata falubritas confe-
cuta eft. Omnibus autem Deo gratulantibus, Ange-
lus hac voce Virginem alloqui vifus: Regina cæli læ-
tare, alleluia : quia quem meruifti portare, alleluia:
refurrexit ficut dixit, alleluia. Quam orationem fi-
mul ac GREGORIUS coràm audiuit, diuino Spiritu
excitatus, eandem in hunc modum cōpleuit : *Ora
pro nobis Deum, alleluia.* Nos etiam te ô clemens, ô
pia deprecamur : & vt vibium Principem pestis la-
queo exuifti, ita nos vitiis illigatos folue. Caniftius
cap. 22. Sigonius lib. De regno Italiæ.

S. WERNHERVS PVER.

Hoc in Pontifice, iftud in puero non minùs il-
luftre exemplum. Cùm Iudæi WERNHERVM PVE-
RVM, quòd Christianus efferet, iniris modis difcruci-
arent, & Vefaliensis Iudex, fui muneris oblitus, fe-
per fummum fcelus ab æquitate & iuftitia abduci
pateretur; dum fuas preces negligi PVER videret, *Si
tu mihi, inquit, opitulari non vis, opem mihi ferat beni-
gnus Deus, & factiffima Mater eius. Ferat, ferat! nam*

Altera iam bello civili voluitur ætas,

Suisque Belga viribus

Interit, ac toti debet ludibria mundo:

Heu triftè fatum! quis modus

Et quis finis erit? Finis, fi turbida vita,

Emancipata crimini,

Mundatur, fi vindicat hanc fibi mafcula virtus.

Tu Diua conantes iuua.

Lippell. tom. 2. de Sanct. menf. April.

IOANNES SAMPENOIVS.

Longum foret oratione complecti, quàm admiranda olim per suam Matrem operatus sit vnigenitus Dei filius in illis, qui eam puro affectu venerantur. Perge itaque calame, maiori quodam ore effer, quæ nostra hæc ætas sensit & vidit. Tu DIVA, manum & mentem moue. Erant Auennæ (Hannoniæ opidum) furti & rapinarum accusati duo: fatentur culpam in tormētis, & simul falsò IOANNEM SAMPENOIVM, cum quo aliquantum itineris confecerant, furti arguunt & cædis. Prætor nihil ambigere, eumque, quò alios, in vincula & immeritam crucem adigere: & tamen quia se innoxium proclamabat, populum hortari vt Missæ sacrificio interfint, in gratiam veniamque criminum iam iam morituri. At IOANNES, *Imò potius, ô Prætor, ait, Dominicam orationem & Angelicam salutationem singuli recitent, honori B. Virginis Hallensis, (quo Hannoniæ loco, summa veneratione visitur Deiparæ statua crebris miraculis illustris) ad quam ibam. Et quoniam in innocentia parum presidij est, ad illam appello, ea me tueatur.* Post dicta, carnifex hominem cruci applicat, scalis deiecit, & funem stringit. At viuit ille, donec omnibus demirantibus superuenit Ioan. Sellius, virtute & stirpe nobilis, qui innoxium hominem sibi, aut potius B. Virgini, cuius monitu eò venerat, donari rogat: & viuum ac illæsum impetrat. I. Lips. de Diua Hallensi, cap. 22.

IOANNES CACVLA MILITARIS.

Adiiciamus quod iam pridem euenit. Orta seditione inter milites, qui Weerdtæ Campiniæ opidulo præerant custodes, IOANNES gente Lucemburgius, CACVLA MILITARIS, falsò furti arguitur. Crux

ilicò statuitur, & iuxta eam, omnium voce nocens. Ille se frustrà pūrgare, mentemque & lumina attollere & inclamare: *Tu celi Regina, innocentū vindex, quæ in Hallensi opido cultum & ædem tenes, me innocentem tuere*, Dixerat. At nil moratus tortor, eum cruci sistit & adstringit. pendebat à duplici fune. at alter rumpitur, alter idem minatur: donec eum vnus militum gladio secat. Ibid. cap. 31.

VIRGO ANONYMA.

Vide SANCTORVM INVOCATIO.

MVLIER ANONYMA.

Properantem adhuc tenet PAVPERCVLA quædam, religiosa tamen & pia in piam hanc Matrem. Cū namque prope Laniacum in æde Virgini sacra preces funderet, factum, vt celestis ignis ei nasum mentumque auferret. Illa domum redit ocyùs, lachrymatur, clamat; *Hei mihi*, inquit, *mater misericordie omnes excipit, nullum sua æde expellit, me solum præter: Deus qui factus es filius femina, sana me precor per feminam matrem tuam*. Dixit, & pristinam membrorum integritatem recepit. Ex Chronic. Anselmi Abbat. Gemblac. manuscr. quæ suppeditauit Aub. Miræus Canon. Antwerp. qui nunc ea ipsa tenebris eruit, & luce donauit.

M A R I T V S.

Vxor PHILONIS IVDÆI.

Viri in vxorē imperium, veluti animi in corpus esse oportere, olim dicebat Plutarchus: eandemque in illis, veluti in his, nature cōiunctionem. Ac veluti huius ornamentum est animus, ita illius vir. Testata hoc præclaro ac memorabili testimonio

PHI-

PHILONIS CONIVX: quæ interrogata, cur non ut mulierum genus monilibus compta & vestium varietate ornata incederet, prudenter & supra mulierem respondebat: *Potissimum pudica uxoris ornamentum, vir bonus & sapiens*. Non minùs sanè eleganter, quàm illa Phocionis Probi: cui semper in ore, *Meus mundus sunt praeclara gesta mariti*. Æmulamini has ô matronæ; quæ spretis his ornamentis, de quibus verè vobis gloriandum, vanis & ad pompam dumtaxat exteriorem destinatis lenociniis inhæretis. Anton. Serm. de muliere forti.

EVGENIA PHILIPPI FILIA.

Vide CONIVGIUM, & BONVS VIR.

FÆMINA ANONYMA.

Pauperis uxor erat, sed honesti ciuis: ad illam

Vestibus & gemmis splendida venit Anus;

Cuius sacrilega ditatus fraude maritus,

Turpiter immensas accumularat opes.

Hac ait, En quantum sum diuite splendida cultu,

Tu quid inops inopis coniugis uxor habes?

Opportuna dedit verbis responsa modestis

Pauper honorato FÆMINA iuncta seni:

Te decorant Tyriæ vestes gemmæque nitentes,

Fama boni decorat me sed honesta viri.

Ex Epigramm. Sabini.

MARTYRIVM.

S. PAVLVS APOSTOLVS.

NON ita recenti pluuiâ rigatum semen incrementum sumit, veluti recenti MARTYRVM sanguine conspersa, sese erexit ac dilatauit Ecclesia. ut verè Martyrum sanguinem, semen Christiano-

rum nuncuparit Tertull. nec falsò cecinerit quidā:

*Sanguine mundata est Ecclesia, sanguine cœpit,
Sanguine succreuit, sanguine finis erit.*

Quod intuiti viri sancti, nihili duxerunt pro nomine IESV calamitatum mole opprimi. Ita PAVLVS, cùm monerent eum ceteri Apostoli ne ascenderet Ierosolymam, eò quòd graues eum persecutiones manerent, respondit: *Quid facitis flentes & affligentes cor meum? Ego enim non solum alligari, sed & mori in Ierusalem paratus sum, propter nomen Domini Iesu.* Act. cap. 21.

S. ROMANVS.

At ROMANVS quantum eodem igne correptus? Lictori ceruicem iam præbebat abscindendam, & ecce nuntius qui Iuliani Imp. litteras defert, quibus ROMANVS manumittitur. An expectatis exultantis animi indicia? Minimè: sed inexpectatum nuntium molestius ferens, *Hand dignus*, exclamat, *erat Romanus, quem Christus haberet martyrem.* Theod. lib. 3. Hist. Eccl. cap. 16.

S. DOMINICVS.

Quid autem iste? Sicariis hæreticis sibi mortem minitantibus; *Nondum*, inquit, *martyrii gloria dignus sum: utinam dignus aliquando euadam!* In Vita eiusdem.

S. CALLOPIVS.

Nec minùs hoc desiderio pro Christo quæuis patiendi tenebatur CALLOPIVS. cui dum pœnarum ac tormentorum quoduis genus obiiceret Tyrannus, alacri voce, vultuque; *Hoc*, inquit, *tota auiditate concupisco. Quanto me grauioribus exercueris tormentis, tanto splendidior mihi coronam contexes.* Sur. in Vita.

S. BA-

S. BASILIUS.

Æquali ardore succensus hic, cū ad Valentis tribunal iudicandus duceretur, mortemque minitaretur Præses; *Vtinam, ait, id mihi contingat, ut pro veritate vitam effundam!* Et ecce dierum aliquot inducias maturæ deliberationi permittit: at, *Ego*, inquit BASILIUS, *cras idem ero, qui hodie: utinam tu quoque idem!* Socrat. lib. 4. cap. 21.

S. ROMANVS MILES.

Alius à priore isto, sed verè etiam hoc factò dictoque ROMANVS. Dum enim plumbatis & equuleo tortus cæderetur, fuerunt qui molliùs cum eo agendum dicerent, quòd nobili esset genere oriundus. Quibus ille: *Nequaquam nobilitatis nomine mihi parcite. Absit ut me nobilem sanguis parentum præstet, aut lex curiæ: generosa Christi secta est, quæ nobilitat viros.* Prud. in Hymno.

S. LVCIVS ALEXANDER.

Et hunc tacitus silebo? En, dum liberè redarguit Urbicium, quòd Ptolomæum Christianum indictâ causâ condemnasset, ad supplicium raptus, clamabat; *Hac ratione à malis dominis me liberandum scitote, & ad bonum patrem ac regem proficisci.* Euseb. lib. 4. cap. 17. & Iustin. in Apolog.

F. IOAN. FORESTVS.

Finem facerem, nisi me vnus FORESTVS teneret, quem priori sæculo fortiter occumbentem vidit Anglia, & invidit. Flammis adiudicatus, quòd Henrici iniustis decretis acquiescere recusaret, condolenti sibi Catharinæ Aragoniæ Reginæ, cui fuerat à confessionibus, respondit rogauitque: *Quæso continuis precibus instantem meum agonem & certamen subleuate. Quo factò, nolim de constantia dubites. Parum*

b s

enim

*enim decet hos canos meos, istis puerorum terricula-
mentis in causa Dei moveri: & virum qui 60. iam &
quattuor annis vixi, mortem turpiter formidare: ac
religiosum Franciscano habitu 43. annis discentem &
docentem terrena contemnere, non amare, & quovis co-
natu adspirare ad celestia.* Sanderus lib. 1. de
Schism. Anglic.

S. AGATHA.

Ad fæminas transeo: sed quantus hîc etiam di-
cendi campus aperitur! Vna AGATHA exemplo sit
& experimento. Minabatur extrema Quintianus
Siciliæ Proconsul, ni Idolis immolaret. at illa, *Deo,*
inquit, non Dæmoni sacrifico. Equuleo subiicitur, cę-
ditur, torquetur. an eiulatus ad quos pronus ille se-
xus, emissos desideras? Nequaquam: sed, *Quantum,*
inquirebat, hisce pænis oblector! Sicuti enim triticum
non reconditur in horreum, nisi tritura ventilatione quæ
purgatum: ita scio me ad patientiæ præmia minimè
peruenturam, nisi suppliciis purgatam. O verum Eu-
angelici frumenti granum; quod priùs in terra e-
mortuum, fructum centuplum attulit! Sur. tom. 1.
in Vita.

MVLIER ANONYMA

Digna item quæ cum ceteris collata, splendoris
sui radios hîc etiam emittat. Edessæ in Mesopota-
mia Valentis decreto cautum erat, ne quis ad Ba-
silicam die postero accurrere præsumeret, nisi & eâ
& vita simul cedere vellet. Taceo quid à viris eâ
tempestate præstitû: certè MVLIER orthodoxa, na-
tum manu trahens, citato cursu, ad dictam Basili-
cam properat. Indignatus Præfectus, eam duci ad
se iubet. Et quid, inquit, mulier tam indecenti gres-
su curris? an ne decreti nostri es conscia? omnes vi-
delicet

delicet neci dandos, qui in illa Basilica reperientur. *Et hoc est, respondit illa, quod me euocat; hac properationis causa, ut etiam inter eos inueniar.* At quò paruum trahis? instat. Illa, *Eodem, ait, ut & ille martyri fiat particeps.* Maluit certè pia MULIER mortē cū prole pro Christo oppetere, Deoq; iuge cum Abrahamo sacrificium offerre, quàm se impiis Præfetti legibus submittere. Hist. Trip. lib. 7. cap. 32.

S. THEODORA VIRGO ET MARTYR.

Require Apophthegmata de ANIMI FORTITUDINE, & FIDE ERGA DEVM.

MATRIMONIUM.

IESVS CHRISTVS.

HONORABILE CONNUBIUM à Deo in Paradiso institutum, sine quo humana societas consistere diu nequit, breui compendio perstringimus. Cuius bonum paucis insinuauit CHRISTVS DOMINVS, dum Pharisæis calumniandi animo accedentibus, rogantibusque multa de libello repudiij à Moyse concessi, Matrimonium ad primam institutionem reuocasset. dicebat enim: *Quod Deus coniunxit, homo nō separet.* distinctè matrimonialis vinculi indissolubilitatem pronuntians. Mat. c. 19.

IDEM

Cū plurima de Matrimonij nexu dixisset, Discipuli quasi stupefacti; *Si ita est, inquiunt, causa hominis cum uxore, non expedit nubere.* Qui respondit eis; *Non omnes capiunt, id est approbant & admittunt, verbum istud; sed quibus datum est: scilicet, speciali gratiæ dono.* Benè Hieron. lib. De viduis: Copula nuptialis non est quasi copula vitanda, sed quasi

quasi necessitatis sarcina declinanda. Nam, ut Theodectus, Similes sunt senectus & nuptiæ: vtraque enim consequi desideramus: postquam verò nacti fuerimus, tristamur. Matth. cap. 9.

ALPHONSVS ARAG. REX.

Huic aliquando in ore: *Tum demum matrimonia tranquille exigentur, si vir surdus, vxor ceca sit.* Significabat autem, plerasque rixas quæ in hoc statu interueniunt, excitari potissimum ex zelotypiâ coniugum. quorum si hic surdus foret, ne alterius profusam garrulitatem audiret; illa cæca, ne mariti intemperantiam videret; non tam frequens etiam foret querelarum ansa. Panorm. de Dict. eiusd.

MARIANVS SOZINVS.

Et quia is qui cum vxore est, iuxta Apostolum, sollicitus est quomodo placeat vxori, & diuisus est: idèò rogatus MARIANVS, vir alioquin eruditus, cur minùs post coniugium, quàm ante illud, libris literisque incumberet; respondit: *Quia vxorem duxi.* dicentiq;: Etiam Socrates vxoratus erat, cur non & ille Philosophiæ studia aspernatus? *Xantippe*, ait, *morosa erat, & deformis; mea autem proba est, & forma decenti.* Æneas Sylu. de Dict. Sigism. & Frederici Imp.

ANONYMVS.

Hinc benè quidam, inquirenti an viro sapienti ducenda foret vxor, respõso hoc satisfecit, inquiens: *Si pulchra, si benè morata, si honestis parentibus, quid obstaret?* At quia hæc rara avis, sapienti ducenda vix erit nam, ut Varro in Menippæa,

Vitium coniugis aut tollendum est, aut ferendum.

Auct. Serm. memor.

ANO-

ANONYMVS.

Duxerat hic vxorem sine vllâ omnino dote, cùm tamen honestiores & opulentiores matronæ se crebriùs offerrent. Roganti verò, cur his spretis, illam in coniugem acciperet; *Ne, inquit, dotium freno constrictus, uxori meæ nupsisse ego videar: & ita contra Apostoli doctrinam viri caput fiat mulier.* Sed quantum hoc æuo ille morbus inualuit, quas non radices egit? Pulchrè simul & facetè Martialis, lib. 8. ad Priscam:

Vxorem quare locupletem ducere nolim,

Quaritis? Vxori nubere nolo meæ.

Inferior matrona suo sit, Prisce, marito:

Non aliter fiunt femina virque pares.

Vt verò insinuet quænam tandem vxor ducenda, ita ad Flaccum loquitur:

Qualem Flacce velim, quæris, nolimve puellam?

Nolo nimis facilem, difficilemque; nimis.

Illud quod medium est, atque inter utrūque; probatur,

Nec volo quod cruciat, nec volo quod satiat.

Ioan. Petrosius in Serm. conuiual.

MEDICINA.

IESVS CHRISTVS.

MEDICINA, quam Altissimus de terra creauit, quamque vir prudens non abhorrebit, inuestiganda. Eius enim necessitatem commendant Sacræ litteræ, & in iis humani generis verus Medicus & reformator CHRISTVS: qui, cauillantibus Pharisæis, quòd ad Matthæum ingressus esset; hac similitudine vsus, ait: *Non est opus valentibus Medicus, sed malè habentibus.* Matth. cap. 9.

PIVS II. PONT.

Inciderat apud eum sermo de imperitis medicis & sacerdotibus : qui inter eos discrimen assignans, *Imperiti*, aiebat, *medici corporis dumtaxat*; sed *sacerdotes indocti, anima interfectores sunt*. Vide vtrumuis è duobus elegeris. Auð. Sermon. memor.

I D E M

Vterat in dicendo mirè facetus, dicere quandoque solebat : *Peccare existimo medicos, quòd ab agris stipendium accipiant, qui malint eis carere: at potiori ratione à sanis accipiendum, ne illis vti compellantur*.

Vndè quidam non illepidè de Medicis ita lusit:

Accipit oblatum Medicus, dare non solet aurum;

Pharmaca dat Medicus, non solet accipere.

Ordonner Medicos, agros or donner oportet:

Alterius sic res altera poscit opem.

Corozet. de Dict. Fact. memorab.

ADRIANVS VI. PONT.

Dum inter domesticos hæc quæstio ventilaretur, exp. dirétne Reipub. esse medicos : ac varij varia dicerent, nonnulli etiam negantem partem amplecterentur, eò quòd Roma eorum ope 600. annis caruisset aliquando: ille subridens, *Imò, ait, expedit eos esse: ne tandem ipse mundus ab inhabitantibus opprimatur, qui aliàs nimis magno numero futuri*. Significabat autem praxim medicinæ, priusquam ad vnguem castigata sit, euidenti multorum periculo exerceri. Floresta in Dict. memor.

MAXÆMILIANVS IMPERATOR.

Detinebatur hic graui morbo, & ecce vndique accurrunt Medici, rem, vt videbatur, magnā acturi. Ille meliusculè se sentiens, singulos seorsim introduci ad se mandat. quos omnes hac voce compellabat;

labat; *Medice quot? mirantur omnes, & vocem faucibus detinent; donec tandem introgressus quidam experiētiā & doctrina clarior ceteris, Imperatori roganti, Quot? respondit; Tua pace dixerim Caesar, innumeros.* Ridet IMPERAT. tam liberā confessionem, inquiens: *Ingenua confessio te medicum Casareum fecit: sed tu porro experimentis per mortes abstine, inuentis ex fide utere.* Theatr. Vitæ humanæ.

IOVIANVS PONTANVS.

Ille item vt erat Alphonso Regi à secretis, vnico dumtaxat cibi genere utebatur. rogatus, cur id ageret; *Vt sic, inquit, medicorum manus effugiam.* Legebat fortassis illud Hippocratis, Diuersitate ciborum nihil nocentius. Hadr. Barlan.

MEDIOCRITAS.

ALPHONSVS REX ARAG.

MEDIOCRITATEM, quam meritò auream dixit Horatius, sectamur: sine quâ nemo sapiens habendus, nemo virtutibus, quarum hæc custos, præditus censendus erit. quod memorabili dicto demonstrauit ALPHONSVS: dicebat enim: *Optimum fore & peroptandum, si voluntas nostra inter amorem & metum media intercederet: vt quantum amor ad excessum, tantum metus pelleret ad defectum.* Sentiebat autem hominum actiones mediâ volūtate temperandas. Panor. lib. 4. de Gest. eiusd.

PETRVS ALDOBRANDINVS CARD.

Dabis veniam Illustrissime Præsul, si Alphonsum tibi extra ordinem præponam. Tu etiam huius virtutis non laudator tantum, sed & sectator, dicere soli-

solitus; *Virtus sine modo fit vitium*. Hinc cum filias Archidami donasset pretiosis vestibus Dionysius, noluit pater eas induerent, ne turpiores apparerent. Benè ergo suum Licinium hortatur Horatius :

*Rectius vines Licini, neque altum
Semper urgendo, neque dum procellas
Cantus horrescis, nimium premendo
Littus iniquum.*

MEMORIA.

PETRVS ALDOBRANDINVS CARD.

Rerum magistra & Musarum parens MEMORIA in proscenium quoque educenda. de quâ præclarè aliquando locutum Illustriss. Cardinalem ALDOBRANDINVM legimus. Rogabatur, quænam esset optima Sapientiæ schola; *Memoria*, respondit. addens, *Estque hæc non magistra modò, sed & mater veteribus constituta Musarum.* Henr. Farnes. Apophth. de Princ.

IDEM.

Quantus verò Memorix defectus in addiscente sit, eiusdem sententia probat. Sciscitanti namque, qualis in addiscente deberet esse Memoria; *Quale*, inquiebat, *in Apollinis simulachro olim erat tricipitium*. Vnum enim erat lupi, ob rapacitatem: leonis alterum, ad tenacitatem: tertium canis, ad fidelitatem. Eam ergo memoriam requirebat, quæ sua rapacitate omnia deuoraret, eademque firma tenacitate retineret, & sibi fidentem non falleret. Ibid.

IDEM

Interrogatus etiam, quænam è veteribus ut maximè ad litterarum studia idoneum reputaret; *Hortensium*,

tensum, respondit. ille enim (Cicerone teste) in tantum valuit memoria, ut, quæ secum pluribus egisset, sine scripto, verbis iisdem redderet. Ibid.

IDEM.

Cum insuper de memoriæ præstantia sermo fieret, & hic Mithridatis regis (qui duarum & viginti gentium linguas calluit) ille Themistoclis aut Cyri (quorum prior non poterat obliuisci quorum nollet; posterior, totius exercitus nomina singulatim referebat) memoriam laudaret; *At ego, inquit, eam memoriam probo, qua quis sui numquam obliuiscitur.* Præclarum profectò, & tam illustri pectore dignum Apophthegma. Ibid.

MERCEDIS CONTEMPTVS.

S. HILARION.

Quamuis naturâ duce cuilibet bono operi sua debeatur merces, eam tamen charitatis intuitu crebrius recusarunt in terris viri sancti, quo ampliore magisque securam in cælis præparatam reperirent. Vnde HILARION, Orioni sibi dona offerenti, quòd dæmonum phalange eum liberasset, dicebat: *Non legisti, quid Giezi, quid Simon, passi? cumque Orion flens diceret: Accipe in vsus pauperum.* respondit: *Tu id rectius præstiteris, qui urbem indies obambulas: ego qui reliqui mea, cur appetam aliena?* Hieron. in Vita:

IDEM.

Ita in Sicilia cuiusdam sibi auri pondus danti, quòd graui eum morbo curasset, depromebat eam Domini sui vocem: *Gratis accepistis, gratis date.* Ibidem, cap. 14.

c

S. LEO.

S. LEONARDVS.

Pari constantia iste, oblatam à Regina Galliæ mercedem, quòd eam precibus difficili partu liberasset, renuit: offerentiq̃ue Regi, *Nequaquam*, ait, *illis mihi opus. nihil enim defuturum est ei, qui omnium opifici libenter seruit. cùm ipsa Veritas dicat, Querite primùm regnum Dei.* Iac. Ianuens.

S. MARTINVS EPISCOPVS.

Et hic Leontij cuiusdam familiam contagioso morbo, diuinâ adiutus ope, liberarat. qui, cùm pro beneficio centum argenti libras rependeret, recusauit accipere. quare indignati comites. Ad quos MARTINVS, *Nos*, inquit, *Ecclesia & pascat & vestiat: dummodò nihil vsibus nostris quæsisse videamur.* Sulpit. in Vita.

MILES, MILITIA.

ALEXANDER SEVERVS.

D iuitiarum non esse securam possessionem, nisi armorum defensione seruetur, auctor est Vegetius. Quare vigilantissimus Imp. SEVERVS. cauere prouidebat, ne vnquam suo stipendio MILITES fraudarentur. Dicebat enim: *Miles non timet nisi vestitus, armatus, calceatus, & satur, ac aliquid habens in zona.* Sentiebat militem, cùm aliquid habet, metuere ne perdat: mendicitas namque in desperationem redigit armatum. Æl. Lamprid.

D. LVDOVICVS FRANC. REX.
Vide Apophth. de ADMONITIONE.

CAROLVS V. IMP.

Ille tres rerum neruos dicebat, *Pecuniam*, *Com-*
mea-

meatum, & Militem. E quibus si vnus eligendus: *Malim*, inquiebat, *veteranum militem. eius namque promptitudine quauis ab hoste impetrabimus.* In Vita eiusd.

M I N Æ.

FREDERICVS II. IMP.

Quemadmodum quod sine fulmine erumpit tonitru, quamuis aliquem terrorem incutiat, periculo vacat: ita quorundam imbelles MINÆ. Sentiebat id FREDERICVS ROGERIVS; qui, vt erat totus Martialis & acer, nihil minoris æstimabat, quàm imbelles quorundam comminationes. cumque ad eum horum aut illorum Principum minæ dicteriatve deferrentur; *Minarum*, dicebat, *strepitus, asinorum crepitus.* Nicol. Reusn.

PETRVS ALDOBRANDINVS CARD.

Viro autem forti nihil derogare minantis auctoritatem, suo dicto asserebat iste. erat autem tale: *Vir fortis adamanti persimilis, qui neque ferro infringi, neque igne absumi potest.* Ita Leonidas Persæ cuidā minitanti, quòd Lacedæmonij die postero ex telorum imbre solem visuri non essent, In vmbra igitur, respondit, commodè pugnabimus. Henr. Farnes. in Apophth. de Principe.

MIRACVLVM.

IESVS CHRISTVS.

SI inuisibilia Dei per ea quæ facta sunt conspiciantur; multo ampliùs ea ipsa elucere dicenda erunt, in iis quæ illustriora & magis admiranda.

Ita cùm de Nathanaële dixisset C H R I S T V S , eum verum Israëlitam; deinde quòd sub ficu eum vidisset dum à Philippo vocaretur; & diceret Nathanaël, Rabbi tu es Filius Dei , tu es Rex Israël : respondit; *Quia dixi tibi, Vidi te sub ficu, credis : maius videbis.* scilicet, vt magis & firmiùs credas. Sunt enim miracula signa non fidelium, sed infidelium.

Ioan. cap. 1.

I D E M.

At non semper oportunum tempus edendi miracula. Dicebat enim I E S V S , deficiente in Cana Galilææ vino, ac monente matre, Vinum non habent: *Quid mihi, & tibi est mulier? nondum venit hora mea.* Quasi dicat, Tēpus miracula operādi, & per ea me ipsum mundo manifestandi nondum adest. Aderat autem, cùm iam omnibus de vini inopia constaret. vt aduertit Iansen. in Concord. cap. 18. Ioan. c. 2.

I D E M.

Neque solùm admiranda C H R I S T I opera eum ab insania dæmonioque, quod habere eum obiiciebant, vindicarunt; sed & verum Messiam à sæculis promissum fuisse testata sunt. Cum enim Hierosolymis ambularet in porticu Salomonis, eumq; circumdedissent Iudæi, requirentes, Quousque animam nostram tollis? si tu es Christus, dic nobis palàm. respondit: *Loquor vobis, & non creditis : opera quæ ego facio in nomine Patris mei, hæc testimonium perhibent de me.* Ioan. cap. 10.

I V D Æ I E V A N G E L I C I.

Vera autem miracula veram etiam diuinitatem arguere, palàm testati Iudæorum quidam præ ceteris benigniores. Postquam enim cæcum à natiuitate sanasset Iesus, seque bonum Pastorem dixisset, or-
tum

tum inter Iudæos dissidium. quorum alij dicebant, Demonium habet, & insanit: quid eum auditis? alij verò sanioris mentis: *Hæc verba non sunt demonium habentis. numquid demonium potest cæcorum oculos aperire?* Ioan. cap. 10.

ANONYMVS.

Vide CHRISTI POTENTIA, & NOMEN.

MISERICORDIA.

Vide CLEMENTIA, ELEEMOSYNA,
PAUPERVM CVRA, &c.

MODESTIA.

ALPHONSVS ARAGONVM REX.

MOdum in rebus esse, & certos fines, auctor est Horatius; & post eum, idem testatus ALPHONSVS: quem cum Lucas vir disertissimus, graui Oratione laudasset, hoc ab eo responsum accepit: *Si vera sint quæ de me prædicas, Deo gratias ago: sin aliter se habeant, vt vera aliquando sint, rogo.* Panorm. lib. 1. de Gest. Alphon.

IDEM.

Infectâ in quâ versabatur vrbe sanguinis profluvio, iaspidem quem secum ferre solitus, ad mulierem quamdam eo morbo laborantem misit. quæ vbi sanitatem recepit, venit gratias actura; quodque iaspidem sinistro casu perdidisset, insinuat. veniam Rex daret. Increpant eam Procures, & ingratitude meritò arguunt. At ALPHONSVS nihil mutato vultu, summa cum MODESTIA; *Matrona*, inquit, *ij qui parvam suæ valetudinis curam habent, mirantur si tu vt valere possis, lapidem retinuisti.* O præ-

dicendam cum humanitate coniunctam MODE-
STIAM. Bapt. Fulgos. lib. 5.

*Require Apophth. de MEDIOCRITATE,
& COGNITIONE SVI.*

MONACHVS.

S. ANTONIVS EREMITA.

QUod olim à sanctis illis Eremitis cultoribus
MONACHORVM nomen deriuatum sciret ma-
gnus ille solitudinis amator ANTONIVS; commissis
sibi fratribus dicere solebat: *Quod piscis in arido, hoc
Monachus in opido.* proprium Monachorum (si ta-
les re, vt nomine sint) domicilium locumve, clau-
strum ac solitudinem reputans. Niceph. lib. 8. c. 4.
Hist. Eccles.

ELIAS ABBAS.

Vide ADMONITIO.

S. HVGONIS EPISC. LINCOLNIENS.

Neque minùs nobile HVGONIS ANTISTITIS di-
ctum. Inita pace inter Franciæ & Angliæ reges, do-
mum Arueriam Carthusiani instituti venit. Roga-
tus autem de pacis conciliatæ conditionibus, re-
spondit: *Rumores audire & referre, etsi Episcopis li-
cet; Monachis tamen non licet.* Dictum non solum
hauriendum auribus, sed verè etiam insculpèdum
inscribendumque eorum animis. • Surius tom. 6.
in Vita.

S. LAVRENTIVS PATRIARCHA VEN.

Æquè laudabile illud LAVRENTII PATRIAR-
CHÆ: qui, *Tribus Monacho est opus, aiebat, desiderio,
moderatione, & gratia: ubi enim horum aliquid deest, ibi
perseuerantia esse non potest.* Sur. to. 1. in Vita.

S. ÆGI-

S. ÆGIDIUS.

Quodam illum consulente, num relicta mundi vanitate satius esset se Deo in monasterio consecrare; respondit: *Si extremâ inopiâ laborans, reconditum quis thesaurum in agro sciret; putâsne requisitum ab aliquo, an eum effodere deberet?* Quo dicto insinuavit, multo ampliùs nobis properandum ad ea loca, in quibus æternæ salutis thesaurus. Sur. tom. 2. in Vita.

BALDERICHVS EPISC. SPIRENSIS.

At non omittendum quod de BALDERICHO asserit Bruschijs. In Episcopum enim Spirensensem ob raras ingenij dotes, &

*Compositum ius fasque animi, sanctosq; recessus
Mentis, & incoctum generoso pectus honesto,*
à clero & populo, ex monasterio Hirsauienti, in quo B. Augustini regulam vouerat. adscitus, summo conatu restitit: adiiciens nobilem illam sententiam: *Ex quo in Cœnobium me contuli, fastui Principum mundi que pompæ valedixi.* Verùm nihil excusatio profuit. inuitus enim ad Episcopatum pertractus, à reprehensione immunem & planè monasticam vitam in eo egit.

ADOLPHVS HOLSATIÆ COMES.

Admirandum etiam monasticæ humilitatis exemplum præbuit ADOLPHVS HOLSATIÆ COMES. Hic enim manus cum hoste cōserturus, voto se adstrinxerat, ut si victor euaderet, Institutum D. Francisci, Comitatu abdicato, sequeretur. Itaque voti compos, paupertatem Christi æmulaturus, sacram vestem Minoritarum, & simul viuendi normam assumpsit, votoque se soluit. Sacris initiatus, Monasterium sui ordinis in opido Kyl ædificari curauit;

collectis etiam ostiatim eleemosynis in subsidium. Factum autem, ut cum hydriam lactis ad socios deferret, filios suos Holsatiæ comites splendido cultu obuios habuerit. Quid faceret? viam declinare non poterat: pudorem tamen vicit constantia, seque totum lacte perfudit, dicens: *Infelix homo, Christi paupertatem baiulare erubuisti: nunc te monachum exhibe, ostende quid portaueris.* iterque suum, nil filiorum moratus præsentiam, totus lacteus absoluit. Hieron. Ziegl. in hist. Illust. German.

MORBUS.

SENEX ANONYMVS.

Quid de corporis infirmitate dicam? quam pro-
uidus aliquando immittit Deus iis, quibus uti-
lius est frangi languoribus ad salutem, quam rema-
nere incolumes ad damnationem. Venerat SENIOR
tam pietate quam annis, ad discipulū suum: quem
cum infirmę valetudinis reperisset, *Fili, inquit, ne
propter corporis infirmitatem angaris, pro quâ Chri-
stianum decet Deo gratias agere.* Quo dicto, & morbi
vehementiam leniit, & infirmi tolerantiam non pa-
rum auxit. Simon Goulartius ex Vitis SS. PP.

EREMITA ANONYMVS.

Et huius quoque spiritum Dei visitatio custodie-
bat. quotannis enim variis infirmitatum generibus
affligi solitus, accidit ut vno anno à morbis omni-
no immunis foret: quam sortem altis suspiriis de-
plorans subinde, exclamabat: *Domine Deus, cur me
deseris? cur me desolatum hoc anno non visitaſti?* Ita
vir sanctus, ea quæ alij pro flagello habent, solatij
loco, quoad vixit, reputabat. Idem.

THEODORICVS EPISC. COLONIEN.

Erat ille auctoritate & prudentiâ inter Electores facile Princeps. Quærenti autem Sigismundo Cæsari, quonam pacto felicitatem consequi posset; *Inter mortales*, ait, *frustrâ requiris*. Instanti rursus; *Ad caelestem ergo quo itinere pergam?* *Rectâ*, respondit ille. *urgenti*que tertio, quid agendo rectâ tenderet; *Si*, ait, *ita vitam institueris, quomodo facturum te promissisti, dum calculus aut alia inualetudo te oppressit*. Docuit autem, morbum quemuis, si acrior sit, esse certum ad meliorem vitam incitamentum. *Æn.*
• Syl. lib. 2. de Gest. Alphonfi. •

ANONYMVS RELIGIOSVS.

Sed & diuinæ probationis ac miserationis argumentum est corporis per egritudinem afflictio. hinc quidam ex Patribus adolescenti à se sanitatem postulanti, respondit: *Rem tibi necessariam cupis auferri: si enim aurum es, per ignem probaris; si ferrum, rubiginem amittis*. Sanè id ipsum nobis omnibus dictum putemus, ut alacri animo feramus,

Cum grauis excruciat morbus, vel seuæ podagra

Cum premit, aut lectus debile corpus habet:

Et morbi auctorem merito celebremus honore.

Vulneris hac nobis certa medela datur.

Refert. L. Granat. Serm. de Commem. Annunt. ex vitis PP.

Require Tit. de TRIBVLATIONE.

M O R E S.

FRANC. BORGIA SOC. IESV.

NON parua modestiæ prudentiæque nota, cuiusuis MORIBVS se facilem præbere, temporis
c 5 ac lo-

ac loci ratione habita. Claruit autem hoc splendore FRANC. BORGIA: qui, dum iter faciens diuertisset ad ea loca ubi eum à quotidiano Sacrificio arcebant, etiam tabulis Societatis prolatis; socio urbinè in aurem insusurrabat: *Nunc per me licet pristinos titulos nomines. Ciuili namque hîc iure agendum.*

Lib. 4. Vit. eiusd. cap. 1.

I D E M

Modum titulis statuere solitus, in iis tamen dandis liberalis; si quem aulico hoc fumo libenter denigrari conspiceretur. aiebat namque: *Si peccandum alterutram in partem est, titulorum ubertate quàm raritate offendere malo.* Ibid. cap. 8.

LVDOVICVS XII. GALL. REX.

Ille ut in aliis, ita & hîc facetus. Dicenti coniugi, futurum ut claudicantem leuiter filiam gener, cui eam Rex se inuita desponderat, planè contemneret; illud Nasonis ingerinabat:

Certus amor morum, formam populabitur atas.

P. Æmil. in Vitâ.

CAROLVS V. IMPERATOR.

Hic etiam cum regali maiestate facetâ urbanitate præditus, frequenti suos Proceres apophthegmate reficiebat. Factum autem, ut de cogendo milite sermo fieret. cùm ille ita orsus: *Ego dum militem & castra colligo, assumo caput Italicum, humeros & manus Hispanicas, Germanum pectus, ventrem & pedes aliarum nationum.* Solertiam Principis in eo potissimum consistere significabat, quòd cuiusvis nationis mores & humores habeat sibi perspectos.

Chytr. Orat. de vita Caroli.

MORIO.

M O R I O.

FREDERICVS IMP.

MORIONES, vt hominum omnium communem fecem, breuiter transcurramus, & simul eos despicientem FREDERICVM CÆSAREM. qui rogatus, an illud hominum genus in conuiuium admittendum esset; sapienter respondit: *Neque stultis delectari possum, neque superbis esse amicus.* Confidebat illud Poëtæ:

———— *Sapientia prima est*

Stultitia caruisse. ———

Æn. Syl. lib. 1. de Gest. Alph.

ALPHONSVS REX ARAG.

Ille in omnes munificus, præterquam in has sordes hominum. dicebat enim: *Huiusmodi homines persimiles sunt cisternæ rimosæ, quam ut nullus implet imber, ita hos nulla rerum compendia exsatiant.*
Pont. de Liberal.

M O R S, E I V S Q. M E M O R I A.

S. HVGO EPISC. LINCOLNIEN.

VLtimam rerum humanarum lineam, MORTEM, attigimus: quâ, vt inquit Seneca, nihil natura præstitit melius, & cuius frequētius nullum est votum. Hinc benè LINCOLNIENSIS ANTISTES HVGO, multa de Mortis horrore dicētibus, respondisse fertur: *Heu quàm miserè nobiscum ageretur, si nūquam hoc exilio excederemus!* Voluebat animo vir sanctus, quòd iustus si morte præoccupatus fuerit, in refrigerio erit. Sur. tom. 6. in Vita.

S. HIE-

S. HIERONYMVS.

Et ob id iugem esse & salutarem mortis memoriam dicebat HIERONYMVS, dum ait : *Facile omnia contemnit, qui se cogitat moriturum.* breui, sed solido dicto vitæ nostræ fragilitatem insinuans. Præclare Martialis:

Pange toros, pete vina, rosas cape, tingere nardo:

Ipse iubet mortis te meminisse Deus.

Fulgos. lib. 7. cap. 2.

RELIGIOSVS ANONYMVS.

Narrat de isto Ioan. Climachus, quòd, cùm negligentius viueret quàm Religionis statutum postularet, morbo ad extrema deductus, integram pænè horam quasi in extasin raptus iacuerit; ac tandem sibi redditus, vt omnes qui aderant à se egrederentur postularit. Quo facto, antri quod incolebat aditum saxi obstruxit, in eoque duodecim annos tam asperam vitam duxit, vt nulla colloquia admitteret, nullum, præter aquæ & panis pauxillum, cibû corpori indulgeret, ac solùm animo volueret, quæ in illo suo mentis excessu fuerant sibi obuersata. Quo tempore autem fatalem sibi diem, quando ex hoc carcere exeundum, instare aduertit; reserato aditu, alios suos collegas admisit. Qui dum supplices peterent mnemosynum aliquod, quo ad virtutis studium incitarentur, ille iam oculos pænè in morte grauatos attollens; *Ignoscite, inquit, fratres. Nemo, qui reuerà mortis memoriam agnouerit, peccare umquã poterit.* Quàm appositè monet in Epist. Horat.

Inter spem, curamque, timores, inter & iras,

Omnem crede diem tibi diluxisse supremum.

Refert ex Climacho Guil. Baldesanus lib. 2. Stim. virt. cap. 17.

ABBAS IOSEPH.

Egregiè quoque, apud Cassianum, ABBATEM IOSEPHVM sensisse fatendum erit. à quo frequenter audita hæc vox: *Postremum illud, quod generaliter vitiorum omnium peremptorium esse nemini dubium; est, ut se de hoc mundo quis credat quotidie migraturum. & verè,*

*Flante velut valido nubes Aquilone fugantur,
Sic meditata scelus Mors procul omne fugat.*

MESSODANVS.

Quæ cum ita sint, iure MESSODANVS iam senex, vitæ tædio affectus, cum ab amico in crastinum vocaretur, respondit: *Quid me vocas in crastinum, qui à multis annis crastinum non habui, sed mortis aduentum indies exspectavi? quæ numquam nobis non insidiatur, donec tandem incautos opprimat.* Sanè, ut doctè iterùm Martialis,

*Non est crede mihi sapientis dicere, Vinam:
Sera nimis vita est crastina, vive hodie.*

Guido Bituric. ex Hist. Eccles.

CONSTANTINVS IMP. ET HORMISDAS.

Require Apophth. de ROMA.

MAXÆMILIANVS I. IMP.

Sed & memori mente voluebat MAXÆMILIANVS, quod sub Mortis, ut canit Claudianus,

*— purpurei veniant vestigia Reges
Deposito luxu, turbâ cum paupere mixti.*

Nam postremo sui Imperij lustro, cum palatium apud Qenipontem magno suo ære construi mandasset, & operis præfecti leuiiores quosdam in eo errores commisissent, secretiùs in aurem cuidâ sibi adstanti susurrabat: *Parum hi faciunt quod me delectet: aliam domum construam mihi placituram.* eoque die

die feretrum omni quæ ad sepulturam necessaria foret suppellectili instructum parari iussit, ac secum, quocumque pergeret, clanculum deferri. Cumque curiosius coniectarent Procures de usu illius scrinii; CÆSAR subridens, ac sibi conscius, *In rei*, dicebat, *mibi supra omnes alias charissima usum, mecum hoc defero*. Ita assidue sepulchrum adesse sibi voluit, ut eiusdem perpetua recordatio, suæ menti fastû mundi eximeret, æternitatis brauium infunderet. Reinhard. Hadamar. in Instit. Principum.

I D E M

Iusserat adhuc superstes, ut quando inter viuos defuisset, cadauer suum omni hominum, etiam infirmæ, sorti conspiciendum proponeretur: ac causam percontanti, *Ut ita*, dicebat, *vel meo exemplo discant omnes, nulla diademata, opes nullas, nec vlla imperia à morte eripere possidentem*. Hæc enim

—— *sola ultricibus armis*

*Elatos frenans animos, communia toti
Genti sceptrâ tenens, æternâq; fœdera seruans,
Et magnos paruosq; terit: nam fortibus æquat
Imbelles, populisq; Duces, seniumq; iuuentæ.*

Ibidem.

FREDERICVS IMPERATOR.

Vide IUDICIUM DEI.

ALPHONSVS REX ARAG.

Nec silentio præteriri ALPHONSVM fas erit. qui requirenti, *quanam res Principes ac priuatos, diuites ac pauperes, exæquaret*; respondit: *Cinis*. significans, quod paucis habet Iuuenalis:

—— *Mors sola fatetur*

Quantula sint hominum corpuscula. ——

Itaque attollere in vita, manus & spes ab Oriente

in

in Occasum mitte : illa contrahet , & te intra te co-
get. Panorm. lib.4. de Cest. eiusd.

CÆSAR BORGIA.

Hic totius Italiæ imperium animo conceperat, ac
sublatis è medio omnibus quos sibi impedimento
futuros suspicabatur, tandem quod aliis miscuerat,
venenum hausit inscius : & moriturum se ratus,
Aduersus omnia, inquit, *pericula me munivi, præ-*
terquam aduersus mortem. quippe qui numquam co-
gitavi me tam citò moriturum. immemor sanè illius
Democratis : Imprudenter & impiè viuere, nō tam
esse malè viuere, quàm diu mori. Machiauellus.

FRANC. BORGIA DVX.

Eiusdem nominis & generis iste, at vitæ notæq;
melioris. Præfuerat funeri Augustæ iam functæ, &
miratus quòd exiguus tumulus sceptræ, coronas, ac
Regiam maiestatem exciperet & concluderet, di-
cere solebat; *Augustæ mors mihi vitam attulit.* &
verè,

Si cupis aduersus scelerum fœdissima quæque
Vulnera, perfacilem dem tibi promptus opem:
Cùm te turpe aliquid tentat, fac illicò mentis
Sese mors oculis offerat atra tuæ.

Ribad. lib.1. Vit. eius, cap. 9.

I D E M.

Cùm decumbenti grauitè, & extra medicorum
spem, adessent qui lachrymas funderèt : ille inopi-
natò, *Cur lachrymas frustra funditis? An illæ me mor-*
ri eripient; si Deo visum, ab hoc vitæ exilio me in pa-
triam reuocare? Sciebat egregius Princeps, statutos
à summo Principe Deo vitæ cuiusuis terminos,
qui præteriri non poterunt. & quòd

Omnes eodem cogimur: omnium

Versa-

*Versatur urna, seriùs, ocys
Sors exitura.*

Ribadin. in Vita eiusd. lib. 2. cap. 13.

MORTIS CONTEMPTVS.

S. THOMAS APOST.

AD MORTEM itaque libenter subeundam, instigare nos debent quotidianæ vitæ molestiæ, & amicorum obitus inopinati, ac maximè ea quæ post hanc vitam secutura est retributio. Et priora quidem illa considerabat THOMAS APOSTOLVS. nam cùm ex Domino intellexisset quomodo Iudæi voluissent eum lapidare, ac Lazarum iam inter viuos desuisse; & subiungeret, Gaudeo propter vos, vt credatis (id est, vt fides vestra in me augeatur, & crescat) quoniam non eram ibi, sed eamus ad eum: dicebat ad condiscipulos; *Eamus & nos, vt moriamur cum eo* (nempe Lazaro iam mortuo.) Non enim tantùm diffidebat ipsos secundùm Domini promissâ præseruâdos ab offendiculo, sed & Lazarum posse inter viuos rediuiuum vocari. vt benè notat Iansen. Ioan. cap. 11.

S. HILARION.

Quæsiuerant eum tota nocte latrones, ac manè repertum, rogant; Quid faceres si latrones ad te venirent? ille: *Nudus latrones non timet.* atqui occidi potes, inferunt: *Possum,* ait HILARION, & *ideò latrones non timeo, quia mori paratus sum.* quam animi constantiam conspicati, culpamq; confessi, resipuerunt. Hier. in Vita.

IDEM.

Vide CONSCIENTIA BONA.

REGI-

REGINALDVS POLVS CARD.

Intellexerat ab Edeuardo Leodiens. Antistite, Henricum Angliæ regem præmium aureorum aliquot constituisse ei, qui illi necem inferret. & miratus Regis dementiam, dicebat; *Iam dudum huius vite radio affectus, mortem optavi: & cum Henricus Rex tanto eam studio efficere contendat, nihil aliud facit, quàm si eunti dormitum, vestimentum subtrahere conetur.* Nō potest enim (vt cum Augustino loquar) malè mori, qui benè vixerit: & vix benè mori, qui malè vixit. N. Sander. lib. i. de Schism. Angl.

ALPHONSVS ARAG. REX.

Nullum finem inueniret narratio, si omnia hunc in locum congessero, quæ passim suis historiis inseruere Ecclesiastici scriptores. Vela itaque contraho, & ad ALPHONSVM pergo: qui, dum intellexisset quemdam ex alumnis suis infirmari, eum adiit, & à mortis diro aspectu abhorrentem, his verbis solabatur; *Non est adolescens, cur mortem tantoperè timeas: cum hæc benè morientibus sit vita, atque eius vite principium, quæ neque doloribus, neque metu, neque inuidiæ arumnis subiecta est.* Panorm. & Æn. Sylu. de Dict. Fact. Alph.

MORS GENEROSA.

CAROLVS IX. FRANC. R.

NON parua apud posteros laudē se relicturos arbitrati sunt Principes quidam viri; si, cum mors oppetēda tandem sit, eam cum gloria oppeterent. quibus etiam pulchrū mori succurrit in armis. CAROLVS IX. certè F. R. circumuentus à seditioso Hugonottorum rebellium equitatu, ad legiones au-

d

xilia-

xiliarium Heluetiorum cōuersus, inter cetera vocem illam edidit: *Malim mori Rex, quàm viuere captiuus.* Annal. Franc.

LVDOVICVS LVDOVICI F. R. FILIVS.

Non minùs generosè iste. erat & viribus & armis robustus, cùm eos qui Patri optimo rebelles exstiterant, bello vindice lacesseret. quâ tempestate crebriùs dixisse commemoratur: *Pulchriùs mori inuenem crudelitate honesta, & ob bonum finem: quàm cum dedecore vitam protrahere.* Corozet. de Dict. Fact. memor.

*Lege Apophth. de BELLICA & ANIMI
FORTITVDINE, CONSTANTIA, &c.*

MORS ÆQVE FERENDA.

S. ELISABETH REG.

ÆQVO animo ferendum quod necessariò subeundum est, ac vitari nequit. vnde equissimo animo ferenda tam nostra, quàm nostrorum Mors. manendi namque aliquâtum, non habitandi diuersorium natura hîc dedit. Vultis exempla, & quidem ab utroque sexu? ELISABETHA Lantgrauij Turingiæ coniux, animi fortitudine & sanctitate pænè pari, marito vita functo, dixisse ad suos fertur; *Ut viueret vir meus, nulli labori parcere volui: verùm eo nunc Deo ita volente sublato, ne minimum capitis dederim capillum, ut mihi viuus restituatur.* Sur. tom.6. in Vita.

MELANIA MARCELLI COS. FILIA.

Et ne vnicam dumtaxat hac fortitudinis coronâ insignitam arbitremini; en MELANIAM. hæc marito nōdum humato, cùm binos amisisset insuper filios,
ita

ita se ab omni dolore temperauit, vt aliud diceret nihil, quàm, *Magis expeditè tibi scruiura sum Domine, quia tanto me onere liberaſti.* Hieron. in Epistola ad Paulam.

MAVRICIVS IMPERATOR.

Transcamus ad viros, quorum virtus hîc etiam emicuit. MAVRICIVS IMP. (quid eo fortius aut constantius?) quinque liberos suos Phocę iussu interfici coràm se spectabat, & vnicum illud Dauidis ingeminabat; *Iustus es Domine, & rectum iudicium tuum.* Cedrenus in Annal.

LAMBAS AVRIA GENVENSIS.

Et ne vnico contenti exemplo videamur, aliud adiiciam. Erat LAMBAS classis Genuensium Præfectus, idque eo bello quod cum Venetis habuêre. Cùm itaque in medio prælij ardore ei esset nuntiatum, filium in pugna cecidisse; nihil turbatus, *Vos, inquit, fortiter præliamini. Ad filium quod attinet, eius cadauer in mare deiicite: nullo enim nobiliori tumulo condi potest, quàm illo, ubi pro patria pugnans, bello superior occubuit.* Bapt. Fulgos. lib. 5.

ANONYMVS.

Commemorat verò Socrates in historia Ecclesiastica, quemdam, dum patris ei subita mors nuntiaretur, exclamasse: *Desine loqui blasphemias, nam pater meus immortalis est.* parui admodum pendens eam mortem, quæ tantùm esset separatio animæ à corpore. Socrates.

P. FRANC. BORGIA.

Dignus qui ceteros comitetur BORGIA. Nuntiabatur mors Isabellæ filiæ. at ipse, *Depositum, inquit, acceperam, repetiit Dominus.* Accedens autem Comestabilis solatium aliquod laturus, rogâsq; *Quid?*

téne amissâ filiâ nihil moueri? hoc responsum accepit: *Ex quo me Deo dicani, illi cor obtuli, ut nihil in humanis rebus turbare illud possit.* Ribadin. lib. 4. cap. 6.

MORIENTIVM MONITA, ET DICTA.

DIONYSIVS AREOPAGITA.

VSuuenire solet, ut ij quorum vita laudabilis, & sine querela, etiam aliquod in morte suæ virtutis post se vestigium relinquant: ita ut eorum mors, vitæ anteaactæ symbolum sit & nota. Morti adiudicatus DIONYSIVS, eam fortiter amplexus est; & se adstâtium probra despiciens, *Vltimum*, inquebat, *verbum Domini mei Jesu in cruce, sit vltimû mibi in hac luce: Pater in manus tuas commendo spiritum meum.* Segerus in Chron.

IOANNES ABBAS.

Vide ACTIO, EIVSQUE NECESSITAS.

S. BERNARDVS.

Quid verò BERNARDVS? Non ita diu ante mortem vocatis fratribus ut eos extremum salutarer, dicebat; *Tria vobis imitanda propono & relinquo, quæ ego quantum potui, seruavi. Minus sensui meo, quam alterius credidi: laesus de ledente vindictam non expectui: nemini scandalo esse volui; & ubi esse me scivi, emendavi.* Auct. vitæ.

S. MARTINVS.

Dum morbi nimia feritate ac duratione oppressus rogaretur, corpusculum lateris mutatione releuaret; *Sinite, inquit, sinite fratres, calum me potius adspicere quam terram, ut suo iam itinere iturus ad*
Domi-

Dominum spiritus dirigatur. Hæc effatus, videt dæmonem propius adstantem; eumque compellans, Quid hic, ait, adstas cruenta bestia? nihil in me funestum reperies: Abrahæ me sinus excipiet. eaq̃ voce fatigatum diuinis operibus spiritum Deo reddidit. Sulpit. Aloisius in vita.

CONSTANTINVS IMPERATOR.

Ille item moriens; *Trium, inquit, me pœnitet: cædis propinquorum, collati in Iulianum Imperatoris tituli, & mutata Religionis. defecerat namque ad Arianos. Zonar. tom. 3. Annal.*

THEODOSIVS M.

Vnicum quoque huic in votis, filiorum pectori veram pietatem, quoad vixit, instillare. quod vt præstaret moriens, vocatis Honorio & Arcadio filiis; *Pietatem, inquit, excolite: eâ enim pax conseruatur, bellum extinguitur, trophæa eriguntur, omnis denique victoria constat. Theod. lib. 5. Hist. Eccl. c. 25.*

LOTHARIVS FRANC. REX.

LOTHARIVM etiam audiamus. Iam pænè animam agebat, &, *Hem! inquiebat, quàm magnus ac potens est Rex ille celestis, qui reges terrenos lentâ morte è sôlio deturbat. Corozet. de Dict. Fact. memorabil.*

FREDERICVS DVX SAXON.

Iste etiam moriturus, se piè SS. Eucharistiæ & sanctarum precum viatico munivit. Cumque quidam eum solaretur, & ad fortiter ferendum, quod iam & Ducatu & vita excederet, incitaret: illud Patriarchæ respondit; *Dominus dedit, Dominus abstulit: sit nomen eius benedictum. In. Orat. funebri de eodem post mortem habitâ.*

Piè pariter & religiosè illustris MARCHIO HENRICVS vitam finiit. Cùm enim iam iam morituro adessent ciues sui, & fletus ac suspiria ingeminarèt, ille eructans (vt est in Psalmo) verbum bonum, se Virgini matri, & Sanctorum cœtui, piorumq; precibus commendabat, iisque qui circumstiterant fatalem thalamum; *Orate, inquit, vt beatus mihi in calum ascensus detur.* Ioan. Garz. de Reb. Saxon.

MORTIFICATIO.

ARSENIUS ABBAS.

Quemadmodum multum ad exuendum veterem hominem, & induendum nouum, facit mortis secura meditatio: ita non parū ad idē conducit proprię carnis, quoad in corpore sumus, MORTIFICATIO. Senferat id Arsenius. qui rogatus, cur aquam rariùs mutaret, cùm fœtore totam cellulam inficeret; respondit: *Lubens fœtorem hunc excipio, in locum odoramentorum, quibus in palatiis Regumque domiciliis fui olim oblectatus: vt in Iudicij die, de innarrabili illo gehennæ fœtore liberet me Dominus.* In vitis PP. par. 2. c. de virt. Patientiæ.

S. FRANCISCVS.

Attendebat & hic illud Apostoli; Qui sunt Christi, carnem suam crucifixerunt cum vitiis & concupiscentiis: hinc tanto disciplinæ rigore sensus coërcebat, vt vix necessaria naturę ministraret. *Difficile, dicebat, necessitati corporis satisfacere, & pronitati sensuum non parère.* D. Bonauent. in Vita eius, cap. 5.

IDEM

I D E M

Rogatus, quâsnam preces Deo gratiores existimaret; *Illas*, ait, *quas propria carnis comitatur mortificatio*. Hinc doctè & benè Iac. Billius in Emblem.

At tua ne fructus pede claudo vota sequantur,

Fac tua cum vitiis ut caro morte cadat.

Ara duplex templi quondam hoc sine voce docebat,

Thus una, at cæsas altera habebat oves.

Obtulit hic cæsas pecudes, qui membra necavit;

Qui pia vota facit, thus dedit ille Deo.

MVLIER, EIVSQUE FVGA
PERVTILIS.

ARSENIVS EREM. ABBAS.

MVLIER, quam malum necessarium & exornatam Scyllam dixit Secundus Philosophus, leui calamo circumscribamus. ne quæ Sapientiæ principibus plerisq;, nobis etiam suaue at execrandum nepenthes propinet. Quare eam cane peius & angue euitant omnes ij, qui ad honoris verèq; virtutis apicem conscendere enituntur. Venerat longis itineribus matrona Romana ARSENIVM vidēdi tacta desiderio: cui postquam se conspiciendū præbuisset, rogat illa, sui memoriam in precibus haberet. qui, *Imò verò*, inquit, *dabo operam, idque seriò, ne tui umquam amplius meminisse queam.* Surius in Vita.

IOANNES ANACHORETA.

DI! quàm iste etiam magnus in hac cautela! rogabat eum Tribunus ut se vxori suæ præberet vel semel conspiciendum. Iam enim pio eius desiderio aliquamdiu tenebatur: *Nequaquam ita fecero*, ait;

sed per quietem me illi appariturum spondeo. verum fuisse declaravit euentus. O magnę perfectionis virum, qui imaginem sui dormienti fæminæ conspiciendam mittere potuit, ad quam accedere non potuit. Marul. lib. 4.

SABAS MONACHVS

Erat in itinere cum altero monacho sibi collegâ. & ecce in occursum venit iuuenula venusta & lasciuis oculis. SABAS sui comitis ingenium tentans, rogat; *Qualis tibi videtur illa? mihi certè lusca, vnoque oculo visa. Negat ille, & pertinax contrarium sustinet, eò quòd accuratiùs eam esset intuitus. Tum SABAS; Numquam legisti, inquit, Nec capiaris nutibus illius? eumque longo tempore in claustro detinuit. Sur. in Vita.*

PION ABBAS.

Ille etiam in tantum à feminarum aspectu abhorruit, vt ad sororem ab Antonio missus, illius cubile oculis clausis ingressus fuerit, abieritque. Illâ verò inclamante, & iteratò inuitante; *Et fui, inquit, tecum, & quod optaueras, vidisti me. Ita abiit. Marul. lib. 4.*

S. AVGVSTINVS.

Percontanti, cur sororem cohabitare sibi nollet; *Quia, inquit, quæ cum sorore mea sunt, non sunt meæ sorores. Eiusdem etiam præclarum illud: Malum est mulierem videre, peius alloqui, pessimum tangere. Causam indicat Hieron. lib. 1. cont. Iouin. Quia mulieris amor insatiabilis est, & semper accenditur, & post culpam rursus est inops, animumque virilem effeminat: & excepta passione quam sustinet, aliud non finit cogitare. Posid. in vita August. cap. 26.*

CLOTARIUS II. FRANC. REX

In regem electus, fines Australiæ animi gratia visitavit. at Bruchenildis plurimorum cæde audax, legatos ad eum mittit, Gallia cedat. cui ille, fæminæ temeritatē & superbiam indignatus; *Moris est fæminam viris subiici: neque de distribuendis regnis, inuitis insciisque Proceribus agere.* Benè & verè Iuuenalis Sat. 6.

*Nil non permittit mulier sibi, turpe putat nil,
Cum virides gemmas collo circumdedit, & cum
Auribus extensis magnos commisit elenchos.*

Gaguin. lib. 2. De reb. Gall.

Quere Apophth. de VXORE.

M V N D V. S.

APOLLO ABBAS.

MVNDVM, Mundi que vanitatem fugiendam, Mulieri subiungimus. cuius, veluti & illius, venustas & decor transeunt, numquam reditura; seque amantem splendidâ circumueniunt seruitute. Vocabat APOLLINEM ABBATEM quidam è fratribus, ut bouem cœno immersum secum extraheret. qui, Cur, inquit, vicini tui prætergresso habitaculo, ad me diuertisti? eo que respondente, vicinum illum iam ab annis quindecim defunctum; *Et mihi, ait, anni viginti, & amplius sunt, ex quo mundo sum mortuus.* Tantum temporis in religione religiosè exegerat, & didicerat in hoc mundo supra mundum esse: & licet corpus gereret, volitabat tamen in eo ales interior. Cassian. Marul.

S. MACARIUS, ET ANONYMVS.

Transiturus erat Nilum Ægypti fluuium cum al-
d s tero

tero Macario, totus pānosus & squalidus. quos cū Tribunus regionis esset intuitus; *Beati*, inquit, *vos, qui mundum illuditis*. At MACARIUS, vt erat urbanus, *Nos*, inquit, *mundum illudimus; sed vos mundus*. Pallad. in Hist. Laus. cap. 20.

S. TYBVRTIVS MARTYR.

Erat ille TYBVRTIVS, quem Valeriani fratris & Cæcilie virginis preces & verba ad Christi fidem pertraxerant. quam ob rem ab Almachio Præfecto insanie arguitur. cui ille: *Vtinam dignentur nos referre in numerum seruatorum suorum, qui respuerūt id quod videtur esse, & non est: & inuenerunt illud, quod videtur non esse, & est*. Ecquid, infert Almachius, videtur esse quod non est? *Omnia*, ait, *illa quæ in mundo sunt, quæ & cultores suos ad æternum exitium per brevis temporis latitiam ducunt*. Quid verò, inquit, est tuo iudicio, quod non videtur? *Vita iniustis*, respondit, *& supplicium iniustis*. Sur. tom. 6. in vita Cæcilie.

S. RYMOLDVS ARCHIEP.

Spektandum hîc etiam se præbet Machliniensis opidi tutelaris Diuus: quem (vt erat Scotorum Regis primogenitus) numquam adduxere parentes, vt regni postuma gubernacula animo, minùs re ipsa, sulciperet. aiebat enim: *Dominus Iesus qui mundanum respuit imperium, mandauit ipsum sequeretur nudus*. Ex Vita eiusd.

REX IOSAPHAT.

Hic verò ab exilio, criptisque quibus latitauerāt, reuertentes Sanctos, summo honore & candore excipiebat. cumque ob id immeritas calumnias sustineret, thecas adferri iussit: è quibus pretiosiores vili impleuit arena, viliores autem rebus admodum sum-

sumptuosus. & redarguenti se, Elige, ait. Qui externa specie pretioque deforis apparente nimium captus, pretiosas thecas accepit. Tum IOSAPHAT: *Qui magni in mundo apparent, his persimiles sunt: interius viles, exterius pretiosi.* Certè,

Quisquis ad excelsi pervenit culmina montis,

Iam cuncta ex alto vertice parva putat.

Sic quoque virtutis tetigit qui culmina, parvi

Iam pretij, quidquid cernit in orbe, putat.

Damasc. in Hist. eiusd.

THOMAS MORVS.

Quid autem talia memorem, quæ prior illa ætas vidit? ad nostrum sæculum venio, & inuenio THOMAM MORVM carceri iniuste mancipatum, ita eos qui ad se consolandum venerant, alloquentē: *Mundus hic, inquiebat, carcer est, ex quo omnes ad causam dicendam suis singuli diebus euocantur. Quod autem meus carcer aliorum Principum carcere sit minor, beneficij loco habeo: cum è malis pluribus, minimū semper sit eligendum.* N. Sander. lib. 1. de Schism. Anglic. Th. Stap. in Vita, cap. 11.

S. ELISABETH HVNG. REG. FILIA

Digna quæ inter priores locum teneat. Intellexerat ex Sophia parente, maritum diem vltimum obiisse. & vix perculsa ad tam infaustæ rei nuntium, dicebat: *Si mortem frater meus obiit, & mihi quoque posthac mundo eiusque vanitatibus defunctæ, morietur mundus ipse.* & sanè vt cuiuis ille moriatur, monet Boëtius de Consolatione, vbi dicit:

Rara si constat sua forma mundo,

Si tantas variat vices:

Crede fortunis hominum caducis,

Bonis crede fugacibus.

Con-

*Constat, aeternâ positumque lege est,
 Ut constet genitum nihil.*

Sur. tom. 6. in Vita.

MVNVS, EIVSQ. CONTEMPTVS.

S. BARTHOLOMÆVS APOST.

MVNERA, quæ iuxta Poëtam hominesq; deos-
 que placant, calamo nunc oberramus: quan-
 tumque eadem aspernati prima illa nostræ Religio-
 nis columnina. D. BARTHOLOMÆVS Polemo India-
 rum regi camelos auro argentoq; onustos sibi offe-
 renti, quòd filiam eius Energumenam immundo
 spiritu liberaasset, dicebat: *Nequaquam his mihi opus.*
neque enim ad te veni munera accepturus, sed ut in
Christum credentibus viam salutis pandam. Quo di-
 cto commotus Rex, baptismum suscipit, & Christi
 discipulus efficitur. Abdias in eius Vita.

S. THADDÆVS.

Ille quoque regi Edisseno Abgari sibi aurum &
 munera offerenti, quòd plura admiranda diuinâ ope
 apud eum patrasset, respondit; *Si nostra relinquimus,*
quomodo accipiemus aliena? Euseb. lib. 1. histor.
 cap. 15.

S. BASILIUS M.

Quid iste? Suadebat Cæsareæ Præfectus, Chri-
 sti fidem negaret, factoque non exigua munera pro-
 ponit. at non persuasit, dicente eo; *Hæc Christiano*
homine indigna sunt: adolescentulis hæc conueniant,
& iis qui ad talia promissa respiciunt. Trip. hist.
 lib. 7. cap. 36.

SPIRIDION MONACHVS.

Dum hæc intueor, etiam SPIRIDION se menti ma-
 nuique

nuique obiicit. Ille enim, dum à Constantino (qui per manus impositionem san- tatem ab eo acceperat) graue auri pondus offerretur, dicebat; *Non sic oportebat, Imperator, odio remunerare amicitiam. ego magnis itineribus huc veni, ut T. M. parerem: & tu mihi aurum, omnis mali causam, reddis?* Sur. in vita S. Spiridionis.

S. MARTINVS.

Non esse verò despiciendum munus quia exiguum sit, sed magis attendendū donantis affectum docuit MARTINVS EPISC. Acceperat namque à sacra virgine munusculum: cumque id præter morem facere videretur; *Benedictio*, inquit, *illius à sacerdote respuenda non est, quæ multis sacerdotibus præferenda est.* Sulpit. 2. Dialog. cap. 12.

Require MERCEDIS NEGLECTVS.

N A T V R A.

S. ANTONIVS.

NATVRAM, quâ duce errare nemo potest, (iuxta illud Iuuenalis Sat. 14.

Numquam aliud Natura, aliud Sapientia dicet.) inuestigamus: & simul ANTONIVM præclare de ea sentientem. Rogatus quippe, quomodo vitam sustentaret destitutus omni solatio quod ex libris haberetur, respondit: *Mens liber est natura rerum à Deo conditarum: quæ, quoties liber, libros ipsius Dei ad legendum suppeditat.* Quid enim, inquit admodum Christianè Seneca, est aliud NATVRA quàm Deus, & diuina ratio, toti mundo partibusque eius inserta? Socrat. lib. 4. hist. Ecclesiast. cap. 18. Ex Euagrio.

ANONYMVS.

Quærenti, quânam defectus difficillimè curarentur; Illi, inquit, quos *Natura rerum nouatrix indidit*. Illa enim, etsi furca expuleris, sua spòte recurret.

*Nec poteris rectum cancris inducere gressum,
Nec leues horrentis echini reddere sentes.*

Ioan. Petrosius.

NOBILITAS.

VRBANVS III. PONT.

Semma & sola apud Deum NOBILITAS est, clarum esse virtutibus.

*Nam genus & proavos, & quæ non fecimus ipsi,
Vix ea nostra puto.*

Vnde exprobrâti cuidam generis humilitatem, dicebat VRBANVS PONT. *Magni viri non nascuntur, sed virtute fiunt*. quod satis appositè hoc Epigrammate expressit Codrus Vrceolus, dum sic habet:

Sint tibi Gallorum rex & regina parentes,

Et maneat virtus pectore nulla tuo:

Non pluris faciam te, quàm tibi rustica mater

Si sit, & ignotus rusticus ipse pater.

Cranz. lib. 9. Metropol.

S. ROMANVS MILES.

Vide MARTYRIVM.

MAXÆMILIANVS IMPERATOR.

Æquè præclarè MAXÆMILIANVS. Venerat ad eum quidam obscuro loco natus, at supra modum diues; supplicans, vt datis aurcorum millibus, nobilis designaretur. Cui IMPERATOR: *Ditare quidem te possum, at nobilitare, non nisi te propria virtus potest*. Insinuabat autem illud Ausonij:

Pul-

Pulchrius multo parari, quàm creari nobilem.

Corozetus.

FREDERICVS THVEN.

Hic sensus, ea mens prisco illo ævo, neruum nobilitatis esse virtutem. at nostro hoc,

—— *Virtus sine censu languet ubique.*

Solabatur quidam FREDERICVM THVEN, quòd ex illustri stirpe suam traheret originem. at ille: *Quid nobilitatem mihi obiectas? Etsi tam nobilis forem, ut perdicum penna mihi per nares erumperent, & pecunie deessent, numquid miserrimus futurus? Ita hoc æuum est, ut soli diuites nobiles habeantur, & stemmata sine opibus vilipendantur.* Georgius Richter, in Axiom. Oeconom.

NOMINIS IMPOSITIO.

S. HILARIUS.

Nihil æquè valere ad rei cuiuspiam naturam & rationem explicandam, ac congruā NOMINIS IMPOSITIONEM, docet in sua Logica Philosophus. quinimò pluribus nominibus sua omina inesse, testantur Sacræ litteræ. Certè B. HILARIUS, dū quidā per calumniam eum Gallum nūcuparet: *Non sum, inquit, natus Gallus, sed ex Gallia. Tu verò Leo es* (erat enim hoc nomine) *sed non de tribu Iuda.* Ioan. Seletus cap. 22.

HENRICVS VIII. ANGL. R.

Habebat ille inter alios quibus familiariter utebatur, vnum Franciscum Brianum, multorum scelerum architectum. quem, dum in re quadam nefaria cōsultorem adhibuisset, ut palàm insignem eius impietatem testaretur, hoc nomine compellabat:

Ne

Ne tu meritò meus es inferni vicarius. Guill. Rastel. in vita Thomæ Mori.

PARISIENSES NOBILES.

Cùm id vnum ageret Henricus VIII. vt repudiâtâ Catharinâ, vita & genere nobilissima, Annam Bolenam pellicem in adulterinum thalamum sumeret, eaque meretriciis suis artibus Regis oculos fascinaret; rumor in Galliam (vbi profusam suam libidinem cum Galliarum Rege celare non poterat) defertur. quo audito, palam & passim hoc nomine natabat in PROCERVVM labris: *Rex Angliæ Henricus, in uxorem ducturus est mulam regis Galliarum.* dignum profectò patella operculum.

I. Sleidanus, lib. 9.

POMPONIVS LÆTVS.

Romę custodię traditus, accusabatur quòd (veluti hac ætate apud plerosque Nouatores in vsu) proprio abdicato, alienum nomen antiquitatis desiderio affectasset. Pro PETRO enim se POMPONIVM appellavit: & accusanti se Vianesio Antistiti, ait: *Quid tibi & Paulo Pontifici, si mihi fœniculi nomen indidissem.* Sabell, in Vita.

ANONYMVS.

Addam aliud, sed in re iocosa. Cuidam Mercurij nomen inditum erat: quem, quòd incompositis esset moribus & lingua, ac parvę fidei, alius hoc scommate illudit:

Te magis elinguis cùm sit nec agrestior alter,

Quare Mercurij nomen inepte geris?

Non ita quòd pręstas dicendi laude, vocaris:

Sed potiùs, turpi furta quòd arte facis.

Coll. ex Epigramm. G. Sabini.

IDEM

I D E M

Non absimili modo alium, cui Urbanus nomen, parum admodum urbanum potorem perstrinxit. dicebat enim,

Diceris Urbanus : sed nominis immemor huius,

Semper inurbanus, cùm bibis, esse soles.

Ibidem.

O B E D I E N T I A.

PARALYTICVS EVANGELICVS.

OB E D I E N T I A, quę proprię voluntatis sepulchrum, & melior quàm victimę, sola menti ceteras virtutes inserit, insertasque custodit, exemplis illustranda. Et quidem SS. litterarum testimonio clarum est, PARALYTICVM, qui annis 38. in infirmitate decubuerat, iussu à Christo, qui eum sanitati restituerat, lectum tollere; & Iudæis insulantibus, Sabbatum est, non licet tibi lectum tollere, respondisse: *Qui me sanum fecit, ille mihi dixit, Tolle grabatum tuum, & ambula.* Pulchrè sanè. quasi dicere voluisset: Qui me hominem desperatę valetudinis, verbo sanitati restituit, tantę auctoritatis est, vt etiam necessitate seruandi Sabbati me absolvere possit. hinc meritò illi pareo. Ioan. cap. 5.

S. PAVLVS APOST.

Quid verò Gentium doctor? factus ex persecutore Christi miles & athleta, dum in terram prostratus audiret: Saule quid me persequeris? ait exemplò: *Domine, quid me vis facere?* quasi fundamentum suę conuersioni substernens, obedientiam. Actor. cap. 9.

CORNELIVS CENTVRIO.

Haud secùs ille. viderat Angelum Dei ad se in-

troeuntem, sibi que dicentem, Corneli. ac timore correptus ait, *Quis es Domine?* & paulò post ad eum ingressus Petrus, cùm visionis suæ historiam brevibus percurreret, adiecit: *Nunc ergo omnes nos in conspectu tuo adsumus, audire omnia quaecumque tibi præcepta sunt à Domino.* Act. cap. 10.

S. PETRVS APOST.

Et iste cùm à Principibus sacerdotum redargueretur, quòd contra mandatum illorum Christum annuntiasset, nil cunctatus; *Oportet, inquit, magis obedire Deo, quàm hominibus.* Act. cap. 5.

PAMBO ABBAS.

Venerant ad visendum eum Religiosi numero tres: quorum hic ieiunij, ille charitatis, tertius obedientiæ laude clarus. de quibus sententiam suam dicens, tertium ceteris prætulit: *Vnusquisque vestrum, ait, virtutem quam possidet, voluntate propria retinuit: hic autem suæ voluntati renuntians, etiam aliena se servum fecit.* In vitis PP. cap. de Obedient.

S. SYNCTETICE.

Ille verò ad suos verba faciens, *Cuilibet, dicebat, in congregatione versanti, magis obedientiam quàm continentiam proponimus: quia hæc arrogantiam habet, illa humilitatem congruam pollicetur.* Ibidem, part. 2.

S. FRANCISCVS.

Quàm spectabilis in eo hæc virtus fuit? qui commissum sibi gregem instruens, quomodo Prælatorum dicto, imò nutui parere deberent, aiebat: *Subditus prælatum suum, non hominem considerare debet, sed illum, pro cuius est amore subuectus. Quanto enim contemptibilior præsidet, tanto magis obedientis humilitas placet.* Sur. tom. 5. in Vita.

IDEM.

I D E M.

Quin idem ipse ad eiusdem virtutis sectanda vestigia quosuis cohortabatur. dicebat autem: *Tantus est sanctæ Obedientiæ fructus, ut eis qui iugo illius suæ colla submitterent, nihil temporis sine lucro transiret.* Bonau. in Vita, cap. 6.

B. IGNATIVS LOYOLA.

Quis hunc Obedientiæ castris excludat, quem ad nutum summi Pontificis quiduis facturū, etiam mare sine comœatu traiecturū fuisse, accepimus? cumque rogaret vir quidam magnus, quæ isthæc esset prudentia; respondisse: *Prudentia non tam est parentis, quàm imperantis.* Ribad. in Vita.

OBMVRMVRATIO.

S. ÆGIDIVS.

Verus sacratæ Obedientiæ aduersarius se hîc obiicit, OBMVRMVRATIO. Vt enim illa dicto parere, ita hæc tergiuersationes quærere, & ab obedientia resilire parata. Hinc benè S. ÆGIDIVS, cui-dam coram se obmurmuranti, quòd grauiorem pro culpæ modo pœnitentiam imposuisset, dicebat: *Quanto plus murmuras, tanto ampliùs te oneras: & quanto humiliùs sanctæ obedientiæ iugo caput submitte-ris, tanto tibi leuius futurum erit onus.* Ex Sent. aur. S. Ægidij.

OBSEQVIVM.

S. MALACHIAS EPISC.

Nemo negauerit, nihil æquè gratum homini esse, ac voluntarium OBSEQVIVM. Illud enim

enim est quod amicos parit; partosque adamantino nexu deuincit. Cuius Eborensis in Anglia, intellecto quòd MALACHIAS ANTISTES Romam peteret, equum obtulit: hoc dolere se testatus, quòd durus esset. adiecitque: *Libentiùs dedissem, si melior fuisset.* Cui MALACHIAS: *Non potest mihi vile esse, quidquid tam pretiosa voluntate offertur.* S. Bern. in vita Malachiæ.

BORSO DVX FERRAR.

Neque infimo loco habendus BORSO DVX inclytus. rogatus namque quānam re vinci & superari possent corda hominum; *Obsequio*, respondit, *magis quā armis aut vindicta.* Corozetus.

OCCASIO.

EREMITA ANONYMVS.

Veluti temporibus medicina valet, ita suo quæque tempore rapienda est quiduis faciendi OCCASIO. Refert de quodam EREMI INCOLA Cassianus, quòd in tantum boni operis Occasionem captauerit, vt numquam eam præterire fuerit passus. Quare cū è patria litterarum fasciculum accepisset, ne aperire quidem eum dignatus; at igne suscitato, vniuersum (vt erat) in illum coniecit, dicens: *Ite cogitationes patriæ, pariter concremimini: nec me vlteriùs, ad ea quæ fugi, reuocare tentetis.* Cass. Monast. instit. lib. 5. cap. 32.

S. WOLSTANVS EPISC. WIGORNIENSIS.

Non minùs sapienter egregius ANTISTES WOLSTANVS, cuidam frequentius eadem peccata confitenti, dixisse fertur: *Oportunitas, vt video, latrones facit: ideo vt vitiorum importunitate careas, id vnum*
necef-

*necessarium, Religioni, dum potes, te dedas. Præclare
Cato: Rem tibi quam noris aptam dimittere noli,
Fronte capillatâ post est occasio calua.*

Sur. tom. 1. in Vita.

MONACHVS ÆGYPTIVS.

Require Apophth. de I R A.

RELIGIOSVS ANONYMVS.

Quàm prudens etiam istius verbum fuit! Cùm
namque indomitæ carnis stimulos, ieiunij & mor-
tificationis cote attereret, rogatus, quam ob causam
se tam grauitè affligeret; *Vt, inquit, exsurgentes li-
bidinum aculeos superem, & cum iis furoris occasio-
nem tollam. noui enim furorem semper pro libidine liti-
gare. Pulchrè Greg. More ignis libido succenditur,
etsi negligenter extinguatur, adiacens stipula veloci-
ter inflammatur. Socrat. Trip. hist. lib. 8. c. 1.*

ANONYMVS.

Concertantibus nonnullis quænam res maiorem
adferret molestiam; cùm hic litem forensè, ille
morosam coniugem diceret, interuenit alius, qui,
*Illud ego, inquit, ubique molestum reputo, quod tem-
pestinè & in loco factum non fuerit. Ita olim è Græ-
cis Comicis Menander:*

Ἀπαντα καὶ πῶ καὶ εἰν ἔχει βουόμενα.

Omnia tempestinè gratiam habent.

Guil. Richter in Axiom. Polit.

OCVLORVM CVSTODIA.

S. HVGGO GRATIANOP. EPISCOPVS.

OCVLORVM, qui frequētius peccati fenestram
aperiunt, CVSTODIAM commendamus: idque
imprimis HVGONIS GRATIANOPOLITANI Anti-

stitis exemplo : qui adeò fidelis huius membri custos , vt cùm R. P. Guidonis mater eum salutatum venisset , & post eius ab eo recessum quæreret Guido, Numquid mea mater senio debilitata est & fracta? paululum secum præmeditatus; *Nescio*, inquit, *planè cuius ætatis sit , neque enim faciem eius intuitus sum.* Sciebat vir pius , quòd si oculus simplex fuerit, totum corpus lucidum erit. Lucerna namque corporis tui est oculus tuus. Guido in Vita eius.

S. EPHREM, ET MERETRIX.

Vt autem ad S. EPHREM deueniamus: ingressurus Edessam opidum , Deum orabat , vt primo cursu in talem hominem incideret, quem & doctrina sua reficere posset, & ad meliorem vitæ normam iter præbere. Ecce cogitabundo, vt portas ingreditur, obuia fit mulier, notoria illius loci PECCATRIX: quam intuens vir sanctus, cōstitit fixis in eam oculis. sed hæc vicissim attentius in eum intuetur. Ille verò conatus eam pudore suffundere; *Quid*, inquit, *non erubescis mulier tam acutum nos intuens?* E contra hæc; *Me*, ait, *conuenit te sic adspicere: nam de tuo latere sumpta sum. Te verò terram , non me adspicere fas est: nam tu primum ex eâ formatus & sumptus.* quod stratagema versu redditum hîc adiungo :

Aspexit iuuenem formosa puella modestum,

Illius in vultu lumina fixa tenens.

Hic ait; In terram potiùs tu deiice ocellos,

Non oculos habeat casta puella vagos.

Imò, ait hæc, magis in terram tu lumina figas:

Ex terra primum nam tua facta caro est.

Nostri principium fuit ortus costa virilis,

Hanc quæro vt iungi me velit ipsa sibi.

Sur. in Vita tom. 1.

ANO-

ANONYMI.

Nec aspernandum hoc loco, quod de his apud Guiliel. Baldesanum lib. 3. de Stimulis virtutum Adolescentiæ legisse me pridem memini. Accidit, inquit ille, nuper viro illustri, quod adstaret alteri non inferioris dignitatis in templo: cumque ingressa esset adolescentula, genere & forma nobilis, oculos (vt hoc æuo plerique faciunt) illicò in eius adspectum reflexit: quod cum alteri illi displicuisse animaduerneret, eius seueritatem cõprimere ausus illo Psalmi versu; *Delectasti me Domine in factura tua.* sed ille ex tẽpore, suauiter sanè, *Perge,* ait, & *vide quæ eodẽ in Psalmo sequatur, & inuenies: Vir insipiens non cognoscet, & stultus non intelliget hæc.* Attonitus ille inopinato responso, obmutuit.

O P V S.

S. IOAN. BAPTISTA.

Nihil æquè testimonium perhibet de homine, ac OPERIS ab eo exerciti qualitas. Hinc Domini PRÆCURSOR aduentus, dum Iudæi se ex stirpe Abrahamæ progenitos dicerent, & de eo gloria- rentur, dicebat: *Facite fructus dignos pœnitentiæ: nec velitis dicere intra vos, Patrẽ habemus Abraham, &c. Omnis arbor quæ non facit fructum bonum, excidetur.* Matth. cap. 3.

MARCELLVS II. PONT.

Vide IVRAMENTVM & PERIVRIVM.

RELIGIOSVS FRANCISCANVS.

Post Domini Præcursorem, non indecorè se RELIGIOSI cuiusdam virtus offert. dum namque Ludouicum Siciliæ regis filium, qui voto seruandi institutũ S. Francisci se obstrinxerat, vt palàm eo se

solueret, incitaret; aiebat: *Qui in occulto benè vivit, sed alieno non studet profectui, carbo est: qui verò rectitudinis lumen ex se multis demonstrat, lampas est: sibi ardet, aliis lucet. Honesti bonis viris, non occulta quaruntur.* Reuocabat in memoriam illud Christi, Sic luceat lux vestra coram hominibus, ut videant opera vestra bona. Ex vita Ludouici, impressa apud Moretum, cap. x l.

IOAN. PRINCEPS LVSITANIÆ.

Audiuerat ille Franciscum Borgiam de diuinis rebus differentem. ac templo egressus, ad Dynastas se conuertens; *Hic, ait, mihi demum Ecclesiastes placet, qui re ipsa quæ docet, præstat.* Illud quippe Doctoris munus, ut sit potens in opere & sermone. Ribad. in vita Borgiae, lib. 2. cap. 7.

Require ACTIO, EIVSQVE NECESSITAS.

OPERA MANV EXERCENDA.

SYLVANVS ABBAS.

SAtius multò est aliquid agere, quàm nihil agere: Smodò quod agitur, honesti limites non excedat. Ita Apostolos, aliosque viros sanctos, indultum sibi otium in honestum negotium commutasse constat. Quod & SYLVANVS ABBAS lepido exemplo docuit. Erat in cœnobio eiusdem Religiosus, qui fratres manibus laborantes nonnumquam redarguebat; & solitudinem illam, tamquam rem superfluam, cauillatus, *Maria, inquit, optimam partem elegit, sedens secus pedes Domini.* Itaque horâ cœnæ, de industria non vocatur: mirantique, cur præter solitum non esset vocatus, respondit SYLVANVS: *Verè existimabam, tibi qui totus spiritalis es, cibo potuque*

tuque opus non esse. Eoque errorem confitente, subiunxit: Scias igitur Mariam Martha etiam ministerio indigere, auxilioque iuvare. In Vitis PP.

MARCVS ANACHORETA.

Hic quoque operi nocturno diurnoque, ab oratione vacans, insudabat. ita ut quibusdam ei elemosynam offerentibus, diceret; *Minime accepero: manus enim istæ me nutriunt, & eos qui ad me propter Deum diuertunt.* . In Prat. Spirit. cap. 3.

Vide Apophth. de LABORE.

ORATIO SIVE PRECES.

IESVS CHRISTVS.

A Ge, sanctarum PRECVM exempla perscrutemur; ut si quem eadem considerasse non piguerit, imitari etiam non pigeat. Nihil autem in tantum se sequentibus DOMINVS commendavit, ac ORATIONEM. nam & orandi formam præscripsit, & discipulos suos ad orandum incitavit, dicens: *Si quid petieritis Patrem in nomine meo, hoc faciam.* Ioan. cap. 14. & 16.

AGATHON ABBAS.

Ne autem quis puræ Orationi nihil inesse difficultatis arbitretur: rogatus AGATHON, cui nam spiritualium actionum plus laboris inesset, respondit; *Precationi. Quia dum illi intendimus; malignus spiritus se nobis plurimum infestum reddit.* In vitis PP.

S. FRUCTVOSVS EPISC.

Ab eo verò dum quispiam peteret, pro se apud Deum intercederet, respondit; *Orare necessum mihi pro Ecclesia Catholica passim diffusa. quis enim orat pro singulis? attamen neminem singulorum præterit,*

qui pro vniuersis deprecatur. Cæsar Baron. Aug. de diuers. Serm. 101. cap. 2.

LVDOVICVS EPISC. TOLOS.

Huic item sæpè in ore, cùm de temporis iactura sermo incideret; *Omne tempus perdidisse existimo, quod sine oratione & diuinis contemplationibus consumpsi.* Ex membrana manuscr. Vitæ eius.

S. FRANCISCVS.

Quare Apophth. de MORTIFICATIONE.

S. BERNARDVS.

Sed de iis etiam qui attentû in oratione animum habuerunt, CLARÆVALLENSIS ABBAS fuit. hunc enim, si templum subiret, quo meliùs orationi inuigilaret, solitum ferunt, apprehenso eiusdem limini exteriorum rerum curas hoc dicto demandare: *Ceteras meas curas tibi committo, donec hac me curâ liberauerim.* Multum enim orationis puritatē iuuare insinuabat, si de ea sola cogitet, qui orat. Recensuit ex Nauar. de Orat. inter alia præclara Reuerendiss. Dominus Ioannes Miræus Episc. Antuerpien. in insigni sua Oratione, quam ad Clerum suæ vrbis habuit, anno 1608. Fer. 2. Mai. hebdom.

LVDOVICVS PALATINVS

Erat venandi studio deditissimus, & publico edicto districtim cauerat, ne quispiam ceruis aliisque feris nocumentum inferret. Factum autem, vt illis omnia passim vineta vastantibus, querelæ deferrentur ad Procures, & per eos ad ipsum LVDOVICVM. Dicebāt enim, Nisi edictum hoc mitiges, eris post-hac expers precum tui populi. Quo audito ille; *Si ita fore existimatis, malim carere, ait, etiam totâ vitâ ferinis ferculis, quàm meorum precibus.* Sciebat sanè, quanta esset puræ Orationis virtus, quæ eò pergit & pene-

penetrat, quò caro peruenire & penetrare nequit.
Timoth. Berch. in Orat. Ludouici Principis.

BALTHASAR GERARDI.

Fuit is qui Guilielmo Principi Auriaco necem attentauit, & tulit. Qui, dum quæuis tormenta infracto animo sustineret, rogatus quomodo tantis cruciatibus non succumberet; respondit: *Tantum efficacia præstant piorum pro me preces.* In Historia eiusdem.

ORATIO ASSIDVA.

F. ÆGIDIUS MINORITA.

MUltum autem valere apud Deum ORATIONEM iusti ASSIDVAM, testis esse potest D. Iacobus, etiam apud Iudæos sanctitatis opinione celebris. quippe qui in oratione tam feruens & assiduus, ut eius genua quasi callo obducta, & instar pellis camelorum indurata fuisset, Hieronymo auctore referantur. Audiamus ergo quid B. Francisci comes & imitator ÆGIDIUS, de hac orandi perseverantia se dignum dixerit aliquando. Rogabatur, cui similem existimaret eum, qui ab orando desistit ingruentibus distractionibus mētis; *Fugienti è prælio*, respondit. Pugnamus namque in oratione contra hostes nostros, mundum, carnem, & maxime Satanam, qui propterea orantes propositis variarum rerum imaginibus perturbat. Memores itaque simus illius Paulini Auson. Epist. 15.

*Quæ non missa Deo, vacuis in nubibus hærent,
Nec penetrant superi stellantem Regis in aulam.*
Sur. tom. 7. in Vita.

I D E M.

I D E M.

Ab eodem etiam profectum accepimus: *Si gratiam in precibus sentis, ora ut augeantur; si non sentis, ne cesses idcirco à precibus. Gratos enim habuit Deus etiam caprarum pilos, qui ei iuxta præceptum legis (Exodi 25.) offerebantur. Ibid.*

I D E M

Denique ad orationis assiduitatem persuadendam, isto simili utebatur: *Cùm primùm plantata est arbor, non illico grandescit, & fructus profert maturos: neque, si eos profert, omnes ab hominibus eduntur. Ita quis ad me fructus redire queat, si vel decem annis cælestem Regem deprecor pro eterno regno, nec in finem perseuero? Nempe anima Deo recôciliata quasi novella arbor, non statim bona desideria producit, & per ea fructificat: nec si fructum vllum adferat, illico ad Dei gloriam cuncta operatur. Perseuerandum itaque in oratione, ut fructum quem optamus, tandem consequamur. Th. Staplut. Dom. infra Oct. Nat. Dom. in Prompt. Morali.*

ORDINIS SACRAMENTVM.

S. E P H R E M.

Quemadmodum ad ciuilem Remp. ritè gubernandam, semper necessarius est & fuit ciuilis Magistratus: ita ad Spirituale Christi in terris regnum decenter administrandum, etiam spiritualis potestas semper fuit necessaria: eamque titulo ORDINIS nuncuparunt veteres. Quam dignitatē, quòd ardua sit, aspernati quandoque viri sancti. & quidem B. E P H R E M à Basilio rogatus, cur, cùm idoneus esset, ad sacrum Presbyterij ordinem non promoue-

moueretur; respōdit: *Quia peccator sum, & indignus qui tam Augusto muneri deſeruam.* Sur. tom. 1. in vita Baſilij.

MARCIVS EPISC.

Admodum verò circumſpectum eſſe oportere in ſacro hoc Senatu ſeligendo, docuit MARCI-
NVS. qui, cū Sabbathum quemdam ex Iudæo fa-
ctum Chriſtianum ad ſacros Ordines admiſiſſet,
quem poſtmodū ambitionis & Iudaici erroris ſtu-
dioſum intellexerat; ſuæ inſcitiae & leuitatis con-
ſcius, crebrius ſecum obmurmurabat: *Satius fuiſſet
manus in ſpinas miſiſſe, quàm earum impoſitione Sab-
batum ad gradum preſbyterij designaſſe.* Hæc etiam
Antitiſtium noſtri temporis lamenta: dum vident
eos, quos in ſacrum Senatum coopitulatores adſci-
uerunt, laſciuentis carnis agitatoſ furiis, ad ſacri-
legorum barathrum, Deo & Fide ſpretis, impiè de-
ſectere, fallam Reformatæ religionis prætexentes
imaginem. Socrat. lib. 1. cap. 20.

MARTYRIVS.

Hunc Neſtarius ſummo conatu nitebatur pro-
mouere in Diaconum: at ille totis viribus renitens,
*Ego, aiebat, olim ſacri Baptiſmatis factus particeps,
in uſu vitæ meæ antiquum ſemper obtinui: & ita or-
dinationem non admiſit.* Sozomenus lib. 7. hi-
ſtor. cap. 10.

ORNATVS CORPORIS.

PAMBO ABBAS.

DE CORPORIS externo ORNATV cultuque di-
cturus, illos ob oculos ponam, qui eundem
non ſuperfluum modò, ſed & noxium reputarunt.
Ac de

Ac de PAMBONE quidem narratur, quòd, cùm apud Athanasium Alexandriæ moraretur, feminam mirum in modum comptam conspiciatus, in lachrymas ierit. Interrogatus verò, quid illachrymaretur; *Dua, ait, me causa mouent: prima, huius mulieris perditio; altera, quòd ego non tantùm coner placere Deo, quantum hæc mundo.* Hist. Trip. lib. 9. c. 1.

S. NONIVS HELIOPOLITANVS.

Haud aliter iste. conspiciatus Pelagiam meretricem Antiochenam transeuntem, auro gemmisque ornata; diu illam intuitus, dicebat: *Quot putatis horas expendit hæc mulier dum in cubiculo se lauat & componit, ut hominum oculis placeat? & (heu) quantulas nos, ut in Dei oculis iusti conspiciamur? Scitè Terentiuis: ——— Nosti mores mulierum:*

Dum moliuntur, dum comuntur, annus est.

Sur. in Vita.

S. EPHREM.

Meritò itaque, & non vanè EPHREM laudabilem hanc protulit sententiam: *In seculari vita qui suum ornat corpus, & subinde vestimenta mutat, humanam obtinet gloriam: at qui in Religiosa professione ista contemnit, & solùm necessario corporis usu intendit, gloriam sibi in celis acquirit.* In Vita eiusd.

ALEXANDER SEVERVS IMPERATOR.

Vide VESTIVM NEGLECTVS.

THOMAS MORVS.

Iungamus his virum clarissimum THOMAM MORVM: qui percontanti, quid de comptulis illis & ad omnium aspectus expositis sentiret; facetè non minus, quàm sapienter, *Quàm multi, aiebat, in hoc seculo eo labore infernum mercantur, cuius vel dimidio calum lucrati fuissent.* Et verè isto quo obtinet, quod
canit

canit de hoc mulierum ornatu & luxu Ovidius:

Auferimur cultu: gemmis auroque teguntur

Omnia: pars minima est ipsa puella sibi.

Sapè ubi sit quod ames inter tam multa requiras,

Decipit hac oculos Agide dives amor.

In Vita eiusd. cap. 12.

IDEM

Matronæ cuidam, quòd se totos dies ornaret, & ut habet Poëta, Naturæ decus mentito mercatoque vultu perderet; dixisse fertur: *Nisi Deus tibi pro hoc tanto labore infernum rependat, magnâ, me iudice, te iniuriâ affecerit.* Ibidem.

Vide Apophth. de VESTIVM LVXV,

& CONTEMPTV.

OSTENTATIO.

LEO X. PONTIFEX.

OSTENTATIONEM arrogantiamque reprimere non parva laus: eaque clausisse LEONEM X. accepimus. Venerat ad eum nescio quis empyricus, peritiam summam & præsentem podagræ curandæ medicinam penes se esse iactitans. At ille homini illusori illudere etiam volens, rogat num habeat aliquot ducatorum millia, quæ ad menses paucos mutuò sibi det; eoque negante, *Næ tu, ait, homo vaser & subdolus. Si enim eam quam prædicas experientiam haberes, crede, me longè diuitiis præcelleres. Ecquis enim in orbe Princeps hoc malo liberari nolle?* & ita planè confusum & conuictum dimisit. Auðt. Serm. memor.

LVDOVICVS XII. GALL. REX.

Audiebat Bearnenses & Piætones, homines igno-
biles

biles & ignavos, cum veris nobilibus de generis splendore gloriari; *Atqui, aiebat, decem istiusmodi nobilibus, unicus ensis satis superque fuerit.* Annal. Franciæ.

Require CASTIGATIO, SUPERBIA, &c.

OTIVM.

MONACHI ÆGYPTI:

Natura humana ut improbo labore instruitur, & quasi gubernatur; ita torpenti OTIO destruitur, & velut infatuatur. Nonne

Cernis ut ignavum corrumpant otia corpus,

Et capiant vitium ni moveantur aqua?

Hinc vetus illa disciplina monastica, OTIVM ut diaboli pulvinar, summa cura vetabat. Quade re ita Cassianus: Per Ægyptum, ait, Patres nullo modo otiosos esse monachos, ac præcipuè iuvenes, sinunt; actum cordis & profectum patientiæ ex humilitatis sedulitate metientes. Itaque erat apud eos celebre hoc dictum: *Laborans ab uno, otiosus ab infinitis oppugnatur demonibus.* Statuat igitur Christianus adolescens omni ratione otium effugere, & optimis occupationibus vitam transigere, ne post, ut quidam ait, & nimis serò,

— doleat stultos præterisse dies.

Refert Guilielm. Baldesanus in Stimulis virtutum, lib. i. cap. vlt.

RELIGIOSVS ANONYMVS.

At verissimum etiam esse illud Ethnici,

Otia si tollas, periêre Cupidinis artes.

insigni exemplo describit Hieronymus, quod hîc totidem verbis adscribam. Græcus adolescens erat in cœ-

in cœnobio, qui nullâ abstinentiâ, nullâ operis magnitudine flammam poterat carnis extinguere. Hunc periclitantem monasterij Rector hac arte seruauit. Imperat viro cuidam graui, vt iurgiis atque contumeliis eum insectaretur, & post irrogatam iniuriam primus veniret ad querimoniam. Vocati testes pro eo loquebantur, qui iniuriam intulerat: flere ille contra mendacium. Quid multa? ita annus ductus. quo expleto, interrogatus adolescens super cogitationibus pessimis, an adhuc molestiæ aliquid sustineret; *Papa!* inquit, *uiuere non liber, & fornicari libeat?* Hieron. Epist. ad Rusticum.

ALPHONSVS ARAGONVM REX.

At quàm grata aliquando honesta à seriis curis animi relaxatio (neque enim Apollo semper arcum tendit) declarauit egregius Princeps ALPHONSVS. Cui dum quasi ignauix exemplum ostenderent rusticum humi recubantem, & vuas comedentem; *Vtinam,* aiebat, *mihi isto otio comedere datum à Diis esset.* Ita olim Ptolomæus Rex cùm se immortalitatem reperisse iactitasset, tandem podagra excruciatu, visis Ægyptiis qui ad flumen proni accubabāt; *Vtinam,* aiebat, *vnus ex eis esse mihi datum!* Panorm. de Dict. Alph.

PROBVS IMP.

Aliter ante eum PROBVS IMP. Ille armatum militem otiosum esse numquam passus. dicebat quippe: *Annonam gratuitam miles comedere non debet.* Iac. Spieg. in Æn. Syl.

Vide LABOR. OPERA MANV EXERCENDA.

f PAREN-

PARENTVM AMOR.

FERDINANDVS REX NEAPOL.

VEniant nunc in manus nostras prospera PARENTVM VOTA, felicibus auspiciis propagata soboles, quæ efficiunt vt aliquādo & genuisse & genitum esse delectet. Quid enim FERDINANDVM eloquar? qui tanto sui parentis detinebatur desiderio, vt crebrius diceret: *Nihil mihi grauius euenire potest, quàm quòd aliquando maiorum rerum occupatione præpeditus, patri adesse non possim.* Pont.lib. 2. cap. 3. de Obedientia.

ALPHONSVS ARAG. REX.

Magnus quoque eodem in regno & re ALPHONSVS. Successerat Ferdinando legitimus regnorum heres, cui eam vicem & obedientiam, quam ille suo parenti olim, rependit. Peregrè aduenienti obuiam progressus, quòd eum utpote minùs valentem lecticâ vehi aduerteret, equo desiliit, ac pedibus comitatur. monenti autem patri, aliorum procerum more equo conscenso adequitaret, respondit: *Aliis liberum sit agere quod voluerint: ego numquam adducar, quin Regem, quin patrem, & eum ægrotum, pedibus sequar.* Panorm. lib. 2. de Gest. Alph.

SFORTIA FRANCISCI FILIVS.

Eadem pietas Iuniorum SFORTIAM, vixdum annos pubertatis egressum, impulit; vt patrem quem viuum summo semper honore fuerat prosecutus, etiam mortuum, & in imagine expressum, honoraret. Erat in extremas angustias ab hostibus redactus, dumque anxius huc illuc voluitur, & nequicquam militem suum vocat, patris effigiem (quæ
fortè

fortè in conspectu) intuitus; *Ecquid, exclamat, dine parens degeneres erimus? & hosti sine conflictu cedemus? Audendum potius.* dictoque citius, in hostem gloriosus irruit. Gaguin. De reb. Gall. in Appen. de Lud. xii.

PARENTVM DE LIBERIS

C V R A.

EDOVARDVS II. ANGL. REX.

AMulatus hanc pietatem, non vt priores illi in parentes, sed in filium EDOVARDVS. qui cum Philippo Franciæ rege manus conferens, dum filium in prima acie acriter vrgeri intelligeret; *Ne, inquiebat circumstantibus, hodie à me subsidium postuletis, quamdiu filius adhuc superstes. Volo vt nunc virtutis suæ specimen edat, atque victoria laus omnis penes eum sit.* Tam gloriosum reputabat talem habere filium, qui pro patria libertate suum latus hosti opponeret. Frossard. hist. Gall. lib. i.

BABO APENSBERGENSIS BARO.

At memorabile, quantam filiorum curam gesserit paternâ pietate motus BABO. Habebat numerosam sobolem, ita vt ex duabus vxoribus legitimis duos & triginta filios atque octo filias superstites post se relinqueret. Cùm ergo Henricus Cæsar sub annum 1015. animi causa aucupium instituisset, BABONEM inuitauit, paucis equitibus præsens etiâ adesset. Ille oportunitatē se nactum arbitratus, vt filios Cæsari commendaret, iuuenes scitos & probè instructos ornat, & cuique comitem adiungit, talique filiorum comitatu ad Imperatorem venit. Qui, visa ea multitudine, rogat quasi indignabundus BABO-

NEM, cur, cum paucis venire iussus, tot equites adduceret; ille, *Non sunt equites, Auguste*, inquit, *quos tua Maiestas conspiciatur, sed tui famuli, mei filij legitimi, quos eidem T. M. exhibeo, dono, consecro. eosque, ut ingenuam decet sobolem, maxima cura educaui.* Imperator singulos appellat, dextra & osculo excipit, filios nuncupat, secum consistere in aula iubet, omnesque paulatim stipendiariis prædiis, castellis & vicis, locupletavit. Hieron. Zeigler. in Hist. Illust. vir. Germ.

Quare CONFESSIO PECCATORVM.

BLANCA FRANC. REG.

Neque mulierum hîc laudem detrecto, aut earum gloriam inuoluo. Sunt & inter has, quamuis rariores, quæ hac virtute polleant. Facem ceteris præfert BLANCA Ludouici istius mater: quæ, dum optimis moribus filium instituisset, quandoque dixisse fertur: *Malim, ô fili, te vita priuatum, quàm vlla virtute relicta, vnum lethale peccatum perpetrantem.* Imitentur hanc omnes matres, quarum numis blanda hoc æuo (proh dolor!) segnes facit indulgentia natos. Iornil. in vit. Lud. cap. 3.

MVLIER ANONYMA.

Iungat se illi Christophori Lusitani arcis Diensis Præfecti PARENS. Quæ, dùm filium glande ferrea ab hostibus ictum conspiceretur, nihil habuit maius, quàm vt salutis suæ curam gereret. adductoque Cōfessore, siccis oculis ac vultu placido; *Tu fili, ait, clementis Dei veniam fidenter implora: teque in hoc transitu virum prebe. unicum hoc mihi in hac orbitate solacium.* I. Maffeus hist. Ind. lib. 11.

Require EDVCATIO. ADMONITIO.

PAR PARI RELATIVM.

PAMBO ABBAS, & PIOR MONACHVS.

Sed artem etiam arte delusisse, in re præsertim
 minùs seriâ & sine felle, quibusdam laudi datur:
 & quidem inter illos PIORI MONACHO. Cùm enim
 hic ad PAMBONEM visendi gratia venisset, propriũ
 secum panem detulit. Rogat ille cur id faceret; *Ne,*
 inquit, *aduentus meus tibi grauis sit.* At memor illius
 PAMBO, dum post multum temporis PIOREM inui-
 feret, panẽ obsonio aut iure intinctum, qui famem
 simul & sitim sedaret, adfert. indignantiq̃ue PIORI,
Hoc egi, ait, ne aduentu meo te quidquam grauem.
 Pallad. in vit. PP.

ANGLI ANONYMI, & SALOMON IVDÆVS.

Lectũ auditũq̃ue iucundum quod subiungo. Erat
 in Anglia SALOMON quidam, gente Iudæus. hic dum
 fortẽ Sabbato in cloacam cœno oppletam cecidisset,
 & aduenirent qui suppetias ferrent; noluit eo
 die religionis ergo extrahi. dicebat enim,

Sabbata sancta colo, de stercore surgere nolo.

Audit MAGISTRATVS loci, & superstitiosum homi-
 nẽ etiam postero die (qui Dominicus erat) extrahi
 vetat. ac suppetias inclamanti, responderi mandat:

Sabbata nostra quidem SALOMON celebrabis ibidẽ.

Annal. Angl. Th. Staplut. in Prompt. Morali.

LVDOVICVS XI. FRANC. R.

Prioribus iungi meretur quod de LVDOVICO XI.
 tradunt scriptores. Viderat è Proceribus quidam
 LVDOVICVM pro rapo sibi à rustico oblato mille
 aureos donasse: & beneficium fœneraturus, equum
 dono dedit. Suscipit eum Rex, & rapum pretiosã

findone inuolutum, rependit, adiiciens; *En mille aureis coemptum rapum: quod equum tuum, vix centum adequantem, longè præcellit.* Corozet.

IANVS LASCARIS, & GALLI ANONYMI.

Cùm Romanam supellectilē augeret Iulius Pont. Gallos in vniuersum Micturiuingos, quasi immodicos vini potores, per iocum appellabat. Quò factum, vt GALLICI POETÆ ita in eum luderent:

*Patria cui Genua est, genetricem Gracia, partum
Pontus & vnda dedit: qui bonus esse potest?*

Sunt vani Ligures, mendax est Gracia, Ponto

Nulla fides: malus est, hac tria quisquis habet.

At IANVS LASCARIS Poëta sui æui celebris, vt Iulio gratificaretur, ilicò hos retorfit:

Est Venus orta mari, Graiūm sapientia, solers

Ingenium est Ligurum: qui malus esse potest?

Cui genus vt Veneri, à Graiis sapientia, solers

Ingenium à Genua est? Mome proterue tace.

P. Æmil. in vita Ludouici XII. Gall.R:

*Require Apophth. de PERFIDIA &
ARTIVM CONCERTATIONE.*

PASQVILLVS.

ADRIANVS VI. PONTIFEX, &

LVDOVICVS SVESSANVS.

AD PASQVILLVM deducimur, cuius statua, Romę potissimùm, omnium rerū nouarum, licet remotis arbitris fiant, & dieteriorū ferax. Quare quòd in ea toties famosis carminibus laceraretur, indignatus est ADRIANVS PONT. eamque demoliri & in Tiberim coniici mandabat. at negabat id factò fore vtile LVDOVICVS SVESSANVS. dicebat enim

enim : *Pasquillus etiam ranarum more in imo vado non erit tacitus. Ergo, inquit PONT., exuratur in calcem. Rectè id quidem, intulit SVESSANVS : sed tam crudeliter necato Poëta clientes non dcerunt, qui Patroni cineres inuidiosis carminibus prosequantur, & supplicij locum quotannis concelebrent. quibus verborum lusibus, Pontificis mentem sedauit.* Pont.

ANONYMVS.

Non ineptè itaque quispiam conspiciatus PASQUILLVM, tamquam clandestinum internuntium, minuta quæque aulicorum delicta suo dorso exhibere legenda, dixit : *Cùm hîc loquendi libertas adempta sit; mirum, lapideis statuis, cuncta etiam occultissima enuntiantibus, obturari os non posse.* Phil. Camerar. cap. 66. Medit. histor.

PASSIO CHRISTI.

S. ELEAZARVS COMES.

REcolimus modò illud quod in omni pressura & afflictione securitatis portū præbet, PASSIONEM CHRISTI; quā vltro pro nobis subiit, vt ex filiis iræ nostræ gloriæ redderet cōparticipes. ELEAZARI Comitæ miram in omni aduersitate patientiam mirata vxor, cū quæreret quomodo toties offensus nullum offensionis signum daret; hoc ab eo responsum accepit: *Noueris me sentire aliquando indignantis animi motionem: sed ilico ad cogitandā Christi passionem mentem verto, quæ sanè longè eam superat, quam hîc sustinemus.* Veram mentis tranquillitatem docebat, iugem Dominicæ passionis memoriam. Et vt dicit Greg. in Epist. Nihil adeò graue, quod non æquanimiter toleretur, si Christi passio

ad mentem reuocetur. Sur.in Vita,tom.3.cap.23.

I D E M

Dum ad eum diutiùs absentem irrequieta quemdam è domesticis mitteret vxor, qui de rerum omnium & salutis potissimùm successu inquireret, responsum hoc dari mandauit: *Sanus corpore sum & sospes. Si autem videre me desideras, quare in vulnere lateris Christi: illic habito; ibi me inuenies, frustra alibi quæsitura.* Ibid. cap. 30.

ZACHARIAS EPISC. HIEROS.

Quo autem corporis habitu passionis Dominicę mysteria & instrumenta pertractanda sint, docuit in Heraclio Imp. ZACHARIAS. Heraclius namque, dum Crucem, in qua Dominus suspensus, humeris ferret, vt in mōte Caluarię loco sibi proprio collocaret; in vrbs Hierosolymitanę portis, quasi fixus stetit & immotus. obstupuit. At ZACHARIAS, *Vide*, ait, *ô Imperator, ne isto triumphali ornatu* (erat enim auro gemmisque decorus) *parum Iesu Christi paupertatem & humilitatem in ferendâ cruce imitêre.* Tum dimisso eo cultu, & plebeio assumpto, reliquũ vię perfecit. Paul. Diac. lib. 18.

S. ELISABETH REGIS HVNG. FILIA.

Miremur hîc, & rimemur puerilis animi prudentiam, verè non annorum numero, sed pietatis officiis computãdam. Vix annos expleuerat pubertatis, & numquam ad templum procedebat, quin coronam capite amoueret: ac tãdiu inglorium verticem ostendebat, quoad ritu sacrorum completo, domum regrederetur. percontantiq; huius rei causam matri Sophię, & id temerè fieri dicenti, respondebat: *Absit a me tanta impietas, vt ibi caput meum, turrito micantis corone fastu superbiat, vbi caput Sal-*
uatoris

uatoris mei spinis coronatum compungitur. Ita diuina charitas in casta puellaris animi præcordia, Dominicæ passionis contēplatione, veluti mucrone quodam vulnus agere cœpit. Sur. tom. 6. in Vita.

THOMAS MORVS.

Meritò hîc etiam celebrandus MORVS. qui, cùm ad supplicij locum pergeret, & ad calicem Domini bibendum properaret, trāscunti mulier vinum obtulit. quod recusans, *Christus*, ait, *in passione non vino, sed felle potatus est.* ita pium, & iam iam hinc emigraturum spiritum, passionis Dominicę meditatio perculit. Th. Staplut. in Vita, cap. 20.

PATIENTIA INIVRIÆ.

S. APOLLONIVS.

VT proprium Christiani hominis est non inferre iniuriam, ita etiam illatam non vlciſci. neque aliud est quod sic animi tranquillitatem conciliet atque conseruet, vt iniuriarum omnium stabilis & firma toleratio. Mancipatus carceri APOLLONIVS, dum contra omnem æquitatem à Philemone variis afficeretur tormentis, nihil aliud dicebat, quàm, *Fili misereatur tui Deus, & nihil horum quæ in me es oblocutus, tibi reputet ad peccatum.* In Vit. PP.

LVPVS EPISCOPVS.

Ille, Attila ciuitatem Trecaſinam obſidente, interrogauit quis eam ita armis laceſſeret; vbi accepit eſſe Attilam flagellum Dei, ingemiſcens ait: *Et ego LVPVS vaſtator gregis Dominici, dignus flagello eius.* portasque pandi iuſſit. Ingreſſi hoſtes nullum hoſtilitatis edidēre ſignum: & ita factum, vt qui ſe
f s dignum

dignum flagello confectus fuerat, à flagello liber esset. Sur. tom. 4.

S. GREGORIUS PONT.

Et hunc ne summa quidem dignitas ad iniuriæ impatientiam compulit. Mauricio enim Augusto, filiisque eius se persequentibus, dicebat: *Quoniam ego peccator sum, vos tanto magis (ut opinor) Deū vobis conciliatis, quāto magis me illi ignauiter seruientem affligitis.* Sic tandem quem armis non poterat, patientiā vicit. In vita Greg. lib. 4. cap. 17.

B. IGNATIVS LOYOLA.

Quid verò omni pietate & religione insignis IGNATIVS? Rogabatur, quænam esset maximè compendiosa ad perfectionem via; respondit: *Si multa Christi nomine patiāre.* Sciebat beatos fore eos, qui persecutionem patiuntur propter iustitiam. & quòd

Nobile vincendi genus est Patientia: vincit

Qui patitur. Si vis vincere, disce pati.

Ribadin. lib. 5. cap. 10. Vitæ eius.

ROBERTVS NORMANDIÆ DVX.

Referamus nunc eos qui hac virtute in ciuili ordine illustres exstiter. Pergebat religionis ergò in terram sanctam ROBERTVS DVX NORMANDIÆ. dumque à suis remotior cum homine agresti altercetur, tandem ab eo vapulauit. quod conspicati comites, vlcisci parant. Ille, *Nolite*, clamabat, *quia has plagas merito meo accepi.* indignum iudicans eo loco vlcisci iniurias, vbi Christus tantas sponte pro nobis tolerasset. Pol. lib. 8.

LVDOVICVS XII. GAL. REX.

Et hunc Aurelianum adhuc Ducem impunè iniuriis conuitiisque lacerarunt nobiliores quidam. Cumque ut se de illis vlcisceretur, iam regni sceptrum tenens,

tenens, instarent nonnulli; respondebat: *Parum decorum esset Regi Galliarum, iniurias illatas Aurelianorum Ducibus ulcisci.* Egregiè in Soliloquiis Isidorus: Magna est virtus, si non lædas à quo læsus es. Magna est fortitudo, si etiam læsus, remittas. Magna est gloria, si cui potuisti nocere, parcas. P. Æmil. in Vita.

FERDINANDVS IMPERATOR.

Intellexerat ille quemdam, cui plura beneficia contulerat, & multis nominibus sibi deuinxerat, à se defecisse. & nihil commotus, *Miror*, dicebat, *virum tantum se maioribus suis indignum reddidisse.* eoque dicto, quidquid commissum erat, dissimulabat. Pont. de Principe.

NOBILIS MATRONA ALEXAND.

Hæc è pectoribus altis & fortibus orta sunt. Illud tamen non minùs laudabile, quod muliebris animus præstitit. Frequentabat Antistitis Athanasij domũ MATRONA NOBILIS, importunè rogatås sibi concedi vnã ex iis viduis, quæ Ecclesiæ impensis alebantur, cui posset benefacere. cumque ea daretur postulanti, quæ inter illas moribus & modestiã præcellebat; queri cœpit, non esse datam ex animi voto. Ea itaque dimissa, aliam recipit: & simul ab eâ contumelias & verbera. quam tamen libenter sufferens, gratias agebat Athanasio, dicens: *Tandem delegi contubernalem; cui pro malo bonum, pro iniuria beneficium, reddere assuefaciam.* Cassianus.

S. PAVLA.

Et PAVLA Gracchorum stirpe nobilis, vitæ innocentia nobilior, cùm audisset se stultam quorundam iudicio reputari; *Theatrum*, inquiebat, *facti sumus mundo, & angelis, & hominibus: nos stulti propter*

pter Christum: sed stultum Dei sapientia est hominibus.
Hier. in Epitaph. Paulæ.

PATIENTIA DOLORIS.

S. VINCENTIVS.

HAud minùs exiguum virtutis opus, aduersas valetudines, quoties in eas inciderimus, æquo animo sustinere. Referamus ergo exempla eorum, qui hac virtute præditi fuere, eaque ex multis pauca. Habuit autem hanc gloriam VINCENTIVS, qui in mediis tormentorum cruciatibus, Tyranno insultans; *Insurge, aiebat, & toto malignitatis spiritu debacchare: videbis me Dei virtute plus posse dum torqueor, quàm possis ipse qui torques.* Quod animosum dictum probauit euentus, dum Tyrannus post tot in vnum corpus inflicta tormenta fateretur, Victi sumus. In Vita eiusd.

S. LAVRENTIVS MARTYR.

Et quænam vis illa fuit, quâ succensus LAVRENTIVS affligenti se Tyranno dicebat: *Infelix, has epulas ego semper optavi.* cumque in craticula subiectis prunis assaretur, inuictò animo flammaram sustinens violentiam, admirandam hanc vocem emisit: *Iste flamma mihi refrigerium præstant.* Merito itaque eum deprecatura canit Ecclesia; Da nobis Domine vitiorum nostrorum flammam extinguere, qui B. Laurentio tribuisti tormentorum incendia superare. In Vita apud Surium.

BENIAMIN ABBAS.

Laborabat hic intolerabili hydropis dolore. cumque præsentem eius cruciatum fixis oculis intueri non possent, dixit: *Orate, ne interior meus homo hydro-*
picus

pius sit. Hoc enim corpus, neque cum bene se habuit, mihi profuit; neque cum male, me laesit. Pallad. in Hist. PP.

STEPHANVS ABBAS.

Ille item, dum ope medicorum incurabili morbo affligeretur, ac putrida membra inciderentur, mutato vix vultu, cum adstantes aspicere vix possent præ angore; *Ego, inquit, novi hos morbos ob peccata accidere: & melius hic pœnas soluere, quam æterna pro iis supplicia sustinere.* Sozom. Hist. Trip. lib. 8. cap. 1.

Require MARTYRIVM & MORBVS.

PATIENTIA DAMNI.

IESVS CHRISTVS.

Rerum etiam iactura fortiter ferenda est, cum nihil sine Dei nutu euenire mortalibus queat. Ad seruandâ eiusmodi patiëntiam adhortabatur nos DOMINVS, cum diceret: *Ab eo qui aufert tibi vestimentũ, etiam tunicam noli prohibere.* ne scilicet, magis irrites raptorem, & in tui necem accendas. *Et qui aufert quæ tua sunt, ne repetas.* id est, paratus sis potius damnum aliquod perpeti, quàm vt cum scandalo proximi repetas. Luc. cap. 6.

S. BERNARDVS.

Quid autem Clareuallensis Abbas BERNARDVS? Ablata erant ducenta argenti pondo, sibi ad impensas construendi cœnobij missa. quod cum ad eum deferretur; *Gratias, inquit, Deo ago, quòd tanto me onere leuarit.* Summæ temperantiæ index ea vox, apud paucos hoc auro recepta. Marul. lib. 5.

SENECA

SENEA ANONYMVS.

Cùm venissent ad eum latrones, dicerentque: Ecce omnia tua venimus tollere. ille: *Quaecumque filij vobis videntur, tollite.* quo facto, abierunt. cumque solùm marsupium reliquissent, eo accepto, SENEX Dominici præcepti memor, illos insequitur, & inclamat: *Accipite etiam illud quod tollere obliti estis.* Redeunt, & ablata restitunt. Quàm verum illud Gregorij sup. Epist. ad Heb. Nihil ita confusionem facit ingerenti mala, sicut fortis tolerantia patientis, & neque in verbo neque in opere reddere vindictam. Prat. Spirit. cap. 211.

PATRIÆ AMOR.

ROBERTVS NEAPOL. REX.

Nescio qua NATALE SOLVM dulcedine cunctos
Ducit, & immemores non sinit esse sui.
 cecinit olim Ouidius. & verè ita se habere suo exemplo fidem fecit ROBERTVS REX. Vt enim erat clementiâ & benignitate in suos incenarrabili, crebriùs hanc vocem vsurpabat: *Malim benigni amantisque patria, quàm pecuniosi & imperiosi regis nomen.* Hinc ille versus ei Romæ sub effigie inscriptus:

Aspice Robertum, patria virtute refertum.

P. Iou. lib. 1. Elog.

FARINATA VBERTVS NOB.

Quo tempore Guelphorum & Gebellinorum in Italia factiones calebant, inito consilio decretum, vt Florentia suis muris exspoliaretur. nō tulit dirę sententię nomen vnus FARINATA, vir nobilis: qui acriùs in eius auctores insurgens, *Sit, inquiebat, vera virtutis premium incolumis patria, uti decet, ex*
 a quo

a quo omnium parens : cui nemo nisi degener atque impius , manus iniecerit. Pari modo Fabius ad filium apud Silium Italicum effatur:

Iamque hoc, nec dubites , longani nate parentis

Accipe, & aeterno fixum sub pectore serua.

Succensere nefas patria: nec foedior vlla

Culpa sub extremas fertur mortalibus umbras.

Ibidem.

MICHAEL MOVROCENVS

Dignus sanè longiori æuo. Venerat ex Syria, vbi amplissimas opes coaceruarat, in Rhodū insulam. quò cū appulisset, intellexit Venetos in summo versari discrimine. Itaque monent amici aliò se cum thesauro congesto reciperet. At ille indignatus, *Egon', ait, tantum scelus audeam, vt desim patriæ, tam grauitè laboranti? quin potius quidquid est fortunarum, in eam lubens impendam.* quod etiam ipso facto præstitit. Ruminabat illud Horatij:

Dulce & decorum est pro patria mori.

Quin vt doctè Ouidius:

Non dubia est Ithaci prudentia, sed tamen optat

Funum de patriis posse videre focis.

Egnat. lib.6. cap. 5.

PATRIÆ INGRATITVDO.

IESVS CHRISTVS.

AT PATRIÆ INGRATITVDINEM intuentibus, vix in mentem venire potest debita aliàs illi gratitudo. dum enim Patria fragilis recordatur infantia, præsentia suorum opera virtutesq; non considerat. Numquid multa præclarè Nazarethi dixerat & fecerat DEI FILIVS? quid nihilominus concives?

'ciues? Vnde huic sapientia & virtutes? nōne hic est fabri filius? &c. & scandalizabantur in eo. At respondens ille, ait: *Non est Propheta sine honore, nisi in patria, & in domo sua.* Insinuabat autem virtute & scientia celebres, nullo in pretio inter agnatos & conciues reputari, ac solūm eos æstimari, qui è longinquo adueniunt: quamuis aliquando,

Veruecum in patria crassoq; sub aëre nati.

Tales enim sunt hominū affectus, vt nouitate gaudeant, & domestica plerumque contēnant ac fastidiant. Audiamus iudicium Euripidis verè hac in re serium. ait enim:

Meo quidem iudicio non rectè sapit,

Qui spretis Patriæ finibus terra,

Alienam laudat, & moribus gaudet alienis.

Matth. cap. 13.

P A V P E R T A S.

I E S V S C H R I S T V S.

DIximus qua patientia viri sancti proCHRISTO persecutiones perpeffi: nunc quo animo PAVPERTATEM, Sapientiæ & bonarum artium magistrā & veram alumnam, tolerauerint, pertractemus. VNIGENITVS DEI FILIVS, Patri consubstantialis, cum quo omnia quæ in cælo & in terra dirigebat; voluntariam tamen paupertatem, vt & nos ad eā induceret, suscepit. Quare cūm secedentem trans lacum Genezareth sequi vellet quocumque ierit, Scriba, eò quòd terrenum cum regem ac præpotentem fore existimaret; vanam de se opinionem redarguens, dicebat: *Vulpes foveas habent, & volucres cali nidos; Filius autem hominis non habet,*
vbi

ubi caput reclinat. quasi dicat, tantum abest, ut me magnum regem opineris. Matth. cap. 8. Luc. 9.

S. HIERONYMVS.

Ille de paupere & aspero Pauli Eremitæ vestitu, quoties verba faciebat, toties in hanc vocem erupisse commemoratur: *Si Dominus mihi optionem daret, multò magis eligerem tunicam Pauli, (quam ipse ex palmæ foliis sibi contexuerat) cum suis meritis; quàm Regum purpuram, cum suis pœnis.* Colligitur ex eodem, in vita Pauli.

S. HILARION.

Quantum verò nimiam rerum cupiditatem cauerit vnicum sanctitatis exemplar HILARION; patet ex iis quæ discipulo suo Helychio testamēto moriens legauit: *Diuitiarum, inquebat, mearum heres esto. Ha autem sunt Euangelium, tunica saccea, cuculla, & palliolum.* qui tenuitatem illam diuitias suas vocat, satis declarat, quàm ab earum amore semper fuerit alienus. Collig. ex Vita eiusd. apud. Hier.

S. FRANCISCVS.

Paupertatis etiam voluntariæ voto ardens MINORVM PATER, dum quòd in pauperes esset profusior, à patre vrgeretur coram Episcopo Assisinate bonis cederet; vestimenta exuit, iisque in patrem reiectis, cum planè nudus consisteret, dicebat: *Huc usque pater te patrem indicavi in terris: amodò securè dicere possum: Pater noster qui es in calis, apud quem omnes thesauros reposui.* Iam enim tacitus cum Propheta gloriari videbatur: *Ego mendicus sum & pauper, Dominus sollicitus est mei.* Bonauent. cap. 2. Vitæ eius.

I D E M.

Requirentibus ab eo fratribus, quænam virtus
g amicū

amicum magis redderet Christo; secretum iui cordis reſerans, *Paupertatem*, inquiebat, *fratres*, *noueritis viam ſpiritualem ſalutis*, *tamquam humilitatis fomentum*, *perfectiōisſque radicem*: cuius fructus multiplex, ſed occultus. Præclare apud Senecam Thyestes:

—— Bene paupertas

Humili teſto contecta latet.

Quatiunt alta ſapè procelle,

Aut euertit fortuna domos.

Sur. tom. 5. in Vita.

S. LAVRENTIUS MARTYR.

Quid te martyrum decus eloquar? qui poſtulant Decio theſauros Eccleſiæ, quos tuæ fidei commiſerat Sixtus, poſt trium dierum inducias, pauperibus quibus eos diſpenſaueras adductis, dicebas: *En hi theſauri Eccleſiæ, quos requiris, in quibus Chriſtus eſt.* inſinuans quod alibi Dominus: Facite vobis amicos de mammona iniquitatis. Alois. in Vita. Ambroſ. 2. Off. cap. 28.

S. LYDWINA.

Sed aliquantum longiore ductu protractus ſermo nunc admonet, etiam fæminis locum demus. Grauiſſimum paupertatis onus, non forti modò, ſed hilari etiam animo, tulit LYDWINA. adeò vt quibusdam eius penuriam reprehendentibus, reſponderit: *Satis abundat, qui eo quod habet contentus eſt: & ſi mihi cum hominibus communes non ſunt diuitiæ & delitiæ; ſunt tamen cum multis communes paupertas & miſeria: quibus ego abundans, Deo gratias ago, & conquieſco.* F. Ioan. Brugman. in Vita. Lippel. tom. 2.

Vide ELEEMOSYNA.

I N

IN PAVPERES LIBERALITAS,
ET DVRTIA.

IESVS CHRISTVS.

QVanta autem virtus, eorum qui ad inopiam redacti paternam curam gerere, vel ex eo patet, quòd sine ea CHRISTVM vix sequi possimus. utpote qui diuiti illi, se omnia mandata à iuventute observasse asserenti, ut vitam æternam magis certâ & compendiosâ viâ obtineret, præcipiebat: *Vnum tibi deest: vade, quaecumque habes vende, & da pauperibus, & habebis thesaurum in celo: & veni, sequere me.* Mar. cap. 10. Luc. 18. Mat. 19.

S. IOAN. PATRIARCHA ALEX.

Quanto autem studio Domini præcepto se conformare conatus est IOANNES PATRIARCHA? Miserrat ad eum dono quispiam, miseratus lectuli in quo decumbebat tomentum, plumeam culcitram. in quâ cum decubuiisset, totâ nocte ingemuit: ac mœroris causam inquirenti; *Quia*, inquit, *mollius iaceo, quàm domini mei.* hoc enim nomine pauperes dignabatur. Itaque primo mane culcitram vendi mandat, & in dominos suos pretium erogari. At qui dono miserat, ab emptore redemptam remittit: cumq; id iam tertiò fieret, ait ad eum PATRIARCHA: *Gratias Deo ago, quòd initari simus certamen, diuiti salubre, pauperi commodum, mihi iucundum.* Sciebat enim melius esse modicū iusto, super diuitias peccatorum multas. Metaph. in Vita.

ANONYMVS RELIGIOSVS.

Narrant de eo, quòd, cum præter Euangeliorum codicem haberet nihil, eum vendiderit, ac obvio

pauperi eius pretium donauerit, dicens: *Ipsam iam vendidi, quod mihi dicit assidue; Vende omnia quæ habes, & da pauperibus.* Socr. lib. 8. Hist. Eccl. c. 1.

S. IOAN. PATRIARCHA ALEX.

Deducit me aliò tendentem rursus ad se IOAN-
NES PATRIARCHA: qui crebrius pauperes suæ vr-
bis in catalogum redigi imperabat. dicebat autem
ministris; *Ite per urbis vicos, & describite sigillatim
dominos meos.* qui cùm exeuntes dubitare incipe-
rent, quĩnam illi domini forent, dixit: *Illi, quos vos
pauperes dicitis & mendicos; ego dominos & adiutores
appello: nam ij soli opem mihi ferunt, vt à Christi re-
gno non excidam.* Egregiè August. Via cæli est pau-
per, per quem venit ad Patrem: incipe erogare, si
non vis errare. Sur. tom. 1. in Vita.

S. RICHARDVS.

Neque tamen expectandum, vt subuenias pau-
peri, donec ipse te sollicitet, & quasi egestate sua pro-
uocet; testis est RICHARDVS. In omnes enim bene-
ficus, egenos quosuis ad accipiendũ à se quidquam
inuitabat: rogatus autem cur id faceret; respondit:
Quia carè emitur, quod precibus emitur. O miserabi-
lis conditio mendicantis! (inquit Iun. de cond.
fragil. hum.) si petit, pudore confunditur: si non
petit, egestate consumitur: & vt mendicet, inopiã
compellitur. Sur. tom. 2. in Vita.

S. ELZEARIVS COMES.

Verũ ad hanc cum proximo nostro misericor-
diam summoperè incitare nos debet, quòd qui eam
facit, à Deo etiam iusto quodam titulo misericor-
diam exposcat. Docet id S. ELZEARIVS COMES:
nam cùm die quodam plures auri vncias, & pan-
num coccineum, oblata munera, repudiallet; in-
gressus

gressus cubile, vt animum pia meditatione colligeret, huiusmodi verbis vsus dicitur : *Tu mihi Domine Deus in Paradiso debes centum auri uncias, & duos pannos coccineos.* Hanc fiduciam nos docet Ecclesiast. Benefac iusto, & inuenies retributionem magnam; etsi non ab ipso, certè à Domino. Sur. tom. 5. in Vita.

S. ELIZABETH REG. PANNON. FILIA.

Verùm ne fæmine sua laude hac quoque in parte fraudentur, vnum aut alterum exemplum ab eis sumamus. PANNONVM REGIS FILIA, & Turingie Principi iuncta, nihil nisi paupertatem in tanto splendore affectabat. vnde vnicâ contenta ancillâ, & habitu populari, dicebat sæpius : *Numquam alio usura sum; si quando tandem dignatus fuerit pius Dominus, expeditius viuendi mihi copiam concedere.* Itaque marito vita functo, omnem substantiam in pauperes impendit; *Parum est*, inquit, *fortunas pro Christo, qui eas dedit, impendisse.* & se totam egenorum ministerio dedicauit. Conrad. in Vita.

S. LVCIA VIRGO ET MART.

Quid autem sedula hæc membrorum Christi nutrix LVCIA? Matrem Euriciam ad erogandas in pauperes facultates inclinabat. Illa verò finem vitæ suæ expectare eam iussit. At hæc: *Non est admodum Deo gratum munus, quod qui offert, ideò offert, quia illius vsum suprema sibi interdicit dies. Da dum sanas; ne, si moriens dederis, inuita dedisse dicaris.* Sur. tom. 6. in Vita.

S. CATHARINA SENENSIS.

Neque hoc loco prætereunda est CATHARINÆ SENENSIS erga pauperes prouidentia. Hæc enim, dum ex putida farina, eaque modicâ admodû, plu-

res & lapidos panes propriis manibus confecisset, & miraculi causam Raimūdu, cui de more sua peccata confitebatur, interrogaret; hanc dedit: *Ne Dei donum despiceretur, néve pauperes negligerentur, magnocum fervore accessi ad illam farinam: atq; ita Angelis mihi cooperantibus multiplicata ea fuit, & in meliorem conuersa.* Ita duo minuta viduæ istius Evangelicæ laudavit Christus, & gloriabatur Apostolus de Corinthiis, ob promptum animum eorum erga ministerium in sanctos. In Vita eius apud Sur. tom. 2. pag. 947.

S. BRIGITTA.

Pari benignitate illustris BRIGITTA. quæ dum omnia pauperum inopiæ subleuandæ elargiretur, Regi cuidam eam vendere destinabat pater. Quam cum rogaret ipse Rex, cur gladium sui patris abstulisset, pretiumque quod ex eo reportarat, pauperibus erogasset; respondit: *Christo illum largita sum. Et certè si te dominum Regem & parentem Deus à me peteret; modò possem, utrumque lubens cum facultatibus darem.* Quo audito, ille ad patrem conuersus; Maior, inquit, filia tua est, quàm quæ vel abs te vendi, vel à me emi possit. Sur. tom. 1. in Vita.

S. LYDWINA.

Flagrabat etiam ista hoc liberalitatis splendore; ita ut neminem aduentantium unquam à se repulerit: domesticis autem concurrentium multitudinem excludere conantibus; *Quid agitis, inquit, sorores meæ? Itane lucrari non debemus Christo animas, quas Satan deuorare intendit? veniant ad me pauperes: necdum eò perueni, quò ille, qui optabat anathema esse pro fratribus.* In Vita apud Surium, tom. 2.

AME-

AMEDÆVS SABAVDIÆ DVX.

Dignus item ille qui cum diuini illius ordinis
 athletis certet. Venerant ad eum Oratores; qui, cum
 palatium obambulant, rogabant, num etiam ve-
 naticos canes aleret. illè, Crastina, inquit, die eos
 vobis exhibebo. Interim, de more, ingentē paupe-
 rum turbam cogit, quibus cibaria apponi mandat:
 ac redeuntibus ad se Oratoribus, *Hi sunt*, inquit,
 (demonstrabat autem discumbentium multitudi-
 nem) *canes mei, quos alo quotidie, quibus gloriam ca-
 lestem venor*. Liceat de illo canere, quod olim de
 Probo Claudianus:

*Hic non diuitias nigrantibus abdidit antris,
 Nec tenebris dampnavit opes, sed largior imbre
 Sueuerat innumeris hominum ditare catervas.
 Quippe velut densa currentia munera nimbo
 Cernere semper erat: populis undare Penates,
 Assiduos intrare inopes, remeare beatos.
 Præcepit illa manus fluuios superabat Iberos,
 Aurea dona vomens.*

Munsterus lib. 2. Cosmog. de Duc. Sabaud.

HATTO EPISC. MOGVNTIN.

Inficit & infringit hanc in pauperes beneficen-
 tiam fœda & crudelis HATTONIS sæuitia, & vt tra-
 gicè hanc scenam claudamus, ansam præbet. Quo
 tempore Orho Magnus rerum potiebatur, horren-
 da fames Germaniam inuasit. Videns itaque HAT-
 TO, pauperes fame & inedia pressos ostiatim victum
 quæritare, plures horreo inclusos concremari ius-
 sit; factò egregiam hanc vocem adiiciens: *Non dif-
 ferunt hi muribus qui frumentum comedunt, ad nihi-
 lum utiles*. At tantum scelus inultum non permisit
 iustus Iudex. Factum enim vt cateruatim eum mu-

res inuaderent, affligerent, & viuum deuorarent. Quis hæc considerans negabit verum esse illud Iuuenalis:

Est tantò vberior vitiorum copia, quantò

Maior auaritia patuit sinus. —

Ibid. lib. 3. de German. cap. 170.

P A X.

I E S V S C H R I S T V S.

PA C I S nunc bonum sectemur, quod tantum esse docuit August. vt in rebus creatis nihil gratiosius soleat audiri, nihil delectabilius concupisci, nihil denique vtilius possideri. Estque hoc, quod ad Patrem rediturus C H R I S T V S D O M I N V S, humano generi in sui memoriam hereditariò reliquit. Post resurrectionem namque ad discipulos ingressus, vnicum hoc insonabat: *Pacem relinquo vobis, pacem meam do vobis: non quomodo mundus dat, ego do vobis.* Quin imò ante passionem suos instruens, eandem etiam commendabat, cum predicationem suam breui hoc dicto terminaret; *Habete in vobis sal, & pacem habete inter vos.* Mar. cap. 9. Luc. 9.

G R E G O R I V S V I I. P O N T.

Pacis amantissimus G R E G O R I V S, cum dissidium quod inter eum & Henricum I I I I. Imperatorem erat, concordibus votis dirimeretur, & pacis conditiones proponerentur, dicebat: *Pacis conditiones non despxero, modò Henricus* (qui multis cladibus Ecclesiam afflixerat) *cum Deo primùm pacem ineat.* Melior aliàs foret talis pugna, inquit Nazian. in Apol. quæ Deo proximum facit, quàm Pax illa, quæ à Deo separat. Platina in Vita.

ALPHON.

ALPHONSVS ARAG. REX.

Huius pectus ut aliarum virtutum, ita & Pacis tranquillitatisque ferax. Ludouico enim Podio viro celeberrimo renuntianti, quod pro Pace quam cum Venetis & Florentinis erat initurus, plus quam ducenta aureorum millia extorqueri possent, respondit: *Pacem ego dare, non vendere solitus sum.* Panorm. lib. 3. de Gest. eiusd.

IDEM

Cum moraretur Valentie, venerunt ad eum Oratores missi à Carolo Gall. Rege (qui ea tempestate cum Britanno bellum gerebat) deprecaturi, ne Regi iam bello implicato ipse aliud inferret: eò quod adscribere sibi videretur Galliam Narbonensem. At ALPHONSVS, etiamsi plura ab eo opida per vim Carolus detineret, fidem dedit, dicens: *Haud eo animo sum, ut quod maiores mei in Caroli prosperitate non petierunt, ego in eius repetam calamitate.* Panorm. & Æn. Syl. de Dict. Fact. eiusd.

BARNAGASIUS.

Iste etiam nomine regis Æthiopie cum Prætor Lusitano fœdus pacemque initurus, apprehensa cruce argentea, nixus genibus; *Quam, inquit, pacem Iesus Christus generis humani redemptor discipulis reliquit: eadem esto inter nos, qui eiusdem profiteamur cultum & fidem.* Maff. hist. Ind. lib. 7.

FREDERICVS III. SAXON. DVX.

Inuident nos priora, & excitent: sed FREDERICI DVCIS exemplum fortiùs mouet, & ad sui imitationem alios eiusdem ordinis, quasi quodam fune, è ciuiliū tumultuum labyrintho trahit. Ille enim pacis amans, nullas arces aut munitiones condidit: quin potiùs ab aliis conditas solo æquauit. & in id

unum incumbere assiduus, ut pecuniis, si quas corrasisset, rite impensis, nihil earum post mortem posteris superesset. Admirantibus autem, eiusque rei causam percontantibus; *Ne*, aiebat, *ego leuiter offensus aliquando, arcibus & pecuniis meis confisus, nimis facile vicinos me inferiores bello lacessam, & pacem cum eis violam.* Quod utique facturus non erat, omnibus belli neruis destitutus. Sciebat autem, quod

——— *Pax optima rerum*

*Quas homini nouisse datum est: Pax una triumphis
Innumeris potior: Pax custodire salutem,
Et ciues equare potens.*

Ioan. Agricola in Prouerb. German.

P E C C A T V M.

IESVS CHRISTVS.

Violata aut neglecta pace, ad PECCATVM transitus fiat oportet. Virtus enim nulla inesse potest, ubi vera non est comes Concordia. Est autem tanta PECCATI malitia, ut ex libero (quod appetunt omnes) faciat seruum. Quare indignantibus Iudeis, quod liberos ipsos futuros diceret D O M I N V S, si mandatis eius parerent: & rogantibus, Semen Abrahæ sumus, & quomodo tu dicis, Liberi eritis? respondit: *Amen dico vobis, quia omnis qui facit peccatum, seruus est peccati.* veram seruitutem demonstrans, subdi peccato. Ioan. cap. 8.

S. LVDOVICVS FRANC. Rex

Altè quod iuuenis biberat, senex retinebat. Cùm enim ex Seneschalco Campaniæ sciscitaretur, malèrne lepra infici, an peccato: & is respondisset, Peccato; acriter eum perstringens, *Toto*, inquit, *calo erras.*

erras. Ecquæ lepra peccato fœdior, quod etiam post mortem affligit? Tu itaque, si me amas, eam mentem mutato. Ionuil. in Vita, cap. 94.

S. LUDOVICVS EPISC. TOLOS.

Quis aptius Ludouico Regi succedat, quàm LUDOVICVS EPISCOPVS? quem, dum (vt erat Rege natus) à sancto proposito capiendi institutum B. Francisci, familiaris quispiam dimouere conaretur, dixisse commemorant: Prius mihi pereat, non dico regnum hoc caducum, sed orbis totus, quàm in Deum meum semel peccem, cuius honorem omnibus anteponendum noui. Ex vita eiusd. cap. x.

S. EADMVNDVS ARCHIEP. CANTVAR.

Huius etiam vox erat: Malo insilire in rogam ardentem, quàm peccatum vllum sciens admittere in Deum meum. Sur. tom. 2. in Vita.

ANGLVS ANONYMVS.

Dum expulsis fugatisque ex Franciæ finibus à Carolo VII. Rege Anglis, quidã ANGLICVM PRÆFECTVM percõtaretur, quando Angli rursus in Galliam redituri essent; respondit: Quando peccata vestra maiora erunt nostris. veram & sinceram calamitatum omnium sentinam reputans Peccatum. Ex lib. Rer. memor. Gall.

CAROLVS V. IMPERATOR.

Præclarè etiam inuictus ille Princeps sentiebat, cum diceret altercantibus de Ecclesiæ scissura: Peccata nostra commeruere vt Ecclesiæ integritas secaretur. vtque eius rei auctorem Lutherum insinuatet, adiecit: Vnus homo nobis scribendo perdiderat rem. Ex relatis Auctori. Flores Sent. Hispanici.

BLANCA FRANC. REG.

Quære PARENTVM DE FILIIS CVRA.

ANVS

ANVS ANONYMA.

Quantum verò sit PECCATIONUS, quo pressus grauatatur peccator; facetè & verè declarauit ANVS, cuius nomen apud Auctorem reticetur. Erat Stratonicus Cytharædus, qui Corinthi peregrinum agebat, homo nefarius & scelestus. Hunc dum fixis ocalis intueretur ANVS, rogat: Quid me per Deos immortales ita indefinèter intueris? cui illa: *Nequeo sat mirari, quod te mater tua decem menses in utero gestare potuerit.* rogantiq̃ue iterùm, Cur ita? respondit: *Quia hæc ciuitas angitur, vnum dñtaxat te diem portans.* Significabat iniquitatum ipsius pōdus tantum esse, vt vix à terra sustineri possit. ac meritò Regium Prophetam confiteri: Sicut onus graue grauatæ sunt super me. Auct. Serm. Conuiui.

PECCATI RECIDIVA.

S. ARSENIUS.

Sicut libertus libertate donatus patronum offendens, grauiùs delinquit quàm seruus: ita Deo per Christum reconciliati, è potestate diaboli & tenebrarũ erepti, vera libertate Spiritus donati, multo atrociùs recidiuando offendunt, quàm qui naturâ filij iræ, & serui peccati. Quare præclarè dixisse accepimus S. ARSENIUM: *Qui peccata peccatis addit, cùm ea resicare deberet pœnitentiâ & diligentia, similis est scindenti ligna & suis humeris imponenti; cùmque iam supra vires onustus est, noua superaddit, & onus auget.* Surius tom. 4. in Vita.

PECVLATVS.

SIGISMVNDVS IMPERATOR.

PECVLATVM furto grauius crimen dicebat M. Cato, eò quòd publicarum rerum sit iniusta ablatio. de quo cùm etiam rogaretur SIGISMVNDVS, cur frequentius esset apud liberas ciuitates; *Ideò, inquit, quòd nudos honores ciuibus commendent, populus autem ad lucrũ inhiat.* Indicabat ipsum Magistratum in causã esse, quòd tam multi hodie Peculatus crimine insimulentur. cùm enim varia sint in Repub. officiorum genera, quibus vix certa stipendia assignata sunt: fit, vt qui ea administrant, sæpè ex publico thesauro sibi per nefas prospiciant. *Æn. Syl. lib. 2. Comm. de Gest. Alph.*

LEGATVS ANONYMVS.

Inter cetera huius rei exempla haud indecorè se LEGATI huius iocus, & libera, iucunda tamen, vindicta offert. Mittebatur à Maxamiliano I. Cæsare LEGATVS, vt ab vrbe quadam Imperiali extorqueret certam pecuniæ summam. ea tamen lege, vt si dexteritate suã quidquam impetraret supra id quod imperatum, sibi vt lucrum cederet. Quinquaginta itaque millia aucupatus est. è quibus triginta Cæsari reddidit, residuum suo vsui dedicauit. Insuperatã prædã latus Imperator, LEGATVM dimittit. Interea Quæstores plus receptum intelligunt quàm redditum, & Cæsarem interpellant, rationem reddat LEGATVS. Acquiescit Imperator, & accitũ hominem, rationem reddat, monet. Ille facturum se spondet ocyùs. differt tamen. At Cæsar suspicatus rationem illi nondum satis subductam, dissimulat.

cum -

cumque sic illuderet sæpius, urgent Quæstores ut compellatur, & quidem statuto dierum termino: ni pareat, multandus grauitè. Annuit Maxæmilianus, cumque ad se vocari districtim iubet. verum is nil veritus, nullâ morâ interpositâ, venit. adueniunt etiam Officiales, ut rationibus præsent. Tum Cæsar, Vbi computus, & promissæ toties rationes? en hîc coram adsunt, qui excipient. (assidebant autem illi codicillis ad id paratis.) Vbi LVVENIS satis dextrè; *Numquam*, ait, *Cæsar inuicte, rationem detrectavi. verum cum experientia & ætas huiusmodi rationum formam & modum mihi necdum suggesserit; unum peto, ut eos qui assident, utpote longo rerû usu peritiores, iubeas aliquod earû exemplum edere: & videbunt me maximè docilem.* Dicto hominis tactus Cæsar, subridens, Verum, ait, & æquum postulas. eumque ilicò à se dimisit. Subindicabat autem, assessorès illos eo modo Cæsari reddere suæ functionis rationes, quo ipse reddiderat: nimirum ut bona pecuniarum publicarum pars penes ipsos remaneret. Vnde pulchrè olim Diogenes, cum vidisset quèdam ob furta apprehensum duci per magistratum; Magni, clamabat, fures paruum ducunt. Cui consonat vulgare hoc apud Belgas adagium: Magnos fures crumena, minores mala crux strangulat. Ioann. Peregrin. Petroselan.

PECVNIA.

S. GERARDVS ABBAS.

Rerum in terris neruum PECVNIAM Peculatui subiicimus: in qua coaceruanda, licet in somnes noctes ducant plures; sanioris tamen mentis alijs eius fœda lucra neglexere. Restituerat sanitati,
diuina

diuina ope fretus, Arnulphum Comitem GERARDVS ABBAS. dumque eius rei gratia immensum auri pondus offerretur, recusauit, dicens: *Pecunia congeries, apud Monachos praesertim, sunt velut lepra anima. Frater autem Gerardus non vult esse leprosus, ergo nec pecuniosus.* Doctè & verè Iuuen. Sat. 6.

Prima peregrinos obscæna pecunia mores

Intulit, & turpi fregerunt sacula laxa

Diuitia molles.

Sur. tom. 5. in Vita.

VLRICHVS III. EPISC. CONSTANT.

Licitè tamen, imò prouidè quandoque pecuniam in bonum vsum colligi, auctor est VLRICHVS PRÆSVL. Quærenti namque cur tantam pecuniarum vim coaceruaret; *Vt, inquit, his aut hostem vincam, aut cum eo pacem consequar.* Sciebat enim cum magno Iulio, potentiam quamuis duabus potissimum rebus, pecunia & milite, conseruari, parari, atque augeri. Bruschi. in Episc. Gerin.

PETRVS ALDOBRANDINVS CARD.

Rogatus hic quâ viâ contra hostes tutò pugnandum sit; *Non ferro, inquit, sed auro.* Ita de Philippo Macedone olim dictum, plura opida expugnasse dando, quàm rapiendo. Henr. Farnesius in Apophth. de Principe.

SENEX ANONYMVS.

Vbi autem vitæ necessaria suppetunt, non esse pecuniis inhiantum, docuere veterum Anachoretarum plures. & primò, dum cuidã SENIORI, quòd mirare, pecuniæ offerrentur, renuit eas accipere; rogatus vt in piorum necessitatem dispensaret, ait: *Duplex id mihi opprobrium futurum, quòd, cum non indigeam, accipio; & aliena tribuens, vanam gloriam colligo.* Clinach.

ANA-

ANACHORETA ANONYMVS.

Alius item non dissimili animo, sibi pecunias donanti, respondebat: *Tu post 70. annos mihi nutrimentum adfers? Ecce tanto tempore infirmus nullo indigui, Deo me pascente.* In Vitis PP.

MVLIER ANONYMA.

Hæc etiam, mirum in auaro sexu, pecuniarum summam sibi largienti, quasi indignata dicebat: *Habeo curatorem meum Deum, & tu illum à me vis tollere?* Auct. Serm. memorab.

*Lege Tit. de CONTEMPTV MVNERVM,
& MERCEDIS.*

Item de LIBERALITATE, &c.

POENITENTIA.

IESVS CHRISTVS.

Demus etiam locum POENITENTIÆ; per quam ij qui culpa sua lapsi, resurgunt ad pristinum nitorem: quamque distulisse semper nocuit. Vultis quanta sit eiusdem necessitas? attēdite quid animarum nostrarum Medicus & SALVATOR ad se venientibus imperarit. Venerant ad eum qui nuntiarent de Galilæis, quorum sanguinem Pilatus sacrificiis commiscuit. quibus respondens, dixit: *Putatis quòd hi Galilei præ omnibus Galilæis peccatores fuerint, quia talia passi sunt? Non, dico vobis: sed nisi pœnitentiam egeritis, omnes similiter peribitis.* quo loco summam huius post naufragium tabulæ necessitatem insinuauit. Luc. cap. 13.

S. PETRVS APOST.

Haud secus Beatus PETRVS, quærentibus quibusdam Iudæis, Quid faciemus viri fratres? respon-

spondit: *Pœnitentiam agite, & baptizetur unusquisque vestrum.* Actor. cap. 2.

S. AMBROSIVS.

Nec dispar in AMBROSIO fraternæ charitatis affectus. Theodosium Imp. propter eadem Theslonicæ factam, ingressu Ecclesiæ prohibebat. Cui, cum ille David regem homicidam fuisse & adukerum diceret, respondit AMBROSIVS: *Qui secutus es errantem, sequere pœnitentem.* Quare impositam sibi ab eo publicam pœnitentiam palam egit.

Breuiar. Rom. 7. Decemb.

F. BORGIA SOC. IESV.

Non immeritò ergo FRANCISCVS BORGIA, percontanti quænam potissima Pœnitentiæ virtus, respondit: *Quòd viam in calum muniat.* hæc enim est angusta illa porta, per quam iubemur ingredi, quæque ad vitam æternam recto tramite ducit. In Vita eius.

THEODOSIVS IMPERATOR.

Præclari illius Principis præclara etiam hæc vox: *Nihil est noui, si quis homo cum sit, vita excedat. Vnius autem Dei est, cum, qui semel per peccatum est mortuus, per pœnitentiam ad vitam reuocare.* Deus enim (vt habet Lactantius) imbecillitatem nostram sciens, aperuit nobis portum salutis: vt huic necessitati, cui fragilitas carnis subiecta est, medicina pœnitentia subueniret. Benè ergo & Christianè monet Naso, licet Ethnicus, lib. 1. de Ponto:

Talia caelestes fieri præconia gaudent,

Vt sua quid valeant numina teste probent.

Sapè leuant pœnas, ereptaq; lumina reddunt,

Cum benè peccati pœnituisse vident.

Niceph. Callist. lib. 14. c. 3. Hist. Eccles.

EQVES ANONYMVS.

Sed vt salutaris ad vitam spiritualem est Pœnitentia, post admissum scelus ilicò assumpta: ita plus æquo dilata, noxia est & abominabilis. cuius rei non pauca supersunt exempla. Narrat Beda fuisse in Anglia equitem Coenredo Regi mirum in modum familiarem: qui cùm à Rege suæ salutis admoneretur, ac præsertim pœnitentiæ; numquam acquieuit, dicens sibi tempus pœnitendi superesse. Paulò pòst, fatali morbo correptus, dum Rex iteratò instaret de admissis sceleribus pœniteret; *Non iam, inquit, ne id metu mortis videar fecisse: ubi sanitatem recepero, spondeo me suæ Maiestatis monitis obtemperaturum.* At incautum oppressit mors; & de salute desperans, infelix animam infelicem efflauit. Beda lib. 5. Hist. Ang. cap. 14.

IMPOENITENS ANONYMVS.

Non minùs insipiens ac propriæ salutis contemptor ille. qui animæ suæ prospiceret cohortantibus, dicebat assiduè: *Hæce cura mihi impendat: ego in supremo articulo vitæ, tribus verbis salutem cōsequar.* At non consecutus est eam, quam optabat. factum enim, vt hiemali aurâ pontem lacerum transiliret: ex quo cùm sibi necessariò cadendum, adeoque intereundum esse videret, tria verba, spei expers, inclamauit: *Capiat omnia Demon.* vndisq; obrutus, cum equo cui insidebat, demergebatur: impiorum vota numquam exaudiente Altissimo. Prouidè & cautè hortatur Ouidius:

Sed propera, nec te venturas differ in horas:

Qui non est hodie, cras minus aptus erit.

Th. Staplut. in Prompt. morali.

VSVRARIVS ANONYMVS.

Quod etiam verè ita se habere præfenti exemplo concludam. Monebat vir pius & religiosus VSVRARIVM, vt dum ætas tempusque sineret, ad imitationem Zachæi publicani, de iniuste acquisitis iuste disponeret. renuit. fit æger: instat, vt prius, alter. At morbo virtutem superante, exclamabat eger: *Pœnitentia ubi es? heu! de cetero pœnitere non valeo, iudicante hoc iusto indice: qui dum pœnitere potui, non volui.* Spec. exempl. Part. 2. exemplo 215.

CAROLVS V. IMP.

Et hi quidem in re seria, & quæ ad animæ salutem: in alia CAROLVS IMPERATOR se prodit. Fuit Hadriano, qui postmodum creatus Põtifex eius nominis VI. commissus adhuc adolescens. Verum magnitudo rerum & Imperij, tenerum adhuc à studiis abduxerat. Dum itaque Genuæ Oratorem audiuiſſet Latinè perorantem, nec plenè satis cepiſſet, tristi ore confellus est: *Agnosco nunc maximè, & cum dolore quidem, Hadriani magistri mei diuina monita, cum has Latini sermonis elegantias nequeam percipere: ac meminerim prædixiſſe eum, me puerilis incuriæ pœnas aliquando daturum.* Arbiter horum est P. Iouius in vita Hadriani VI. Tom. 2. de Viris Illustr. Ita quàm plures videmus, qui, iuuenilibus annis somno iocisque peractis sine honore, iam maturiores effecti,

—— cum lapidosa chiragra

*Fregerit articulos, veteris ramalia fagi,
Tunc crassos transiſſe dies, lucemq; palustrem,
Et sibi iam feri vitam ingemuere relictam.*

HENRICVS VII. ANGL. REX.

Similis etiam pœnitentia, quavis in re grauiore,

diu ante Carolum, HENRICO VII. ANGLIÆ REGI fuit. dum namque consobrinum suum morte multasset, factique pœniteret postmodum, ac pro alio quodam etiam capitis reo plures è proceribus supplices ad eum accederent, conceptum animo dolorem testatus, ingemuit. & *Nemo vestrum*, inquit, *consobrini mei causam apud me egit.* Patiuntur quippe amantes etiam iustè læsi, aliquando se per amicum teneri, & quasi suspendi à proposita sententia. Refert Th. Stap. Prom. æstiu. Dom. 3. post Pent.

PEREGRINATIO RELIGIOSA.

PHILOROMVS PRESBYTER.

Longum esset singulas ætates decurrere, quot viri sancti & religiosi, loca sancta, pietatis stimulis permoti, venerati sint, & è longinquis regionibus salutarint. Qui sanè ad virtutum apicem se ascensuros non posse existimabant, nisi Christum Sanctosque iis adorarent locis, vbi vel mortem passi, vel certè crebris miraculis à Deo illustrantur. adeoque eis erat gloriosum, adorasse Dominum in loco vbi steterunt pedes eius. Ex his PHILOROMVS, quamvis vitæ innocentia præcelleret; quoties tamen Terræ sanctæ mentio incidebat, gloriabatur palàm: *Gratias Deo ago, quòd me dignum reputarit, qui bis pedibus loca in quibus Filius eius passus est, saluta-uerim.* Pallad. in Lausic. cap. 113.

IOAN. EPISC. HIEROS.

Venerat ad loca sancta peregrino vilique habitu Theodosius Imp.: cumque templi limen ingrederetur, subitò lucernæ omnes extinctæ, ac statim diuinitus accensæ. Miratur ædituus, eumque (cog-
noue-

nouerat enim à Deo intrinseca reuelatione quis esset) ad IOAN. PONTIFICEM adduxit. qui eo viso; *Verè tu beatus es*, inquebat, *qui, cum Imperatoris personam sustineas, tam vili habitu ad loca hac ingressus es.* Cedren. in Theod.

Require PASSIO CHRISTI.

MARIA MATER DEI.

PERFIDIA.

FREDERICVS III. IMP.

Sincerae fidei concordiaque repugnans PERFIDIAE crimen, leui stylo percurremus, eosque qui illo infecti. Dederat FREDERICVS IMP. fidem publicam iis qui in se absentem coniurauerant, eisque liberè ad se veniendi abeundi que potestatem faciebat. At Neapolim vocatos, capite plecti iubet. Rogantibus autem cur datam fidem falleret; *Quia equum est*, inquit, *perfidis & parricidis violare fidem, & scelus pari arte punire.* Bonfin. lib. 4. Decad. 4.

EDWARDVS ANGLIAE REX.

Et hic cum Ioanne Francorum rege inducias inierat plurium annorum. quo tempore factum, vt Angliae procures auto corrumpere præsidium castris de Guines, & obtinerent. Mittit Oratores suos Ioannes, qui EDWARDVM perfidia incusent. Quibus ille; *Nequaquam*, inquit, *per me violatae induciae: nullus enim pacti nostri articulus mercatura exercitium prohibet.* Clamat Silius Poëta:

*Audite o gentes, non rumpite sœdera pacis,
Nec regnis postferte fidem.*

Auc̃t. Sermonum memorab.

CAROLVS IV. IMP. qui & VVENCESLAVS.

Ille item bellum gerebat contra Philippum Au-

striacum. cumque se copiis inferiorem conspiceretur, Duces quosdam in suas partes, datis & addictis amplis muneribus, trahit, qui domino suo suadeant, prælio abstineat.

— *Dolus an virtus, quis in hoste requirat?*

Spondent illi, &, ut erat postulatum, exequuntur. Re ad effectum deducta, proditoris mercedem accepturi, adeunt IMPERATOREM: qui adulterinum aurum, quod studiosè colligi mandauerat, eis tradit. At paulò post deprehensa fraude, queruli ad CAROLVM reuertuntur, monetam falsitatis arguunt. Ille toruis oculis eos intuitus, *Abite, ait, furciferi in meritam malam crucem, alia proditoris premia accepturi. Quam quæso aliam pecuniam vestra meretur perfidia? adulterino auro adulterina compensatur fides.* Cranzius in Saxonia lib. 9. cap. 37. Hieron. Ziegler. de Vir. Illust. German.

PERICVLVM.

ALPHONSVS REX ARAG.

Vitare PERICVLA, cauti est animi: at gloriosum aliquando iis sese exposuisse. Susceperat ALPHONSVS bellum pro Ioanna Regina Neapolis, ut eam iustè ab aliorum iniuriis vindicaret: monent amici, ne se temerè periculis exponat. Quibus ille: *Non abhorreo pericula, cum sine illis nemo umquam gloriam consecutus sit.* Monet tamen admodum cautè apud Senecam in Hercule furente Amphytrion:

— *Nemo se tutò diu*

Periculis offerre tam crebris potest,

Quem sæpè transit casus, aliquando inuenit.

Panorm. cap. 2. de Reb. eiusd.

PERIVRIVM, vide IVRAMENTVM.

PER-

PERSEVERANTIA.

S. FRANCISCUS.

Virtutum omnium finis & consummatio (vt loquitur Bernardus) est PERSEVERANTIA, sine qua nemo Deum videt. Hac præditum FRANCISCUM fuisse tradunt, qui vitam eius posteritati consecraverunt: nam cum apud Episcopum Imolensem, à quo prædicandi licentiam postulauerat, repulsam passus esset, post horam rediit. Inquirens iteratò Episcopus, quid petiturus aduenisset. Ille humili tam voce, quàm corde: *Domine, si pater filium uno ostio eiecerit, alio ei reintrandum erit.* Sur. in Vita to. 5.

PACOMIUS ABBAS.

Huius quoque laudabilis vox ad discipulos crebrius prolata: *Frustrà ad salutis brauium currimus, nisi sic curramus, ut cõprehendamus. Frustrà cum hoste configimus, nisi certemus ut vincamus.* Meminerat quippe illius præcepti Dominici, Qui perseuerauerit vsque in finē, hic saluus erit. Marul. lib. 5. ca. 8.

S. THEODORUS MARTYR.

Quod prior voce, hic reipsa compleuit. Immanes cruciatus minantibus sicariis, nisi Christi fidem abiuraret; in præclarum hunc sermonem erupit: *Pro fidei Christianæ confessione qui vulnerat, incidat: & qui verberat, laceret: & qui cremat, flammam adiiciat: & qui his verbis offenditur, linguam eximat.* Nyss. in Vita eius. Polyanthea Caroli Langij tit. Perseuerantia.

ATTALVS.

Ille, cum subiectis prunis in sella ferrea torreretur, voce magna ad plebem clamauit: *Ecce hoc est homines comedere, quod vos facitis, qui à nobis velut*

occultū facinus inquiritis, quod vos aperta luce cōmittitis. Nos enim neque homines comedimus, neq; aliud malum operati sumus. Euseb. lib. 5. Hist. Eccl. c. 3.

SYLVANVS EPISCOPVS.

Quid verò SYLVANVS? Constantium tyrannū ad fidei defectionē eum adhortantē, & ni pareat mortē minitantē, ita compellat: *Potestātē habes nos puniendi: ut autē patrum decretis dissentiamus, nihil virium habes.* Theod. lib. 5. Hist. Eccl. cap. 24.

BASILIUS MAGNVS.

An aliud expectatis à MAGNO illo BASILIO? Valentis Cæsaris iussu patria proscripto, & ad tribunal Præfecti pertracto, cū præsens interitus denuntiaretur, nil turbatus; *Vtinam*, aiebat, *mibi quidquam esset digni muneris, quod offerrem ei, qui maturius Basilium de nodo follis huius absolueret.* Hist. Eccles. lib. 11. cap. 9.

EUSEBIUS SAMOSATENVS.

Pari fortitudine hic. Cū enim nolenti sibi tradere decretum Arrianorum aduersus Melitum, minaretur Constantius dextram se abscillurum, utraque palmas porrexit, inquires: *Melire in me quod potes. decretum non dabo, clarum Arriana pestis indicium.* Theod. Trip. Hist. cap. 49. lib. 5.

FRATRES ANONYMI.

Quàm gloriosi hac virtute, tenellæ ætatis licet, GERMANI FRATRES? quorum tanto illustrior est Perseuerantia, quanto ad resistendum ætas imbecillior. Volebat hos de immolatis sumere Tyrannus: ac primū muneribus, quibus trahi minor ætas; dein minis, quibus terreri solet, adigit. Illi fortiter; *Non hoc*, inquit, *à parentibus accepimus.* Post verba ad verbera deuentum. Cumque senior iam ani-

mam

nam agere videretur, alter eum amplexatus, nihil de constantia remittens; *Vicisti, inquit, frater, vicisti.* & vita functum, eodem perseverantiæ spiritu victor etiam comitatus est, æternum cum eo victurus.

Retulit inter alia R. P. Adrian. Mangoetsius, Soc. Iesv presb. in Orat. quam habuit de B. Virg. concept. in congregat. Sodalium Antuerpiæ.

DIONYSIA HYNERICHI R. FILIA.

Magnum Perseverantiæ argumentum tenelli illi: æquè illustre DIONYSIÆ REGINÆ exemplum. A tortoribus namque turpiter denudata, cùm graviter cæderetur, ita ut riuuli sanguinis toto corpore fluitarent, alacri & libera voce dixit: *Ministri diaboli, quidquid ad opprobrium meum vos facere existimatis, hoc ad laudem meam à me reputari scitote.* & ita inter virgarum ictus, inuicta exspiravit. Eusebius in Hist. Ecclesiast.

PETRVS ALDOBRANDINVS CARD.

Quia verò perseverantia est stabilis quædã permanensio, solitum ferunt CARD. ALDOBRANDINVM dicere: *Perseverantia est virtutum baculus, cui nisi innitantur omnes corruunt.* Henricus Farnesius in Apophth. de Principe.

Require Apophth. de CONSTANTIA RELIGIOSA, MARTYRIO, &c.

PETITIO HONESTA, ET INHONESTA.

MARIA SALOME.

FIt ut qui HONESTA, sibi quæ convenientia, ab eo qui concedere ea potest, postulat; si non semper impetret, eiusdem tamen gratiam & fauorem obtineat, qui verò INHONESTA, aut minùs sibi decentia

efflagitat, ea impetret aliquādo in suam perniciem: vel pudore suffusus, repulsam patiatur. Ut autem à fæminis, quarum intemperata cupiditas, exordiamur; MATER FILIORVM ZEBEDÆI, audita mortuorum resurrectione, & regno Christi, venit ad eum cum filiis adorans & petens; *Dic ut sedent hi duo filij mei, vnus ad dextram tuam, & vnus ad sinistram, in regno tuo.* Qui insulsam mulieris petitionem retundens, *Nescitis, aiebat, quid petatis.* Verum esse significans, quòd

Non sit è terris mollis ad astra via.

Matth. cap. 20. Mar. 10.

HERODIAS HERODIS NEPTIS.

Quid verò lasciuia hæc pellex, quo intemperantiæ suæ carnisque libidini satisfaceret, petiit aut desiderauit? Ardebat desiderio Herodis regis auunculi sui: at vnum timebat Ioannem Baptistam, huic incestui obersistentem. Et ecce natali Herodis, dum mero ipse incaluisset, eamque choreas leuiter ducentem aspexisset, placuissetque, ei quiduis petendi fecit potestatem, eamque iuramento confirmauit. Quæ nil cunctata, ex matris consilio, *Volo, inquit, ut protinus des mihi in disco caput Ioannis Baptiste.* Ita impiorum stultiua, iustorum persæpè ruina est. Quinimò, teste Iuuenale Sat. x.

Euertère domos totas, optantibus ipsis,

DI faciles. Nocitura toga, nocitura petuntur Militia.

Marci cap. 6.

ALPHONSVS REX ARAG.

Venerat ad hunc Equestris ordinis quidam: & multa, quòd apud hostes captiuus detineretur, ab eo petiit, & impetrauit. Quo à se digressò, Rex ait;
Dispercam:

Dispercam : ni metui, ne etiam uxorem meam posceret meus eques. Ita alteri, cui plura contulerat beneficia, quæ ille dissipabat indies, & noua postulabat, dixisse ferunt : Si ita progressus fueris, citius me pauperem, quàm te diuitem effecero. Potuisset illi dicere, quod amico suo olim Quidius, in Ponto :

Ab nimium est, quod amice petis : moderatiùs opta, Et voti quæso contrahere vela tui.

Panorm. lib. 2. de Gest. eiusd.

FREDERICVS CÆSAR.

Æquè facetus ille. Cùm plura importunè peteret ab eo Ioan. Sirck Episc. Treuirensis, vir industrius; dicebat, *Si finem petendi non feceris, ego certè negandi facile inueniam. Quod meritò illis dici & potest, & debet, quibus insatiabilis est quiduis consequendi cupiditas. Æn. Syl. lib. 2. de Gest. Alph.*

SS. APOSTOLI CHRISTI.

Ad honesta petentes transitum facimus. Digressi cum Iesu in montem Petrus, Iacobus, & Ioannes, visa eiusdem diuinâ transfiguratione & maiestate, attoniti dicebant: *Domine bonum est nos hîc esse: si vis, faciamus hîc tria tabernacula; tibi vnum, Moysi vnum, Elie vnum.* Vbinam locorum enim decètiùs optabiliùsve remanere poterant, quàm in tam sancto celebrique consortio? quid verò ardentius desiderare, quàm eius gloriæ fieri participes, cuius scintillam iam viderant? Matth. cap. 17.

S. ATHANASIVS.

Reuocatus ab exilio, rogabatur à Constantino, vnicam Arrianis in sua ciuitate Ecclesiam concederet. cui ille: *Libens id fecero Imperator: sed æquum est mihi tantūdem concedi Antiochia, ut unicā Catholicis Ecclesiam largiaris. Theod. lib. 2. Hist. c. 12.*

OTHO

OTHO MAGNVS IMP.

OTHONI CÆSARI hîc etiam locum demus. qui postulanti Comiti sibi daret monasterium Larissense; *Veluti, ait, non decet margaritas canibus obnucere: ita neque Imperatori, profano homini, ea quæ Deo semel dicata, in profanū vsum elargiri. & ita Comitē, importuna petentē, dimisit.* Hedio in Chron. Germ.

REGIS ANGLIÆ FIL.

Vide RESPONSVM PRÆCEPS.

ALPHONSVS REX ARAG.

Illustrat etiam priores suo splendore ALPHONSVS: qui dicenti cuidam, decere Principem non ea tantū quæ verbis promisit, præstare, sed & ea quæ nutu affirmavit; respondit: *Rectè tu quidem: sed decet etiam petentes ea postulare, quæ iusta sunt & honesta; sin minùs, satius est promissis non stare, quam peccare in leges iustitiæ.* Panorm. lib. 3. de Gestis eiusdem.

PHILOSOPHIA.

S. THEOPHILVS.

QVis te rerum diuinarum humanarumque sedula indagatrix PHILOSOPHIA digno elogio concelebret? quæ vitæ dux eiusdem tranquillitatem largita es, & terrorem mortis (si Tullio fides) sustulisti. At verè te sustulisse, declaravit THEOPHILVS. Apud quem dum Sapritius Præfectus instaret, ut mente cultūque mutato, rursus à vero Deo descisceret ad Idola, aliàs miserâ morte multandus: verus Dei amicus, *Summa, ait, sapientia est, ut Philosophiam declarem erga omnes meos affectus, & tuos cruciatus nihil timeam.* Cui Præses: Ergon' tormentis requiem, morti vitā postponis? Ille: *Ego & tormenta*
timeo,

timeo, & mortem perhorresco; sed illa tormenta quæ finem non habent, illam mortem quæ aternas tenebras patitur. Sur. tom. i. in vita Dorotheæ.

S. BASILIVS, & IULIANVS APOSTATA.

Bellum fatale in Persas suscepturus IULIANVS, cum sibi obvium haberet BASILIVM, clamabat: *Ego te Basili in Philosophia excello.* Cui BASILIVS lento gradu pertransiens: *Vtinam Imperator Philosophus esses!* insinuans, non in tot tantisque errores prolapsum fuisse, si Philosophiæ sedulam operâ impendisset: hæc enim, si vlla est alia,

———— recto vivere talo

Ars dedit, ut veri speciem dignoscere possis,

Ne qua subarato mendosum tinniat auro:

Quæque sequenda forent, quæq; evitanda vicissim,

Illa prius cretâ, mox hæc carbone notares.

Sur. tom. i. in vita Basilij.

COSMAS MONACHVS.

Erat is quo præceptore vltus olim Damascenus, Philosophiæ professor eruditus. Qui rogatus de statu suo & professione, totus in lachrymas soluebatur. aduenit solatium laturus Damasceni pater, &, an ne vitæ & mundi, cui renuntiabat, amissionem fletet, rogat; qui ait: *Nequaquam: sed id unum me affligit, quod, cum artium omnium disciplinis imbutus sim, hætenus mihi negatum, ut per Philosophiam filium mihi similem generem; quo aurea illa Philosophorum progenies semper in mundo cōseruetur.* Sciebat enim, quod hinc caperent

———— iuvenesque senesque

Finem animo certum, miserisque; viatica canis.

In vita Io. Damasceni, apud Sur.

P O D A-

PODAGRA.

ALPHONSVS ARAGONVM REX.

DE PODAGRA, quæ magnatum ferè morbus est, percontanti, cur, qui eius nodis pressi continentur, loquaciores ceteris forent; *Quia*, inquit, *cùm pedibus uti nequeant, lingua velut ambulatione quadam utuntur.* Panor. lib. 3. de Gest. eiusd.

PETRVS FVNDANVS

Audiuerat quemdam de pedum dolore à Podagra excitato eiulantem. accessit, & , *Ecquid?* inquit, *aliy de itinerum labore queruntur assidue, de negotiorum inquietudine ali;* & *tu de quiete & otio. quod si tibi molestum, surge paulisper & ambula.* Pontan.

ANONYMVS.

Hinc rectè proposita quæstione inter quosdam, *Quòdnam esset molestissimum otium?* variis variè respondentibus, ait vnus : *Podagricum.* Idem.

POESIS.

ALPHONSVS ARAG. REX.

A*Vi prodesse volunt, aut delectare Poëta,
Aut simul & iucunda & idonea dicere vita;*
inquit Horatius. Quare non immeritò summo honore pariter & amore eos prosecutus legitur ALPHONSVS. Nam cùm Parthenopen iter faceret, venissetque ad eum locum vnde Sulmo videri poterat, eamque Ouidij patriam intellexisset; vrbe salutata, *Ego*, inquit, *huic regioni qua non parua regni mei Neapolitani pars, lubens cedam, ut poëtam hunc habeam: quem, licet mortuum, plaris faciam, quàm*
Aprutij

Aprutij dominatum. Spieg. in lib. i. Panorm.
de Gest. Alphon. cap. 47.

CAROLVS IX. FRANC. REX.

Ille quoque fouere eos solitus, qui in POESI excellere, eisque præmia largiri: minùs ampla tamen, vt semper noua meditantes, sæpiùs redirent. Dicebat autem: *Poëta equis generosis similes, quos nutrire oportet, non saginare.* Meminerat fortassis illius Persij in Prologo:

*Quòd si dolosi spes refulserit nummi;
Cornos Poëtas, & poetridas picas,
Cantare credas Pegaseium melos.*

Annal. Franc.

THOMAS MORVS.

Et ille miles Phæbi, Musarum castra secutus aliquando, receperat versus quosdam à filia sua Margaretâ conscriptos; iisque lectis, dicebat: *Singulos hos versus non singulis aureis, quod Cherilo fecit Alexander; sed si animo par esset facultas, singulas syllabas uncis binis auri compensarem.* Thom. Stapluc. in Vita cap. 11.

ANONYMVS POETA.

Quis non ergo appositè & eleganter respondisse fatebitur quemdam POETAM, qui Adrianum VI. Pont. Max. crebris versibus, quorum in locum ipse nummos aliquando rependerat, salutabat. Dicenti namque sibi Adriano, eò quòd toties rediret, & eadem encomia mutato metri genere offerret:

Desine pro numeris nummos sperare Poëta;

Carmina si dederis, carmina reddidero.

ille inexpectatò, miro cum lepòre, liberiùs tamen, vt ingenia illa sunt, subiecit:

Ni tibi pro numeris nummos Fortuna dedisset,

Non

Non esset capiti tanta corona tuo.

Recensuit inter alia à se observata, Francisc. Sweer-
tius iunior, egregius memorabilium rerum & ser-
monum indagator.

PONTIFEX RÔM.

IESVS CHRISTVS.

VT suo capiti membra singula; ita omnes qui in
Christi Ecclesia constituti, eiusdem capiti Ro-
MANO SUMMOQUE PONTIFICI reuerèter obsequi
& adherere oportet. utpote cui ouilis Dominici de-
mandata cum potestatis plenitudine est cura, cuius-
que regimini sanctus Spiritus perpetuò assistit, ita
ut in fidei decretis errare nullo modo queat. Quæ
omnia Apostolorum Pontificumque Principi Pe-
tro, aliisque qui legitimè in sacro illo munere suc-
cedunt, promisit D O M I N U S; dum illi, post insi-
gnem illam cōfessionem, quâ eum Dei filium pro-
testabatur, hanc dignitatem præ aliis rependeret:
Ego dico tibi, quia tu es Petrus, & super hanc petram,
id est, super te, ô Petre, edificabo Ecclesiam meam, &
tibi dabo claves regni celorum. id est, supremam &
plenariam potestatem in Ecclesiam, cuius tu funda-
mentum eris, impartiam. Matth. cap. 16.

ADRIANVS IV. & MARCELLVS II. PP.

Quò ergo maior urbibus Roma, eò maior quàm
ceteros Prælatos laborum moles summos Pontifi-
ces manet. quod intuitus ADRIANVS, qui illud sub-
iit aliquando: *Tantum, aiebat, huius muneris est pon-*
dus, ut & robustissimos non premat modò, sed & oppri-
mat. Cuius dicti MARCELLVS, qui post Adrianum
Pontificatum gessit, memor, postquam diu siluisset,

manu

manu mensam, cui accumbebat, percutiens; *Non video, inquit, quomodo qui hunc locum tenent, saluari queant.* Onuphrius Panuinus in vita Marcelli.

PATRES CONC. SINVESS.

Quantus autem honor huic ordini deferendus, exhibuerunt suo exemplo CONC. SINVESS. PATRES. dum enim tyrannidem in Christianos exercente Diocletiano, Marcellinus Pont. immanitati suppliciorum cedens, in fidei professione nutasset; facti pœnitens, Sinuessæ in Campania Concilium 180. Episc. coëgit. à quibus, cilicio indutus, petiit suæ culpæ condignam pœnā præscribi. at illi summa cum reuerentia id recusarunt, dicentes: *Tuo te ore, non nostro iudicio iudica. Prima namque sedes à nullo mortalium, præterquam à solo Deo, indicatur.* Platina in vita Marcell. Breuiar. Rom. xxvi. Apr.

PIVS II. PONT.

Ille verò, *Graue*, dicebat, *est Pontificis onus: at beatus, qui illud benè defert.* Platina in Vita.

ADRIANVS V. PONT.

Idipsum animo voluens ADRIANVS V. dum rogaretur, quòdnam supplicium capitali suo hosti imprecaretur; respondit: *Vt sit Pontifex.* Ita de B. Brunone quidam meminere:

*Renuit oblatum sibi Bruno Pontificatum,
Cernens esse statum Magnatum rarò beatum.*

Ex libro Gall. Rer. memorab.

IOAN. NELSONVS PRESB. ANGLVS.

Esse autem summum Pontificem caput Ecclesiæ per orbem diffusæ, etiam suo sanguine testatus est NELSONVS SACERDOS ANGLVS. rogatus namque, cur principatum Ecclesiæ nollet Reginae tribuere; respōdit: *Numquam audiuisse me aut legisse memini,*

Principem secularem ea potestate ornatum fuisse. Bene is certè. quàm enim speciosa esset Christi sponsa Ecclesia, quàm felix tali capite? ubi nempe in regnum succedit mulier, cui silentium ab Apostolo in Ecclesia præcipitur. Mulieres, inquit, 1. ad Cor. 14. in Ecclesia taceant: non enim permittitur eis loqui, sed subditas esse. & 1. ad Tim. 2. Mulier, ait, in silentio discat (ut scilicet naturæ suæ vitium corrigat) cum omni subiectione. Docere autem mulieri non permitto. Martyrol. Angliæ.

FREDERICVS IMP. PRIMVS.

Hic in gratiam à Pontifice receptus, cùm se eius pedibus humiliter aduolueret, Pontifex Davidicum hunc rithmum, Super aspidem & Basiliscum ambulabis, protulisse cōmemoratur. ad quod CÆSAR graui vultu respondit: *Non tibi, sed Petro.* tamquam hominem facilè contemneret, personæ verò dignitatē probè veneraretur. P. Iouius Elog. lib. 1.

VALENTINIANVS IMPERATOR.

Auxentio defuncto, cùm de successore ageretur, VALENTINIANVS, conuocata Synodo, *Talem, inquit, in Pontificali sede constituite, cui & nos, qui gubernamus Imperium, syncerè nostra capita submittamus.* At petebat Synodus, ipse eum eligeret, quem huic muneri idoneum iudicaret. Verùm ille; *Supra nos, inquit, est talis electio. Vos gratia diuina potiti, & illo splendore fulgentes, meliùs eligetis.* Hist. Tripar. lib. 7. cap. 8.

THOMAS MORVS.

Erat hic regni Angliæ Cancellarius, cuius celebris in hoc opere facta mentio. Hic, inquam, dum Henricum regem Ecclesiæ primatum obtinere negasset, ideoque iudicibus ad moris sententiam accipien-

cupiendam sifteretur; rogatus, num tandem ab eo errore mentem reuocare nollet; quod sentiebat, palam explicauit, dicens: *Iam integris septem annis omnium veterum monumenta euolui: neque tamen vspiam reperi, hominem laicum & secularem caput esse posse, aut fuisse Ecclesie.* Nemo enim sibi sumit honorem illum: sed qui vocatur à Deo, tamquam Aaron. Sic & Christus non semetipsum clarificauit ut Pontifex fieret: sed qui locutus est ad eum, Filius meus es tu, ego hodie genui te. ad Hebræos cap. 5. In Vita eiusd. apud Staplut.

P O P V L V S.

S. POLYCARPVS.

VEluti crebra in mari tempestatum, ita in Populo sententiarum cōmutatio. cui proinde vir prudens vix vñquā satisfecerit. Cū fidei suæ rationē Herodi Proconsuli reddere iuberetur POLYCARPVS, diemque diceret, quo cum eo ageret: Proconsul, ut coram populo se excusaret, mandauit. Cui POLYCARPVS: *Numquam id fecero. Principibus honor debetur, modò Deo non sit contrarius: populo autem furenti nemo potest satisfacere.* Euseb. lib. 4. Eccl. Hist. cap. 15.

IOANNES XXIII. PONT.

Vide Apophth. de V V L G O.

PETRVS ALDOBRANDINVS CARD.

Illius etiam ab ore profectum aliquando: *Principi cum populo plus negotij, quàm olim Herculi cum tauro.* Videbat enim populum, vtpote belluam multorum capitum, vno rationis freno arceri vix posse. Henr. Farnes. suprà.

PHILIPPVS I. HISP. REX

Clari generis magnæque dignitatis vir; alebat, ut Reges solent, falconem, qui ceteris illius generis ferocior, in aquilam (quam in palatij vestibulo in pompam Rex videndam exhibebat) fortè inuolat, ei que adunco rostro fauces præscindit. Indignatus Rex, aquilicidam talionis pœna multari imperat. Factum redarguentibus; *Indecorum est, ait, & impium, populum in Principem exsurgere* Aquila enim auium princeps. Significabat autem allegoricè, licentiæ frēna numquam populo relaxanda. Chron. Hispan.

PRÆDICATIO.

IESVS CHRISTVS.

Quantum utilitatis per PRÆDICATIONIS OFFICIUM Christiano orbi accesserit, vel ex eo constabit, quòd Saluator nostri generis CHRISTVS, ex hoc mundo ad Patrem iturus, idem vnicè discipulis commendavit, dicens: *Ite in mundum vniuersum, & predicate Euangelium omni creatura. Qui crediderit, & baptizatus fuerit, saluus erit.* Matth. cap. vlt.

SS. PETRVS & IOANNES.

Dominici itaque præcepti memores isti, dum iubentur abstinere à propagatione nominis IESV, respondent: *Si iustum est in conspectu Dei, vos potius audire quàm Deum, iudicate. Non enim possumus quæ vidimus & audiimus non loqui.* Act. cap. 4.

BENIAMIN DIACONVS.

Ille etiam in carcere biennium detentus, dum ea lege solutus esset, ne ampliùs Dei Euangelium prædicaret;

dicaret; memor villicationis suæ, dicebat : *Neque possum neque debeo, talentum mea fidei commissum, in terram abscondere.* memor serui illius nequam, qui propter absconsum talentum, in tenebras exteriores missus est. Theod. lib. 5. cap. 28.

S. FRANCISCVS.

Egregius etiam sui talenti dispensator FRANCISCVS. quem rogasse aliquando confratres suos ferunt, Quid vobis consultius videtur, an quòd orationi, an verò quòd prædicationi vacem? & enumeratis commodis vtriusque, quamque Deo grata essent, tandem conclusisse: *Attamen prædicationis officium suis potissimum commendare voluit Redemptor noster, dum ipse cum peccatoribus conuersatus est: cuius vestigio cum nobis insistendum sit, utilius, Deoque gratius futurum, intermissa quiete, foras egredi ad laborem.* quod & præstitit. Bonau. cap. 12. in Vita.

ANONYMVS RELIGIOSVS.

Nullius verò personæ conditionem spectandam, sed liberè annuntiandum quod veritas dicat, docuit Viennæ Austriæ cōcionator Alberti primi Imp. Ille enim & Imperatorem & proceres conspiciatus, oscitanter verba sua excipientes; voce intenta, *Quæritur*, inquit, *saluarine Principes possint?* Et re agitata in vtramvis partem, excussioq; audientium somno; *Quid ni, ait, possint? si modo Baptismo suscepto, in cunis vagientes moriantur.* Æn. Sylu. lib. 3. Com. in Panormit.

ANONYMVS.

Sed factores verbi, non auditores tantum, requirit Apostolus. Cuius doctrinæ memor quidam è Saracenorum finibus, vbi plures annos vixerat, reuersus Florentiam, dum interfuisset concioni cele-

berrimæ fratris Alberti de Sartiano, totus in lachrymas abiit. ac causam percontanti Alberto, quid in tantum fleret; *Saracenorum*, respondit, *calamitatem, & Christianorum oscitantiam atque ingratitudinem.* causamque addens, *Si namque*, aiebat, *hæc prædictio facta fuisset Damasci in centum millium coronâ, ausim spõdere, plures octoginta sex millibus ab errore convertendos fuisse.* Refert Bernardinus à Busto, Par. 1. Ros. serm. sermone 3.

ANONYMA MATRONA.

Quid tandem de deuoto femineo sexu dicemus? Requirebat honesta quædam MATRONA ab omnibus domesticis, num concio esset facta. Respondentibus illis iterum atque iterum, & factam affirmantibus, eò quòd certo certius interfuissent, imò notabilia quædam ex ea proferrent; *Dicta est*, inquit illa, *sed necdum facta concio. Superest eam nunc faciat*, & *quæ audistis opere adimpleatis.* Sciebat autem, quòd, qui auditor est verbi & non factor, comparetur à Iacobo Apostolo, viro consideranti vultum natiuitatis suæ in speculo. Considerauit enim se, & abiit, & statim oblitus est qualis fuerit. Recenset P. Ioan. Daud in Verid. Christ. cap. 97.

P R I N C E P S.

Ac primùm quidem,

PRINCIPIS RELIGIO.

PETRVS ALDOBRANDINVS CARD.

CUm ad imperandum in Dei Opt. Max. locum suffectus sit PRINCEPS, quem sine RELIGIONE nemo sequi potest; dicere consuevit Religiosus AN-
TISTES

TISTES ALDOBRANDINVS: *Nihil magis spectare decet Principem, quam Religionem. idque tribus de causis: cum, quia homo est: tum, quia Dei minister: ac denique, quia Reipub. rector est & gubernator.* Henricus Farnes. in Apophth. de Principe.

I D E M.

Et quia populi sui obsequium refugere videtur, qui Dei negligit imperium; *Maxima*, aiebat, *Principis commendatio in Religione consistit.* & verè, respirat in inclinata fortuna populus, vbi Principem videt Religioni deditum. Ibid.

I D E M

Rogatus, quoniam Principum forent clementissimi; *Maximè*, respondit, *religiosi. quia nihil est Religione clementius.* Hinc noluit vetustas deorum simulachra ex lapidibus aut metallis effingi, quia durior esset illa materia: sed ex ligno, quod ad vsum hominum crescit. Ibidem.

I D E M

Sciscitanti quoque, quid potissimum Principi curandum; *Religio*, respondit. instanti, Quid insuper? *Ne*, ait, *ea deferatur, quæ Religioni debetur obedientia.* ô si Angliæ Regum pectoribus insculpta aliquando & inscripta fuisset hæc imperandi norma! viueret adhuc auitus pietatis cultus, quem iam pridem liliatus pater suo stigmate fœdauit. Ibid.

PRINCIPIS FORTITVDO.

PETRVS ALDOBRANDINVS CARD.

INcunabula Reipub. & militaris disciplinæ ab vno Hercule trahi, assererat superstitiosa vetustas. vnde quærenti, qualem esse oporteret Principem;

pem; respondebat illustriss. CARDINALIS ALDOBRANDINVS: *Fortem. quia imperij tutela fidiſſima, Fortitudo. Præclarè Seneca;*

Rex eſt qui metuit nihil,

Qui tuto poſitus loco,

Infra ſe videt omnia:

Occurritque ſuo libens

Fato. Ibidem.

IDEM

Interrogatus autem, quo fortitudinis ſtudio duci deberet Imperator; *Eo, inquit, quo ferebatur Pelopidas Thebanus.* Is enim cùm ad expeditionem profiſceretur, monenti coniugi ſuæ ſaluti proſpiceret; *Hoc, inquiebat, gregario militi curæ ſit: Principem, certè decet, non ſe ſolum, ſed & totum exercitum à perditione ſeruare immunem.* Ibid.

IDEM.

Dixiſſe eum etiã memoriæ proditum eſt: *Fortem qui laceſſit Principem, ſuo ſe gladio ingulat.* Ita Braſidas vir magnanimus, haſta quam è vulnere eduxerat, ſuum hoſtem interemit. Ibid.

PRINCIPIS PRÆSENTIA.

PETRVS ALDOBRANDINVS CARD.

Magno quidem in pretio Principis fortitudo apud magnos; at non minori, eiſdem PRÆSENTIA. vnde rogatus PETRVS ALDOBRANDINVS, quidnam in conflictu renitētibus ſummum adferret præſidium; *Conſpectus, inquiebat, Principis.* Hoc ſentiens Agabrias aiebat, pluris eſſe pecudum exercitum leone duce, quàm leonum imperante pecude. Debet ergo Princeps iuxta Silium,

Primus

Primus inire manum, postremus ponere Martem.

Henr. Farnes. Apophth. de Principe.

Require DVX BONVS, STRENVVS, &c.

PRINCIPIS CONSILIVM.

PETRVS ALDOBRANDINVS CARD.

Ridiculos eos dicebant viri sapientes olim, qui
 vocem in quæstum conferunt; nec officium in
 deliberando, sed spem sequuntur. est enim consilij
 obses, non quæstus, sed prudentia. Quod vt sapien-
 tissimus ille ANTISTES doceret, dicebat: CONSI-
 LIVM est Principatus baculus: sine quo stare nõ potest,
 iacere verò potest Princeps. Henr. Farn. ibid.

I D E M.

Interroganti autem cuidam, quo armorum gene-
 re hostium vis maximè possit reparari; Umbone, di-
 xit, Palladis: quo qui tegitur, ladi non potest. Sanè
 res bellica sine consilij prudentia, nec vtilitatem ha-
 bet, nec laudem. Ibidem.

I D E M

Dum Imperatori imbecillo cum robustissimo ho-
 ste cõfligendum aliquando foret, rogatus, Quomo-
 dotalis Imperator se geret, vt victoriam reportet?
Vt leopardus, ait, *cum leone*. Innuebat autem, arti
 & consilio magis quàm viribus fidendum. Hinc
 Verinus in Distichis:

Consilio viliùs; quàm viribus arma geruntur;

Militis est robur, consiliumque Ducis.

Ibidem.

PRINCIPIS VITA.

ALEXANDER SEVERVS.

PRINCIPIS in Repub. personam sustinere, magnum dicebat Cicero: at maximum, eandē benè & ad ciuium vtilitatem sustinuisse. Hinc dum humili veste sæpenumerò incederet ALEX. SEVERVS; reprehensus ab aulicis, *Imperatoria maiestas, inquiebat, virtute constat; animique, non corporis cultu.* quia, vt rectè Iuuen.

Scilicet in vulgus manant exempla regentū:

Vtq; Ducum lituos, sic mores castra sequuntur.

Lampridius.

ALPHONSVS ARAGONIVS.

Ille quoque verus sui æui Alexander, si fortitudinem; maior eo, si virtutem & summam pietatē spectemus. Cū vix habitu à popularibus dissideret, admonenti regium habitum sumeret, dixisse commemoratur: *Malo moribus & auctoritate meos excellere, quàm diademate & purpura.* Sciebat enim summam Principis virtutem,

Consulere patriæ, parcere afflictis, fera

Cade abstinere, tempus atque ira dare,

Orbi quietem, sæculo pacem suo.

Æn. Syl. de Dict. Alphonfi.

HENRICVS IV. IMP.

Iungatur Alphonso HENRICVS. qui rogatus, cur plebeio habitu Imperator vteretur; *Quia, inquit, Regum est, non corporis sed animi ornatu excellere.* Ioan. Peregrinus.

ÆNEAS SYLVIVS.

Iste priusquam Pontificatu fungeretur, intellexerat

rat Alphonsum, de quo iam sermo, nulli umquam subditorum offensam dedisse. *Et iusti, inquit, Principis est, non solum neminem iniuria afficere; sed & eos qui damna alius inferunt sine causa, prohibere.* Ita Ovidius ferè in eandem sententiam:

Regia (crede mihi) res est, succurrere lapsis.
Idem lib. 1. Comm. de rebus Alphonsi.

MARCUS BARBARICUS VENET. DVX.

Cum huic item obiiceretur, quod in puniendo, & se de iniuriis vindicando tardior esset, respondit: *Boni Principis est, non se ulcisci de inimicis: sed sufficit ut se ulcisci posse declaret.* Laudatur merito illud Senecæ:

Qui vult amari, languidâ regnet manu.
Corozetus.

SOPHIA TIBERII CÆS. VXOR.

Neque latuit SOPHIAM TIBERII II. CONIVGEM, matronam prudentem & religiosam, rem magnam esse bonum Principem. Ita enim sæpius eam ad maritum locutam ferunt; *Præstat esse malum hominem, & bonum Principem: quàm malum Principem, & bonum hominem.* significans, melius esse Principi benè facere, & malè audire; quàm benè audire, & malè facere. Ex lib. Rer. mem. Gall.

PRINCIPIS EXEMPLVM.

ALPHONSVS ARAG. REX.

REGIS ad EXEMPLVM totus componitur orbis, habet commune adagium. Hinc si is pius & prudens, similes sibi subditos habiturus. Quare benè ALPHONSVS, de Principum vita differentibus: *Veluti, aiebat, Heliotropium ad Solis motum; ita popu-*
pula-

pulares ad principum mores vertuntur, & formantur.

Rex velit honesta, nemo non eadem velit. &

Nemo suos (hæc est auia natura potentis)

Sed domini mores Casarianus habet.

Panorm. lib. 2. de Gest. eiusdem.

IDEM

Intellexerat mala Punica per artem reddi dulcia
& sapida. *Quin, inquit, & nos cives nostros ingenio
acri & prauo, industria & labore meliores reddimus.*
quasi diceret, populi deprauatos mores, gubernan-
tis studio reddi meliores. nam

*Facere rectè cives suos, Princeps optimus faciendo
docet:*

Cumque sit imperio maximus, exemplo est maior.

Panorm. lib. 4. de Gest. eiusd.

PRINCIPVM SATELLITIVM.

vide SATELLITIVM.

PROSPERITAS.

S. AMBROSIVS.

MVNDI PROSPERITATEM, veram quidem pro-
speritatem, sed falsam iucunditatem dicebat
August. At eiusdem institutor directorque AMBRO-
SIVS, dum ad domum diuitis cuiusdam diuertisset,
qui sibi omnia ex voto, toto vitæ tempore euenisse
gloriabatur, euestigiò recessit. Rogatus à comite,
cur fugeret tam liberalem hospitem; *Ne, inquit,
vnà cum eo perpetua prosperitate uso, malè peream.*
neque id vanum augurium. Vix enim domo reces-
serat, dum ea cum omnibus eam incolentibus terræ
hiatu fuit absorpta. Paulin. in Vita.

MAR-

MARCUS PISANVS.

Quid verò hoc exemplo illustrius ? Erat Vgolinus Gidarescus Pisanus, qui eò deuenerat, rebus secundis sublatus, vt nutu imperioque quasi cuncta administraret: diuitiis, nobilitate, filiis, nepotibusque affluens, beatū se & felicem prædicabat. Cumque festo sui natalis die fortunam apud amicos extolleret, cæloque æquaret, ausus ad extremum, familiarium quēpiam interrogare, num quid sibi deesse existimaret: qui attentā rerum humanarum fallaci specie, quamque volucris orbe circumagantur, vel certè mente à Deo mota, *Sola*, inquit, *ira numinis procul diuque abesse à tam secundis rebus non potest.* neque verè abfuit. Paulò enim pòst turri à Gibellinis inclusus, misera fame cum liberis extinctus est. de quo ita lusit aliquando Cornelius Kilianus Dufflaus:

Vrbs Pise, atque Arnus qui Pisas irrigat amnis,

Testes exitij sunt, Vgoline, tui.

Cùm turri inclusus, charissima pignora natos

Esurie extinguere cernis, & ipse peris.

Pòst Danthes duce Virgilio regna infera lustrans

Necdum ibi sedatam comperit esse famem.

Nam videt infidi te Ruggerij occiput ore

Horribili & rabidis dentibus impetere.

Fortuna miserum mortales discite casum,

Esurie ecce Comes dira Vgolinus obit.

Require ADVERSITAS, &

FORTVNA.

PRVDENTIA.

PETRVS ALDOBRANDINVS CARD.

N*Vllum numen abest, si sit PRVDENTIA, inquit Iuuenalis. Cuius intuitu sciscitanti quandoque, quam esset vite magistra; respondit CARDINALIS ALDOBRANDINVS; Prudentia. Soli, inquit, Prudentiæ alumni ad rectè viuendum idonei sunt. Facit enim illa (vt habet Claudianus) ne quid inconsultus agas. Henricus Farnesius suprà de Apophthegm. Princ.*

I D E M

Cùm præteritorum malorum iam quasi obducta cicatrix recrudesceret, & refricaretur admissi sceleris in imperando memoria, rogatus quomodo rectè Respub. gubernari possit; respondit: *Vna est rectè gubernandi ars, sine qua nec regere quis potest, nec regi: Prudentia. Ibid.*

I D E M

Interroganti, *Quid maximè timet vir prudens?* Res, inquit, *fortuitas*. Significabat autem, prudentis non esse, inanibus honorum aut cupiditatum blandimentis seduci. Ibidem.

GREGORIUS THEOLOGVS.

Præclarè igitur de Prudentia locutum GREGORIUM, quis inficiabitur? cuius ab ore profectus hic sermo: *Qui serpentis prudentiam in malis, colūbina sinceritati circa bona miscuerit; is neq; prudentiam sinet malignam fieri, neq; simplicitatem stolidam. Habet Langius in Polyanth. ex Stobæo.*

PVDI-

PVDICITIA.

IOAN. MACER MARASCALLVS FRANC.

PVDICITIAM, muliebris sexus potissimum ornamētum, pertractanti, id vnum verendū, ne exequi valeam vel minimam earum rerum partem, quę tantę virtutis pręconio debentur : satius tamen duxi parcē de ea loqui, quā silere omnino. Videamus ergo quantum subiecta exempla PVDICITIÆ decus illustrent. IOAN. MACER obuias quasuis mulieres, & in eis pudicitiam, detecto capite reuereri solitus erat. cumque fortē duas salutasset, rogat qui illi à latere, cur id faceret; an sciret se salutem impertiuisse meretricibus? Qui ait : *Si ita est, nescio. malim tamen exhibere reuerentiam decem inhonestis feminis, quā falli non salutando vnā pudicā.* Sentiebat sanē cum Plauto in Amphith. non eam esse dotem, quę dos dicitur; sed pudicitiam, & pudorem, & sedatam cupidinem. Corozet.

IULIANVS APOSTATA.

In hoc quoque, etsi à pietate & religione nostra abiit, admiranda hæc pudicitia fuit. quem fides certa habet, functā Helenā coniuge, nihil vnquā venercum attigisse. celebrabat sæpē, & recolebat illud Bacchilidis Poëtæ : *Vt egregius pictor vultum speciosum effingit, sic pudicitia celsius consurgentem vitam exornat.* Coll. ex Mon. Pol. I. Lips. cap. 17.

PELAGIVS GALICII PRINC. FILIVS.

Addatur PELAGIVS. Ille Abderamini regi Maurorum datus obses. Et ecce forma eius captus Barbarus, florem hunc sibi destinat, & alludere cœpit, contrectare, & tentare. Ille reiicit, idque sapius :
donec

donec vim parat amator. cui iste ingenua ira pugnum inpegit, & *Tolle canis*, inquit, *vitam: non pudicitiam mihi extorquebis*. Præclarum in puero exemplum. Ibidem.

LUDOVICVS XII. GAL. REX

Videbat Annam Reginam dominandi libidine flagrantem, & multa quoque contra se molientem. Monentibus autem se in tempore de ea vindicaret; *Vxori*, ait, *pudica plura sunt condonanda*. Hanc solum in coniuge magni ducens virtutē, Pudicitiam: quæ, dum semel deperit, nulla est reparabilis arte. P. Æmil. in Vita.

PETRVS ALDOBRANDINVS CARD.

Quid si PETRVM ALDOBRANDINVM hîc, licet præpostero ordine, inferere fas; quantus Pudicitiaæ custos exstiterit, vnum eius dictum declarabit. rogatus enim, *quidnam potissimum humanis affectibus dominaretur*; *Pudor*, respondit, & *Pudicitia*. quinimò sæpiùs ab eodem prolatum: *Homo sine pudore & pudicitia, & nomen amittit & hominis naturam*. Verissimum certè. nullum enim animal præter hominem, sensum habet pudoris. Henricus Farnes. suprà.

Lege Apophth. de CASTITATE.

PVNITIO.

IACOBVS CARRARIENSIS PRINCEPS
PATAVINVS.

MOderatæ PVNITIONIS veluti summum ad virtutes bonum, ita delictorum impunitas est graue ad quoduis scelus malum. Erat IACOBVS CARRARIENSIS, qui laxatis foribus, è vita excessurus,

surus quosuis admittebat, qui queri de se vellent. Venit cū aliis vnus, qui arroganter pecuniam quam ob remissam capitis damnationem acceperat, sibi restitui postulauit, tamquam contra iustitiæ ordinem datā. Cui PRINCEPS, generosa, licet exili voce: *Si tunc iustitia in te reddita fuisset, nunc quod iniuste facis, queri de me non posses. Nullius ergo peccati conscius sum: nisi forte, quod mitius quàm merueras, fueris multatus.* Probè ergo monet Horatius Sat. 3.

— Adsit

Regula peccatis, quæ pœnas irroget æquas;

Nec scuticâ dignum, horribili insectere flagello.

Bernardus Scardeonius, lib. 3. class. 13. descript. Patuij.

MORIO LVDOVICI REGIS GALL.

Venerat ad Regem quidam perpetrati homicidij veniam petens. Rex facti enormitatem cōsiderans, quodque iam tertio in illud crimen incidisset impunè; *Ecquid, ait, rursus tu veniam? iam tertium homicidium est.* Nil cunctatus qui fors aderat, MORIO; *Quid, inquit, Domine, tertium? imò primum dumtaxat est, quod hic perpetravit. Secundum & tertium tuum est: quia si primum non condonasses, reliqua non perpetrasset.* Philipp. Camer. Medit. hist. c. 100.

D. LVDOVICVS FRANC. R.

Præclarè itaque LVDOVICVS. Postulauerat ab eo quispiam gratiam pro reo capitalis criminis: impetrat. At paulò pòst dum preces ad Deum conciperet ex Psalmis Daudicis, & in illum Psalmi 106. versiculum incidisset: *Beati qui faciunt iustitiam in omni tempore: protinus eam gratiam reuocari iussit, dicens; Princeps, qui cū crimen punire possit,*
k
illud

illud non punit, non minùs coram Deo reus est, quàm si ipse perpetrasset. Annal. Franc.

RATIO REDDENDA.

IESVS CHRISTVS.

ITa nobis semper viuendum monet Lactantius, vt rationem Deo reddendam arbitremur. idque instinctu Dominici dogmatis, quo nos instruit, tam districtim villicationis nostræ rationem reddendam; vt dicat, *Quoniam omne verbum otiosum* (quod nempe ratione iustæ necessitatis aut piæ intentionis caret) *quod locuti fuerint homines, rationem reddent de eo in die iudicij.* Matth. cap. 12.

ABBAS ANONYMVS.

Hic vt erat religiosus & pius, animo sæpiùs voluens SALVATORIS de reddenda ratione dictum, conspiciabatur quemdam è suis profusiùs ridetem, & quasi stomachatus, *Coram calo,* ait, *& terra rationem totius vitæ nostræ acturi sumus; & tu rides?* In vit. PP. de Compunctione.

IOAN. EPISCOPVS ROFFENS.

Incomparabili vitæ innocentia ille vir, dum ob amplissima merita à Rege ad primam Angliæ Cathedram sollicitaretur; eâ quam obtinebat contentus, *Beatum me existimo,* aiebat, *si de minuto hoc grege mihi concredito, in die Domini rectè valeam respondere.* Sciebat vir sanctus, Dominici gregis sanguinem de manibus Pastorum requirendum.

N. Sander. lib. 1. de Schism. Anglic.

Vide IUDICIUM EXTREMVM.

RE-

REGNUM.

IESVS CHRISTVS.

PROsequamur nunc REGES & REGNA, & quænam vtriusque conditio ac natura intueamur. Rex regum CHRISTVS à Scribis & Phariseis per calumniam tentatus, quòd in Beelzebub Principe demoniorum eiiceret dæmonia; iis conuocatis, os suum in parabolis aperiens, dicebat: *Quomodo potest satanas satanam eiicere? Et si regnum in se diuidatur, non potest regnum illud stare.* significans regni stabilitimentum esse, Concordiam. Benè Seneca:

——— *Regnum non capit duos.*

Nec regna socium ferre, nec tædæ sciunt.

Marci cap. 3.

RYDOLPHVS AVSTRIACVS.

Cur verò tanto homines regnandi desiderio incendantur, qui tamen artes omnes, quas numquam didicerint, se scire recusent; percontanti causam dabat RYDOLPHVS AVSTRIVS: *Quia omnes, inquit, stultos eos putant, qui regnare nesciunt: stultum autem nemo se esse indicat.* Æn. Syluius de Dict. Fred. Imperat.

IDEM

Regni pomœria ampliaret monenti, respondit: *Melius est benè imperare, quàm imperium ampliare.* Nicol. Reusn.

CAROLVS IX. FRAN. REX.

Quos non labores lubens is pertulit, ut regnò potiretur? Dum enim in regem vngeretur, anxia erat mater ne per ætatem (nam vix annum decimum excesserat) non esset sufficiens cæremoniis omnibus,

quæ tam solemnî actû adhibentur, sufferendis. At, *Feram*, inquit ille, *nec recusabo hunc laborem, quoties se regna offerent.* Non tamen sine causa in Oedipo Seneca inquirît,

Quisquânnè regno gaudet? O fallax bonum!

Quantum malorum fronte quàm blanda regis?

Vt alta ventos semper excipiunt inga,

Imperia sic excelsa fortune subiacent.

Annal. Franc.

HENRICVS GLAREANVS.

Hic facetè admodum Regum Principûmve mores corripiebat, rogabatur cùm esset fortunæ tenuioris, qualem vitam ageret. Qui, *Regalem*, ait. *nam splendide ac laute rem familiarem gero: & cuius me debitorem obstringo.* Corripiebat, inquam, profusam magnatum in subditos temeritatem, à quouis vitæ statusque necessaria exigendi, & paucis, idque non nisi dum lubet, satisfaciendi. Ex lib. Ser. conuiui.

FREDEGVNDIS FRANCIE REG.

Etiam Fæminæ hîc locum suum vendicant. FREDEGVNDIS, dum mortuo marito bello prouocaretur, filium suum Clotarium, adhuc infantem, primores de regno consultura, secum ferebat. &, *Non parui*, aiebat, *vobis aestimari debet Rex & dominus vester, quamquam ætate paruulus, ut in conspectu vestro regnû vastari patiamini.* Ego neque animo fracta, neque consilij inops, rebus decero. quod & opere compleuit. Nam ipsum exercitum quasi Ductrix antebat, natum ab vberibus pendentem gestans.

Gaguin. lib. ii. De reb. Gall.

Require GVBERNARE. PRINCEPS. &c.

RELI-

RELIGIO VT VIRTVS.

THEODOSIVS MAIOR.

Magno apud magnos olim in pretio habita
 RELIGIO: cuius non solum obseruandæ, sed
 & amplificandæ tantum studium apud plerosque
 fuit, vt vix vllum ei par viderit hæc ætas. Arcadium
 & Honorium Imperij sui heredes & filios, ita mo-
 riens hortabatur THEODOSIVS MAIOR: *Imprimis*
& ante omnia religionem & pietatē excolite, per quam
& pax seruari, & bella confici, & hostes fundi, & tro-
phæa statui, & denique victoriæ obtineri poterunt. hinc
 benè Horatius:

*DI multa neglecti dedere
 Hesperia mala luclnosa.*

Cedrenus in Theodos.

IOVIANVS IMPERATOR.

Haud aliter IOVIANVS. cæso Iuliano, dum ei sum-
 mam imperij deferret exercitus ex varia gente con-
 flatus, primùm recusauit, dicens: *Nequeo imperare*
exercitui superstitionem Græcorum amplexo. At vbi
 milites vno ore acclamarent se Christianos, admi-
 sit. Idem.

PALATINVS ANONYMVS.

Erat hic ex Henrici VIIII. regis asseclis: qui con-
 spicatus quosdam morti adiudicatos; hos ob Ca-
 tholicam fidem propugnata, illos propter oppu-
 gnata; *Næ, inquit, imposterum ego regia Religionis*
ero, id est nullius. magis impiè quàm olim Ethnici:
 quorum ea maxima; Omnes Religione mouentur,
 cæque vita constat. Sander. lib. I. de Schif. Angl.

Vide Apophth. de CHRISTIANISMO.

CHRISTI HONORE. &c.

RELIGIOSVS STATVS.

S. LAVRENTIVS PATR. VENET.

Quamuis in omni vitæ statu salus benè operanti aduenire possit, ac merita laborum merces rependi: illum nihilominus excellentiorem præstantioremve existimamus, qui magis compendiosâ licet angustiori semitâ, ad vitam ducit operatam: estque is quem RELIGIOSVM dicimus. cuius egregiam dignitatem & præstantiam quandoque dicto suo expresseſſerūt viri Religiosi. Et quidem LAVRENTIVS PATRIAR. VENET. de bono Religionis differentibus dixisse commemoratur: *Consultò Deus gratiam Religionis hominibus occultauit: nam si cognosceretur illius felicitas, omnes ad eam concurrerent.* Sur. tom. 1. in Vita.

I D E M

Adolescentem nobili genere oriundum, qui fratrum suasu cœnobium ingressus vitæ monasticę se dederat, patri restituit. ei que causam sciscitanti; Religionis, dicebat, *propositum à Spiritu sancto est: non ab humana suadela.* Sur. tom. 1. in Vita.

PAMBO ABBAS.

Ille verò hoc modo iuniores qui religioni se consecrauerant, hortabatur: *Talis esse debet Religiosus, quale corpus mortuum; quod neque voluntatem habet, neque sensum: aut qualis baculus in manu senis, qui eo ad arbitrium utitur.* In vitis PP. de Obedien.

S. ÆGIDIUS.

Neque hunc silentio inuoluendum sentio: qui roganti, quidnam esset Religio; Curia, aiebat, *magni Regis, in quam ingredi cuius datum, & nullius reputatur*

*tatur artis : at non ita , benè & competenter in ea con-
uersari.* Notabat autem , plures Religionem ingre-
di , & manere irreligiosos ; ac (vt habet vulgatum)
cucullam non facere monachum. Ex Sent. au-
reis S. Ægidij.

S FRANCISCVS.

At in Religionis & fidei obedientia nullius valo-
ris esse genus , opes , formam , quæ sunt velut mundi
quædam numismata , facto dictoque asseruit Mi-
norum pater FRANCISCVS. Dum enim a sello vhe-
retur , eumque collega duceret , cœpit is intra se di-
cere ; Non de pari ludebant parêtes eius , & mei : ta-
men ipse equitat , & ego pedes eius asinum duco.
Hoc eo cogitante , descendit asino vir sanctus , & ait :
Haud æquum est frater , me asino , te pedibus incedere :
quia me longè in sæculo nobilitate & potentia superasti.
Obstupuit alter , & rubore suffusus , veniam cum la-
chrymis petiuit. Bonau. in Vita , cap. 11.

S. HILARION.

Neque illud infimum Religionis bonum , quòd
in ea cõuiuentibus omnia sint communia , vti olim
sanctis Apostolis : ita vt distribuatur vnicuique prout
ei necessarium fore Superiores perspexerint. Quare
Hesychium monachũ reprehensum ab HILARIO-
NE , testis est Hieronymus , quòd propriæ liberta-
tis amantior , ab aliis segregatus viueret. Itaque vt gra-
tiam apud HILARIONEM iniret , ei fasciculum cice-
rum ex horto detulit. quibus ad mensam apposis ,
tantum fœtorem fructus ille proprii studij per eam
diffudit , vt HILARION exclamaret : *Non sentis pu-
torem teterrimum , & in cicere latere auaritiã ? mitte
bubus , mitte brutis animalibus , & vide num comedãt.*
Hieron. in vita Hilarion.

FRANC. BORGIA SOC. IESV.

At hic *Religiosam vitam* dicebat *crucem esse perpetuam & martyrium*: quòd Religiosus seipsum vincere necesse habeat, & perpetuò obtemperare ex voto debeat. Lib.4. Vit. cap.8.

RELIGIOSVS HABITVS.

S. ANASTASIUS MARTYR.

NON ipsam Religionem modò, sed & HABITVM eiusdem indicem in pretio habuisse, laudi datur. In terram prostratus ANASTASIUS, dum tam crebris pulsaretur ictibus, quàm imber deorsum guttas emittit; solam illà à percutientibus gratiam efflagitavit, vt religiosum amictum exueret. rogatus, cur ita; *Ne, inquit, is vnà cum meis membris probro afficiatur.* Sur. tom. 1. in Vita.

LVDOVICVS CAROLI II. FRAN. REG. F.

Eiusdem ordinis est quod sequitur. Dum spreto Franciæ regno, & paterna hereditate, LVDOVICVS ad S. Francisci institutum transiisset; gratulabundus ei de confratribus, dixit: Multum hodie splendoris Franciscanæ familiæ per te accessit. Cui ille: *Quinimò, multo amplius mihi per hunc habitum.* Hier. Platus lib.2. De bono statu Relig. cap.37.

REPREHENSIO.

IESVS CHRISTVS.

MAGnum quandoque commodum adferre iustam malorum REPREHENSIONEM; nullum verò, si intemperata fuerit, testis est rerum magistra experientia. Neque parvæ virtutis est, eam cum mode-

moderamine adhibuisse. CHRISTVS veritatis magister, sanata ipso Sabbato muliere, quæ duo de viginti annis graui morbo afflictæ fuerat, indignantem quòd Sabbato curaret Archisynagogum acriter reprehendebat, dicens: *Hypocrite. vnusquisque vestrum non soluit bouem suum aut asinum à præsepio, & ducit adquare? Hanc autem filiam Abrahe, quam alligauit Satanus, ecce decem & octo annis, non oportuit solui à vinculo isto die Sabbati?* additq̃ Euangelista: Et cùm hoc diceret, erubescabant omnes. Hæc enim optima ratio Apophthegmatis, aduersarium confundere. Lucæ cap. 13.

PAMBO ABBAS.

Cùm accepisset auri pondus in bonos piosque vsus dispensandum, & diceret is qui dederat, Numeram quātam summam conficiat? respondit: *Quod dedisti non eget numero, sed bono affectu.* significans quod habet Apostolus, Hilarem datorem à Deo diligere. Socrat. Trip. Hist. lib. 8. cap. 1.

SS. BASILIUS & GREGORIUS.

Isti item librum conscripserant, cui (Pro veritate) titulum indiderant. Hunc ad Iulianum Apostatam mittunt: quem vbi is accuratiùs euoluisset, rescribi ad eos curauit: Legi, & reprehendi. Cui protinus illi, *Etsi legisti, non intellexisti: si enim intellexisses, nequaquam reprehenderes.* Egregia castigatio, Imperatorem falsitatis & inscitiae arguens. Sozom. Trip. Hist. lib. 6. cap. 38.

S. THOMAS ARCHIEP. CANTUAR.

Intellexerat Henrici regis decreto latam in se sententiam, vt perpetuo carceri inclusus detineretur. ac sedens eam placato animo accepit, magnæque grauitate respondit: *Ordo confunditur, si pasto-*

remotis, magistrum discipulus, patrem filius verberet. meritò corripuens, maiorem à minori impiè & contra iustitiam condemnari. Surius tom. 6. in Vita.

Require Apophth. de CASTIGATIONE.

RESPONSVM MATVRVM.

IESVS CHRISTVS.

QValis vir, talis sermo; habet vulgatum Prouer-
bium. vnde non obicurè ex respondentis ore,
mentis qualitas elucescit. Rogantibus Iudæis, post-
quam CHRISTVS e mentes & vendentes templo e-
iecisset. Quod signum ostendis, quia hæc facis? re-
spondebat: *Soluite templum hoc, & in tribus diebus*
excitabo illud. Maturè admodum & prùdenter si-
gnificabat se tertia die à mortuis resuscitandum.
Ioan. cap. 2.

CÆCI EVANGELICI PARENTES.

Haud minimā laudem merètur isti. Filio quippe à
Domino sanitati restituto, rogabant eos Iudæi, Hic-
ne est filius vester, quem vos dicitis quia cæcus na-
tus est? quomodo ergo nunc videt? Illi autem re-
sponderunt: *Scimus quia hic est filius noster, & quia*
cæcus natus est. Quomodo autem nunc videat, nesci-
mus: ipsum interrogate, etatem habet, ipse de se loqua-
tur. Maturè diluebant concitatorum hominum
obiectiones: omni suspicione, quæ de se haberi po-
terat, remota. Ioan. cap. 9.

MVLIER EVANGELICA.

Digna etiam illa quæ extento ætuo viuat. ambu-
lanti Domino iuxta partes Tyri & Sidonis, M V-
LIER GENTILIS ex Syro Phœnicia acclamauit, vt
filiam

filiam quam energumenam habebat, à maligno spiritu liberaret. qui respondens, Non est bonum, aiebat, sumere panem filiorum, id est, alimenta filiis debita; & mittere canibus, id est, Gentilibus, quos Iudæi velut canes reputabant. cui illa: *Etiā Domine: nam & catelli edunt de micis quæ cadunt de mensa dominorum suorum.* Matura & inexpectata mulieris responsio, quæ Dei benignitatem erga quoscunque clarè repræsentat. Matth. cap. 15.

S. AUGUSTINVS

Percontanti, quid Deus ante mundi creationem fecisset; *Respondeo*, inquit, *non quod respondiſſe per iocum fertur quidam eludens quæstionis violentiam; Alta, dicens, scrutantibus Gehennam parabat. Aliud est videre, aliud ridere. Hæc non respondeo. Libētius respōderim, Nescio, quod nescio; quā illud unde irridetur qui alta rogauit, & laudatur qui falsa respondit.* Coll. ex lib. 11. Confess. 12.

S. ANTIPAS.

Nec alium se exhibuit ANTIPAS, quem dum Præfectus durius increparet, quòd antiqua deorum religione neglecta, insanam quādam hominis in cruce acti doctrinam sequeretur, cū non ignoraret vetera recentibus præstantiora. respondit enim: *Si vetustissima quævis obseruāda, cur nō & Cain fratricidij inuentorem imitamini? aut eos qui calum conscendere conati? vel qui cum propriis sororibus se commiscere non sunt veriti?* Quo dicto obiectionem quidem diluit, at animi ferocitatem non minuit.

Sim. Metaphrast. in Vita. Lippelloo tom. 2.

NICOLAUS EPISCOPVS CAPVANVS.

Hunc ob raras dotes Paulus Pontifex ad Franciæ, Angliæ, & Hispaniæ Reges Oratorem miserat.

cum-

cumque reuersum Cardinalis Saluiati percontaretur, quidnam maximâ admiratione dignum vidisset; paucis, & maturè, *Vidi in Galliâ, inquit, pulchrû & florens regnum, ac benè institutum legibus & disciplina: in Angliâ autem, Regem pulchrum corpore, at moribus deformem: sed in Hispania, Regem prudentem & consilio magnum.* Peucerus & Strigelius.

RESPONSVM PRÆCEPS.

FREDERICVS DVX SAXONIÆ.

Nihil ita cauendum, præsertim Principi viro, quàm in RESPONDENDO PRÆCIPITANTIA. quod non ignorans FREDERICVS ELECTOR, dicebat quandoque ad suos: *Ego in rebus magnis, non nisi præuia deliberatione responderim.* Hinc multa etiam prudenter ab eo facta & dicta. Phil. Camer. in post. Pez. par. 4.

IDEM

Quin & iis qui nimium in respondendo præcipientes, dicere solebat illud à Demosthene olim vsurpatum; *Improbum ciuem iudico cum, qui non paratus responderet.* Ibidem.

CAVSIDICVS ANONYMVS.

Quare prudenter ille, dum causam quamdam in iudicio produceret, eaque responsum postularet, *Prius, inquit, deliberatione opus.* Cumque solus is esset, rogarentque iudices, cum quo deliberandum sibi foret; caput manu contingens, *Cum isto,* inquit. Ibidem.

REX ANGLIÆ ANONYMVS.

Neque tu silentio inuoluendus, quicumque es, generose PRINCEPS. immeritò fateor & iniquè tui nomi-

nominis famâ postuma ætas priuatur. Rogabat te pater, quidnam optione data præ omnibus à Deo postulares, & *Collum gruis*, inquis, *quo non nisi benè discussa verba depromam.* Quanto tu meliùs illo, quem hoc ipsum gulæ explendæ gratia ferunt à diis postulasse? Fulgos.

RESTITVTIO.

ZACHÆVS PUBLICANVS.

Magni momenti apud nos esse debet iniustè acceptorū RESTITVTIO: præsertim cū nullo dimittatur peccatum, nisi restituatur quod fuerit ablatum. Cuius rei scrupulo tactus ZACHÆVS Publicanorum Princeps, postquam Dominum Iesum in domum suam gaudens excepisset, memor quantum fortassis per iniqua vectigalia miserum populum oppressisset; stetit, & ait: *Domine, ecce dimidium bonorum meorum do pauperibus, & si quid aliquem defraudauit, reddo quadruplum.* Meruit ergo à Domino vocari filius Abrahamæ; non quidem natura, sed exemplo ac imitatione. Lucæ cap. 19.

CAROLVS V. IMP.

Verū vt iustitiæ Zachæi est testis Sacra pagina; ita CAROLI CÆSARIS Gandauum, quod de tanto ciue gloriatur. Ille enim dum Franciscum Galliæ regem bello lacefferet, sæpè in regiam hanc vocem prorupit: *Etsi totum Franciæ regnum debellassem, redderem illud Regi, modò id quod meum esse contendo, mihi relinqueret.* Præclare August. de verb. Apost. Quod inuenisti, & non reddidisti, rapuisti. Qui alienum negat, si potuit, tollit. Auct. vitæ eiusd. Ger-

German. Item habetur in Serm. Conuiual. Ioan. Pereg. Petrosel.

Vide FVRARI. FVRTVM.

R I S V S.

S. SABINA.

RIDET fatuus nulla dum causa subest, inquebant apud Græcos Comici: at prudens, causa dum subest, ridet. Aderat Pionio presbytero, dum quosdam ad Christianam religionem suscipiendam alliceret, SABINA. quæ cum alios à fide videret alienos, eò quòd se comburendos dicerent, risit. ad quã dum conuersi illi dicerēt; Rides in re seriâ? respondit: *Ita Deo placet, Christiani enim sumus: & qui fide firmâ in Christum sunt, risu ridebunt perpetuo.* Sur. tom. i. in vita Pionij.

ABBAS ANONYMVS.

Vide RATIO REDDENDA.

R O M A.

CONSTANTINVS IMPERATOR, &
HORMISDAS ARCHITECTVS.

ROMAM mundi caput ingredimur: quæ olim vt omnibus dominabatur Gentibus, ita omnium Gentium seruiebat erroribus. Huius splendorem conspicatus aliquãdo CONSTANTINVS, summa cum admiratione dicebat: *Natura omnes vires in vnâ hanc urbem effudit.* dumque HORMISDAM percontaretur, quidnam sentiret; *Id tantum mihi arridet,* respondit, *quòd didicerim etiam hic homines mori.* Parui ducebat externum illum splendorem cum

cum ipso homine senescentem. I. Lips. de Magnit. Imp. Rom. Platina, Fulgosus, & alij.

S. FVLGENTIVS EPISC.

Require Apophth. de GLORIA CÆLESTI.

S A B B A T V M.

I E S V S C H R I S T V S.

Diem SABBATI sanctificandum, districtim in veteri Lege Deus præceperat; quòd cum diem representaret, quo expleta huius mundi fabrica, ipse ab omni opere, cuius species vel semen non præcesserat, cessavit. Ideoque hunc superstitiosè observarunt Iudæi: nam dum in eorum synagogam CHRISTVS introisset, & oblatum sibi hominem aridam manum habentem curasset, calumniabantur quòd Sabbato curasset. quibus ille: *Quis erit ex vobis homo, qui habet ovem unam, & si ceciderit hac Sabbatis in foveam, nonne tenebit & leuabit eam? Quanto magis melior est homo ovis? Itaque licet Sabbatis benefacere.* Quo dicto, superstitionem eorum repressit, qui Sabbato à quouis opere externo, quacumque subsistente causa, existimabant abstinendū. Mat. c. 12.

I D E M.

Cùm discipulis Sabbato per sata transeuntibus, spicasque vt manducarent vellentibus, insultarent Pharisei, quòd facerent ea quæ non liceret in Sabbato; argumento à fortiori eos confundens, dixit: *Non legistis quid fecerit David quando esuriit, & qui cum eo erant: quomodo intrauit in domū Dei, & panes propositionis comedit, quos non licebat ei edere, neque his qui cū illo crāt, nisi solis Sacerdotibus? Maior quippe erat religionis contemptus, panes sanctos à laicis*

cis manducari, quàm vellere spicas in Sabbato.
Matth. cap. 12. Mar. c. 2. Luc. 6.

SALOMON IVDÆVS & ANGLI ANONYMI.

Require PAR PARI RELATVM.

SACRAMENTA ECCLESIAE.

CIVIS FERRARIENSIS ANONYMVS.

CVM concupiscentiae cicatrix, nobis ex vulnere
quod Adami peccatum inflixit relictæ, recru-
descere cœperit, & nescio quem in corde excitare
pruritus; nemo suapte vi tam efferos motus potest
frangere, nisi (vt loquitur Bernardus) supernatura-
lem SACRAMENTORVM ECCLESIAE inuestituram
habeat. hac contactus fuit, CIVIS quidam FERRA-
RIENSIS, quem probè nouisse Guilielmum Balbe-
sanum præclaro eiusdem testimonio constat: Audi-
ui, inquit, (verba eius adiicio) CIVEM FERRARIEN-
SEM de se narrare solitum, adolescentem se, tam ve-
hementem sensisse carnis incitationes, vt nec vm-
quam à tentationibus interquiesceret, & aliquoties
etiam rueret in peccatum: auidum tamen salutis
accessisse virum religiosum, petiisse consilium; il-
lum hoc dedisse tantùm, vxorem duceret. se fecisse:
post annos aliquot vxore mortuâ se pertinuisse, ne
in pristinas recideret miseras. abhorrentem tamen
à seruitute (ita cōiugium vocabat) dedisse se in pre-
ces, confessione purgasse, diuinis epulis confirmasse
animum. His rebus ita sibi vires aduersus furias ap-
petituum creuisse, vt se ipsum admirans, & dolens
superioris ætatis infelicitatem, diceret: *Heu me mi-
serum! Ecce non olim adolescens incidi in hominem,*
qui non diceret, Vxorem duc: sed, Vtere frequenter Sa-
cramen-

cramentis. Visa sunt & videntur indies huius generis miracula, virtutē diuinæ gratiæ in SACRAMENTIS testantia. Lib. 2. in Stim. virtut. cap. 28.

Reliqua huius generis quare in tit. de BAPTISMO, CONFESSIO, EVCHARISTIA, & POENITENTIA.

SACERDOTIVM. SACERDOS.

IESVS CHRISTVS.

TAndem ad ministros Christi, & dispensatores ministeriorum Dei, confugimus: quorum dignitatē in veteris Legis Sacerdotibus adumbratam, noui Testamenti mediator **CHRISTVS** exhibuit: mundato enim leproso, præcipiebat: *Vide nemini dixeris: sed vade, ostende te Sacerdoti, & offer munus, &c.* ita Sacerdotibus debitum honorem proposuit; nempe dum illis se exhibere voluit eos, quos ipse propria virtute sanauerat. Matth. cap. 8.

S. FRANCISCVS.

Auxit etiam Sacerdotibus debitum honorem suo dicto FRANCISCVS. qui de Sacerdotali honore & Sanctorum gloria verba faciens, dixisse fertur: *Si cui Sanctorum in terram è calo lapso, & Sacerdoti occurrerem; huius primum manus exoscularer, ac dein Sancto reuerētiam exhiberem.* plus debere se significans ei, quo ministrante Christum acciperet, quàm illi, qui præsens cum Christo regnaret. Marul. libro 3.

S. IOANNES CHRYSOSTOMVS

Considerabat quàm sancta res esset Sacerdotium: ideoque sanctuarij aditu arcebat eos, qui iuxta legum Ecclesiasticarum præscriptum vitam instituere
! negli-

negligerent, inquit: *Non est æquum sacerdotali honore fulgere eos qui vitam eorum, qui verè sunt Sacerdotes, non imitantur.* Theodor. lib. 5. Histor. Eccles. cap. 28.

GVNTHERVVS EPISC. PABENBERGENSIS.

Iter hic instituerat ad terram sanctam. cumque impeteretur à Barbaro quodam, vt erat seuerè grauitatis, inuasorem pugno à se reiecit in solum, adiiciens: *Sic Barbaros pœnas dare conuenit, si impuras manus in Christi Sacerdotes inferre conentur.* Ita olim Plautus,

*Quis homo est tanta confidentia
Qui Sacerdotem audeat violare? &c.
At malo cum magno suo herclè fecit.*

Herueldens. De gest. Germ.

CONSTANTINVS M.

Et ille ciuili in ordine, quos non honores Sacerdotio deferri voluit, & sanxit? vtpote qui lege cauerit, Sacerdotem præ Rege aut quouis Principe honorari. Dicebat autem: *In illis Christum honoramus, qui eius vicem in terris gerunt.* Præclare Ouid. lib. 1. de Ponto:

*Vaticinor, moneoque, locum date sacra ferenti:
Non mihi, sed magno poscitur ille Deo.*

Gratianus dist. 10.

I D E M.

Nec minori elogio dignum quod sequitur. Audiuerat in Nicena Synodo accusationes, quibus se inuicem Sacerdotes criminabantur: easque ad se delatas, in sinum reposuit, & Vulcano consecrauit, dicens: *Sacerdotum iudicium Deo reseruo: qui velut numina, ad homines regendos, ab ipso hîc in terris sunt constituti.* Egnat. lib. 1. cap. 1. ex Eusebio.

SAL-

SALTATIO.

ALBERTVS IMPERATOR.

SALTATIONVM frequens apud veteres vsus. neque eæ omnes reprehensione dignæ. Sed heu! indomitam præsentis sæculi, velut in omnibus aliis, ita & in choreis intemperantiam ac cōsuetudinem deplorandam, quæ apud omnes iam penè inoleuit. Fuêre tamen ab hac immunes viri principes plerique, è quibus ALBERTVS CÆSAR. Redarguebat is quorundam principum mollitiem, quòd, dum se Hannibale fortiores iactitent, Sardanapalum imitantes, in confessu nobilium matronarum saltitantes inueniantur: dicebat enim; *Laudo venationem, quæ virilis exercitatio est: saltationem verò, quæ muliebris dumtaxat, nec laudo, nec amplector.* Quid aliud ab eo expectandum, si à Dionysio Rege iussus esset in conuiuio purpura indutus saltitare, quàm illud agere recusantis Platonis?

*Muliebri ego haudquaquam indui queam stola,
Vir natus ipse, & ex virili germine.*

Ioan. Peregrin. Petroselan. in Conuiual. quæst.

FREDERICVS IMPERATOR.

Erat vt Imperij, ita & animi eiusdem FREDERICVS. cuius memorabilis illa vox: *Malim febribus in lecto detineri, quàm minimam saltationi operam dare.* Æn. Syluius lib. I. Comm. in res Alphonci. Car. Lang. in Polyanth.

ALPHONSVS REX ARAG.

Quid verò expectatis ab isto? vt saltationi choreisque suffragetur? Haudquaquam. Quippe qui Galliæ populos eo nomine leues vocitabat: *Quia,*
1 2 *quò*

quò magis atate pronecti, eò magis saltationis se insania oblectarent. Panorm. lib. 1. de Reb. eiusdem, & Syluius de Dictis.

I D E M

Cùm mulierem impudentiùs vidisset saltitantem, *Exspectate*, inquit, *mox Sibylla edet oraculum*. sentiens vnum insaniæ genus esse saltationem. Panorm. lib. 2.

I D E M

Obiicienti sibi, Scipionem aliosque Principes animum tripudio relaxasse; tertio dicebat: *Saltatorem ab insano nihil differre existimo: nisi quòd hic dum saltat, ille dum vivit, insanus est.* Panor. lib. 1.

I D E M.

Posse autem etiam à piis & bonis choreas suo loco & tempore aptè decenterque duci, ac tolerari, suomet exemplo testatus est. nam in aduentu Frederici III. cum Leonorâ Augustâ palàm saltitare visus. quam ob rem dum argueretur, respondit: *Eum ego insanum arbitror & stultum, qui luxuria causa saltuaret: sed si ob honorem fiat, reprehensionis partem effugere; cùm magnis viris insanire aliquando, non indecorum.* Ita Aristippus purpurâ indutus, iubente Dionysio, saltaturus, inquebat:

——— *In Liberi patris sacris,*

Mens quæ pudica est, nesciet corrumpier.

Ibid. lib. 2. de Gest. eiusd.

S A L V S.

I E S V S C H R I S T V S.

NON de illa quæ corpori seruit, & vnâ cum eo interit, nobis hîc sermo: sed de ea quæ animam

mam immarcessibili coronâ & sempiternâ gloriâ donat. De quâ vt populo se sequenti prouisum esset, Salutis auctor IESVS se in hunc orbem venisse palàm edocuit, dū murmurantibus Phariseis, quòd ad Zachæum hominem peccatorem diuertisset, diceret: *Venit Filius hominis quærere & saluum facere quod perierat.* Lucæ cap. 19.

PANVSIVS ABBAS.

Eadem etiam cura PANVSIO ABBATI fuit. tentatus enim à Thaide meretricula, cū se assentiri eius petitioni simularet, si loco ita secreto conuenirent, vt à nemine conspicerentur; & illa, plura esse diceret, in quibus à nemine, præterquam Deo, conspici possent; captata occasione, rogat, an Deum esse & omnia intueri crederet. Annuenti verò illi, subiunxit: *Cū hoc non ignores, numquid infelicissima es, quæ propter breuissimi temporis voluptatem, & te, & omnes quibus tui copiam facis, perdas?* Audit, & corde compuncta, pudicitiam deinceps mira pietate coluit. Benè Seneca olim dicebat: Sic viue cum hominibus, quasi Deus te videat. Surtius tom. 2. in Vita lib. 1. cap. 13.

CAROLVS V. IMP.

Amantio rem proximi orbis non vidit. Ægriùs ferebant procures, quòd non vti Iulius, aliique Cæsares, partam victoriam prosequeretur. quibus ille: *Ethnicis solus finis, honor, & clara nominis fama: at nobis Christianis alius est scopus præfigendus; neque in tantum laus hominum cordi esse debet, quantū eorundem salus.* Iust. Goblerus in Chronico.

CHRISTOPHORVS ARCIS DIENSIS PRÆF.

Ille quidem proximi, subiiciam nunc eos, qui propriæ salutis curam nō exiguan gessere. Erat CHRI-

STOPHORVS Lusitania oriundus, arcis Diensis Præfectus: qui dum pro muri corona staret armatus, contorta ab hostibus è transuerso pila, partem ventris vna cū intestinis abripuit. Semianimis domum delatus, ilicò optimam parentem hac voce compellat: *Peto à te, ô mater, mihi prius ad crimina expianda Sacerdotē præbeas, quàm lachrymas ad obitum meum prosequendum. Vererer sanè, ne tua lachryma meam ad supremum iter necessariam exigui temporis præparationem impedirent.* Mass. hist. Indicæ lib. 11.

IOANNES SHERTVS ANGLVS.

Vide ANIMÆ IMMORTALITAS.

*Quare etiam Apophth. de CONSTANTIA
RELIGIOSA. ADMONITIONE. PERSEVERANTIA. MARTYRIO, &c.*

SALVTIS NEGLECTVS.

REX LAGINENSIVM ANONYMVS.

NEc defuere homines nefarij, qui salutē suam pro nihilo habuerunt; pluris facientes temporalia hæc & caduca, quàm cælestia & æterna. Venerat ad LAGINENSIVM REGEM Brigitta virgo, postulans quid ab eo. quod cū impetrasset, *Quidnam nunc mihi relatura es? ille rogat. Hæc, Vitam æternam, ait, si vis, & pro posteris tuis preces ad Deum.* Quid autem his præclarius aut sanctius dari poterat? at veluti carnalis homo non sapit ea quæ sursum sunt; ita ille, *Alia, respondebat, abs te malim: vitam quæ sub aspectum non cadit, non possum amare: nec mihi filij post me venturi, cura.* Ita oblatam sibi salutem respuens, maluit se iungere diligentibus
vani-

vanitatem ; quàm obsequi Sanctis, facientibus veritatem. Sur. tom. 1. in vita S. Brigittæ.

RICOCLVS FRISONVM DVX.

Suscipiendam ille, hic verò susceptam pænè salutis viam neglexit: & quam benè ingressus semel, postmodum ab eâ in pristinam deflexit. Conuersus namque Volfrani Senonensis Episcopi monitis ad fidem, dum iam alterum pedem in fonte Baptismatis posuisset; petiit, vbinam suorum potiore partem esse putarent, in Paradiso, an in inferno? Respondente Volfranio, In inferno: quia nullus eorum Christum agnouisset. pede retracto, *Eò, inquit, proficisci volo, ubi maior meorum pars: eam enim sequi tutius est, quàm minorem.* Non gustabat hic eam dulcedinem, quam consequuntur ij, qui in Domino mortui inebriantur ab vbertate domus Dei, & æternæ voluptatis torrente recreantur. Bapt. Fulgos. lib. 9.

SALVS CORPORIS.

Quare SANITAS.

SANCTORVM MEMORIA ET INVOCATIO.

CLODOVEVS FRANC. REX.

Quemadmodum ex igne naturaliter promicat splendor; ita SANCTORVM COMMEMORATIONE & INVOCATIONE, ad omnes prouenit utilitas. qui proinde non natura sua adorandi, sed quòd illum (vt loquitur Damascenus) qui natura adorandus est, in seipsis habeant. Franc. Rex Christianissimus CLODOVEVS, vt erat infensus omnibus qui à Christi fide descuiissent, equum quo vehebatur

D. Martino, si victor votique compos euaderet, vouit. Ita accidit. & ecce equum offert, ac pro eo pretium centum aureorum, quos in tutelaribus Diui honorem impenderet. Res mira! stat equus, nec loco cedit. quo viso, ducentos numerari iubet: tum quasi solutus, Regem expectantem sequitur. qui ad circumstantes conuersus, *Bonus, ait, Martinus egregius adiutor est, sed stipendio carus.* Pulchrè Chrysost. Velut si quis margaritam in luto conculcet, eius ampliùs demonstrat pulchritudinem: sic virtus Sanctorum, quocumque eam proieceris, declarat suam virtutē, in seruitute, in carcere, in prosperitate. Cranz. lib. 3. Sueciæ cap. 16.

SANCTVLVS ABBAS.

Præclarum etiam SANCTVLI Nursiæ prouinciæ Abbatis exemplum fuit. qui, vt Diaconum suum à Longobardis latronibus captū redimeret; seipsum pro eo trucidandum deposuit. At ne tanta charitas suā mercede careret, iam iam feriendus, dum inclamaret; *Sancte Ioannes contine manum ferientis.* ipsa manus immota permansit: nec modò vitam suam miraculo seruata accepit, sed & Barbaris obstupescantibus, omnes quotquot habebant captiuos, secum abduxit. Sur. tom. 3. in Vita.

LVDOVICVS XII. FRANC. REX.

Require BENEFICENTIA.

VIRGO ANONYMA.

Quo tempore Carolus VIII. Gall. Rex Italiam bello deuastabat, factum, vt opidulum quoddam militi in prædam daret. & ecce puella ad pedes eius prouoluta, tutelam à vi militum, & pudicitiae suæ custodiam postulat. Annuit ille: sed vt erat iuuenis adhuc, oculos & cupidinem ad eam adiicit, & quidem

dem in lectum seduxit iam imminuendam. Animo anxia, videt suspensam in pariete D. Virginis effigiem; eaque ostensa, *Per intactam*, clamat, *hanc Virginem oro, adiuro, virgini mihi parce*. Mouit hæc vox Regem, & libidinem exfiliètem coërcuit: eamque amplexatus, cum quingentorum aureorum dote dimisit. I. Lips. Mon. Polit. lib. 2. cap. 17.

Require S. MARIA MATER DEI.

SANCTORVM RELIQUIÆ.

FRANCISCVS BORGIA SOC. IESV.

SI paterna vestis & annulus, aut quid huiusmodi, tanto est charius posteris, quanto erga parentes maior exstitit affectus: nullo modo spernenda erunt corpora, quæ multo coniunctiùs quàm indumenta gestamus; eorum præsertim, qui velut promptuarium (iuxta Damascenum) & habitacula facti sunt & templum Dei. Meritò ergo eorundem reliquias honore profecuta semper est Ecclesia, & in eâ FRANCISCVS BORGIA: ille enim, quoties Sanctorum aut reliquias aut imagines conspicaretur, eas manibus contrectans; *Saluete*, aiebat, *pignora nobis in hoc exilio degentibus à Deo deposita: saluete salutis nostræ spes atque solatium*. Lib. 4. Vitæ eius, cap. 4.

SANITAS.

B. IGNATIVS LOYOLA.

MAgnum secum commodum adferre SANITATEM, languor morbusque ostendunt. hinc de IGNATIO LOYOLA SOCIET. IESV primo institutore, viro eruditione vitæque integritate incomparabili,

rabili, narratur, tanti aestimasse suorum corporalem salutem, ut omni eam thesauro prætulerit. dicebat enim; *Ægrotus vix quicquam boni in aliorum utilitatem facere potest: multa verò præstat, qui corpore valens est.* Tetigit hanc rem Horatius in Satyris, quando ait:

*Si ventri benè, si lateri est, pedibusque tuis: nil
Diuitia poterunt regales addere maius.*

Ribadin. lib. 5. cap. 8.

ALBERTVS IMP. AVSTRIVS.

Idem animo voluebat AVSTRIVS ALBERTVS. quem interrogatum, quænam esset iucundissima possessio, respondisse ferunt: *Sanitatis. cuius thesaurus,* aiebat, *tam pretiosus est, ut quidvis potius perpeti debeat homo, quàm eum sibi eripi sinat.* Cuius exemplum in Castore animali habemus; qui

*Et pedibus segnis, tumidâ & propendulus aluo,
Hac tamen insidias effugit arte ferox.*

*Mordicus ipse sibi medicata virilia vellit,
Atque abicit, sese gnarus ob illa peti.*

*Huius ab exemplo disces non parcere rebus;
Et vitam ut redimas, hostibus ara dare.*

Andr. Alciatus in Embl.

SAPIENTIA.

ALPHONSVS ARAG. REX.

TEmpus est SAPIENTIÆ penetralia subire, in quibus decorum atq; hominum stabilitur conservaturque societas. Eius autem præcipuum exemplum fuit ALPHONSVS: qui, dum esset potētissimus, percontanti, quomodo tot partis regnis opibusque ad paupertatem redigi posset; respondebat: *Si venderetur*

deretur Sapiētia. At verè, nescit homo pretium eius, inquiebat Iob, nec inuenitur in terrâ suauiter uiuentium. Panor. in Proœm. lib. 3. de Gest. eiusd.

I D E M

Sciscitanti, quo nomine Sapiētiā decorandam sentiret; aiebat: *Eam ego existimo Dei filiam, ac solam rerum omnium esse immortalem, soli que homini inter animantia datam.* Hinc etiam olim præclare in Finibus Cicero, eam hominis custodem & procreatricem nuncupauit. Ibidem.

PETRVS ALDOBRANDINVS CARD.

Non immeritò ergo Illustriss. CARD. ALDOBRANDINVS, eos diuites dicebat, *non qui bona possident, sed qui boni sunt.* solam Sapiētiā veras diuitias reputans. Henr. Farnes. suprâ.

I D E M

Sapientes vocabat Prometheos, id est, hominum architectos: Ignis, inquiebat, Promethei doctrina est: qua remota, ex homine truncus; & addita, è trunco redditur homo. Sapienter & doctè Lucret. 2.

— *Nil dulcius est, benè quàm munita tenere*

Edita doctrina sapientum templa serena:

Despicere unde queas alios, passimque videre

Errare, atque viam palanteis querere vita.

Ibidem.

SATELLITIVM PRINCIPVM, &c.

SIGISMVNDVS IMPERATOR.

POsse quemuis Principem sine satellitio regnare, dicebat Agasicles, qui ita suis imperaret, vt filiis pater. non incautè tamen SIGISMVNDVS, dicenti sibi Alberto Austrio, Principes ciuium amore
cautos

cautos esse oportere ; respondit: *Et fida custodia infortunium excludit.* Meminerat huius olim etiam Seneca, dum ita Reges alloquitur :

*Tu quicumque es qui sceptrum tenes,
Licet omne tua vulgus in aula
Centum pariter limina pulset;
Cum tot populis stipatus eas,
In tot populis vix una fides.*

Æn. Syl. Comm. de Gest. Alphonſi.

ALPHONSVS ARAGONVM REX.

Nec ALPHONSVS hîc ſupprimendus. Caſtigatus à ſuis, quòd maiestatis Regiæ oblitus, ſine ſatrapis ſatellitibusque prodiret in publicum ; *Non opus eſt, inquiebat, ſibi timeat, qui neminem habet quem ita laſerit, ut aliorum manu ſit defendendus.* Panorm. lib. 2. de Geſt. eiufd.

I D E M.

Eundem dicere ſolitum accepimus, cùm ſolus quandoque obambulare: *Non eſt timendum ei, qui civium ſuorum benivolentiam perſpectam habet.* Ibidem.

GODOFREDVS BVILIONIVS.

Vno adhuc domeſtico exemplo adiecto, hunc curſum ſiſtam. Erat GODOFREDVS BVILIONIVS, ille qui religionis ergo terræ ſanctæ penetralia propugnauit, creatus tandem totius Palæſtinæ Rex. ad quem dum palearum ſacco inſidentē veniſſent Barbarorū legati, oſtupuere, quòd nullo ſatellitio, nulloque apparatu tantus Princeps ſederet. quibus ille: *Terra ſatis ſuperq; mortali corpori ſedem præſtat; cui vitâ ſuncto, tam longum eſt præbitura domicilium.* Guiliel. Tyrius lib. 9. Hiſt. 5. cap. 19.

Vide AMARI A SVBDITIS.

SENE-

SENECTVS. SENEX.

FREDERICVS IMP.

Nihil est præclarius, quàm honoribus & Reipub. muneribus perfunctum senem posse suo iure dicere quod est apud Ennium, Omnes ciues consilium suum expetere. neque enim corporis, sed animi vires in sene spectandæ. docuit id FREDERICVS CÆSAR: qui dum in vrbe quadam Præfectum senem admodum & ætate imbecillem dedisset; non defuere adolescentiores, qui eum præfecturâ dicerent amouendum. quibus IMPERATOR: *Senem amicum opido, non amico opidum commendauimus.* sentiens decere omnino vt senex ille iam à ciuibus foueretur, quos ipse diu suo consilio præsidioque fouerat. Æn. Syl. lib. 4. de Gest. Alphonsi.

S. GREGORIUS NAZIANSENVS.

Veluti autem ignis ardor aquæ frigore temperandus est; sic in Repub. conseruanda, iuuenum subitis cupiditatibus senum prudentia moderetur, oportet. Hinc laudabilis illa vox NAZIANSENI, qui hoc Principum agmen perrumpit: *Laudo legē nauticam; qua nemo ad nauis gubernacula admittitur, nisi prius diu sederit ad remos.* Idem fieri debet in Repub. nam

A senibus prisci sanctum dixere Senatum.

Strigel. in Chron.

LVDOVICVS XI. GALL. REX.

Hic regno pænè exutus, quòd seniorum consilio acquiescere nollet. Quare vocato ad se filio; moriens, *Vide, inquit, seniores consiliarios in consilium adhibeas, eorum sententiam sequaris, verbis insistas.*

Et

Est enim robur iuuenum, senum consilium.
Ioan. Spinæus de Tranquill. animi, pag. 387.

CAROLVS V. IMP.

Esse autem varia senectutis incommoda, insinua-
uit IMPERATOR CAROLVS V. cùm enim Philippo
filio summam harum regionum gubernationem
committeret, totus in fletum abiit; inquiens: *Ne
miremini: illa sunt senectæ propria, facile lachrymari.*
Idem Frederico Cæsari adscribunt alij. Georg.
Richter in Axiom. Oecon.

S E R V I T V S.

S. TIBVRTIVS.

BONUM, etiam si seruit, liberum dicebat Augu-
stinus. neque enim ea seruitus æstimanda, quæ
bonis ac timoratis cum ratione impenditur. Quare
ab Almachio Præfecto castigatus TIBVRTIVS, quòd
Principum sententiis damnatos, honore sepulturæ
afficeret; rogatusque cur contra legem datam illud
præsumeret; respondit: *Quia quos ipsi Principes pro
Christo damnandos iudicant, eorum nos serui esse vo-
lumus.* Metaphrast. in Vita.

LYDOVICVS XII. GALL. REX.

Debere autem seruos omni honore prosequi do-
minos suos, auctor est LYDOVICVS XII. cùm nam-
que Talerandus, è domesticis quidam, multa præter
opinionem effutiret; eius in dicendo libertatem o-
cyùs compescuit, dicens illud veterum: *Plus oportet
seruum scire, quàm loqui.* Attexam hîc, quid de fa-
mulorum moribus & vita senserit Ioannes Campa-
nus. Ita enim canit:

*Scis mihi quâ Polydore potes ratione placere?
Si, quæ præscribam precipiamque, facis.*

Lex

Lex igitur sit prima; Fidem seruato: deinde

A domini mundas rebus habeto manus.

Odi mendacem, non possum ferre proteruum:

Nec tu lusorem crede placere mihi.

Odi qui multum sese mihi iactat, & odi

Alterius famam qui lacerando premit.

Displicet indocilis, nimium mihi displicet ille

Qui multo semper murmure iussa facit.

Assentatorem non planè diligo, nec qui

Desidia fuerit deditus, atque gula.

Quis toleret famulum domini secreta volentem

Scire? quis elatum, multiloquumq; ferat?

Fallacem fugio, ceu tartara: denique cultum

Ingenuis hominem moribus esse volo.

P. Æmilius in Vita.

SIMONIA.

S. PETRVS.

Quid cesso SIMONIÆ perniciem commemora-
re, quæ iam à Simone Mago, qui huic malo
nomen dedit, in Ecclesiam irrepsit, ac radices egit?
Ille etenim cùm vidisset per impositionem manus
Apostolorum dari Spiritum sanctum, obtulit eis
pecuniam, vt, cuicumque manus imposteret, simili
euentu acciperet Spiritum sanctum. At benè eum
perstringens PETRVS, Pecunia, ait, tua tecum sit in
perditionem: quoniam donum Dei existimasti pecuniâ
possideri. quo Apostoli dicto notantur, qui rem sa-
cram pretio emunt, aut diuendunt: quos ab hoc Si-
mone, Simoniacos dicimus. Act. cap. 8.

S. TRANQVILLINVS MARTYR.

Meliùs itaque & securiùs TRANQVILLINVS:
quem

quem cum dudum de fide Christiana differentem audiuiſſet Agreſtius, tandem auri certum pondus offert, quò ſe à podagræ cruciatibus oratione liberet. Cui ille: *Scito grauem Dei furorem illis impendere, qui eius gratiam pretio vendi aut emi poſſe exiſtimant.* Sur. tom. i. in Vita S. Sebaſtiani.

GVNTRANVS REX.

Ille etiam Remigio Biturigum Præſuli vita functo Sulpitium ſuccedere iuſſit, non obſtante quòd plures eum locum ſtatumque ambirent, ac pretium offerrent. dicebat enim his: *Non eſt noſtra conſuetudo manſuetudinis, Eccleſias Chriſti pretio vendere: ne nos damnationis obnoxij, & vos Simoni Mago aſſimilemini.* Aimon. lib. 3. cap. 55. de Geſt. Franc.

Require Apophth. de MERCEDIS NEGLECTV.

SIMVLATIO ET DISSIMVLATIO.

PETRVS ALDOBRANDINVS CARD.

Vulgari adagio innotuit, *Qui nescit ſimulare, nescit regnare.* hinc Principum conſilia ſimulatione regenda, docuit PETRVS CARDINALIS. Sciſcitanti enim cuidam, quis maximè eſſet ad benè imperandum idoneus; ait: *Qui naturam habet Polyphi, nouitque in populo morum colores induere.* Nihil ſanè prudentius dici potuit. Henr. Farnes. apophtheg. De Principe.

FREDERICVS IMP.

Vide CONSILIVM, & CONſILIARIVS.

SIGISMVNDVS CÆSAR.

Haud inferior in hoc ſenſu iſte. quem frequenter dixiſſe ferunt: *Ineptus & inidoneus ad regnum eſt ſimulare neſcius.* Notabat autem, Principis eſſe, interdum

terdum simulare ea quæ minoris momenti, com-
modi maioris gratia. Æn. Syluius lib. 1. Comin.
in Gesta Alphonſi.

Vide GVBERNARE. REGNUM.

SOLITVDO.

SYSOIS ABBAS.

MInus voluptatibus stimulator, qui non est,
vbi frequentia voluptatum obiecta potentias
ad agendum commouent. Hinc tanti SOLITVDINIS
cultores prisci illi Anachoretæ. Inter quos non infi-
mus SYSOIS ABBAS. Hic enim dum iam senio con-
fectus, à discipulo suo Abrahamo moneretur, ad
mundum se transferret; *Placet, ait, verum ad eam-*
partem, è qua proscriptæ mulieres. cui Abraham: Vbi-
nam gentium id futurum, præterquam in solitudi-
ne? ABBAS quasi ad hæc verba anhelans; *Ergo me*
rursus in solitudinẽ tollite. Sapienter & verè in Hyp-
pol. Seneca:

*Non alia magis est libera & vitio carens,
Ritusque melius vita quæ priscos colat,
Quàm quæ relictis mœnibus syluas amat.*

Ex Vitis SS. Anachoret. Ægypt. lib. 1.

MOYSES ABBAS.

Percontanti fratri, quomodo ad rerum omnium
scientiam pertingere valeret; *Vade, inquiebat, ad*
cellulam, & ipsa te docebit vniuersa. Ibid.

ARSENIUS ABBAS.

Vide CONSORTIVM.

ANTONIUS ABBAS.

Addamus vnicum solitudinis ornamentum AN-
TONIVM. Pulsauerat iam eius nominis fama aures

Constantini Cæsaris, qui videndi eius desiderio tactus, mittit qui ad palatium ducant. Ille Maiorum limina despiciens, suæ cellulae amans; *Solitudo*, ait, *monachis ornamento, velut piscibus aqua alimento: & velut hi in continentem recepti vitam; ita illi in vrbes egressi, monasticam amittunt disciplinam & gravitatem.* Solitudinē quærit, ait Seneca Philosophus, qui vult cum innocentibus vivere. Fuge multitudinem, fuge paucitatem, fuge & vnum. Vnus pro populo mihi est, & populus pro vno. mihi satis est vnus, satis est nullus. P. Opmerus in Martyrol. Holl.

S O M N V S.

S. ARSENIUS ABBAS.

SOMNVVM mortis fratrem & imaginem dicebant veteres; eumque aspernati primi illi Anachoretæ, eò quòd bonam vitæ partem abriperet, & ad bona opera inhabiles redderet. Quare rogatus ARSENIUS, cur tam parcus esset somni; respondiisse fertur: *Satis monacho videri debet, si ei una ad quietem hora contingat.* Existimabat pius religiosus, se tempus perdidisse, quod somno transigebat. Prudenter Aristoteles, vt ex Græco vertit quidam:

Hic propè dimidium vita dormitur, & ipsum

Per somnum similes diues inopsq; iacent.

Cræse igitur Regum ditissime, num tibi fermè

Dimidio vitæ par fuit Irus egens?

Sabell. lib. 2.

S. DOMINICVS.

At veniant qui carnis somniq; delectantur illecebris, & DOMINICVM contemplantur. Hic enim vt peruigilandi sumeret consuetudinem, vix vquam

quam somno se dabat. *Nam, inquit, somnus somnum adest, & vigilia parit vigiliis.* Guil. Baldan. lib. 2. cap. 26. Sum. virt. adolescentiæ.

SOMNIORVM INTERPRETATIO.

ALPHONSVS ARAG. REX.

Quasi qui apprehendit umbram, & persequitur ventum, sic qui attendit ad visa mendacia, inquit Eccles. Itaque dum quidam iocandi vel tentandi gratia, per somnium se vidisse diceret, regem ALPHONSVM donasse sibi sacculum auro refertum; respondebat ALPHONSVS: *An ignoras nullam apud Christianos fidem dari somniis?* Illa enim, ut est apud Tibullum,

—— fallaci ludunt temeraria nocte,
Et pavidas mentes falsa timere iubent.

ANONYMVS CONIECTOR.

Quandoque tamen, somnia esse futuri euentus prænuntia, subiecto exemplo confirmatur. Quo die Heraclij Imp. filius Constans, classe cum Abulana-
ro Duce congrediretur, per somnium se Thessalonicæ esse existimabat. cumque illud insomnium CONIECTORI proposuisset; *Vtinam*, dixit ille, *Imperator hac nocte neque dormiisses, neque tibi insomnium fuisset oblatum.* Quod enim tibi Thessalonica versari visus; indicat, *Alteri cede victoriam.* Verum coniectasse, probavit euentus. Somnium ergo, ita in Hercule furente Seneca,

Veris miscet falsa, futuri

Certus, & idem pessimus actor.

Cedrenus in Constant.

S V P E R B I A.

S. ARSENIUS.

VT SUPERBIA, — *vitium rebus solēne secundis,
Virtutumque ingrata comes,* —
etiam in conspectu ponatur; præclara ARSENI
sententia in medium adducenda. Nihil enim ei fre-
quentiùs in labris, quandocūque de superbis men-
tio fieret; quàm, *Superbi omnem sibi ad celum viam,
præcludūt, hanc secūs quàm qui transversum lignum,
equis insidentes, templo inferre conantur.* Non minùs
eleganter Hugo lib. 1. de Anima: Superbia in cælo
nata est, sed velut immemor quâ viâ inde cecidit,
illuc postea redire non potuit. ita

Sequitur superbos ultor à tergo Deus.

Th. Stapl. Dom. 4. Aduen. in Promp. Morali.

EVAGRIVS.

Quid autem EVAGRIVS? Percontanti, quid sibi
videretur superbus animus, sui pectoris arcanum
referans; *Virtutis, inquit, ventilator, cisterna aquis
destituta, diversorium lutronum.* Hæc enim,

Sollicitum pectus curis flammantibus urget,

Immansueta, ferox, & amica nescia pacis,

Nescia quid pietas, quid sit clementia, in omne

Sponte scelus præcepit, implacabile monstrum.

Anton. serm. de Superbia.

FO. CLIMAX.

Nec virtuti tantum, sed & bonis moribus aduer-
sari hanc Christianæ vitæ novercam, asseruit iste: à
quo profectum meminit præfatus Anton. serm. eo-
dem de Superbia: *Vt fures solem detestantur, ita*
mode-

modestos superbi. Sic Claudian. in eandem panē sententiam:

Inquinat egregios adiuncta superbia mores.

I D E M.

At difficile esse eius laqueos effugere, qui semel in iis incautum pedem fixit, docuit idem ipse, cū diceret; *Ægrè superbia dæmonem à te repellis. quidquid enim molitus fueris ut hanc detrahas, id ipsum alterius superbiæ futurum est initium.* Ibid.

CONSTANTIVS IMPERATOR.

Verū ne spiritualibus tantū bonis aduersari Superbiam existimemus; videamus CONSTANTIVM CÆSAREM. Rogabatur, *quo tempore maximè decresceret fortuna.* & respondit, *Crescente superbia.* Ita non spiritualibus tantū, sed & temporalibus bonis insidiatur. Ex lib. Rer. memor.

ISDIGERDAS PERSARVM REX

Prælio contra Romanos ceciderat: quo intellecto, accurrit ocius, tāquam quid sibi accidisset ignarus, ac pacis conditiones proponit. At ut erat animo elato, & cedere nescio, ita Rom. Legatum compellabat: *Non bello cedens, pacem amplector, sed eam tibi lubens præsto, quod te omnium sapientissimum cognoscam, quos Rom. Imperium alit.* Ita superbus Rex, ne quidem tantā clade attritus, ad humilitatem redigi potuit. Trip. Hist. Socrat. lib. 10. cap. 13.

LVDOVICVS XI. GAL. REX.

Benè itaque & præclarè sensisse LVDOVICVM fateamur, cuius illud prouerbum: *Dedecus & detrimentum, comites sunt ac pedisseque superbiæ.* Phil. Comminęus in Comm. Gest. Ludouici.

SVPERSTITIO.

ALPHONSVS ARAG. REX.

SVPERSTITIONEM, quæ Pietati & Religioni aduersatur, mirū in modū fugiebat & execrabatur ALPHONSVS REX; quem triumphantem cū monerent quidam vultum minio triumphantium more illineret, dixisse fertur: *Minium soli Baccho conuenit, qui non solum triumphi, sed & vini repertor existit.* & ita veterem illam superstitionem aboleuit. Panorm. de Gest. eiusd.

ANONYMVS.

Filium habebat quidam, quem tenerè fouebat. hic in morbum incidit plus æquo sæuientem. dolet pater, & de filij salute anxius hæret, quid medelæ tandem adhibendum sit. Accedit contubernaliū quispiam, & Cur nō, ait, vbi humana desunt præsidia, ad diuina precibus recurris? Ad quod ille, Nequeo me tantum iūstrahere conspectui filij, vt ad templum, Deum deprecaturus, accedam. Cui alter; *Ne tu, inquit, homo vanus es. Adeone surdastrum reputasti Deum, vt non nisi in templo auditurus sit tuas preces? Funde apud te, funde in abscondito, & qui in abscondito etiam est Deus, te exaudiet.* Merito taxabat eam quorūdam opinionem, existimantium in solo templo Deum efficaciter exorari; cū Dei filius apud Matthæum dixerit: Dum oraueris, intra in cubiculum tuum, & clauso ostio ora Patrem, &c. quamuis eiusdem testimonio, templum propriè sit domus orationis, & ad eum finem erectum.

TACI-

TACITURNITAS.

PASTOR ABBAS.

NUnquam tacuisse nocet, ac locutum esse. hinc Hieronymus: Diu considera quid loquendū, & adhuc tacens, prouide ne quid pœniteat dixisse. Venerat ad PASTOREM ABBATEM quidam de rebus spiritualibus consulturus: & primo aduentu se veritum dicebat, ne ob solenne ieiunium, sibi negaretur aditus. Ille verò, *Nos, inquit, non didicimus ianuam ligneam claudere, sed magis lingue ianuam clausam habere.* In vitis PP. cap. de Hospitalit.

PAMBO ABBAS.

Sed quis Pastorem mirabitur, qui in PAMBO-NEM oculos coniciet? Ille namque iam morti proximus, quali exultans dixisse fertur: *Latus vitâ hac exeo, quod nullum in eâ verbum mihi excidisse sciam, cuius me vel pœniteat.* O felix & beatus, quisquis eo tempore tam præclarum de se testimonium ferre potest. Granat. Conc. 3. de Annunt. Dñica.

S. BASILIUS.

Huius frequentissima illa vox: *Dicenda tacenda-que nouisse nos oportet: non enim diuina omnia, lingue verbis explicanda sunt.* & rationem subiiciens, *Ne,* aiebat, *mens, sicut oculus totum solem intueri volens, id etiam quod habet luminis, perdat.* Anton. & Max. Serm. de Taciturnitate.

AGATHON ABBAS.

Illum etiam lapillo assiduè ori indito, tacere didicisse ferunt. idque tanto rigore ab eo obseruatum, vt, cùm fari veller, non posset. Rogatus autem cur tantum sileret; *Quia, inquit, qui custodit os suum,*

custodit animam suam: & ita verè existimabat primam virtutem esse, compescere linguam: quodque loqui ignorabit, qui tacere nesciet. Raulf. de Temper. Volâter. lib. 21. Antrop.

RELIGIOSVS ANONYMVS.

Æquè fidelis sui oris custos iste. à quo cùm Adolefcens quispiam sæcularis cilicium peteret, tale responsum accepit: *Verè fili mi, optimum cilicium est bonam habere curã, quid per hoc ostium egrediatur.* Hinc non ineptè And. Alciatus in Emblem.

*Cùm tacet, haud quidquã differt sapientibus amēs,
Stultitiæ est index linguaq; voxque sue.*

*Ergo premat labia, digitoque silentia signet,
Et sese Phariam vertat in Harpocratem.*

Guil. Baldesan. in stim. Virtutum.

TALIONIS POENA.

CAROLVS IV. CASAR.

TALIONIS POENAM in veteri lege vsitatam, seuerus scelerum vindex CAROLVS, suã etiam ætate imperioque vsurpauit. Pro tribunali namque sedēti cùm offerretur nobilis (cui Zachora nomen) qui presbyterum utroque oculo priuauerat, & admissum scelus excusaret, & pecuniarum largitione illud palliare præsumeret; Talionis poenam exegit, *Non potest, inquit, hoc modo dari satisfactio: ceco enim oculi restitui nequeunt: quare te etiam oculis priuari oportet, ut ius sit æquabile.* Ioan. Dubran. Episc. Olmucen. hist. Bohemic. lib. 22.

*Require IUDICIUM, & PAR PARI
RELATVM.*

TEM-

TEMPERANTIA.

PETRVS ALDOBRANDINVS CARD.

TEMPERANTIA, quæ in rebus aut expetendis, aut fugiendis, ut rationem sequamur, monet; cum in omnibus præclara sit virtus, maximè tamen in Principibus eam efferebat PETRVS ALDOBRANDINVS. Rogatus namque, quid maximi faceret in Principe; *Eam ait, virtutem, qua Cicero Deiotarum regem extollit.* Erat autem in illo insolita quædam & non contemnenda frugalitas. Hen. Farnes. lib. de Apophth. Princ'p.

I D E M

Solitus est dicere; *Gloriosius est Imperatori hostem temperantia, quàm armis superare: nec minùs honestũ est temperare aduersus voluptatem, quàm fortiter contra pericula decertare.* Quàm appositè Lucan. lib. 4.

*Discite quàm paruo liceat producere vitam,
Et quantum natura petat. non erigit agros
Nobilis ignoto diffusus Consule Bacchus;
Non auro myrrhaque bibunt; sed gurgite puro
Vita redit: satis est populis fluminisque Ceresque.*

Ibidem.

Vide ABSTINENTIA. LIBIDO.

CASTITAS, &c.

TEMPLVM.

I E S V S C H R I S T V S.

DEI SANCTVARIVM summa semper veneratione coluisse Maiores nostros, etiam illos qui vera fide caruere, meminerunt tam sacri quàm prophani

phani scriptores. Et quidem COÆTERNVS DEI FILIVS, Ierololymorum templum ingressus, dum id à Iudeis pollui, & irreuerenter in forum columbarium & nummulariorum mensas conuerti animaduertisset, egregiè eos perstringens, mensasque euerrens; *Scriptum est*, inquit, *Domus mea domus orationis vocabitur, vos autem fecistis eam speluncam latronum.* factoque è funiculis flagello, vniuersos eiecit. Matth. cap. 21. Mar. 11. Luc. 19.

D. IOAN. CHRYSOSTOMVS.

Et hoc de illo habetur certissimum. Postulabat ab eo Imperator, Ganiæ duci Adriano vnum è Catholicorum templis concederet. At beatus vir, *Ne* inquit, *Imperator hoc ei polliceâre, neque sanctum dari canibus mandes.* Nūquam enim patiar, eos, qui Deum nocturnis diurnisque hymnis laudant, templo expelli; illudque eis tribui, qui contra eum loquuntur blasphemias. In Vita eiusd:

IDEM

Passo repulsam Ganiæ duci, dicenti que sibi templum dari oportere; respondit: *Templum sacrum, apertum est, & cuius patens: nulli aditum prohibeo, quò minus in eo, si libet, Deo preces fundat.* Theod. lib. 5. hist. Eccles. cap. 32.

HILBORGIS NOBILIS FÆMINA.

Sed deuotus in Templorum erectione ornatuq; fæmineus sexus, suo encomio carere, sine iniuriæ & ingratitude notâ; non potest. Erat in Mildensi Episcopatu NOBILIS MATRONA, quæ, dum maritum è Palestina, ad quã voto obstrictus secesserat, redituum desperaret; totam substantiam vni cœnobio & nouè Ecclesiis ædificandis insumpsit. Reuertitur non ita diu post maritus, eumq; placatura, obuiam proce-

procedit, ac salute prævia; *Novem, ait, filias, tibi absenti, peperit, at nondum in Christo renatae sunt.* Intellexit vir pius novem Ecclesias instructas, necdum tamen consecratas. factumque uxoris gratum & ratum habuit. Cranz. lib. 3. Metrop. cap. 8.

Plura vide Tu. de ECCLESIA, & AB ECCLESIA ARCERE INDIGNOS.

TEMPVS.

CLEMENS VIII. PONT. MAX.

Nihil Tempore pretiosius, nihil eo carius habuere viri sapientes, & inter eos nostro hoc ævo CLEMENS VIII. apud quem cum plures de variarum rerum iactura conquererentur; *Eius verò aiebat, rei iacturam deplorandam sentio, quæ semel amissa, non renocari potest, nec reparari.* sciebat namq; prudentissimus PONTIFEX, quòd

—— velut unda impellitur undâ,

Urgeturq; eadem veniens, urgetque priorem:

Tempora sic fugiant pariter, pariterq; sequantur,

Et nova sint semper.

Coll. ex Apophth. de Principe Henr. Farnes.

PETRVS ALDOBRANDINVS CARD.

Nihil autem prudenter fieri, nisi quod in tempore fit; adeoque temporis habendam rationem, allegit PETRVS ALDOBRANDINVS, S. R. E. CARD. Dicebat enim: *Prudentis est odorari quid res quidve tempus in rebus agendis postulet, omniaque temporis momenta observare.* quia, vt in Andria Terent.

Nunc hic dies aliam vitam adfert, alios mores postulat.

Henr. Farnes. suprâ.

TEN-

TENTATIO.

S. BASILIUS.

Qui non est tentatus, inquit Ecclesiastes, quid scit? Unde à Domino tentari ac probari petiit David, quòd sciret amari à Deo illos, quos prebat & exercet. Quare sapienter admodum dicebat S. BASILIUS: *Nauclerum tempestas, studium athleta, calamitas magnanimum; at Christianum TENTATIO probat, exercet, & examinat.* Coll. ex Hom. in diuit. auaros.

I D E M.

Rogatus carnalis tentationis remedium, respondit: *Desiderium rerum meliorum.* Th. Staplur. in Prompt. Æst. Dom. 2. post Pent.

IOANNES ABBAS.

Similis, aiebat hic, esse debet religiosus, homini habenti ad sinistram ignem, ad dextram autem aquam: ut quoties succensus fuerit ignis, eum aqua restinguat. In vitis PP. pag. 2.

TIMOR, TIMIDVS.

MAVRICIUS IMPERATOR.

Chamæleonem, quòd timeat ad quemuis aspectum, quosuis etiam colores induere, auctor est Plinius. ita hominem TIMIDVM ad insidiosas artes confugere, docuit MAVRICIUS IMP. cum enim sibi per somnium reuelatum esset, se à Phocâ interimendum; primo manè Philippicum nobilem accersit, & qualis sit Phocas, inquit. ille, Homo timidus, ait. Subiecit Imperator: *Si timidus, homicida est,*

est, & crudelis. atque ita postmodum eum miserè in se expertus est. Georg. Richter in Axiom. Politicis c. 182.

EQVES ANONYMVS.

Huius autem rei causam, cur timidus omnis crudelis sit, percontatus quidam equitem generosum, illam ab eo accepit: *Homo timidus, in illud solum incumbit, ne sit superstes vindex iniuria.* Hinc ergo est, quòd hostem suum è medio semper tollere conetur. Ibidem.

TIMOR DEI.

IESVS CHRISTVS.

Sapientiae initium TIMOREM DOMINI, dicebat Vates regius: sine quo proinde nulla pietas diu stare, nulla religio florere diu potest. Hinc illum tanto desiderio in seipsis excitarunt viri sancti, exemplo antesignani sui CHRISTI permoti: nempe qui suorum animos excitans ad fidei constantiam seruandam, *Ne terreamini, ait, ab his qui occidunt corpus, & post hac non habent amplius quid faciant. Ostendam autem vobis, quem timeatis. Timeate eum, qui postquam occiderit, habet potestatem mittere in gehennam. Ita dico vobis, hunc timeate.* Lucę cap. 12. Matth. cap. 10.

S. ANASTASIUS MARTYR.

Horum verborum memor ANASTASIUS, Marzabanam Pręfectum, qui eum minis ac tormentorum violentia à fidei susceptę constantia deteriere nitebatur, ita est allocutus: *Non timeo Regem, ad quem meam in fide pertinaciam delaturum te minaris. an non ipse quoque homo est, in quem cadit interitus? Quem-*
nam

*nam me ergo timere oportet; illum qui a quē atque ego
interit, an eum qui semper est, & omnia produxit?*

Sur. tom. 1. in Vita.

FRANC. BORGIA SOC. IESV.

Ille etiam insigni dicto hunc Timorem asseruit.
ad omnia enim pavidus, dicere solebat: *Iudicia Dei
vinentis & videntis, quantum à mortalium iudicio
discrepant! timeat itaque qui sapit, Deum.* Suauiter
Bern. super Cantica: Deum time, & mandata eius
obserua, hoc est omnis homo: ergo si hoc est omnis
homo, absque hoc nihil est homo. Ribad. lib. 4.
in Vita cap. 4.

REX ANONYMVS.

Require IUDICIUM EXTREMUM.

Vide etiam DEI HONOR. MARTYRIUM.

CONSTANTIA RELIGIOSA. &c.

TRIBVLATIO.

Vide Apophth. de AFFLICTIONE.

Item de ADVÈRSITATE, & PROSPERITATE.

TRINITAS.

IESVS CHRISTVS.

DE profundissimo TRINITATIS mysterio actu-
ris subit præclarum illud & luculentum de eo
INCARNATI VERBI testimonium. Discipulos nam-
que in vniuersum orbem missurus, præcepit Euan-
gelium omni creature (quâ voce omnem hominem
intelligunt sancti Patres) prædicarent; *Baptizantes*
inquiens, eos in nomine Patris, & Filij, & Spiritus
sancti. Conueniebat enim in Baptismo, qui est ianua
ceterorum Sacramentorum, expressis verbis Tri-
nita-

nitatem inuocari: quòd ea sit fundamentum totius fidei, omniumque myſteriorum nouæ Legis cauſa. Matth. cap. vlt.

I D E M.

Roganti cum Philippo, Domine, oſtende nobis Patrem, & ſufficit nobis: *Philippe, inquit, qui videt me, videt & Patrem.* (cùm propter ſimilitudinem ſummam, tum ob omnimodam naturæ idẽtitatem, quam habet inter ſe.) *Quomodo tu dicis, Oſtende nobis Patrem? Non credis, quia ego in Patre, & Pater in me eſt?* Quibus verbis & ſignificatur perſonarum Patris & Filij diuerſitas, ne poſſit cum Sabellio ob perſonæ idẽtitatem intelligi dictum, Qui videt me, videt & Patrem: & ruruſus ſignificatur naturæ omnimoda identitas, ne putetur id tantùm propter ſimilitudinem inter Patrem & Filium fuiſſe dictum; ſicut voluit ineptè Arrius. Vide Ianſſ. Concord. cap. 134. & 43. Ioan. cap. 14.

MELITIVS PRESBYTER.

Ille verò dum coram Conſtantio Imper. concionem haberet, & totus in enucleando illo Scripturæ loco, Deus creauit me in initio viarum ſuarum, &c. moraretur; rogatus breuem eius rei imaginem daret, ternos digitos protendens, ac duos colligens, hanc de Trinitate vocem protulit: *Tria ſunt quæ intelliguntur, ſed velut de vno diſputamus.* Namque vt benè Iac. Billius in Antholog. Sacr.

Natura omnipotens vna eſt, quæ cuncta creauit,

Et propriè, quod ſunt, omnibus eſſe dedit.

Nam quidquid minus eſt, non eſt Deus: à Patre natum

Verbum, & qui amborum Spiritus eſt, Deus eſt.

Vna

Vna eademq; trium quoniam est essentia, quæ se

Numquam vel maior vel minor esse potest.

In vita Constant. Imp. Hist. sacra Euf.

TYRANNIS.

Vide CRVDELITAS.

VENENVM.

LVDOVICVS BAVARVS.

NVnc quoniam vitæ humanæ tum bona tum mala persequimur, etiam hîc locum sortiatur prompta nimium venefici criminis voluntas, imò voluptas. quam Italiæ populis plus æquo familiarem carpebat LVDOVICVS BAVARVS: electus namque in regem Roman. circa annum 1314. Italia excessit, dicens: *Plures Germania Cæsares Italiã pepulit venenum, quàm gladius.* & ita verè se res habet. Ac vt benè Iuuenalis,

— nulla aconita bibuntur

Fictilibus. tunc illa time, cùm pocula sumes

Gemmata, & lato Setinum ardebit in auro.

Matth. Castric. de Her. Virt. Princ. German. ex Ioan. Cuspiniano.

VERBVM DEI.

IESVS CHRISTVS.

SEquitur nunc spirituali cibo animam nostram reficiamus; DEI VERBO videlicet: quod velut lucerna in hac nocte sæculi, operibus nostris est præferendum. & quidem DOMINVS noster, cùm tentatoris calumniam dilueret, qui obiecerat, Si filius Dei es, dic vt lapides isti panes fiant; respondit:

Scri-

Scriptum est: Non in solo pane vivit homo, sed in omni verbo quod procedit de ore Dei. aperte significans, non solum terreno, sed & spirituali verbi sui cibo hominem sustentari. Matthæi capite 2.

I D E M.

Verbum Dei verò audire non modò, sed & custodire, hominem beatum reddere; idem DOMINVS insinuavit, cùm è turba mulier vocem extollens, diceret: Beatus venter qui te portavit, & vbera quæ suxisti. respondit enim: *Quinimò. Beati qui audiunt Verbum Dei & custodiunt illud.* Debent quippè (inquit Macarius Homil. 30.) qui Verbum Dei audiunt, in suis ipsorum animis opus Verbi demonstrare. Lucæ cap. 11.

S. WOLSTANVS EPISCOPVS WIGORNIEN.

Quid autem ille clari generis, & rarę virtutis vir? Nondum adepto Episcopatu, assiduus erat in annuntiando Verbum Dei. cumque quidam diceret, Monacho silentium & claustrum competere, Pontifici verò prædicationem; respondit: *Verbum Dei non est alligatum: nihilq; Deo gratius, quàm Christum annuntiare.* Sciebat enim, quàm essent speciosi pedes euangelizantium pacem, euangelizantium bona. Sur. tom. 1. in Vita.

Require PRÆDICARE.

VERITAS.

SS. CARPVVS & PAPILVS.

VERITATEM pani comparabat Augustinus super Ioan. scilicet quę mentem reficiat, nec deficiat; mutet vrescentem, nec tamen ipsa in eum mutetur. Hinc eius præstantiam palàm confessi CAR-

PVS & PAPILVS, qui, insultantibus sibi Ethnicis, & Christi dogmata detrectantibus, *Non frustra*, dicebant, *mentem nobis largitus est Deus, sed vult, ut ratione, qua nihil diuinius, verum discernamus à falso; & ex Veritate, qua ratione nititur, res omnes perspiculemus.* Metaphr. in Vita.

PETRVS ALDOBRANDINVS CARD.

Hac autem duce, virtutum omnium crescere cohortem, suo dicto testatus est Illustriss. hic PRÆS V L. cuius voce sæpè tota Vrbs exultauit. dicebat enim: *Paucorum est Veritatem aspicere, multorum despicere.* altero ignaros, altero mordebat improbos. Ita Heraclitus olim Aram veritatis in antro, Democritus in puteo collocavit. Hen. Farnes. suprà.

I D E M.

Veritas autem filia temporis olim habita, promptam sui requirit obedientiam. Rogatus autem hic, *cuius rei incundissimus nuntius Principi adferri possit*; respondit: *Veritatis.* At nihil infelicius in Principum aulis, quàm quòd eis veritas occultetur. Ibidem.

LVDOVICVS XII. GALL. REX.

Hinc summo dolore tactus LVDOVICVS XII. Rex Christianissimus, dum se in aula omni re abundare gloriaretur; *Vna tamen*, aiebat, *mihi deest.* de qua dum inquireret familiarium quispiam, respondit: *Veritas.* Quàm miserū, esse Imperatorem, apud quem vera reticentur: qui, cùm ipse publicè ambulare non possit, necesse est vt audiat, & audita ab aliis confirmet. Franc. Patritius de Hist. Dial. 5.

ALPHONSVS REX ARAG.

Huic etiam Principi illud crebrius in ore: *Veritas licet omnibus conueniat, Principum tamen præcipuum esse*

esse debet ornamentum. Ant. Panorm. lib. 1. de Gest. eiusd.

DUX NORICVS ANONYMVS.

Laudantur itaque non immeritò Principes, quibus, cùm veritas occultetur, eam quouis astu per se ipsos assequuntur. Iure ergo hunc DUCEM suo Epigrammate extulit Georg. Sabinus, poëta clarissimus: quod hîc inferere non abs re fore visum. Ita enim se habet:

Sapè rudes inter mutata veste colonos,

NORICVS agricola DUX faciebat opus.

Nunc pascebat oues, nunc gramina falce secabat,

Vomere proscindens nunc subigebat humum.

Et simul illato de se sermone, rogabat

Plurima: nempe quibus moribus ipse foret.

Iustus an exigeret pœnas à fontibus ultor:

Debita conferret præmia nûmve bonis.

Quærenti verò causam, cur Regibus ortus

Princeps, agricolam se simularet; ait:

Me iuuat è rudibus cognoscere vera colonis:

Seruit adulatrix auribus aula meis.

Philipp. Camer. Medit. Hist. cap. 90. pag. 444.

VESTIVM NEGLECTVS.

S. ELIZABETH REGINA HVNG.

PRæmisso Dei Verbo, quod, ne solliciti simus quo induamur, monet; superest videamus, quo corporis cultu nobis vtendum, quantumve (si modum excedat) despiciendus. A fæminis itaque huius rei exempla petimus. quæ eò magis erunt admiranda, quò magis huic cultui deditus dicatusque ille sexus. ELIZABETHAM Hungariæ Reginam intueamur.

Magnatibus ad Principem maritum venire parantibus, dolebat ille, quod coniux dignis suo genere indumentis careret. At hæc regij splendoris cōtemptrix, *Nolo*, inquit, *vestibus placere humano conspectui, ne moribus displiceam Deo*. Ingressis itaque ad eum Legatis, vocatur ELIZABETH. quā omnis pulchritudinis auctor tanto decore venustauerat, ut planè hyacinthina appareret. Principi ergo in stuporem verso, subridens illa, *Huiusmodi, ait, scit Dominus meus cū voluerit, ornamenta præparare*.

Sur. tom. 6. in Vita.

LEONORA DUCISSA GANDIÆ.

Non absimilis huic LEONORA. quæ interrogata à nobilissima quadam matrona, cur simpliciore veste vteretur; *Méne*, inquit, *byssinis, sericis, aut purpureis indui vis, cū dominum meum* (ita Franciscum Borgiam maritum suum, exemplo veteris Saræ, appellabat) *cilicium gestare sciam?* Ribadin. de vita Borgiæ lib. 1. cap. 12.

EDELDRIDA ANGL. REGIS FILIA.

Hæc in ultimâ ætate virginum Abbâtissa facta, cū ingenti dolore colli, quo & mortua postmodum, premeretur; solita erat dicere: *Scio quod meritò in collo languoris pondus porto, in quo, iuenculam me, memini supervacua monilium pondera gestasse*.

Vener. Beda Hist. Anglic. lib. 4. cap. 19.

ALEXANDER SEVERVS IMP.

Da veniam IMPERATOR, si te fæminis ordine quidem, non tamen virtute postponam. A tuo namque ore profectum aliquando, apparatu & pompa regia spretis: *Imperium in virtute est, non in decore*. Coll. ex Mon. Pol. I. Lips. cap. 15.

Quære ORNATVS CORPORIS.

VE-

VESTIVM VSVS, ET CVLTVS.

PICTOR GERMANVS.

MVtatio frequens HABITVS, mutationis morum & animorum argumentum est apud plerosque. & ita sanè, multarum gentium mores vnà cum habitu mutari & deprauari videmus. multum quippe ad æstimationem augendam honestus habitus facit, eoque boni oblectantur. Iusserat aliquando Turcarum Imperator, omniũ gentium habitum viuis coloribus per GERMANVM eius artis peritum exprimi. cumque is plurimarum gentium indumenta pinxisset, tandem nudum hominem, & iuxta eum diuersas vestium exuias, inter alios constituit: iussusque à Principe interpretari picturam, dixit: *Nudus ille, Germanum populum denotat; cui, quòd indies nouam excogitet, certa vestium forma appingi non potuit.* Dolendum certè, eam nationẽ quæ grauitatis laudem sibi vendicat, hac in parte Gallicę leuitatis insimulari. Petrus Lotichius Secundus, & ipse Germanus, Poëta huius æui celeberrimus, ita in suæ Gentis milites ludebat:

Pudor deorum opprobriumque sæculi,

Pestis luesque militaris ordinis:

Qui perciti furore mentis ebria,

Licentiaque perditorum temporum,

Abominandis inuoluti vestibus,

Fas omne rumpunt, eruunt Rempublicam.

Lib. 2. Carm. Greg. Richter in Axiom. Polit.

EBERARDVS BARBATVS PRINC. SVEVIÆ.

Ille etiam æternam apud posteros sui memoriam reliquit. Venerat ad eum iuuenis, postulans sibi

conferri sacerdotium, quod per mortem possessoris vacabat. Fortè huic ventus talarem vestem aperuit, ita vt PRINCEPS videret caligas militari more scissas. Qui ilicò, vt erat morù & disciplina acerrimus custos, ira commotus, eum è conspectu suo abire iussit, dicens: *Non te pudet coram Principe comparere scurrili habitu, eoq̃ue sacerdotium ambire? O censuram dignam laude!* Ibid.

DUX ANONYMVS.

Haud aliâ mente hic. Nobilem domi alebat, cui vnum in votis, habitu indecoro, & (vt est in Prou.) pellenæa tunica indui. cumq̃ue id molestiùs ferret, veste magis decenti ac congrua vteretur, monuit. ille, Numquid, inquit, id ex arbitratu meo pendet, quomodo induar? *Omnino, respondet Dux, sed hoc etiam ex meo arbitratu pendet, vt te sic indutum aula mea eiiciam.* quod & fecit postmodum. Phil. Camer. in Declamat.

CONSILIARIVS ANONYMVS.

Viderat iste suum Principem admodum peregrinâ & obsoletâ vestimentorum formâ oblectari. accedit propiùs, causam inquirat. ille, Parùm, inquit, hoc refert quænam sit mearum vestium forma. cui prudenter subiecit alius: *Imò multum id refert. Vestis enim indicat Principem esse talem virum, qui consiliariis suis obtemperare nolit.* Gregorius Richterus, suprà.

SCYRRA ANONYMVS.

Anne etiam ab hac hominum fèce aliquid memoratu dignum? Erat in Franciæ finibus homo ignobilis & sordidus, qui, vt honorem passim aucuparetur, splendidâ veste, non secùs quàm simia in purpu-

purpura, prodiit. Salutatur ab ignotis, & reputatur nobilis: rogantibus autem amicis, cur habitu, suæ conditionis oblitus, tam splendido vteretur; *Non videtis*, inquit, *hoc eno, quid vestis faciat virum?* & statim vulgatum hoc distichon subiecit:

*Vir bene vestitus, in vestibus ipse peritus
Creditur à mille, quamvis idiota sit ille.*

Ibidem.

HERMANNVS BVSCHIVS.

Confirmat illud ipsum suo exemplo HERMANNVS BVSCHIVS, vir celeberrimus. qui dum domestico vestitus habitu ad forum Marpurgense descendisset, neminem sibi assurgentem habuit. indignatus, quod sibi debitus & consuetus negaretur honos; domum reuersus, togam prælustrem sumpsit, forumque euestigiò repetit: & ecce venienti assurgunt omnes, honoris signa exhibent & locum. Ille verò nihil talia moratus, se domum recipit, & togam pedibus conculcat, dicens: *Es tu BVSCHIVS, vel ego? Tibi ne honor iste deferretur, an mihi?* Indignabatur, & meritò, quod præpostero iudicio, homines non viro, sed vesti honorem deferrent: stultorum instar, qui equum empturi, non ipsum, sed frena & phaleras intuentur. Philip. Camer.

ANONYMVS.

Serius ille: iocosus hic & facetus, cuius adhuc recens memoria Antuerpiæ. Vocandus erat ad nuptias cognatæ: at obstabat incultus incomptusque habitus, quo indies magno familiæ generisque incommodo & dedecore utebatur. Audit: & exemplò noua sibi indumenta coaptari mandat, iisq; ornatus, in amicorum conspectum prodit. Hi tali veste ornatum, nuptiali gaudio interfit, rogant. venit.

At ubi naturæ genioque iam satis indulserat, thoracem & caligas, inspectantibus ac ridentibus conuiuis, multâ pinguedine perungit, dicens : *Numquid etiam hac indumenta saginare me oportet, quorum gratiâ huc vocatus ego sum, aliàs non vocandus? Indulgete ergo vos genio cum domino vestro : ne aliàs vestri defectu, ille eo non indulgeat.* Ex relatis & auditis.

VICTORIA A DEO.

TRAIANVS DVX VALENTIS IMP.

VT autem parta de hostibus VICTORIA etiam ob oculos ponatur, eam à solo Deo expectandam esse, significauit TRAIANVS DVX. Cùm enim ab hostibus victus & profligatus rediisset, ignauiam ei Imperator & timorem obiecit. Ille autem : *Non ego ô Imperator victus : sed tu sponte victoriam à te reuicis, qui cum Deo bellum geris.* Insectabatur enim eos, qui fidem Christianam recepissent. Niceph. Call. lib. i i. cap. 40. Hist. Eccl.

CAROLVS V. IMP.

Require CHRISTI HONOR, &c.

VICTORIA VIRTUTE PARANDA.

ALPHONSVS ARAG. REX.

Rem magnam se prestitisse arbitrati sunt plures, si per astum insidiâsve hostem profligauerint : at saniori mente ALPHONSVS. qui, dum à Ludouico Podio nuntiaretur, esse qui armamentarium nauesque Venetorum subiecto igne combureret, modò duo aureorum millia à Rege acciperet; respondit:

dit: *Virtute vincendum, aut numquam: ex hac enim re non alia mihi laus speranda, quàm eius, qui Diana Ephesina templum exussit.* Panorm. lib. 3. de Gest. Alphonfi.

IDEM

Illis qui se in necem Franc. Sfortiæ paratos nuntiabant, renuntiari iussit: *Huiusmodi proposito abstineant. Numquam enim mihi placuit victoria, cuius postmodum pigendum pudendumque esset.* Ibid.

IDEM.

Venerat ad eum Rogerius Pallantiæ comes, vir strenuus; se regem Castellæ Ioannem confossurum spondens, si Rex annuat. at ille: *Neque pro Castella neque pro totius orbis imperio tantum scelus admiserim: virtute non scelere paranda est gloria.* Ibidem lib. 2.

Vide CLEMENTIA.

item, ERGA HOSTES CLEMENTIA.

VICTORIA INCRVENTA.

ÆNEAS SYLVIVS.

Illam demum VICTORIAM, quæ sine sanguinis effusione contingit, celebri triumpho dignam, Platonis elogio clarum est. cui ÆNEAS SYLVIVS consonat, qui dicere solitus: *Longè maior servati quàm cæsi hostis victoria.* & ita se habere testatus est ille, qui ait:

Regnare si vis, sanguine humano abstine.
Lib. 1. Comm. in Alphon.

IDEM.

Eiusdem etiã illa vox: *Decet regem iniustum habere animum, res si iusta sit; at ubi conatus iniustus est, præstat vinci quàm vincere.* Ibidem.

ALPHONSVS ARAG. REX.

Prodeat hîc rursus clementissimus inter Principes ALPHONSVS : qui crebriùs ad suos dixisse commemoratur : *Tanto victoris triumphus est illustrior, quanto plures relictî, de quibus triumphetur.* Pulchrè Lotichius:

Gloria victori est, victis donare salutem.

Panorm. lib. 1. de Gest. eiusd.

Vide AMICITIA, & AMICVM BONVM.

ERGA HOSTES CLEMENTIA. &c.

VINCERE SEIPSVM.

B. IGNATIVS LOYOLA S. I.

Fortior est qui se, quàm qui fortissima vincit
Mœnia:

prouerbiali scemate fertur. cuius memor IGNATIVS, hoc modo adolescentem acri ingenio paternè cohortabatur : *Hoc age, vt te vincas. Quod si feceris, splendidior em aliis qui ingenio mitiori, habebis in calo coronam.* Ribad. lib. 5. Vitæ, cap. 10.

FREDERICVS IMPERATOR.

Ille quoque quàm eleganter & præclarè ? Victis in Hungariâ Gunziensibus, *Magnum*, inquebat ad suos, *opus egimus. Maius nunc restat : vt vincamus nosipsos, atque auaritia vltionique frenos imponamus.* Discite exēplo FREDERICI vos Reges & Principes, imperare animi affectibus ; neque insolescere, si votis adspirarit belli incerta fors : adeoque victis parcere, nam ——— si decidit hostis,

Ire super satis est, vitamque relinquere victa.

Æn. Syl. lib. 2. de Gest. Alph.

Require Apophth. de AFFECTIBVS DOMANDIS.

VIN-

VINDICTA.

PETRVS DE VINEIS.

VLEISCENDI nocendique cupido in humanis pectoribus magnos fluctus excitat, consternationis plenus affectus, ac numquam sine tormento sui violentus. PETRVM DE VINEIS, Fredericus Barbarossa oculis priuari leuissima de causa iusserat: cumque Pontificem Paulum III. bello lacessere in animum induxisset, præfatum PETRVM in Consiliariorum numerum adsciuit. Ille ultionem sceleris in se admissi meditatus, cum de mediis ad bellum istud sustinendum rogaretur; *Mihi, inquit, consultissimum videtur Ecclesiam proprio ære oppugnare.* Placuit sententia. & ecce itum passim ad Ecclesias, quæ suis vasis & prouentibus spoliatae. Quo facto, adit Imperatorem nefandus consiliarius: &, *Nunc, ait, Imperator tui in me commissi sceleris pœnam das. Iam enim te coram Deo reum effeci meo consilio, cuius templa tam impiè es depredatus.* Parum de salute æternâ sollicitus, non meminerat illius Script. *Noli vinci à malo, sed vince in bono malum.* nam

Semper & infirmi est animi exiguiq; voluptas,

Ultio. ut habet Iuuen. Sat. 13.

Pogg. Florent. Phil. Camer.

PHILIPPVS FRANC. & GVILIELMVS

ANGLIÆ REGES.

Hunc etiam ultionis stimuli, prudentiæ moderationisque immemorem reddiderunt. Venerat quippe ex Anglia cum ingenti auri pondere in Normandiam: vbi, cum in morbum incidens, diutiùs decubuisset; PHILIPPVS per iocum cauil-

cauillatus, *Cubat*, inquit, *Rex Anglia Rothomagi, adueniente puerperio. Quod scommma mox fama ad aures GVILIELMI vulgavit. qui eo extra iocum accepto, Cùm, ait, ego partui lenatus, ad templum me purificatum iero, tunc mille in Francia lucebunt faces. Vix pauci dies intercesserant, cùm GVILIELMVS Franciæ fines ferro & igne est depopulatus. Pol. lib. 9.*

NARZES EVNVCHVS.

Erat is quem Iustinus Imp. Byzant. aduersus Gothos præfecerat. Hic offensus dicto Sophiæ, quæ cum, utpote Eunuchum, ad lanam & pensa reuerti oportere criminata erat, respondebat: *At ego talem ordiar telam, non facile amulis extricabilem. quod & præstitit. Contr. Lycost.*

VINDICTA NEGLECTA.

S. LAVRENTIVS PATRIAR. VENETVS.

Magna igitur, & non contemnenda virtus, vindictæ ultionisque frenos contrahere, ac illi laxandos eos permittere, qui seruorum suorum sanguinem pro merito vlciscetur. Ita Venetorum PATRIARCHA LAVRENTIVS, cùm multa præclare dixisset, pluribus locis ab improbis hominibus excitatus est risus. dumque amici cohortarentur, se de iniuria illa vindicaret; vultu placido, *Noli, inquit, te affligere fili. Dominus Iesus, cuius negotium gerimus, ipse aderit honori suo. Sur. tom. 1. in Vita.*

ANONYMVS SACERDOS.

Quàm verò grata sit Deo delicti in nos commissi voluntaria remissio, Surius auctor grauissimus subiecto exemplo documentum præbet. S. Hanno Archie-

chiepisc. Colonien. contemplationis studio intentus, videbat mentis oculis, quosdam alios Archiepiscopos in candida & gloriosa veste sedes gloriosas in cælo occupare, seque inter eos insigni etiam amictu fulgere, cuius tamen partem quæ pectus tegeret, sordida fœdabat macula: quam cum manu obiectâ tegere non posset, ab aliis, ne sedem sibi locatam occuparet, repelli. Quod portentum cum familiari cuiquam exposuisset, ille rem coniiciens; *Macula, inquit, vesti tue candida inherens, memoria est iniuriæ tuorum civium, qui anno superiore te Colonia expulere, quibuscum necdum in gratiam redisti.* Archiepiscopus testimonio conscientiæ suæ conuictus, statim eos omnes reuocari, & bona eorum, quæ prius fisco addicta, restitui iussit. Adeo Deo displicet amarus zelus, cuius filius hîc quærebat ouem perditam, donec eam inueniret. In vita Hannonis lib. 2. cap. 25. apud Sur. tom. 6.

S. MALACHIAS EPISC. HIBERNIÆ.

Emicuit etiam hoc splendore MALACHIAS. In quem dum petulâter multa iactasset maledica quædam, ita ut caluitiei eius etiam improperearet; nihil aliud respondit, quàm, *Dominus respondeat pro me.* & ecce respondit Dominus, sed lentis verbis. Versa enim in rabiem illa, miserè interiit; & ita aduersus MALACHIAM assumens improprium Elisæi, verè illum sibi quasi alterum experta est Elisæum.

Sur. tom. 6. in Vita.

RVDOLPHVS AVSTRIACVS.

Talis etiam RVDOLPHI mansuetudo, quamuis in causa dispare. Sagittariis de sagittandi peritiâ concertantibus, factum, ut RVDOLPHVS animi gratia ad eos properaret: dumque aliquali spatio à certa-

certaminis loco abest, sagittâ ab imperito in incertum emissâ, sauciatur. cumque è vulnere decumbenti suaderet quidam, illi sagittario dextram amputandam; *Bene*, inquit, *istud & provide, priusquam me læsisset: sed quid nunc emolumenti exinde consequar?* ac sagittarium è custodia liberum dimisit. Pogg. Florent.

FREDERICVS IMPERATOR:

Aliquid etiam ab hac stirpe traxit FREDERICVS. qui conuitiis impetitus à suis, *Parum*, inquit, *id est: in libera enim ciuitate liberas linguas esse oportet.* I. Lipsi. in Mon. Polit.

ALPHONSVS ARAGONVM REX.

Eodem vt genere, ita & virtute nobilis ALPHONSVS. Intellexerat se turpiter à turbido quodam apud exteros eleuatum, qui tamen postmodum ab eo beneficia petiturus accedebat: neque se ob id indecore gessit, sed perbenignè eum accipiens, *Parum refert*, inquebat, *quid dixerit. benefactorum quippe illius, non vanè dictorum, adhuc memor sum.* Panor. lib. 1. de Gest. eiusd.

Require Apophth. de CONVITIIS, PATIENTIA IN INIURIÆ, CLEMENTIA, &c.

VIRTUS.

PETRVS ALDOBRANDINVS CARD.

VIRTUTIS tandem nobis penetralia subeunda. eius enim possessione nulla est honestior aut diuturnior: ideoque summis votis expetenda. Ad quod non parum nos incitauit CARD. ALDOBRANDINVS, qui rogatus, quid esset virtus; *Predium*,
aic.

aiebat, *Plutonis*. Insinuabat illum verè diuitem, qui possessionem haberet virtutis. Henr. Farnesius, in Apophtheg. De Principe.

IDEM

Sciscitanti Clementi viii. Pont. Max. quos in administratione publici muneris maximè probaret; *Qui Dei*, respondit, *vinia sunt simulachra*. non fastu, sed virtute illustres viros ostendens. Ibid.

IDEM

Cùm de iuventutis sedula educatione institutioneque ageretur, rogabatur, quænam Italiæ Gymnasia maximi faceret: *Non*, inquit, *quæ ornamentum habent marmoris, sed virtutis*. Hinc Plato in Academiæ suæ ingressu scripserat *Ἀγεαμένους ἐδαις ἰσχύειν*, id est, Nullus Geometriæ ignarus huc accedat. Virtutem appellabat Geometriam, quòd in æquâ affectuum mensurâ consistat. Ibid.

ALEXANDER SEVERVS IMP.

Seuerum etiam & memoratu dignum SEVERI IMP. de virtute elogium. Iam ad Imperium euecto nuntiabatur Ataxerxem numerofo exercitu in Romaniam cogitare. &, *Haud multum id refert*, inquit, *ut enim quæ cum voluptate agimus, dulcia sunt: ita quæ cum virtute fiunt, gloriosa esse solent*. Non enim in vita tantùm; sed

Post obitum benefacta manent, æternaq; virtus

Non metuit Stygiis ne rapiatur aquis.

Herod. lib. 6.

VITÆ

VITÆ HVIVS PERFECTIO.

S. ÆGIDIUS ASSISINAS.

QVamuis neminem ante obitum beatum dixerint veteres, quòd tum demũ in veram quietem recipiatur homo: potest nihilominus etiam in hac vita, sua haberi felicitas & perfectio. de qua cùm sciscitaretur quispiam B. ÆGIDIUM, quĩsnam videlicet in hac vita dicendus esset beatus; hoc ab eo responsum habuit: *Qui amat, & non desiderat amari. Qui timet, & non appetit timeri. Qui servit, & serviri sibi non cupit. Qui denique se erga alios benè gerit, non tamen eo fine, ut se erga illum vicissim benè gerant.* Magna hæc sunt, & à paucis benè enucleata. Ex Sent.aureis Ægidij.

CANIS SCALIGER VERONÆ DOMINVS.

Ille diuersis orbis partibus aduentātes, quacumque conditione in Palatij sui hospitium excipiebat. dicebat autem: *Nihil in hac vita beatius, quàm inuictō animo, sua pariter atque aliena fortune obuiam ire; & perpetuis beneficentia ac liberalitatis operibus, insita virtutis famā extendisse.* Iouius lib. i. Elog.

Quare BENEFICENTIA. LIBERALITAS.

VOLVNTAS.

S. BASILIUS.

AGgrediamur illud, cui nec Leges imperant, nec Principes dominantur. Estque VOLVNTAS humana, quæ sola inter potentias verè libera est, & nulli subiecta, nisi qui eam habet: cuius etiam promptitudo ad bonum laudabilis est. Venerat ad

BASIL-

BASILIVM muliercula, litteras ab eo postulans, quò à vectigalium solutione redderetur immunis. quas cùm ad Satrapam regionis detulisset, ille iis visis, se id facere non posse respondit, ne quidem in BASILII (cui multum deberet) gratiam. Cui iteratò BASILIVS : *Si voluntas prompta fuit, & defuit facultas, tolerabile est: si autem potuisti quidē, & noluisti, Christus te redigat in ordinem inopum, ut ubi volueris, non possis.* quod & euēnit. Sur.tom. 1. in Vita eiusd.

S. HUGO LINCOLNIENS. EPISCOPVS.

Ille cùm nihil aliud in hac vita desiderare se diceret, quàm ut in Sacerdotem consecraretur, à cœnobij præfecto reprehensus, quòd eam rem suscipere veller, quam vix vllus dignè suscipit, semper deinceps voluntati suæ cessit. Quare ab Henrico II. Angliæ Rege ad Carthusiensis cœnobij præfecturam vocatus, quidque de ea sibi videretur, interrogatus; *Voluntati,* respondit, *mea de statu meo nihil penitus reservare iam pridem edoctus sum.* Sur. tom. 6. in Vita.

PASTOR ABBAS

Hoc frequenter vsurpabat : *Murus ferreus est propria voluntas, qui hominem à Deo separat atque dinellit.* Dorothe. Serm. 5.

ANONYMVS ABBAS.

Iste etiam ad calcem adiiciendus. Venerant ad eum visendum peregrini monachi: cumque hospitalitatis ergo eum ad cibum sumendum induxissent, rogant: Anne tristaris Pater? quibus ille: *Mea tristitia est, si propria voluntati obtemperauero.* In vitis PP. cap. De hospitalit.

VOLVPTAS.

LVDOVICVS XII. GALL. REX.

Veluti turpe admodum, meretricem in nobilium matronarum cœtum ; ita in virtutum concilium VOLVPTATEM adducere, indecorum. est enim ea cum quadam lubrica suauitate ad illicita fœdę mentis inclinatio. Pulchrè igitur LVDOVICVS REX, dum intellexisset nobilem quemdam ob puellam Neapolitanam deperire ; *Gravis*, dicebat, *Tyrannis est voluptas, quæ ea demum concupiscit, quorum est copia angustior.*

—— *Vsq̃ue adeò nulla est sincera voluptas, Sollicitumq̃ue aliquid latis interuenit.*

P. Æmil. in Vita.

PIOR MONACHVS.

Require Apophth. de CIBO & IRA.

PETRVS ALDOBRANDINVS CARD.

Quid expectatis à præclaro illo viro? Interrogatus quandoque, quænam Religioni pestis acerbior infligi posset; respondit: *Voluptate nulla atrocior.* Facit enim voluptatum illecebra, vt Religionis lumen obtenebretur. Henr. Farnes. suprâ.

THOMAS MORVS.

Ruminabat ille toto vitæ suæ tempore, vt auctor est T. Staplut. : *Nulla est animi peior affectio, quàm eâ re delectari, quæ nisi peccando obtineri non potest.* Insinuans mundi voluptates noxias, & possessores in peccati seruitutem trahere. Idem conuenienti Emblemate expressit Georg. Sabinus, dum ita canit:

*Cùm puer aluolo furatur mella cupido,
Furanti digitum cuspide fixit apis.*

*Sic etiam nobis est brevis & peritura voluptas
Quam petimus, tristi mista dolore nocet.*
VOTVM. vide CASTITAS.

VVLGVVS.

IOANNES XXIII. PONT. MAX.

VVLGVS, quod fluctu mobilius Seneca, ignobile dicit Virgilius, huic operi tandem, vel inuitus infero: quòd eiusdem censuras & iudicia mihi parata hîc sciam, at solatur me celeberrimum illud IOANNIS PONTIFICIS responsum: qui rogatus, quid esset à vero remotius; *Vulgi sententia*, inquit: *quidquid enim laudat, vituperio dignum est: quidquid cogitat, vanum: quidquid loquitur, falsum: quod improbat, bonum est: quodque approbat, malum: & quidquid denique extollit, infame.* Ita sanè

*Tradere turpi fasces populus
Gaudet, eosdem colit atque odit.*

Seneca in Hipp. Phil. Camer. In Oper. success. c. 40.

S. POLYCARPVS.

Require POPVLVS.

VXOR MOROSA.

ALPHONSVS ARAG. REX.

NOn ineptè hanc Vulgo subiicimus, quæ potissimum suæ intemperantiæ molestiarumque ab eo sumit argumentum. Sanè vt nemo sentit, quâ parte stringat calceus, nisi qui eum induit: ita MOROSÆ MVLIERIS genium nemo experitur, nisi qui illi inseparabili nexu coniunctus est. Quis ergo ALPHONSVM meritò non extulerit? qui dum fugitiuam vxorem quempiam sollicitè requirentem intellexisset;

set; *Verè insanire eum existimo*, inquit, *qui fugitivam, & à se sponte digressam uxorem perquirat*. Laudabilior fortassis fuisset apud eum illa Diogenis vox, qui cum mulieres ob flagitium ex oliuâ pendere conspiceretur, *Vtinam*, ait, & ceteræ arbores similem ferrent fructum! Panorm. lib. 4. de Gestis eiusdem. I D E M

Conspicatus Trisponium I. C. animo anxium, quod trecentos aureos, qui ex dote supererant, furto surreptos perdidisset; dixisse fertur: *Longè illi melius, si uxorem, quàm pecunias fures abstulissent*. significans magnæ felicitatis, ab improba & morosa muliere liberari. Ibidem.

GREGORIUS HAIMBERGENSIS.

Succedat magno huic Principi GREGORIUS HAIMBER. iuris dicendiq; scientia inter Germanos facilè Princeps. sed, quod litteratis omnibus etiam hoc nostro quo accidit miserabile, morosam sibi conjugem, & quasi alteram Xantippen duxerat. cumque à Cæsare missus, diutiùs domo, adeoque & conjugē abesset, nuntiatum per amicum, eam vivere & benè valere. Cui ille: *Si vivit mea uxor, ego sanè obij.* insinuans, morosam uxorem lentam mariti esse mortem. Cur ita? inquit, Quia, ut doctè & verè Iuven. Sat. 6.

Semper habet lites alternaq; iurgia lectus

In quo nupta iacet: minimum dormitur in illo.

Tunc grauis illa viro, tunc omni tigride peior,

Cum simulat gemitus occulti conscia facti;

Aut odit pueros, aut ficta pellice plorat.

Vberibus semper lachrymis, semperq; paratis

In statione sua.

Æn. Syl. lib. 3. Com. in Res gest. Alph.

ANONYMVS HOSPES.

Sed claudio hoc totum de morosis vxoribus, vno
eoque iocoso exemplo. Diuerterat ad hospitium
quidam, vxoris improbitatem moleste ferens. vix-
que ingressus, audit hospitam diutius vociferan-
tem, & nunc cum marito, nunc cum ancillis, rixas
& iurgia miscentem : impatiens ille, assurgit, & re-
cessum parat. Cui HOSPES; *Ecqua*, inquit, *amice*,
isthac impatientia tua est? Duos & triginta annos hu-
ius clamores dies noctesque aequissime fero: tunc vnus
diei sextantem eos ferre potes? Si risu excepta re-
sponsio fuit, nemo quærat, effuso maximè. Ecce
hominem paratum, quietis pacisque causâ, quæ-
uis etiam ineptissima ab vxore perpeti. Benè mo-
net Comicus:

Proba vxor, ô Nicostrata, marito suo

Non debet esse superior, sed obsequens.

Nam graue malum vxor est superans virum suum.

Adrian. Barlandus.

Quere MVLIER.

ZELVS ERGA DEVM,
ET ECCLESIAM.

APHRAATES MONACHVS.

AD portum huius operis properantibus, pius
erga Deum, cuius auxilio præsidioque huc
vsque peruenimus, nobis superest proponendus
affectus, quem ZELVM dicimus: quantumque eo
claruere viri sancti & timorati. Inter quos princi-
pem, meo quidem iudicio, locum debeo APHRAA-
TÆ MONACHO. qui, vt erat summus contemptæ

ces fortissimi, & Religionis quam in Baptismo professi, protestati, zelum ad seros nepotes transmittite. Niceph. Callist. Hist. Eccl. lib. 11. cap. 49.

PHILIPPVS 11. HISP. REX.

Verè appuleram, sed propioris æui exemplum interuenit, quod MAGNVS PHILIPPVS nobis donat. Carolo Cæsari superstes, regnorumque vt heres, ita & egregius paternæ pietatis imitator, & auctæ, Religionis propugnator exstitit: cuius etiam zelum ad extremum vsque spiritum, nec spe melioris sortis elatus, neque iniquioris metu fractus, variis argumentis declarauit. Idque vel maximè, dum iam plenus dierum & meritorum in Ecclesiam & Reipub. Christianam, malignâ feбри correptus (quæ eum etiam extinxit) anteaactæ vitæ cæuentus varios considerans, nullo doloris, quem instans aut Fatum aut præsens tanti Imperij amissio excitare poterant, sensu tactus, dicebat: *Vnum est quod me meritò reficit, cuius vel sola contemplatione oblector, quòd in Catholica fide, maiorum Religione, Catholica Ecclesia, eiusque supremi capitis Pontificis Romani obedientia conquiescam.* & ita Deo Opt. Max. suum gregem commendans, à nobis abiit, magnumque sui vbiuis gentium desiderium reliquit: maius relicturus, nisi superstitem alterum Philippum, etiam patriæ pietatis & fortitudinis, vt Imperij heredem, orbi post se dedisset: in quo (vt illud B. Ambrosij de Theodosio Imp. vsurpè) eum agnoscere debemus, in quo eum & cernimus, & videmus. ————— *Qualem si prisca tulissent,*

Secula, iam positis Bellona resurgeret armis,

Tritaque sub dulci florerent sacula pace.

In append. Hadr. Barlandi de Ducibus Brab.

IOANNES SAMOSCIUS CANCELL. POLON.

Philippo Regi IOANNEM SAMOSCIUM adhuc adiungo, & cursum hunc libens cum eo sisto. Ut enim erat in nobili illo regno famâ & virtute nobilis heros, multæ etiam ab eo profectæ nobiles gnomæ, quæ prioribus adsitæ, extremam hanc aciem suo pondere tuentur, & nouo quodam splendore illustrant. Vna è ceteris locum hîc vendicat: quam non dicto suo tantum, verum & testamento asseruit. Ingrauescente namque morbi violentiâ, oculis manibusque iam iam morituris, in optatam cælestis patriæ mansionem sublatis, piè insonabat Ecclesiæ Catholicæ vnitatem & præstantiam: *Est enim illa, inquiebat, non Regum ac Principum modò, sed, quod longè præclarior, omnium Sanctorum cõmunis mater. In cuius proinde gremio mori felicius est, quàm ab initio nasci: cum non nasci satius sit, quàm in hac non mori.* O egregium & innocentis animi indicem sermonem! quem publico & merito encomio V. C. Iustum Lipsium celebraturum fuisse, auctor est Ioan. Wouerius in sua assertione Lipsiani Donarij; nisi statuta viuendi scribendiq, periodus adfuisset, quæ emeritum senem orbi eripuit, & cælo intulit. vbi

Et Cali procures, & Triados decus,

Et qua condita tegmine

Suspexit cupidâ mente Sophos; videt

Pulsâ nube beatior.

Require DEI HONOR, ECCLESIA, MARTYRIVM, MORIENTIVM DICTA, &c.

F I N I S.

INDEX

INDEX

CAPITVM SIVE RERVM,

quæ hoc opere tractantur.

A.	
A Bſtinentia.	Pag. 1
Abusus rerum.	5
Accusatio ſui.	7
Acutè dicta.	ibid.
Actio, eiufq; neceſſitas.	11
Admonitio.	14
Aduerſitas. Res aduerſa.	19
Adulatio. Adulator.	21
Adulterium.	25
Aduocatus.	28
Æmulatio.	30
Æquitas.	ibid.
Æternitas. Vita aterna.	ibid.
Affabilitas.	32
Affectus domandi.	34
Afflictio. Vexatio. Tribula- tio.	36
Altare.	39
Altiora non ſcrutanda.	40
Ambitio.	ibid.
Amicitia. Amicum bonum.	45
Amare & amor.	49
Amor Dei.	49
Amor proximi.	ibid.
Amari à ſubditis.	ibid.
Angelorum cuſtodia.	50
Angli populi.	52
Anime immortalitas & cul- rus.	53
Animi promptitudo.	56
Animi fortitudo.	ibid.
Aqua luſtralis.	61

Argutè dicta & reſponſa.	62
Arrogantia.	64
Ars, eiufq; dignitas.	65
Artium concertatio.	66
Aſſentatio.	68
Aſſiduitas.	ibid.
Aſtologia.	ibid.
Aiutia bona.	69
Auaritia.	71
Aulica vita. Aulici. Aula.	73

B.	
Baptiſmus.	76
Barba.	79
Barbaries.	81
Beatitudo.	ibid.
Belli ſtudium.	ibid.
Beneſicentia.	83
Beneſicentia.	85
Blasphemia.	87
Bona fortuna.	91
Bonum.	92
Bonus vir.	ibid.
Breuiloquentia.	93

C.	
Cacitas.	99
Callidè dicta.	97
Calumnia.	100
Cantor.	103
Caſtigatio. Correptio. Repre- henſio.	104
Caſtigatio modeſta.	106
Caſtigatio dura.	107
Caſtigatio libera.	108

INDEX.

<i>Castitas.</i>	110	<i>Crucis signum.</i>	181
<i>Census. Tributum.</i>	116	<i>Cunctatio.</i>	183
<i>Charitas erga Deum.</i>	117	<i>Cura proximi.</i>	184
<i>Charitas erga proximū. ibid.</i>		<i>Curia.</i>	186
<i>Christi honor, amor, & laus.</i>		<i>Curiositas.</i>	187
120		D.	
<i>Christianismus.</i>	122	<i>Demon.</i>	190
<i>Christianorum amor, & o-</i>		<i>Detractio.</i>	191
<i>dium.</i>	126	<i>Deus.</i>	192
<i>Christi potentia & nomen.</i>		<i>Dei cognitio.</i>	194
128		<i>Dei benignitas, cura, & pro-</i>	
<i>Christum sequi.</i>	131	<i>uidencia.</i>	195
<i>Christum confiteri.</i>	132	<i>Dei potentia.</i>	197
<i>Cibus.</i>	133	<i>Dei dilectio, cultus & honor.</i>	
<i>Clementia.</i>	134	199	
<i>Cæmeterium.</i>	141	<i>Dei timor.</i>	201
<i>Cogitatio, contemplatio</i>	142	<i>Discendi cupiditas.</i>	ibid.
<i>Cognitio sui.</i>	144	<i>Discordia.</i>	203
<i>Colloquia.</i>	146	<i>Disputatio.</i>	204
<i>Compassio.</i>	147	<i>Diuinitio.</i>	205
<i>Concordia.</i>	148	<i>Diuitie.</i>	209
<i>Confessio peccatorum.</i>	150	<i>Diuitiarum contemptus.</i>	211
<i>Confessio fidei.</i>	152	<i>Docilitas.</i>	213
<i>Coniugium.</i>	154	<i>Doctrina.</i>	ibid.
<i>Conscientia bona.</i>	155	<i>Doctrina in pretio habita.</i>	
<i>Conscientia mala.</i>	157	215	
<i>Consilium, & Consiliarij.</i>	158	<i>Dolor.</i>	218
<i>Consolatio.</i>	160	<i>Dolus & fraus.</i>	219
<i>Consortium.</i>	163	<i>Dux bonus, prudens, strenuus.</i>	
<i>Constantia religiosa & pia.</i>		ibid.	
165		E.	
<i>Consuetudo.</i>	166	<i>Ebrietas.</i>	221
<i>Contumelia.</i>	168	<i>Ecclesia, eiusq; immunitas</i>	
<i>Conuitia.</i>	169	<i>& auctoritas.</i>	223
<i>Conuitia in auctorem retor-</i>		<i>Ecclesia bona.</i>	226
<i>ta.</i>	170	<i>ab Ecclesia arcere indignos.</i>	
<i>Conuiuium.</i>	173	227	
<i>Correptio.</i>	175	<i>Ecclesiastici honorandi.</i>	228
<i>Crudelitas. Tyrannis.</i>	177	<i>Educatio liberorum.</i>	229
<i>Crux. Crucifigi.</i>	179	<i>Electio.</i>	231
		<i>Eleemo-</i>	

INDEX.

Eleemosyna.	232
Eloquentia.	239
Episcopus.	240
Euangelium.	242
Eucharistia sacrificium & sa- cramentum.	244
Excommunicatio.	250
Exemplum.	252
Exprobratio.	255

F.

Facetè dicta.	257
Familia.	263
Festinatio.	ibid.
Festi dies.	264
Fides. Fidelitas erga Deum & homines.	265
Fiducia in Deum.	270
Finis.	271
Fœdus.	272
Fœnus & usura.	273
Forma, pulchritudo.	ibid.
Fortitudo animi.	274
Fortitudo bellica.	275
Fortuna.	277
Fuga.	280
Furtum.	281

G.

Garrulitas creffa.	283
Gloria.	284
Gloria vana contēptus.	286
Gloria caelestis.	289
Gratitudo.	293
Graviter dicta.	295
Gubernare.	296

H.

Hæresis, Hæretici.	297
Hæretici fugiendi.	298
Historia.	301
Homo.	302
Honor.	304

Honoris contemptus.	306
Hora canonica.	310
Hostis.	312
erga Hostes clementia.	ibid.
Humilitas.	314
Humilis sui aestimatio.	319
Hypocrisis.	322

I.

Iactantia.	324
Idola.	ibid.
Ieiunium.	325
Ignorantia.	328
Imperium.	329
Impietas.	331
Incontinentia.	ibid.
Infernus.	ibid.
Ingratitudo.	333
Inscitia.	335
Integritas vita.	336
Intemperantia.	337
Invidia.	338
Iocosè dicta.	340
Ira.	342
Irrisio.	343
Iudex. Iudicium.	344
Iudex corruptus.	347

Iudicium non temerè feren-
dum.

Iudicium Dei.	350
Iudicium extremum.	352
Iuramentum. Periuriū.	353
Iuriſprudentia.	355
Iustitia.	356

L.

Labor.	358
Laus.	360
Lectio.	362
Lex.	363
Liberalitas.	365
Liberè dicta.	367

Liber.

INDEX.

<i>Libertas.</i>	370
<i>Libido.</i>	371
<i>Libri.</i>	373
<i>Lis, & contentio.</i>	377
<i>Inusus.</i>	278
<i>Luxuria.</i>	ibid.

M.

<i>Magistratus.</i>	380
<i>Magnificencia.</i>	381
<i>Maledicentia.</i>	382
<i>Mandata Dei, eorumq; obser-</i>	
<i>uatio.</i>	383
<i>S. Maria mater Dei.</i>	384
<i>Maritus.</i>	390
<i>Martyrium.</i>	391
<i>Matrimonium.</i>	395
<i>Medicina.</i>	397
<i>Mediocritas.</i>	399
<i>Memoria.</i>	400
<i>Mercedis contemptus.</i>	401
<i>Miles. Militia.</i>	402
<i>Mina.</i>	403
<i>Miraculum.</i>	ibid.
<i>Misericordia.</i>	405
<i>Modestia.</i>	ibid.
<i>Monachus.</i>	406
<i>Morbus.</i>	408
<i>Mores.</i>	409
<i>Morio.</i>	411
<i>Mors, eiusq; memoria.</i>	ibid.
<i>Mortis contemptus.</i>	416
<i>Mors generosa.</i>	417
<i>Mors æquè ferenda.</i>	418
<i>Morientium monita, & di-</i>	
<i>cta.</i>	420
<i>Mortificatio.</i>	422
<i>Mulier, eiusq; fuga perutilis.</i>	
	423
<i>Mundus.</i>	425
<i>Munus, eiusq; contemptus.</i>	
	428

N.

<i>Natura.</i>	429
<i>Nobilitas.</i>	430
<i>Nominis impositio.</i>	431

O.

<i>Obedientia.</i>	433
<i>Ol murmuratio.</i>	435
<i>Obsequium.</i>	ibid.
<i>Occasio.</i>	436
<i>Oculorum custodia.</i>	437
<i>Opus.</i>	439
<i>Opera manu exercenda.</i>	440
<i>Oratio siue preces.</i>	441
<i>Oratio assidua.</i>	443
<i>Ordinis sacramentum.</i>	444
<i>Ornatus corporis.</i>	445
<i>Ostantatio.</i>	447
<i>Otium.</i>	448

P.

<i>Parentum amor.</i>	450
<i>Parentum de liberis cura.</i>	
	451.
<i>Par pari relatum.</i>	453
<i>Pasquillus.</i>	454
<i>Passio Christi.</i>	455
<i>Patientia iniuria.</i>	457
<i>Patientia doloris.</i>	460
<i>Patientia damni.</i>	461
<i>Patriæ amor.</i>	462
<i>Patriæ ingratitude.</i>	463
<i>Paupertas.</i>	464
<i>In Pauperes liberalitas &</i>	
<i>duritia.</i>	467
<i>Pax.</i>	472
<i>Peccatum.</i>	474
<i>Peccati recidiva.</i>	476
<i>Pecunia.</i>	

INDEX.

<i>Peculatus.</i>	477	<i>S.</i>	
<i>Pecunia.</i>	478		
<i>Pœnitentia.</i>	480	<i>Sabbatum.</i>	527
<i>Peregrinatio religiosa.</i>	484	<i>Sacramenta Ecclesiæ.</i>	528
<i>Perfidia.</i>	485	<i>Sacerdotium. Sacerdos.</i>	529
<i>Periculum.</i>	486	<i>Salutatio.</i>	531
<i>Periurium.</i>	ibid.	<i>Salus.</i>	532
<i>Perscuerantia.</i>	487	<i>Salutis neglectus.</i>	534
<i>Petitio honesta & inhonesta.</i>	489	<i>Sanctorum memoria, & in-</i>	
		<i>uocatio.</i>	535
<i>Philosophia.</i>	492	<i>Sanctorum reliquia.</i>	537
<i>Podagra.</i>	494	<i>Sanitas.</i>	ibid.
<i>Pœsis.</i>	ibid.	<i>Sapientia.</i>	538
<i>Pontifex Rom.</i>	496	<i>Satellitium Principum.</i>	539
<i>Populus.</i>	499	<i>Senectus. Senex.</i>	541
<i>Prædicatio.</i>	500	<i>Servitus.</i>	542
<i>Principis religio.</i>	502	<i>Simonia.</i>	543
<i>Principis fortitudo.</i>	503	<i>Simulatio, & dissimulatio.</i>	
<i>Principis præsentia.</i>	504		544
<i>Principis consilium.</i>	505	<i>Solitudo.</i>	545
<i>Principis vita.</i>	506	<i>Somnus.</i>	546
<i>Principis exemplum.</i>	507	<i>Somniorum interpretatio.</i>	
<i>Prosperitas.</i>	508		547
<i>Prudentia.</i>	510	<i>Superbia.</i>	548
<i>Pudicitia.</i>	511	<i>Superstitio.</i>	550
<i>Punitio.</i>	512		

T.

R.

<i>Ratio reddenda.</i>	514
<i>Regnum.</i>	515
<i>Religio ut virtus.</i>	517
<i>Religiosus status.</i>	518
<i>Religiosus habitus.</i>	520
<i>Reprehensio.</i>	ibid.
<i>Responsum maturum.</i>	522
<i>Responsum præcept.</i>	524
<i>Restitutio.</i>	525
<i>Risus.</i>	526
<i>Roma.</i>	ibid.

<i>Taciturnitas.</i>	551
<i>Talionis pœna.</i>	552
<i>Temperantia.</i>	553
<i>Templum.</i>	554
<i>Tempus.</i>	555
<i>Tentatio.</i>	556
<i>Timor.</i>	ibid.
<i>Timor Dei.</i>	558
<i>Trinitas.</i>	559

V.

<i>Venenum.</i>	560
<i>Verbum Dei.</i>	ibid.

INDEX.

<i>Veritas.</i>	561	<i>Virtus.</i>	574
<i>Vestium neglectus.</i>	563	<i>Vita huius perfectio.</i>	576
<i>Vestium usus & cultus.</i>	565	<i>Voluntas.</i>	ibid.
<i>Victoria à Deo.</i>	568	<i>Voluptas.</i>	578
<i>Victoria virtute paranda.</i>		<i>Votum.</i>	579
<i>ibidem.</i>		<i>Vulgus.</i>	ibid.
<i>Victoria incruenta.</i>	569	<i>Vxor morosa & mala.</i>	ibid.
<i>Vincere seipsum.</i>	570	<i>Z.</i>	
<i>Vindicta.</i>	571	<i>Zelus erga Deum & Eccle-</i>	
<i>Vindicta neglecta.</i>	572	<i>siam.</i>	581

ERRATA.

<i>Pagina.</i>	<i>linea.</i>	<i>mendum.</i>	<i>emendatio.</i>
12.	8.	confirmetur	conformetur
30.	ult.	&	ut
52.	ult.	præclai	præclari
66.	1.	nestarum	honestarum
77.	4.	donus	donum
221	5.	pæneque	pænæque
238.	18.	Quisquid	Quisquis
368.	17.	auferatur	auferantur
505.	26.	vilius	utilius
572	4.	partui	partu

— 11 —

B